





Meditationes









Pisa. A. IX. 13 (a)

dem
ti m
ego
mens
illum
Con
pecc
tē &

telli
con
abit
lum
getu
pec
qua
turp
div
Ab
vic
hal
me
me
the
ha
ca
do
pt
an
pi
pe
re
gi
ac
et
m
h
h

dem Parabolæ. In se autem reversus dixit: Quanti mercenarii, in domo Patris mei, abundant panibus, ego autem hic fame pereor: surgam & ibo ad Patrem meum. &c. Cum autem adhuc longè esset, vidit illum Pater ejus & Misericordiâ motus &.

Et Considera: his verbis exprimi initia conversionis, peccatoris ad DEUM, & DEI in peccatores pietatē & Misericordiā, quā ipsis subvenit, ut convertantur

Expende singula. imò. In se reversus, (intellige filius prodigus) dixit. Ut quis ad DEUM, convertatur, debet in se reverti. Per peccatum ita abit in regionē longinquam peccator, ut non solum à DEO, ejus gratiā, & domo Patris sui elongetur; sed etiam, ut à seipso abeat. Abit à seipso peccator, quia imaginem & similitudinem DEI, quam per Creationem accepit, sædat, amittit ac in turpissimi monstri transformat spectrum. O quam diversus, o quam dissimilis sibi; o quantum à se abit! Abit à seipso, per oblivionem sui ipsius, per oblivionem suæ salutis, bonorum quæ habuit, & quæ habere potuit. Abit à se ipso, quia rationis & mentis se inopem facit, pro modica vanitate, momentanea voluptate, permutando inestimabiles thesauros; & æterna gaudia; dum relicto Patre; adhæret civi regionis longinquæ, nimirum mundo, carni, & diabolo; dum filius magni regis, pascentes porcos suscipit, & qui in domo Patris voluptuosè vescabatur, qui nutriebatur in croceis, dum amplexatur stercora, filiquis ventrem implere cupit, & fame miserè perit. Qui ita à se ipso abiit peccator, si ad DEUM converti velit, debet in se ipsum reverti per cogitationem infelicis status sui, recogitando annos suos in amaritudine animæ suæ, debet advertere unde exciderit. Debet scire se infirmum esse, in se non esse sanitatem, se malè, imò pessimè habere; tandem; quod fame pereat. Nisi enim hac ratione in se reversus fuerit, de quaerendo malis suis remedio nunquam fructuosè cogitabit.

Exem Cam: Insulae Egeren

Expende 2dò Verba. Quanti Mercenarij in Domo Patris mei abundant panibus, & Considera Filio prodigo in seipsum reuerso, id ante omnia occurrere: quòd mercenarij in Domo Patris eius abundant panibus, ipse verò fame paret. Mercenarij sunt, qui DEO seruiunt ob spem mercedis qui laborant tanquam operarij conducti ex denario diurno. Hi in domo Patris cælestis antequam promissam recipiant mercedem, abundant panibus, abundant cælestibus consolationibus, fruuntur pace & tranquillitate conscientiæ. Non patitur illos DEUS fame premi, famemquè experiri. super pra hanc Patris sui in mercenarios liberalitatem dum se reflectit filius prodigus, in spem erigitur, cogitat fieri posse, ut fame non pereat, sed etiam ipse pane reficiatur & abundet. Dicit: Et quamdiu ergo fame conficior? quamdiu siliquas appetam? cum & ego non reficior pane, quo abundant mercenarij? non debeo seruire DEO ut mercenarius, sed ut filius; ex amore filiali ad DEUM ut Patrem reuerti me convenit. Interim quia non sum dignus recipi in filium, admittar saltem in mercenarium.

Expende 3tìò Verba illa: surgam & ibo ad Patrem meum. Surgam ex cænovitiis, ex volutabro porcorum, ex inveterata peccandi consuetudine, excutiam animi torporem, pondus illud iniquitatum mearum, quod me terræ, rebus vanis ac sensualibus affixit, abijciam, avellam, & abraham violenter à terra affectum & animum, atque hac ratione surgam, Ibo ad Patrem meum; Ibo per fidem, quia pius, misericors, & Pater est, Ibo per spem & fiduciam in Bonitate ipsius. Ibo per desiderium DEO adhærendi, eique serviendi, per desiderium, DEUM ut Patrem amandi; Ibo per veram pœnitentiam, per seriam vitæ emendationem; per aversionem meam à Creaturis, per conversionem ad DEUM. Ibo superatis difficultatibus, amotis impedimentis, ibo & meipsum vincam. Ibo à mundo, carne, & diabolo, quibus adhæsi. Ibo à por-

porcis, filiquis, vanitatibus, & Mundi illecebris, super his omnibus, tanquam cibo vilissimo nauseat anima mea. Ibo ad Patrem. trahit me pissime Pater, paterna tua in filios charitas & clementia. Hæc mihi spem facit, quod non rejiciat quia ad Patrem ibo, qui Pater Misericordiarum est, qui etiam; cum ego ab eo recesserim Pater esse, non desijt, qui Pater est, etiam tunc dum ego filius esse desij. Surgam & ibo. & quare non surgò? quare non eo? quare non venio? quousque differam & procrastinabo? Et quando tandem finis erit turpitudinis meæ? Ecce venio, jam exurgo Adjuva me Domine, erige super pedes meos, fac ut eam ut curram, ut ad te perveniam.

Expende 4to Cum adhuc longè esset vidit illum Pater ipsius & misericordiâ motus est. Hic est excessus Bonitatis & Misericordiæ Divinæ, in peccatores. Cum adhuc longè a Deo sumus, Pater Misericordiæ videt nos, benignissimo oculo respicit, sicut respexit Petrum, ut peccata nostra desileamus. Misericordiâ movetur, & sicut Pater miseretur filiorum. Ille nos excitat ut revertamur in nosmetipsos, ut surgamus, Ille auxiliante gratiâ sublevat, ut ad Ipsum veniamus super pedes nos statuit, ad se trahit, viam quâ debeamus redire Ipse ostendit, & ad se adducit. Hac optimi Patris bonitate accendere ô anima mea: velociter surgè & redi ad Patrem tuum, ne quæso metuas iram ejus, Pater est, tanquam Pater te redeuntem recipiet, dum adhuc longè es, antequam ipsi reconcilieris, jam te videt, jam super te misericordiâ movetur. Hoc ipsum, quod surgere, & ad Patrem ire velis, Ejus misericordiæ & gratiæ opus est; quantò magis cum ad ipsum redieris, intuebitur te tanquam filium, commovebuntur viscera, ejus, amplexabitur te, & deosculabitur.

PUNCTUM III. Audi ulteriora verba quæ se-

Et

quantur

quantur. *Dixit ei Filius: Pater peccavi in cælum & coram te, jam non sum dignus vocari filius tuus. Dixit autem Pater ad servos: Citò proferte stolam primam, & induite illum, date annulum in manu ejus, & calceamenta in pedibus ejus. Et ex his agnosce, quàm facilis sit reconciliatio filij prodigi cum Patre suo, facilis inquam sive ex parte Filij deprecantis culpam, & pænitentis, sive ex parte Patris, in gratiam recipientis Filium. Iterum expende singula.*

Ac imprimis expende verba: Dixit ei filius: Pater peccavi. Pater! quia Pater es, non potes non misereri. Quia Pater es, Major est misericordia tua, quàm iniquitas mea. Magna quidem hæc est non tamen talis, ut non consequar veniam. Pater peccavi, quia à te recessi, quia abij in regionem longinquam, quia luxuriosè vixi, quia dissipavi tuam & meam substantiam: quia adhæsi uni civium regionis longinquæ, quia aspernatus panem filiorum, quo etiam mercenarij in Domo tua abundant, ad filiquas me converti, illisque ventrem implere cupivi quia in cæno vitiorum diu jacui; quia volens feci me fame perire, quia serò nimis ad te ô Pater redeo. Hæc peccata, pænitens humiliter confiteor, & explicatius coram servis & Ministris Tuis, quibus paterni hujus fori judicium cōmisisti, confitebor adversum me omnem injustitiam meam. Peccavi in cælum, quia in te cæli Dominum, quia in Tuam Essentiam & Divinitatem, quia in omnes ac singulas sanctissimæ Trinitatis Personas. Peccavi in cælum, quia Iure hæreditario cæli me privavi, quia cælum terræ postposui, quia Sanctissimos cælites contristavi. Pater peccavi in cælum & coram Te, Non solum in Te, sed etiam Coram te peccavi ô Pater quia peccavi in oculis & in conspectu Tuo, peccavi te vidente, & aversante turpitudines meas; pecca-
vi

vi cūm mihi, per immensitatem præsens adesses: cūm mihi faceres magna, qui potens es, cūm me conservares, totque conferres beneficia, cūm stares ad ostium cordis & pulsares; atque me à peccato retraheres, cūm Tuam circa salutem animæ meæ exercereres providentiam. Ita peccando: quomodò non coram te peccavi Pater?

Expende 2dò Verba: jam non sum dignus vocari filius tuus. O detestanda peccata mea, quò me deduxistis? Per illa factus sum, non solū pastor, socius, sed etiam conviva porcorum: factus sum servus & mancipium infelicis civis regionis longinquæ, prodigus dissipator substantiæ mihi a Patre datæ, Et quā ratione tuus ero filius ò Pater? Indignus planè sum vocari filius tuus, qui pridem talis esse desij: qui factus sum filius iræ, filius perditionis, filius gehennæ. tam digni Patris quomodo ero dignus filius? Quæ participatio Iustitiæ cum iniquitate? quæ societas lucis ad tenebras? Detestor & execor peccata meā. doleo de illis propter tuam bonitatem DEUS, quia bonus: quia Pater optimus es; Tibi ab hinc adhærere volo: & cūm non sim dignus vocari filius tuus, & ad privilegia filiorum admitti, patere me, Sanctissime Pater, in Domo tua tanquam mercenarium, interim ego amabo te, honorabo te, ut Patrem, nullum tuum deinceps transgrediar mandatum, non ex metu pænæ, ut servus, neque ex spe mercedis, ut mercenarius; sed ex amore filiali, ut filius; quia amo te. quia DEUS meus & Pater meus es.

Expende 3tò Dixit autem Pater ad servos: Cito proferte stolam primam, & induite eum. O verè Pater qui tali pœnitentiâ, humili peccatorum confessione tam facilè placatur! Meruerat filius prodigus, ut contra ipsum iratus detonaret Pater, ut fulmina vibraret; nihil tale auditur à Patre. Amorem nonnisi loquitur; *Cito proferte stolam pri-*

mam. Executionem Paternæ benevolentiae serv-
fuis, hoc est ministris Ecclesiae demandat, stolâ pri-
mâ, seu primâ gratia, quam amiserat filius, jubet il-
lum vestiri, stolâ præstantissimâ, veste nuptiali, in
qua in Nuptijs Agni comparandum est. Citò il-
lam proferri jubet, ut & in beneficij præstiti cele-
ritate paternam exhibeat benevolentiam.

*Expende 4tò reliqua verba: Date annulum
in manu eius.* Non solum redeuntem peccatorem
recipit Pater cælestis in filium; sed etiam animam
ejus sibi desponsat: & in signum perpetuæ dilectio-
nis, quâ ipsum diligit, dat annulum, eoque illum si-
bi obligat, ut nullum alium amorem, nullumque
amatorem admittat. Angulus symbolum est æ-
ternitatis, hanc Pater dat in manum filij, ut de-
inceps pro felici labore æternitate, ut operetur
ea, quæ beata æternitate præmiari possunt. *Date
calceamenta in pedibus ejus.* Hæc est providentia
clementissimi Patris, ne via pænitiæ, via man-
datorum DEI, via crucis & mortificationis aspera
& ardua videatur. Pænitenti filio dat calceamenta,
hoc est gratijs suis munit filium, ne sua asperitate
via hæc, ipsum deterreat, ut aculeos viæ hujus
spinosa proterat, impedimenta & difficultates su-
peret, & inoffenso pede viam hanc decurrat. Ad-
mirare tantam Patris tui pietatem. In spem con-
sequendæ veniæ erigere. Personam filij prodigi
indutus, actus ejusdem pænitentis elice: & seriam
age pænitentiam, affectumque illum habe dein-
ceps familiarem. *Pater peccavi in Calum & co-
ram te.*

Colloquium. Pater Misericordiarum, qui re-
deuntes ad te filios prodigos benignissime recipis,
nec quenquam illorum qui animo contrito ad Te
revertuntur rejcis, imò ut redeant illos oculis tuæ
pietatis respicis, gratiâ tua, ut resurgant, adjuvas, &
ad Te potenti attrahis virtute. Recipe me qui in

ter filios prodigos, maximè sum prodigus, dum adhuc sum longè a Te respice me. Misericordissimè, jacentem erige, ut ex peccatis meis aliquando plenè confuggam, misertus mei trahe me ad Te. Durum cor meum contere, ut in spiritu humilitatis & in animo contrito, suscipiar à te Domine, Stulam primam hoc est gratiam tuam Sanctificantem, fac mihi restitui, in tuo amore me confirma: ac denique pedes meos præpara ad ingrediendum viam asperam pænitentiae, viam crucis & mortificationis, quam decurrendo; ad Te feliciter perveniam.

In fine Pater noster

Meditatio II.

De Morte

Præludium 1. Imaginare te ex gravi morbo in lecto decumbentem, in extremis constitutum, à medicis derelictum, illud à Confessario tuo audire. *Morieris tu & non vivas, dispone demuitue.*

Præludium 2. Pete gratiam ut vivacem mortis tuæ habeas apprehensionem, ex eaque spiritualia quàm plurima referas commoda, & discas tempestivè disponere te & præparare ad mortem.

PUNCTUM 1. Audi illa verba Psalm. 18. *Et vos sicut homines moriemini.* Et Considera unicuique nostrum moriendum, sicut homines moriuntur: hoc est simili morte, morti aliorum hominum, seu morte tali, cui illæ conditiones & proprietates conveniant, quæ conveniunt mortibus aliorum hominum. Porro conditiones & proprietates mortis, communes sunt. *Ima* Necessitas moriendi, quæ tanta est, ut ab hac moriendi lege, nul-

Ius quantumvis Sanctus, quantumvis fortis & potens: sapiens & dives sit exemptus, ita ut nihil certius sit hac veritate, quod moriendum sit. Quis fuit sanctior Christo Domino, Marte ejus sanctissimâ, S. Ioanne Baptista, Sanctis Patriarchis, Prophetis, Apostolis, aliisque Sanctis? qui tamen mortui sunt: vel si aliqui necdum mortui sunt, tamen & illis moriendum est. Quis fortior & potentior Abrahamo, Samfone, Davide, Alexandro Magno, & tot alijs Heroibus? & tamen, etiam hos omnes mors devicit & superavit. Quis sapientior Sapientiâ incarnatâ, Rege Salomone, Philosophis illis Ethnicis, orbis Sapientibus, sanctis Ecclesiæ Doctoribus? qui tamen non evitaverunt mortis insidias. Quis ditior Salomone, tot Imperatoribus, Regibus, Principibus? qui tamen nullo pretio moriendinecessitatem redimere poterant. Necessitas hæc moriendi oritur tam ex Lege & decreto Divino, quo Deus ex altissimo suo consilio constituit, ut omnes moriamur, juxta illud Apostoli: *Statutum est omnibus hominibz semel mori*, tū ex peccato, cui præter Christum & Beatissimam, omnes subjecti sumus: peccati etiam pæna & stipendium mors est; tum ex ipsa natura hominis constituti corpore obnoxio multis alterationibus, morbis, vulneribus & similibus.

2da *Conditio* & proprietas mortis est incertitudo ejusdem quoad tempus, locum, & modum. Nemo enim nostrum scit quâ ætate, quo anno, mense, die, horâ sit moriturus: cum mors rapiat singulis annis, singulis diebus, horis, imò singulis momentis. Est etiam eadem mors incerta quoad locum. Mors enim ubique exspectat, ubique insidiatur, ubique homines perimit. Abel in agro mortuus est, Saul & Ionathas in montibus, Heli ex Sella decedens, Iacob & Ioseph in Ægypto, Moyses, Aaron in deserto, Iosue & Caleb in terra promissæ.

promissionis. Incerta adhuc mors est quoad modum; idque sive per modum hunc intelligatur genus mortis: non enim omnes; eodem mortis genere moriuntur: quidam moriuntur morte violentâ, alij morte naturali: quidam moriuntur morte secutâ ex longiori morbo, alij morte subitaneâ, aliqui moriuntur in amentia, usu sensuum destituti, alij moriuntur sibi (ut dicitur) præsentes, rationis compotes, & utentes sensibus: Sive etiam per modum mortis intelligatur status interior animæ: quod adhuc modum mors incerta est, quia incertum est, in quo statu animæ, unumquemque nostrum mors inveniet. Non potest tibi constare, qui hæc meditaris, an mors te paratum, & in gratia DEI inveniet? an sis habiturus gratiam finalem? an habebis copiam Confessarij? an moriturus sis omnibus Sacramentis instructus? an inter amplexus Christi Crucifixi? an inter oscula imaginis Matris Beatissimæ? An ultimus tuus actus futurus sit actus supernaturalis, ferventis Charitatis & Amoris DEI? An ultimæ voces Sanctissima JESU & MARIÆ nomina? Tandem incertum est, arbor hæc à morte succisa, in quam partem cadet, an ad Austrum an ad Aquilonem?

3^{tia} Proprietas & Conditio mortis est: quod mors sit ultima linea rerum hoc est; finis & terminus vitæ, viæ, & peregrinationis tuæ, status meriti & demeriti. Est terminus vitæ, a qua non datur regressus ad vitam nisi in communi resurrectione mortuorum. Est terminus viæ, quia dum vivis, viatorem agis. Vixisti benè? cucurristi viam Mandatorum DEI, ambulasti semitam Iustorum. Vixisti malè? ambulasti vias difficiles, lassatus es in via iniquitatis: ivisti viâ latâ & spatio-sâ, quæ ducit ad interitum. Moreris? viæ attingis terminum, mors tua est ultimus viæ tuæ terminus. Est etiam mors ultimus terminus status

meriti & demeriti, ab hoc enim momento, quo, moreris, tempus non erit amplius, nihil abhinc mereri, nihil pro salute animæ tuæ agere poteris. Finis hic & terminus vitæ, viæ, statûsqûe meriti & demeriti, talis est futurus, qualis fuit vita. Vixisti Sanctè, morieris morte Sanctorum, in peccatis vixisti, in peccatis & sceleribus morieris; Talem enim mortem unicuique promittit S. Paulus 2. ad Corint. 11. *Quorum finis erit secundum opera ipsorum.* Ambulasti viam arctam, intrabis per angustam portam, quæ ducit ad vitam, ambulasti viam spatiosam, intrabis per portam latam, per ostium illud dilatatum, de quo scriptura: Dilatavit infernus os suum absque termino. Neque enim (ut ait S. Chrysostomus) *Potest quis pervenire ad Patriam, nisi ambulaverit in via.* Licet verò aliquando homines in vita sua scelerati & improbissimi vitam aliquando in vera pænitentia finiverint, licet latro bonus in morte, patentes sibi paradisi portas invenerit, hoc in exemplum trahi non debet; id enim ita rarè & extraordinariè factum est ut S. Hieronymus audeat dicere. *Vix de centum millibus hominum, quorum mala fuit semper vita, meretur habere à DEO indulgentiam unus.*

4ta tandem mortis proprietas est; quod sit Principium alterius vitæ, & ingressus domûs æternitatis. In Beatis mors est principium vitæ felicissimæ, nullis miserijs, nullis doloribus obnoxia, in reprobris mors est principium vitæ infelicissimæ, vitæ illius; in qua homines quærent mortem, & non invenient, vitæ quæ erit ipsa mors secunda.

Ex hac Mortis suarumque proprietatum consideratione erue sequentia dictamina practica, 1mo Stultum esse timeri mortem quæ evitari non potest. 2do. Cùm hora & tempus mortis incerta sint, omni tempore te ad mortem paratum

esse

omnem quoque tuam actionem, præcipuè ve-
 omnem Confessionem sacramentalem & om-
 nem sacram Communionem debere te ita pera-
 gere; atque si immediatè moriendum esset. 3^{to}
 Cum locus mortis incertus sit, nulli loco te affici
 debere, sed ad omnem oportere te esse indifferen-
 tem. 4^{to} Cum nescias quis sit futurus animæ tuæ
 status, & quæ dispositio? nunc dispositionem
 ad mortem inchoandum esse, curandumque tibi
 esse, ut semper Deo vivas, ut non sis tibi conscius
 peccati gravis, ut sis in gratia Divina. optima e-
 nim ad mortem dispositio est vita christianè &
 Sanctè instituta. Qui animæ tuæ status in vita
 fuerit, idem erit & in morte. Cum S. Augus-
 tinus asseveret neminem se vidisse male mortuum,
 qui benè vixerit. 5^{to} Cum mors sit ultima re-
 rum linea, debere te instantè nunc operari, meri-
 ta cumulare, nullam merendi occasionem præter-
 mittere.

6^{to} Tandem Cum mors in bonis, sit vitæ
 mellioris principium, ad illam te debere aspirare
 cum Apostolo: *Quis meliberabit de corpora mortis
 hujus? Cupio dissolvi & esse cum Christo.*

Reflecte te supra singula hæc dictamina, quo-
 modo te illis regulaveris, & regulare deinceps de-
 beas, elice affectus materiæ huic servientes, resigna-
 tionis in DEI voluntatem, circa mortis tuæ tem-
 pus, locum & modum. desiderij Sanctæ mortis,
 Doloris, &c. Postremò Christo agonizanti com-
 menda agonem tuum, & postula ut ille suum ti-
 bi spiritum inspiret, quo anima tua vivificata, Ipsi
 per tuum reddatur agonem.

PUNCTUM II. Audi verba illa Psal. 34. *Mors
 peccatorum pessima.* Audi item Rationem, quam
 hujus ipsius reddit S. Bernardus Epist. 105. *Mala
 siquidem est in Mundi amissione, pejor in carnis se-
 paratione, pessima in vermis ignisque duplici contri-*
tiona

zione. Et expende singula, atque.

*Considera imò Mortem peccatorum malam esse in amissione mundi. Peccatores dum vivunt, cum magno amore possident divitias, amplas possessiones modis indebitis acquirunt, congregant aurum, argentum, pecunias, thesauros maximos, & bona fortunæ coacervant, summo studio quærunt honores, famam, nominis celebritatem, dumque talia assequuntur, in his sibi cōplacent, talibus delectantur, ac in ipsis, maximam suam reponunt felicitatem. Quare dum deinde, hæc per mortem amittunt, idque amittunt irremparabiliter, jacturā hanc gravissimè ferunt, & ingenti hinc afficiuntur dolore. Siquidem ut ait S. Augustinus: non Sine dolore amittitur, quod, cum amore possidetur. Peccatores ut lucrentur mundum, æquo animo detrimentum suæ salutis subeunt: quanto igitur dolore cruciabuntur? si animæ suæ detrimentum passi, etiam mundum amittere cogentur. Tandem peccatores sperant pollicenturque sibi, quòd longo tempore divitijs a se collectis, fortunā & mundo fruuntur, illud Epulonis Evangelici ingeminantes. *Anima mea epulare, ede, bibe, habes multa bona in annos plurimos reposita.* Quantum igitur in morte torquebuntur, dum advertent hæc omnia sibi eripi: in aliorum, idque frequenter in illas manus, in quas nollent devenire, brevī deventura.*

2dò expende illud. *Mors peccatorum pejor in carnis separatione.* Peccatoribus nihil dulcius, nihil amabilius, vitā hac corporali, de vita alia non cogitant, ad illam non aspirant, sed in votis unicè habent, ut anima illorum nexu indissolubili, corpori semper sit conjuncta, in morte autem videbunt hanc se vitā spoliari, nexum illum dissolvi, animam à corpore separari, idque à corpore illo, quod tot Dei offensarum, & æternæ damnationis causa sibi existit; ab illo corpore: cui, tantum indulge-

dulgebant, cui nullas voluptates negabant, cujus concupiscentiis appetitibus & inclinationibus in omnibus obsequebantur. Videbunt ulterius per hanc separationem, omnes voluptates finem accepturas, videbunt corpus brevè corrumpendum & in pulverem dissolvendum: animam vero infelicem à dæmonibus violenter rapi & in infernum trahi. Quantà igitur amaritudine replebitur peccator? cū quanto gemitu & ejulatu exclamabit miser? ficcine separas amara mors? O mors; quam amara est memoria tui!

31^o Expende verba illa: *Mors peccatorum pessima, in vermis, ignisque duplici contritione.* Vermis Conscientiæ gravissimè in vita torquet peccatorem; sed incomparabiliter gravius torquet eundem in morte. In vita, taliter eum torquet ut spes saltem, vermis hujus enecandi, illum solari possit: existimat enim peccator, per pæniteentiàm quam se aliquando facturum proponit, vermem hunc se exstincturum. In morte verò siquidem peccator videbit jam se extra omnem spem salutis constitutum esse; faciliè advertet quod vermis ille semper sit ipsum cruciaturus. Cogitabit miser & dicet, Ego quidem morior; sed vermis conscientiæ, qui me torquet, non morietur in æternum. Nulla arbor sic à verme roditur, & in pulverem conteritur, atque vermis conscientiæ rodet & conteret peccatorem. Ignis etiam infernalis; quem sibi paratum esse moriens peccator intuebitur & in quem à malignis trahetur spiritibus, conteret eundem; mortemque ipsius pessimam & infelicissimam reddet. Hunc ignem recogitans, dolore plenus ululabit miser: Quis poterit habitare cum igne devorante & ardoribus sempiternis? respondebitque sibi: in histibi habitandum est in æternum.

Ex horum consideratione; hæc dictamina erue. Imò. Cū per mortem amissurus sis mundum,
velis

velis nolis: An non ultroneè tempestivè sit dimit-
tendus? Felix es si hunc amore Christi contem-
pisti & reliquisti; si vivendo in Religione; intra
hanc non quæris mundum: hoc est, si non quæris
vanitates, honores, plausus, officia speciosa, exqui-
sita commoda &c. Confide in Bonitate Divina
non fore tibi mortem tuam gravem ex mundi
amissione. Quòd, *1^o* in mundo vivis, nec hoc vi-
tæ genus: fas est tibi relinquere, age ut vivens in
mundo, non sis de hoc mundo; ut affectu non ad-
hæreas ad ea quæ mundi sunt, ut non inhies divi-
tijs aggregandis; quærendis honoribus, nè hæc ti-
bi mortem tuam, malam reddant & amaram. *2^{do}*
non indulgendum esse carni, sed potius eam esse
affligendam; mortificandam, tanquam hostem
persequendam, commoditates illi negandas, bel-
lum continuum gerendum; adversus eius concu-
piscencias; ita enim fiet; ut mors quæ gravis solet
esse malis, ex carnis separatione; tibi non sit futu-
ra gravis. *3^{io}* Custodiendam tibi esse consci-
entiæ puritatem; nullum committendum pecca-
tum; de commissis pœnitentiam seriam, tempesti-
vè faciendam; ne in morte conscientia te arguat
de peccato, maximè gravi: ne vermis non mori-
turus te conterat; ne item ignis infernalis in te in-
veniat, quod totâ exurat æternitate.

Reflecte te deinde si nunc tibi moriendum
esset; qualis mors tua foret; an non esset mala in
mundi amissione, an non peior in carnis separa-
tione; an non pessima in vermis & ignis duplici
contritione? Exhorresce ralem mortem, fac pro-
posita, elice affectus materiæ accomodatos.

PUNCTUM III. Audi illa verba Psal. 118.
Pretiosa in conspectu Domini mors Sanctorum ejus
Audi item verba Melliflui Doctoris D. Bernardi.
hunc locum explicantis sermone in transitu S. Mala-
chiæ. *Pretiosa mors Sanctorum, tanquam firis labo-*

rum, tanquam victoria Consummatio, tanquam vita aeterna, & perfecta securitatis ingressus. Expende iterum singula, & imprimis expende & considera, Pretiosam esse mortem Sanctorum; ex eo, quòd sit finis laborum. hoc est, quod sit finis omnium ærumnarum, omnium dolorum, omnium gemituum. In morte enim sperat homo iustus brevi se eò perventurum ubi neque luctus, neque clamor, neque labor, neque dolor erit ultra. Mors sanctorum erit laborum finis, sed simul merces eorundem, idque merces magna nimis, merces non alia nisi per quam possidebitur DEUS. O quanto iusti in morte superabundabunt gaudio? dum intelligent se non in vanum laborasse, non recepisse se mercedem in vita sua, sed illam sibi reservari reddendam in altera vita, consecuturos se finem, in quem suis Actionibus & laboribus collimabant.

Expende 2dò. illud: *Pretiosa mors Sanctorum tanquam victoria consummatio.* Iusti cum viverent, præliabantur bella Domini, adversus mundum, carnem, & Diabolum, insensissimos DEI & hominum hostes. Militia fuit vita eorum super terram. Decertabant incerti quo eventu pugna ipsorum esset terminanda. Inter spem & metum toto vitæ tempore fluctuabant; In spem victoriæ erigebat ipsos Christus Dux eorundem, erigebant tot Sanctorum exempla, qui de hostibus triumpharunt, Auxiliorum Divinæ gratiæ abundantia &c. Metu percellebat illos propriæ fragilitatis Conscientia, Hostilium insultuum seutationum assiduitas & vehementia. &c. In morte constituti vident se victores exstitisse, vident & pugnam & victoriam suam consummatam esse, vident parari sibi victrices palmas, triumphales coronas, & palmas strenui sui certaminis. Quantum igitur lætitiæ, quantum gaudij inde percipiunt? Nunquam sic exultant victores captâ prædâ, dum dividunt spolia,

spolia, quantum Sancti exultabunt in morte, de obtenta & consummata sua victoria.

Expende 3^{ti}o Pretiosa mors Sanctorum, tanquam vita Janua & perfecta securitatis ingressus. Justus cum viveret suspirabat sæpius, ut portæ, cælestis Ierusalem sibi paterent. In morte videt has portas sibi patere, videt cum Stephano cælos apertos, videt Jesum stantem, Matrem ejus Sanctissimam, aliosque Cælites invitantes; videt mortem suam vitæ alterius, ejusque summæ felicitis, & æternæ, esse sibi januam. Videt se omnibus periculis quibus hic jactabatur eripi, suis omnibus salvis & integris, salvis meritorum & bonorum suorum operum, gratiæque Divinæ thesauris: quibus infernales prædones spoliare ipsum volentes; insidiabantur, in securissimo portu constitui. Est igitur Justo, mors dulcis, mors pretiosa, tanquam vitæ janua, & perfectæ securitatis ingressus,

His expensis, gratulare in animo, mortem tam felicem, tam pretiosam Sanctis & electis DEI. Talem tibi exopta; & ut consequaris, vivere stude secundum Sanctorum exempla.

In Colloquio postula à Christo & Sanctissima DEI Parente, ut Ipsorum meritis vita hæc tua quâ inter mortales vivis, sit vita Sanctorum, ut sit pretiosa propter labores pro DEO & DEI gloria susceptos; sit pretiosa propter fortem adversus animæ tuæ hostes; & victricem semper pugnam: sit pretiosa propter constantem tuum pervias vitæ cursum. Post vitam verò hanc mortalem ut obtingat tibi mors Sanctorum, quæ sit pretiosa, tanquam finis & merces laborum, tanquam victoriæ consummatio, tanquam vitæ janua, & perfectæ securitatis ingressus. Et ut non aliter januam vitæ illius beatæ ingrediaris nisi deducantibus te Sanctissimis his Ducibus IESU & MARIA.

In fine Pater noster, Ave Maria

MEDI-

Meditatio III. De Judicio Particulari.

Preludium 1. Imaginare te esse villicum iniquitatis, & constitui ante Christum Judicem, ut reddas rationem villicationis tuæ, jamque tibi declarari, quod amplius non poteris villicare.

Preludium 2. Postula gratiā, ut intelligas quanto rigore, in Judicio particulari, tuarum actionum exigetur à te ratio, & ut in vita tua Christum Judicem pro hora vel momento particularis tui judicij placatum tibi reddere possis.

PUNCTUM I. Audi verba illa Ecclesiast. 11. *In fine hominis denudatio operum ejus.* Et revoca tibi in memoriam id, quod fides & Sancti Patres docent, quod anima cujusvis hominis, immediate post obitum, sistenda sit tribunali supremi simulque justissimi Judicis, ab eoque sit judicanda. Cujus judicij formam quod melius cognoscas.

Considera Coram illo Tribunali denudanda & manifestanda omnia opera hominis, quæcunque homo à primo rationis usu, ad ultimum halitum fecit, sive benè sive malè, omnia hæc clarissimè patebunt, & uno intuitu conspicientur. Denudabuntur opera occultissima, quorum neminem in hac vita consciū esse voluimus, quæ ut tegeremus rubor nobis & verecundia persvaserat. Denudabuntur illa, quæ velabantur aliquâ externâ specie pietatis, virtutis &c. decident velamina excusationum, quibus aliqua opera nostra involvebamus, sive in confessionibus, sive coram illis, quorum jurisdictioni subjecti aliquâ ratione fuimus, sive etiam apud nosmetipsos. Idque denudabuntur non solum verba, non solum opera, sed etiam secretissimæ cogitationes, & actus interni voluntatis. Revelabitur &

manifestabitur non solum id, quod fecimus, sed etiam quod omisimus, quod negleximus. Denudabuntur etiam ea, quæ bene egimus, & patebit, quo fervore, quâ intentione, unum quodque opus bonum egerimus; patebit quam intentionem in nostris actionibus habuerimus? quem finem per eas intenderimus? an maiorem DEI gloriam, nostramque salutem & perfectionem, an certè vanitatem, inanem gloriam, aut aliquem respectum humanum;

Porro hæc denudabuntur omnia imò. Coram oculis ipsius Judicis, non quia hos oculos aliquando latebant, sed quia latere putabantur, tunc autem anima iudicanda, clarissimè cognoscet, in omnibus se deprehensam esse, omnia sua opera optimè nota, ac perspecta fuisse suo Judici. O quanta tunc erit confusio animæ peccatricis? agnoscere, quod suæ tantæ sceleratates, oculum supremi Judicis non latuerint. Denudabuntur adhuc, eò etiam sensu omnia opera hominis, coram eodem Iudice, quia etsi DEUS viderit illa ante, non vidit tamen illa tanquam Iudex, non vidit taliter, ut de illis, & peccatore, ultimam suam ferret sententiam; non vidit eo finè ut illa præmiaret, vel puniret, præmio vel pænâ, quâ merentur; sed vidit, ut mala opera nostra misericorditer remitteret, vidit, ut nos ad penitentiam provocaret. In fine autem, hoc est: in morte hominis, DEUS Iudicem aget, ut Iudex nostra opera inspiciet, cum antea misericordissimum Patrem ageret, fueritque paratus nostra remittere peccata, nobis ad se in toto corde conver-

sis. *Idò* Eadem opera hominis, in illo Iudicio, denudabuntur coram oculis ipsius animæ, quæ iudicabitur; tunc enim hæc in momento separationis suæ à corpore, clarè cognoscet omnes suos actus, omnes ipsi in uno instanti repræsentabuntur, quid quovis tempore cogitaverit, dixerit, fecerit?

In-

Intelliget perspicacissimè quomodò usa sit medijs salutis suæ, auxilijs gratiæ Divinæ, sensibus, potentijs, talentis suis, ad salutem & perfectionem consequendam. Nescivit anima, dum in corpore esset, an amore, an odio digna fuerit? an peccata sua fuerint sibi dimissa, an sufficientem de ipsis pœnitentiam egerit? De plerisque suis peccatis fuit dubia, an attigerint gravitatem culpæ lethalis? an commissa sint cum plena deliberatione? sciet tunc dignitatem vel indignitatem suam. Omnia sua dubia clarè dissolventur. Denudabuntur opera hominis coram proprijs animæ oculis; tunc enim opera illa, quæ apud se & corâ alijs excusabat, apparebunt ipsi talia, qualia in seipsis, & coram oculis Dei fuerunt. Tandem coram oculis animæ denudabuntur opera ejus, quia tunc anima longè aliud judicium formabit de rebus omnibus, quàm judicaverit ante, suæque priora judicia & dictamina fuisse mala, & perversa, fuisse insanias falsas, vanitates vanitatum, & magnas stultitias cognoscet.

3^{to} denudabuntur eadem opera hominis coram severi Judicis Assessoribus, scilicet corâ tot Cœlitibus & Beatis Spiritibus, coram S. Angelo Custode, qui miseræ animæ peccatrici exprobrabit suorum instinctuum & monitionum contemptum, tot suas irreverentiâs, tantas ingratitudines, pro impensis circa eam obsequijs &c.

4^{to} Tandem denudabuntur opera hominis coram ipsis Dæmonibus, qui peccatori tunc vel maximè insultabunt, accusabunt eundem, & damnationis sententiam à Judice exposcent.

His consideratis, reflecte te, quomodò tunc fereris conspectum supremi Judicis; quanta tua erit confusio audire tunc exprobrationem S. Angeli tui Custodis, S. Patroni nominis tui, Fundatoris Religionis, si Religiosus es, aliorumque Cœlitum; quâ graves tibi erunt insultationes hostium animæ tuæ

Ex eadem consideratione, erue hæc dictaminâ practica 1^{mo} Debere te, in omni actione tua, præ oculis habere DEUM, quæ aliquando experturus es severum Judicem. Debere te, meminisse, quòd DEUS omnes tuas actiones spectet, omnes semitas observet, vestigia pedum tuorum consideret, & gressus dinumeret, quòd (ut loquitur S. Augustinus) ipse erit Judex causæ tuæ, qui modò est testis vitæ tuæ.

2^{do} Nè ad tuâ confusionē denudentur corā DEO Judice opera tua, debere nunc te ipsum per humilem, integram, & sinceram Confessionem, superato quovis pudore & verecundiâ, denudare hæc ipsa opera coram Sacerdote, Christi locum tenente. 3^{to} Ita tibi nunc vivendum esse, ut non sit de quo tanto opere confundi te oporteat in illa operū denudatione.

4^{to} Debere te nunc talia de rebus formare judicia, qualia formaturus es, in terribili illo judicio. 5^{to} S. Angeli Custodis instinctibus monitionibusq; internis obtemperandum esse, ipsique in omni loco, in omni angulo, maximam reverentiam exhibendam.

Fac proposita, elice affectus confusionis, de tot tuis malis operibus, doloris, deprecationis, desiderij, perfectæ emendationis. Tandem postula à Matre Beatissima, ut illa suo contegat pallio nuditatem tuam, ut tibi, tanquam filio prodigò impetret primam stolam, quâ vestitus; coram illo tribunali securus, & sine metu confusionis, ex denudatione operum tuorum compareas.

PUNCTUM II. Audi illa verba DEI Judicis apud Psalmistam dicentis Psal. 74, *Cum accepero tempus, Ego justitias judicabo* Et considera, in particulari hominis judicio, post denudationem & manifestationem operum ejus, hæc ipsa opera, à justissimo Judice, discutienda, examinanda & rigidissime judicanda esse. Porro non aliter Judex ad causâ dijudicandâ accedet, nisi, accepto prius tēpore; *Cum accepero tēpus, Ego justitias judicabo*, hoc est quādo non erit amplius

erit aplius tēpus merendi, tēpus pænitiendi, quando transibit tempus miserendi, quando jam nobis nec intercessio Sanctorum proderit, nec ullæ nostræ supplicationes exaudientur: quando nullis lacrymis, nullis gemitibus, nullâ pænientiâ, Judex flecti poterit. Post hoc tempus acceptum, quando homo jam erit in limine æternitatis, Christus, Judicis personam assumet.

Ut verò melius intelligas rigorem & severitatem illius Judicij, noveris, quia ipsas etiam justitias judicabit. O quantas in his injustitias & imperfectiones inveniet? imo judicabit justitias non quod tales in se fuerint, sed quod pro talibus à nobis habitæ fuerint: sæpe enim (ut ait S. Augustinus) in oculis Judicis DEI sordet, quod fulget in conspectu operantis. O quanta tunc judicij Divini à nostris judicijs diversitas apparebit? judicamus frequenter esse nos justos, & Deus arguet nos de peccato. Fortasse (ut dicit idem Augustinus,) dum te putas agnum, DEVS probabit te esse hircum. Unde exclamat ulterius: Væ etiam laudabili vita hominum, si remota misericordiâ, discutias eam.

2da Judicabit Judex ille supremus justitias etiam hoc sensu: quia judicabit illas actiones, quarum natura ipsa exigit, ut sint justitiæ, ut sint sanctæ, ut ordinentur ad DEI gloriam & animæ salutem. Quales actiones sunt confessiones & communioniones sacramentales, piæ preces, meditationes rerum spiritualium, examina conscientiæ, opera misericordiæ, aliæque his similes actiones. Has omnes examinabit DEUS Judex; an non fuerint sacrilegæ? quâ perfectione factæ sunt? quâ dispositione & animi applicatione? quâ intentione? quo fine & respectu? quo item fructu? scrutabiturque Jerusalem in lucernis, hoc est: minimos defectus, tantò magis palmares imperfectiones, tepiditates, tædia, quæsitæ distractiones investigabit.

Judicabit 3^{to} iustitias veras. Quod si autem has iudicabit, tanto magis iustitias fictas & simulatas, quæ extrinsecus patent, intrinsecus verò sunt veræ impietates. Quod si Iudex ille iudicabit iustitias, subiungit S. Bernardus. *Quid injurias? quid contumelias; quid blasphemias; quid scandala & tot aperta scelera.*

Hæc considerans, reflecte te; quæ & quanta DEUS Iudex in te iudicaturus & condemnaturus est? Reflecte te supra tuas iustitias, supra pia opera tua, an non sint vitiosa studio vanitatis? respectibus humanis? alijsque imperfectionibus? Reflecte te, supra tuas confessiones, absque prævia conscientiae discussione, sine serio dolore & emendationis proposito, & fortè cum non requisita integritate factas, supra Communiones tepidè & nonnisi ex consuetudine peractas, & agnosce iustitias has rigidè à Christo iudicandas. Reflecte deinde te, supra aperta tua vitia, scandala à te data, supra conversationes tuas, supra legum tam Divinarum, quam humanarum transgressionem. Omnia hæc, copiosa materia iudicij Divini est futura.

Quod si nolis de his à DEO Iudice iudicari, ipse te nunc iudica, tuo te condemna iudicio, condemna tuas imperfectiones & nequitias, de his te accusa, ea in te vindica. Hoc medium, effugendi iudicij Divini proponit S. Paulus Apostolus: *Si nos ipsos iudicaremus non utique iudicaremur à Domino.* Vel certè contra te ipsum actoris & accusatoris personam assume, & coram Sacerdote, Christi Vicario, te accusa, & ipsius iudicio ac sententiæ humiliter subijce, ab hoc absolutus, iudicium illud ne formides. Quidquid hîc solum fuerit, erit solum & in Cælis. Cave etiam ne facilis sis iudicandis & malè interpretandis aliorum actibus, Christo ipso monente: *Nolite iudicare & non iudicabimini nolite condemnare & non condemnabimini*

Elice

Elice affectus, confusionis, aliosque materiæ accommodatos: fac etiam proposita particularia. Ad extremum, humilia te coram Iudice tuo, ab eoque supplex postula, Non intres in iudicium cum servo tuo Domine, quia non justificabitur in conspectu tuo, omnis vivens.

PUNCTUM III. Audi Ecclesiasticum Cap. 11 dicentem *Facile est coram DEO, in die obitus retribuere cuique secundum vias suas.* Et considera, in particulari iudicio, quod sit in die obitus, seu in morte cujusque hominis, post manifestationem & denudationem omnium operum, post rigidum eorundem examen & discussionem, ex nunc ferendam esse ultimam sententiam & decretum, post quod latum, intra idem momentum perfecta ejusdem sequetur executio. Nullæ tunc erunt difficultates in formando decreto; quia infinitæ Iudicis sapientiæ nulla astutia & versutia fucum facere poterit, quominus totam causam plenissimè cognoscat, & perspectam habeat, adeoque, ut aliquā dilatione opus sit, propter meliorem causæ cognitionem. Præterea nulla tunc remedia juris locum habebunt, nullæ etiam preces, nulla patrocinia evincere poterunt, ut sententiæ pronuntiatio differatur. Non erit etiam ulla difficultas in executione decreti, quia à supremo Iudice ejusque sententia, nulla restabit provocatio, nulla appellatio.

Porro Decreti executio, fiet per retributionem cuique secundum vias suas. Iusti tunc præmiabuntur, impij punientur. Qui ambulaverunt vias vitæ, ibunt in vitam æternam, qui ambulaverunt vias mortis, lassati sunt in via iniquitatis, ibunt in supplicium æternum, ubi mors depascet eos. Anima quæ progredietur speciosis pedibus tota pulchra & sine macula, à Sponso cælesti, ad præmia æterna evocabitur. Quæ verò inquinatis & lutosiis pedibus apparebit coram illo Iudice, & quibus aliquid de

luto & imperfectionum pulveribus adhæsit, Anima quæ ita est munda tota, ut tamen indigeat ut pedes lavet: hæc in purgatorio prius purgabitur, siquidem nihil coinquinatum intrabit in regnum cœlorum.

Hic consideratis, intuere mentis oculo, & observa vultum & affectus tam animæ in cœlum euntis, quàm animæ ad purgatorium relegatæ, quàm etiam animæ ad pœnas, & supplicia æterna damnatæ. simulque te reflecte, cujus animæ sortem exoptes. Nec dubium est, quòd omnibus votis & desiderijs suspires, ut inter Sanctos & Beatos fors tua obveniat. Hoc ut assequaris, noveris; sortem hanc retributionem esse secundum uniuscujusque vias, adeoque, nemini alteri obtingere posse; nisi illi, qui vias vitæ ambulat, qui Christum per imitationem ejusdem, sequitur, qui procedit semitâ Justorum.

Statue firmiter recto justitiæ tramite te progressurum, illâ viâ, quam tibi Spiritus S. per vocationem suam ostendit, quâ te ducit; Dux & Caput omnium Electorum Dominus noster JESUS CHRISTUS, nec te unquam viam hanc derelicturum.

Colloquium ad Christum Dominum, à quo postulabis, ut qui aliquando Judex tuus est futurus, sit modò Advocatus tuus, ut eâ te via ducat, secundum quam, in die retributionis, retribuât tibi vitam & beatitudinem æternam.

In fine Pater noster.

DIEI. IV.

Meditatio I.

De Judicio universali.

Preludium 1. Imaginare te in pulvere sepulchrali dormien-

dormientē, audire tubam Archangeli, eāque ad iudiciū universale evocari.

Praludium 2. Pete à DEO gratiam, ut hæc tuba ita sonet in auribus tuis, sicut aliquando sonabat in auribus S. Hieronymi, hoc de se ipso testantis, utque DEUS timore hujus iudicij, carnes tuas configat.

PUNCTUM I. Audi verba illa DEI Judicis, apud Jöëlem Cap. 3 *Congregabo omnes gentes, & deducam illas in vallem Josaphat, & disceptabo cum eis.*

Etc considera: præter iudiciū illud particulare, quod fiet in fine hominis, hoc est in morte uniuscujusque, aliud iudiciū universale instituendum in fine mundi, juxta formam, adductis Prophetæ verbis expressam: scilicet.

Congregabuntur imprimis omnes gentes, per admirandam corporum resurrectionem: quod ipsum, tali ratione fiet: congregabuntur prius omnes pulveres, in quos, unumquodque corpus mortui hominis dissolutum fuerat, ex iisque congregatis, coalescet corpus, cui deinde corpori, sua reunietur anima, quæ illud ante informabat & animabat, Atq; hoc modo, congregabuntur omnes gentes, omnes scilicet homines, a primo nostro Parente Adam incipiendo, ad ultimum hominem nasciturum. Nullus poterit se subducere, nullus effugiet iudiciū illud, sed omnes omnino oportebit resurgere & manifestari. Quare congregabuntur tam justi, seu Beati: quàm etiam impij, seu damnati. Beati congregabuntur, ut in reassumpto corpore glorificentur, damnati congregabuntur, ut qui ante iudicij diem solum in anima puniebantur, postea etiam in corpore pænam damnationis suæ sustineant. Beatorum animæ, ut se coram illo tribunali fiant, libenter relinquent sedes illas, quas in cœlis occupant, descendent exultantes à summo cœlo ad sua corpora, quibus reunitæ, ibunt obviam Christo in æra: qui

deinde, cum iisdem veniet cum Majestate magna: Dammati autem inviti ex inferno trahentur ante illud tribunal: vellentque protunc in inferno profundissime mergi, vellent à montibus cadentibus tegi; ne vultu irati Iudicis feriantur, & ne intolerabili illà confusione; quàm sustinere cogentur, repleantur.

Considera 2^{da} Quòd ipse Iudex, illas omnes gentes deducet in vallem Josaphat, hoc est non casu aliquo fortuito, in valle illa congregabuntur; sed congregabuntur ex altissimo DEI Iudicis consilio. Deducet illas (id est, omnes creaturas rationales) Quia ipse Christus in illo Iudicio Iudex futurus, personaliter descendet & veniet, ipse sedem Iudiciorum occupabit & coram suo Tribunali easdē creaturas statui volet. Deducet illas in vallem Josaphat, per ministros suos, qui in illa die, separabunt malos de medio Justorum, malosque statuent à sinistris, bonos autem à dextris.

Considera 3^{ta} Quòd Iudex, in illa die pro tribunali sedens disceptabit cum gentibus, seu creaturis à se judicandis. Vultum terribilem Iudicis inspicere, intolerabile erit. Ejus enim oculi erunt tanquam flamma ignis, ex ore verò procedet gladius, utrāque parte acutus. Quantò magis intolerabile iisdem erit, audire non tam verba, quàm fulmina de ore Iudicis procedentia. Satis esset ad confusionem damnatorum, videre Eum, quem confixerunt: quò autem major sit confusio ipsorum, disceptabit cum eis Christus Iudex, exprobrando ingritudinem illorum, & in se crudelitatem ac tyrannidem, contemptum tot gratiæ suæ auxiliorum, tot mediolorum ad consequendam salutem, à Deo ipsis liberaliter oblatorum, neglectum tot inspirationum, tot merendi occasionū, neglecti obsequij & servitij sibi debiti, neglectæ pœnitentiæ. Disceptabit tunc cum unoquoque, rationem exigendo omnium fa-
ctorum

etorum, dictorum, cogitatorum, totique mundo, & univ[er]sis illis, qui se huic sistunt iudicio, manifestabuntur cujusvis scelera. Has exprobrationes Christi Judicis, cum ipsis disceptantis, audientes reprobi, ô quantâ confusione replebuntur? o quanto afficientur dolore: Ululatus ipsorum, replebit univ[er]sam terram.

His consideratis, reflecte te supra teipsum & memineris: etiam te sistendum illi tribunali: sistendum inquam in hoc corpore, in quo modo vivis, deduceri in vallem Josaphat. Sed ubinam tunc invenieris? an inter oves an inter fatentes hædos? num à dextris, an fortè à sinistris? num inter Beatos, an certè inter reprobos & damnatos? Reflecte iterum te, quomodo tunc feres vultum terribilem irati Judicis, audebisne in illum tuos levare, oculos? Te ipsum interroga cum Iob. Quid faciam cum surrexerit ad Iudicium Deus, & cum quaesieris quid respondebo. Quid respondebo? cum quaesierit & rationem sibi reddi voluerit, tam malè collocati temporis, neglectorum mediorum salutis, & gratiæ suæ auxiliorum, tot & tantorum scelerum, a me patratorum. Certè non aliud respondere poterò, nisi quod tunc mihi dictabit, in quo me condemnabit conscientia mea. Fatebor tunc iniquitates meas, confitebor adversum me peccata: sed mea illa confessio, non erit ad obtinendam veniam & salutem.

Agnosce modò ô Anima & desle culpas tuas, corrige errata tua, & tunc Judicem propitium invenies. Procide ad pedes Christi Crucifixi, tuorumque delictorum veniam supplex postula illis Ecclesiæ verbis: Iuste Iudex ultionis, donum fac remissionis, ante diem rationis. Ingemisco tanquam reus, culpâ rubet vultus meus, supplicanti parce DEVS.

PUNCTUM II. Audi illa verba Matth. 25
Tunc dicet Rex his, qui à dextris ejus erunt. Venite

Bene-

Benedicti Patris mei: possidete paratum vobis regnum à constitutione mundi: esurivi enim & dedistis mihi manducare, &c. tunc dicet & his, qui à sinistris erunt, discedite à me maledicti in ignem eternum, qui paratus est diabolo, & Angelis ejus, esurivi enim & non dedistis mihi manducare &c.

Et considera post disceptationem Christi Judicis cum gentibus, seu creaturis rationalibus, proferendam esse ab Eodem, in omnium auribus sententiam: tam in bonos quàm in malos. Formam utriusque sententiæ clarè expressam habes in adducto Evangelij textu.

Expende prius sententiam ferendam in Beatos. *Tunc dicet Rex* Ipse supremus, Rex & Judex, ore suo proprio, & per seipsum, non verò per aliquem suum ministrum, sententiam promulgabit; ad majus ipsorum solatium, ad manifestandam suam in ipsos benevolentiam & amorem. Promulgabit ipse ore suo hanc sententiam, ut Beati sint securissimi suæ beatitudinis & felicitatis, cum optimè sciant; quòd Deus verbum de ore suo procedens non faciat irritum. *Dicet Rex, Venite Benedicti Patris mei.* Vobis enim benedixit Pater Misericordiarum, faciendo vobiscum misericordiam. Odor vestrarum virtutum & meritorum, ostendit, vos esse agrum illum fertilem, plenum, frugiferum, cui benedixit Dominus. Possidete regnum, propter contemptas possessiones terrenas. Possidete regnum, vos enim estis Filij & hæredes regni. *Possidete regnum paratum vobis à constitutione mundi.* Tanti Deus æstimavit merita vestra, ut antequam essetis; statim a constitutione mundi regnum vobis præparaverit: prius Deus præparavit vestra præmia quàm vos feceritis vestra merita. *Esurivi enim, & dedistis mihi manducare.* O quanti Christus æstimat minutias nostras, ut eas coram toto orbe sit prædicaturus in die iudicij. O felices refectiones

nes Christi; refectiones pauperum! quas ipsum Verbum Patris disertissimâ laudabit panegyri. Mortificas gustum tuum, subtrahis sensualitati tuæ, propter imitationem Christi esurientis & sitientis, ex amore ipsius, ut de eo, quod tibi subtrahis reficias pauperem, reficis ipsum Christum. Mortificationem hanc tuam, hanc pauperis, & in paupere, Christi refectionem, totus orbis, in extremo iudicii die, ab ipso Christo deprædicatore cognoscet.

Expende deinde sententiam Iudicis in impios.

Tunc dicet & his qui à sinistris erunt. Etiam in impios sententiam, ipse Iudex Christus ore suo promulgabit, ut tinniant ambæ aures eorum, ad majorem confusionem & afflictionem ipsorum: majorem item veniæ & salutis desperationem, & damnationis suæ certitudinem & sententiæ latæ immutabilitatem. Dicet. *Discedite à me*, procul à me estote, *discedite*, hoc est: non quomodocunque recedite, sed properate ab oculis meis. *At quoniam discessuri sunt?* si ascenderint in Cœlum, tu illic es Domine, si descenderint in infernum, ades. *Discedite à me*, hoc est: à gratiâ meâ, à mea misericordia, benevolentia, liberalitate, felicitate, à bonitate & charitate mea. *Discedite maledicti*, maledicti à me, à Patre meo, à Sanctissima Trinitate, maledicti ab omni creatura, maledicti etiam ore & confessione vestrà. *Maledicti propter odium*, quo Deus vos totâ æternitate persequetur: *maledicti propter excisionem à statu felicitatis æternæ*: maledicti propter supplicia æterna. *Discedite in ignem æternum.* Ignis hic complectitur omnia tormenta & omnes cruciatus, hic ultor erit injuriæ Dei, ipse in furore Dei accensus est. *In ignem qui paratus est diabolo &c.* Ignis hic non vobis à me fuerat paratus, vobis siquidem regnum Cœlorum paraveram: hoc regnum, Sangvinis mei pretio vobis emeram, sed vos, ab hoc regno, vestrà culpâ, excidistis.

excidistis & vestrâ culpâ ignē diabolo paratū vobis, met ipsis excitastis. O miser quisquis es, peccator: perditio tua ex te est! ex DEO autem tantum modò auxilium tuum. *Esurivi enim & non dedistis mihi manducare.* Si DEUS negligentias omissiones bonorum operum, æterno igne est puniturus, quid faciet de fædissimis commissionis peccatis? quid de gravissimis alijs sceleribus? Quo inferno ad hæc vindicanda opus erit? Ad hanc Iudicis exprobrationem, quanta confusio impiorum est futura? Exprobratio hæc generabit impijs opprobrium sempiternum, & ignominiam æternam, quæ nunquā oblivione delebitur.

His consideratis tecum ipse perpende. Quamnam ex his audire velis sententiam? Quodsi sola prior sententia tibi placet, ita vive, ut Christum tuarum virtutum laudatorem in die extremi iudicii habere merearis.

Ab Eodem pete gratiam, hęc sanctè & laudabiliter vivendi, ut in die iudicii favorabilem sententiam audire possis, usus illis ex prosa Ecclesiæ verbis: Inter oves locum presta, & ab hædis me sequestra, statuens in parte dextra. Confutatis maledictis, flammis acribus addictis, voca me cum Benedictis.

PUNCTUM III. Audi illa verba Matth. 25. *Ibunt hi in ignem æternum. Iusti autem in vitam æternā.* Et considera extremū illud Universale iudiciū hoc exitu esse terminandum quod impij post latam suæ damnationis sententiam, discessuri sint in ignem æternum. Iusti autem auditā pariter de se sententia, ituri sunt in vitam æternam. Expende iterum singula, & *Imprimis:* considera infelicem circa damnatos Iudicii extremi exitum. Ibunt hi (damnati & impij designantur) post Christi sententiam, ita infelices, ut nec titulum nec appellationem communem habeant, ut nullus terminus suæ infelicitatis

licitatis, satis expressivus inveniri, possit. Ibunt hi. O quanta disrumpentur invidiâ miseri illi; quòd ipsi ibunt in perditionē & non alij, quòd alij ibunt in vitam æternam & non illi. Ibunt in vitam æternam amici, Parentes, vicini, contubernales, quandoque suorum criminum complices, illi autem in supplicium. O quantus dolor; o quàm amara separatio? o quânto tunc impij odio exardescant adversus peccatâ sua, imò adversus etiam seipsos? Ibunt. Non ita pridem ad tribunal Dei Judicis trahi debuerant, post latam verò sententiam, eâ ipsâ urgente, simulque urgente nimia confusione ipsorum, non ferentes tantam suam ignominiam, non ferentes, ultra vultum irati Judicis, exprobrationes Christi, insultationes Sanctorum, approbationem latæ in ipsos sententiæ ab omnibus factam, ibunt, nec trahi amplius debebunt, omnia potius inferni supplicia experiri parati, quàm tantâ repleti confusione. Ibunt, in æternitate enim solus est progressus, terminus nunquam. Ibunt in ignem æternum, non redituri unquam, ibunt in ignem & supplicium æternum, propter momentaneum illud, quod ipsos cum offensa Dei delectabat.

Considera adò, & expende ea, quæ post promulgatam in Beatos sententiam consequentur. *Justi autem*: si illi Justo, tu Domine justus & pius es, quia illorum præmiâs merita. Justo ibunt, felices, qui ante ibant & flebant, virtutum & meritorum spargentes semina; tunc ibunt cum exultatione portantes manipulos suos. Ibunt insultantes improbis, stultitiam ipsorum accusantes, quòd ipsis benè utentibus, gratiæ Divinæ auxilijs, meritis Christi, aliisque obtinendæ salutis medijs illi hæc omnia contēperint, eaque præelegerint; de quibus coguntur nunc erubescere. Ibunt Justo, sequentes Christum, in comitatu Beatissimæ Dei Parentis SS. Angelorum, ac Beatorum omnium. Ibunt in splendori-

doribus Sanctorum, damnatis illam ipsorum gloriam cum summo dolore spectantibus. Ibunt in vitam, qui moriebantur quotidie, qui continuam Christi mortificationem in corpore suo circumferebant, qui vitam suam pro Deo; prompto & alacri animo impendebant. Ibunt in vitam, nimirum: ut per visionem intuitivam DEUM clarè cognoscentes, Eodem fruantur, utitem fruantur Christi Redemptoris & Salvatoris sui conspectu, & clara itidem cognitione, in quali utrâque cognitione; consistit vita æterna. Ibunt in vitam æternam; quia introibunt in potentias Domini, & in ipsam DEUM, qui est Vita perfectissima, transformabuntur per amorem. Ibunt in vitam æternam, pro tantillis laboribus, copiosam & superabundantem mercedem recepturi. Ibunt in vitam æternam, non solum quoad animam, Deo, & suæ Beatitudini in æternum victuri, sed etiam victuri in glorioso corpore, quod mercedem æternam participabit cum Anima.

His consideratis exhorresce infelicitatem impiorum. E contra gratulare Beatis felicem ipsorum sortem. Accendere desiderio, unâ cum Beatis evolvendi ad præmia æterna. Fac proposita particularia de adhibendis medijs, per quæ possis consequi præmiâ Justis præparata.

Colloquium institue ad Christum euntem ad mortis & supplicij sui locum, ab eoquè humillimè postula, ne cogaris aliquando, propter tua scelera, ire in supplicium æternum.

In fine Pater noster.

Meditatio II. De Inferno.

Præludium i Imaginare Evangelicum Epulone m

nem in flammis inferni ardentem, & ab Abraha-
ino postulantem, ut Lazarum in sinu suo recumben-
tem mittat ad fratres ejus, qui illis prædicet, ne &
ipsi veniant in eum tormentorum locum.

Preludium 2dum. Pete gratiam, quâ illumi-
natus, agnoscas pœnarum inferni gravitatem, &
earum horrorem concipias.

PUNCTUM I. Expende illa verba Lucæ 16.
Ne veniant in hunc locum tormentorum. Et con-
sidera, nec veriùs, nec meliùs, infernum definiri
& explicari potuisse, quàm per hoc quòd sit locus
tormentorum. Infernum sic definit Epulo Evan-
gelicus, qui propriâ didicit experienciâ, quid sit in-
fernus, si quipiam alius, hoc nomine infernum ap-
pellasset, non mereretur fidem; meretur fidem E-
pulo, quia ex experientia loquitur. Cæterùm
huic veritati testimonium ipsius DEI, quòd ma-
jus est suffragatur. Siquidē Spiritus sanctus quascunq;
pœnas, & quæcunq; mala à nobis cogitabilia, par-
tem non nisi pœnarum inferni appellat, dum *Psal-*
10. dicit; *Ignis, grando, nix, spiritus procellarum,*
pars calicis eorum. Ut verò meliùs adhuc multitu-
do, vis, & gravitas tormentorum inferni innotescat.

Expende ulterius imò In inferno, damnatos
cruciandos pœnis, & doloribus gravioribus, quàm
sint quæcunq; pœnæ, quantumcunq; graves & atro-
ces, quæ aliquando hominibus in hac vitâ inflictæ
sunt, vel infligi poterant. Percurre pœnas & tor-
menta, quæ aliquando sive Sanctis Martyribus, si-
ve quibuscunq; alijs mortalibus inflicta sunt. Ima-
ginare rogos & pyras ardentes, imaginare forna-
ces Babylonicas ita succensas, ut flamma supra for-
nacem erumperet & ascenderet cubitis quadragin-
ta novē. Imaginare ignitos Phalaridis boves, rotas no-
vaculis & uncis ferreis armatas, crebris & acutis præ-
fixas gladiis. Imaginare crurium confectionē, disse-
ctiones mēbratim factas, acutarū arundinū infixiones

cutis detractiōem, laterum cudentibus laminis vel facibus exustionem, volutationes in testarum fragmentis, aquā ferventi vel metallis liquatis perfusiones, Japonica, per aquā in os infusionē & ejusdem violentam expressionem, tormenta, aliaq; similia innumera. Omnia hæc respectu pœnarum quas in inferno patiuntur damnati, umbra sunt & refrigerium, si post inferni cruciatus, talia tormenta pati quēpiam damnatum contingeret, is pro mollibus rosis hæc haberet. Imaginare itē gravissimorū morborum dolores, dolores capitis, dentium, calculi, podagræ, Artritidis, ventriculi, lienis, hepatis &c. Omnibus his doloribus incomparabiliter graviores experiuntur damnati.

Expende 2dò Gravitatem pœnarum inferni ex eo, quia omnia elementa & Creaturæ cruciabunt peccatores. Cruciabit Ignis, hic enim specialius assumetur pro instrumentō Justitiæ Divinæ non solum ad corpora damnatorum urēda, sed etiam ad torquendas ipsas animas, & spiritus, affligetque dānatos gravissimē ut meritō scriptura dicat. *Quis poterit habitare cum igne devorante & ardoribus sempiternis.* Cruciabit aqua jam fervore & calore intensissimō, iā frigore rigidissimō, duplex ibi stagnum dabitur unum gelidissimū alterum ferventissimum bullientium aquarum, vel certē ignis sulphuris & liquatorum metallorum. Hæc stagna erunt balnea damnatorum. Cruciabit ær suō pestilentissimō afflatu, intolerandō fœtore, Cruciabit concitatis procellis dānatos, tanquam folia rapiendo & transferendo de unō tormentorum locō in alium. Cruciabit terra absorbendo damnatos, suō pondere eosdem contērendo, saxa in ipsos ejaculando, ighes, cineres copiosos evomendo, metallis miseros perfundendo, in iisque demergendo. In spectris varia animalia & Creaturas repræsentantibus cruciabunt damnatos, serpentes, viperæ aspides, vultures, milvi &c. Devorabunt

bunt eos & discerpent morſu amariffimo, leones dentibus comminuent, urſi unguibus dilacerabunt &c. Omneſque aliæ Creaturæ ſimili modò armabuntur in ultionem inimicorum DEI. Modò dum ſumus in hac vitâ mortali, Creaturæ ſunt exarmatæ, & tamen graviter affligere & cruciare poſſunt. Quanta vis earum erit in excrucian- diſ improbiſ, dum ab ipſo D^{no} armabuntur! Quantam ſtragem gladius ille faciet de quò ſcriptura loquitur, *ſi exaceruo ut fulgur gladium meum*. Ipſi dæmoneſ immaniffimi noſtri hoſteſ, quorum ſuggeſtionibus & tentationibus, tam facilè modò obſequimur, crudeliſſimi damnatorum tortoreſ ſunt futuri. Odium & furorem quò in DEUM exæſtuant, in miſeram animam DEI imagine inſignitam tunc evoment, ad inſtar Pantheræ, quæ cum non poſſit nocere homini, rabiem ſuam in ejus imaginem effundit, eamque (ſi in hanc incidat) in fruſta diſcerpit. Sed ſupra quaſcunque Creaturas, ipſa Juſtitia Divina atrociffimè ſæviet in damnatoſ. DEUS enim tunc ager in virtute propriâ, in fortitudine brachij ſui, ut agens potentiffimum, Creaturæ autem agent in virtute alienâ, tanquam inſtrumenta DEI, ut agentia debilia & imperfecta. DEUS ſuas tunc ulciſcetur offenſaſ & injuriaſ, quapropter pro menſurâ & modò, quò eaſ averſatur, proportionatè ipſaſ puniet & vindicabit.

Expende 3tio, & percurte ſinguloſ ſenſuſ, in quibus cruciabuntur damnati poſt corporum reſurrectionem. Cruciabitur graviffimè viſuſ, denſiffimiſ tenebris, à quibus ſcriptura infernum appellat tenebraſ exteriorēſ. Cruciabitur ſumò illò igniſ taretai moleſtiſſimo. Turpiſſimiſ dæmonum ſpectriſ horrore teterrimiſ, illiſ infernaliſ carceriſ, conſpectu inſtrumentorum ad excrucian- doſ damnatoſ ſervientium, totque graviffimorum tormentorum. Tandem cruciabitur viſuſ ipſiſ lacrymiſ, quaſ copio-

fissimè damnati profundent, educeute eas ex oculis vi cruciatuum, & doloris ac tristitiæ magnitudine. Auditus cruciabitur mœstissimis desperantium ejulatibus, lamentabili væ incessanter persenante, tristibus gemitibus, non tolerandis maledictionibus, per quas filij parentibus, parentes filijs maledicent. Singuli damnati maledicent diei, in quo nati sunt, tempori, quo in peccatum prolapsi sunt, complicibus suis, quibus ad offensam DEI abusi sunt, quorum pravo exemplo inducti sunt ad peccatum. Cruciabitur auditus stridore dentium, fremitu inferni, inçonditis dæmonum clamoribus, horrendis in DEUM & Christum, in Sanctissimam DEI Parentem, & in Sanctos, blasphemijs, illis mutuis gravissimis damnatorum sibi invicem insultationibus, improperijs, & exprobrationibus, ad quæ omnia, tinnient ambæ damnatorum aures. Cruciabitur gustus fame illâ acerbissimâ, fame caninâ, de qua scriptura loquitur, *famem patientur ut canes*. Cruciabitur gustus siti illâ ardentissimâ, quam nunquam restingere poterunt, volent damnati cum Epulone vel unicâ guttâ, ex intinçto Lazari digito defluente, exustas lingvas suas refrigerari, sed hanc gratiam nunquam impetrabunt. Gustus damnatorum cruciabitur felle draconum, & veneno aspidum insanabili, Cibus illorum non alius est futurus quàm ignis ille infernalis, quàm omnium sordium colluvies. Potus damnatorum pix liquata metalla, sulphur ignis, *grando, nix, glacies, spiritus procellarum* erit pars calicis quò potabuntur.

Cruciabitur odoratus gravissimò illò fætoze, quem putrida & adusta damnatorum corpora exhalabunt, sulphureo stagni infernalis vapore, graveolentissimis exhalationibus ascendentibus ex sentinis fœtidissimis. Cruciabitur denique tactus igne infernali, tota damnatorum corpora penetrante, imò etiam & ipsa pervadente ossa, gravissimis om-

nis generis cruciatibus & per omnia membra doloribus. Totum corpus damnati ardentem carbonem vel ferrum ignitum referet, igne avernali intimas carnis & ossium medullas depascente.

Expende 4^{to} & percurre potentias Animæ, cruciatuque, quibus illæ cruciabuntur. Cruciabitur Memoria recordatione honorum, divitiarum, voluptarum, quibus dum viverent affluebant impij, propter quæ in vitâ felices & beati censebantur, per totam verò æternitatem miseri & infelices sunt futuri, Ad hanc recordationem bonorum, quibus in vitâ fruebantur, exclamabunt: Quid nobis profuit superbia nostra, aut divitiarum jactantia, quid contulit nobis, transferunt omnia & nos in malignitate nostrâ consumpti sumus. Cruciabitur memoria recordatione gratiarum & inspirationum divinarum contēptarum, tot mediocrum salutis neglectorum, occasionum & commoditatum merendi ac poenitentiam agendi omiffarum, tanti temporis, in quô salutē consequi poterant miserè perditæ & collocati. Cruciabitur adhuc memoria, recordatione aliorum coæqualium, consodalium, quibus convixerunt, qui in similibus occasionibus, temptationibus existentes, similibus inclinationibus ad malum obnoxij, æqualibus gratijs adjuti, ibi strenuè decertarunt & de hoste triumpharunt, ubi illi miserè prolapsi, se in perditionem præcipitarunt, & æternæ damnationis reatum incurrerunt. Cruciabitur ulterius memoria, recordatione conversationis malæ, cum ijs, cum quibus nunc torquentur, & quorum maledictis impetuntur: tandem cruciabitur tot & tantorum delictorum, ab ipsis commissorum conscienciâ.

Intellectus cruciabitur vivâ apprehensione & consideratione implacabilis odij, quo Deus damnatos tanquam hostes sibi maximè exosos, persequetur per totam æternitatem. Implacabilis item odij quô eosdē prosequetur Christus Dominus, Beatissima Mater ejus, s. Angelus Custos, alijque Sancti

Cælites. Consideratione etiam odij, quò unum quemque damnatum prosequuntur dæmones, aliique suæ damnationis consortes. Cruciabitur præterea intellectus apprehensione vivâ & forti omnium tormentorum, cruciatuum, dolorum, quos vel actu patitur damnatus, vel totâ deinceps æternitate est perpeffurus. Idem intellectus cruciabitur judicijs illis, quibus judicabit se esse infelicissimum, vana, misera, nec diuturna fuisse illa omnia; propter quæ perijt in æternum. Postremo cruciabitur intellectus, illis discursibus & illationibus *Ergo erravimus*; Ergo totâ æternitate luemus pœnas, ergo nunquam misericordiam consequemur.

Voluntas præ alijs potentijs cruciabitur singularissimè, sicut enim hæc existit potissima imò unica damnationis causa, ita ut verè dictum sit, cesset propria voluntas, & infernus non erit, ita in ipsam potissimum sæviet ultrix scelerum justitia Divina. Cruciabitur verò (quantum captu intellectus nostri assequi licet) summâ in malò obstinatione, odio implacabili, quò averfabitur DEUM, humanitatem Christi, pretiosissimam DEI Parentem, Sanctos omnes. Rabie & furore immanissimò in omnes creaturas, & imprimis in seipsum. Infelici sed simul inefficaci appetitu mortis, suæque annihilationis. Tandemque summâ illâ disordinatione, ex vi cujus non poterit quidquam velle nisi malum, non poterit odisse nisi bonum.

Expende 5tò Duplicem fore damnatorum pœnam, unam, quam vocant pœnam sensûs, alteram, quam vocant pœnam damni. Pœna sensûs consistit non solum in cruciatibus, quos corpora damnatorum, in suis sensibus sive externis, sive internis patientur, sed etiam in illis cruciatibus, quos in Potentijs animæ sustinebunt damnati, quos item ipsæ animæ ac spiritus corporis expertes, nimirum dæmones perpetientur ab igne infernali, quò
eisdem

eosdem spiritus (ut dicit S. Augustinus) torquet
 & torquebit *varis & miris modis*. Poena damni
 consistit in exclusione damnatorum ab æternâ bea-
 titudine & gloriâ cælesti, hoc est à visione intuiti-
 vâ DEI, & amore ejus fructivô. Poena hæc gra-
 vissimè affliget & torquebit damnatos. Non dolet
 tantum Rex propriô expulsus regnô, & ad extre-
 mam redactus egestatem, de tam infelici & ca-
 lamitosô suô statu. Non dolet tantum filius de
 exclusionè sui ab hæreditate jure naturali sibi de-
 bitâ, quantum ingemiscunt damnati de sui exclu-
 sione ab illô regnô, ab illâ hæreditate, quâ potien-
 tur Beati. irrugit Esau, postquam intellexit se pri-
 vatum esse jure filij primogeniti, & benedictionem
 Patris à fratre suô sibi surreptam fuisse. Multo
 magis irrugient damnati, dum intelligent, se, qui
 aliquando filij regni fuerant, vel esse poterant, ej-
 ci, & in æternum præcipituri supplicium. Hæc pœ-
 na adeo gravis est futura damnatis, ut S. Chryso-
 stomus dicere audeat. *Decem millo quis, ponat ge-
 bennas, nihil tale dicet, quale est, Beatâ gloriâ exci-
 dere.* Porro ex eò damnati tam graviter hanc
 poenam damni sentient, Quia vivaci apprehensio-
 ne advertent, quod ipsorum ultimus finis, ad quem
 consequendum omnia eorum studia, omnes actus
 collimare debuerant, fuerit DEUS, ut clarè & intuti-
 vè visus; quod hic unice potuerit esse expletivus
 & satiativus ipsorum appetitûs, quod in hoc uni-
 cè conquiescere potuerint; quod cum hoc tantô
 bonô omnia pariter bona ipsis obtigissent. Quod
 hic finis tantæ excellentiæ & præstantiæ sit; ut &
 ipse DEUS non aliunde sit & fuerit, semperque
 erit summe felix & beatus, nisi quod seipsum perfe-
 ctissime videat & cognoscat, seque ipsum summô
 amore amet. Ab hoc ergo fine, siquidem adver-
 tent damnati, se æternaliter excidisse, jamque se
 esse extra omnem spem talis beatitudinis & felici-

tatis obtinendæ, serò agnoscent, quàm grave incurrerint damnum, tantique damni pœniam sentient acerbissimè. Augebit dolorem illorum, ex tali pœnâ, irritatio appetitûs eorundem, tum per gaudia Beatorum ab ipsis in die extremi iudicij cognita, tum ex splendore, & maiestate magna supremi Iudicis, ad iudicium universale venientis ab ipsis conspectâ.

His expensis reflecte te, an & tu non merueris aliquando, ut venires ad infelicem illû tormentorum locum, an non pluries tibi debebatur infernus. Cogita qua ratione factum est, quod adhuc cum Epulone non ardeas, & exclama: *Misericordia Domini, Quia consumpti non sumus.* Recogita quis in te animi sensus, an poteris sustinere inferni pœnas? an poteris habitare cum igne devorante? Experire quantum hic ignis noster urat, quod si illius ardores sustinere non vales, quomodo poteris habitare, cum sempiternis, ignis infernalis ardoribus.

Hinc autem facilè deduces 1^{mo}. Non debere te unquam gravi mortali peccato DEUM offendere, cum propter quodvis peccatum mortale, incurras reatum sustinendi æternas inferni pœnas. 2^{do}. De peccatis à te commissis debere te convenientem agere pœnitentiam Si enim commisisti peccatum mortale, jam infernum meruisti, à cuius reatu potes adhuc liberari in hac vita, non alia tamen viâ, nisi per pœnitentiam, eamque seriam, ac talem, qualem à te Christus requirit.

3^{to}. Pœnitentiam hanc non differendam esse, quia incertus es, an commoditatem, quam nunc, habes ad pœnitendum, habiturus es postea? an tempus illud, in quod tuam differs pœnitentiam, mors & æterna tua non præveniet damnatio. 4^{to} providendum tibi esse, ne deinceps mortaliter pecces, ut si in certo & fixo vitæ statu constitutus es, habeas modos & media statui huic convenientia, ad

sancte

Sanctè & laudabiliter vivendum, & DEUM non offendendum unquam, maximè peccato lethali. Si necdum es in certo statu vitæ, illum statum eligas, in quo securus esse possis de non offendendo DEO mortaliter, & non incurrendo periculo damnationis æternæ.

Fac proposita, Lacrymis pœnitentiæ desle tua peccata, ipse de te sume tuorum scelerum vindictâ ne tota æternitate ea deslere & æterna supplicia sustinere cogaris. DEO te offeras ad quasvis crucces & pœnas in hac vitâ sustinendas, ut pœnas æternas effugias, dicendo. Hîc ure, hîc seca, modò in æternum parcas.

PUNCTUM II. Audi illa verba Deuteron. 25. *Pro mensura delicti, erit et plagarum modus.* Et considera, licet in inferno omnes damnati gravissimas pœnas sint perpassuri, sive pœnas sensûs, sive pœnas damni, inter has tamen ipsas pœnas, quas diversi sustinebunt, magnam futuram esse inæqualitatem, nam graviorum & plurium delictorum rei, graviores sustinebunt pœnas, quàm ille, qui unius peccati mortalis vel pauciorum & leviorum fuerit reus. Quod ut melius perspicias.

Expende imò Diversa peccata, diversis in inferno puniendâ pœnis. Et sic aliâ superbi, aliâ gulosi, & ebriosi, aliâ avari, aliâ luxuriosi, aliâ alienæ famæ detractores, aliâ iracundi, aliâ invidi &c. punientur pœnâ. Superbi punientur gravissimè humiliatione & depressione sui, in qua illud sibi occinent: *Quomodo cecidisti Lucifer, qui manè oriebaris.* Gulosi ebriosi, punientur gravissima fame & siti, & qui cum Epulone quotidie epulabantur splendide, unicam aquæ guttam, ad refrigerandam linguam postulabunt. Avari punientur & affligentur maxima egestate illudque de iplis verificabitur: *Viri divitiarum dormierunt somnum suum & nihil invenerunt in manibus suis.* Luxuriosi, gravissimâ toto corpore per-

petientur tormenta. Juxta illud Apocalypsis *Quantum indeliis fuit, tantum illi date tormentum*, Detractores punientur in lingvâ & suâ propriâ famâ. Inverecundi aspectus punientur oculorum cruciatu, Rapinæ per torturam manuum.

Expende 2dò Quò plura sive numero, sive specie aut genere diversa peccata quis commisit, eò plures numerò sive specie, aut genere diversas in infernò sustinebit pœnas. Multiplicitati enim peccatorum genericæ, multiplicitas generica pœnarum, multiplicitati specificæ, aut numericæ peccatorum respondebit, multiplicitas specifica aut numerica pœnarum. Intensiori etiam majori peccati, correspondebit intensio proportionata pœnæ. Circûstantijs aggravantibus respondebant aggravantes circûstantiæ pœnarum, ita enim fiet, ut pro mensura delicti sit plagarum modus, & ut retribuatur cuique juxta vias suas. Verificabitur & illud: *Potentes potenter punientur*. Illud item *Cui plus datum plus requiratur ab eo*.

Expende 3tò Etiam venialia in hac vitâ non expiata, in damnatis, pœnis inferni punienda esse per accidens. Et sic si quis plurimum venialium reus, committat peccatum mortale, post illudque impenitens moriatur & damnetur, talis in inferno non solum peccati lethalis à se commissi luet pœnas, sed etiam patietur pœnas peccatorum venialium. Idque aliqui Theologi docent in talibus damnatis venialia in inferno, plectenda esse pœnâ æternâ alij docent pœnam ipsorum futuram temporalem.

His expensis quàm extrema sit dementia, eorum, qui in unum prolapsi peccatum mortale: resolvunt se etiam in alia, & peccatis peccata accumulanti, idque frequenter non numerò tantum, sed specie & genere diversa, tanquam si parum esset unum illos meruisse infernum, ut velint tot infernos, tot gehennas, tot pœnas numerò, specie, & genere diversas

versas sustinere. Cogita iterum, quàm timenda sint beneficia Divina aut potius quàm timendum sit post accepta DEI Beneficia, post collata uberiora gratiæ ejus auxilia, & habitas opportunitates ad tentationes vincendas, iisdem succumbere & DEUM offendere, à talibus enin plus requiretur, siquidem ipsis plus datum est. Cogita ulterius, quomodo non sint contemnenda, peccata venialia; quando, quidem hæc per accidens in damnatis puniuntur pœnâ inferni. Non potest tibi constare, quod post multiplicata venialia, non sis prolapsurus in mortale, imò contrarium est præsumendum; quod si lapsus fueris in mortale, & propter hoc dānaberis, etiā venialia teneberis exsolvere pœnis inferni. Fac reflexiones materiæ accomodatas, fac item proposita, & varios elice affectus.

PUNCTUM III. Audi illa verba: *Momentaneum quod delectat, æternum quod cruciat.* Et considera pœnarum inferni, quibus mortalia punientur, hanc futuram gravissimam proprietatem, quod sint tota æternitate duraturæ, quod momentaneæ impiorū delectationes quibus in vita DEUM mortaliter offenderunt, per totam æternitatem sint puniendæ.

Vis nosse quid sit infelix illa æternitas? Est duratio gravissimarum illarum pœnarum, carens fine & termino, hoc est nunquam terminanda. Elabentur millia annorum, miliones miliones millionū ab inchoatâ dānatione, num fortè tot saltem elapsis annis finietur pœna damnati! nequaquam. Imò hæc primū dolorum & damnationis erunt. Fac cogitabiles suppositiones, calculationes, ut pervenias ad terminum æternitatis, per nullas ad illum pervenies. Intra mille annos unus damnatus unicam lacrymæ guttam profundat, ex ita profusis guttis si conserventur, coalescet oceanus, & ad terminum æternitatis non perveniet. Intra millionem annorum producat DEUS pulvisculum unum.

unum, singulisque annorum millionibus, alios & alios pulvisculos creet & reponat in spatio quod est inter centrum terræ & inter supremi cœli concavum. In hunc modum factâ pulvisculorum productione, pulvisculis replebitur totum memoratum spatium, & non pervenietur ad æternitatis terminum, ad id enim, quod nec est, nec esse potest, perveniri nequit.

Essentia & natura æternitatis plenè & sufficienter explicatur, duobus illis adverbijis *semper, nunquam* semper necabit tartarus, nunquam, tamen enecabit, semper vorabit tartarus, nunquam devorabit. Semper trucidat tartarus, nunquā conquiescit. Heu semper ardet tartarus, nunquam focus quiescit, arsura sēper fulmina & sopienda nunquam.

Æternitatis illius infelicitis mensura futura est ipsius *DEI* æternitas, tamdiu enim pænæ inferni durabunt, quamdiu in *DEO* manebit jus ad exigendas de peccatore pœnas, propter offensam sui, ab eodem commissam. Hoc autem jus, tamdiu manebit, quādiu *DEUS* erit *DEUS*, quia tamdiu manebit illud jus quamdiu non exhibebitur, vel satisfactio condigna pro peccato, vel satisfactio æqualis eidem. Porro satisfactio condigna pro peccatis damnatorum nunquam exhibebitur, quia ex inferno nulla est redemptio. Satisfactio etiam æqualis, gravitati peccati mortalis nequaquam exhiberi potest, quantacunque enim satisfactio, quomodoque intensâ, & quantacunque quo ad suam durationem protractâ & extensâ adhuc major & major satisfactio debetur. cum nulla possit ad eam æstimabilitatem in suo ordine pertingere, quam habet offensa mortalis, ut *DEUS* offensus dicere possit, Jam pro mea offensa his pœnis mihi plenè satisfactum est. Jam jus meum ad irasci extinctum, non amplius exigo ultiores cōmissi peccati pœnas.

Æternitas hæc pffinarum, quantum augebit
& aggra-

& aggravabit damnatorum pœnas & cruciatus, explicari non potest. Nunc in maximis ærumnis illud habetur solatii, quod hæc aliquando sint terminandæ, quod mors saltem sit ipsas terminatura. Quanta igitur è contrario damnatorum afflictio erit? quod ipsorum calamitates & miseriæ finem nunquam sint accepturæ. Illud infelices damnati, inter suos cruciatus sibi lamentabiliter occinent. Perijt cheu! perijt finis meus! Ipsa mors damnatorum non erit terminus ærurnarum, quas patientes, moriantur nunquam, quærent tunc miseri mortem & non invenient. Molestissima fuit Ezechieli Prophetæ, per trecentos nonaginta dies, in uno latere cubatio, molestissimum etiam alijs est, in molli culcitra longiori tempore decumbere. Quid putas quàm molestum erit tota æternitate excruciarì, tota æternitate super ignitos carbones super durissimas ardentes & æstuantes cubare crates.

His expensis compara rigidissimam pœnitentiam per totam vitam continuatam, cum æternitate pœnarum inferni, quàm levis hæc, & brevis, illius æternitatis comparatione esse debeat. & reflecte te supra tuam a b austriore vitâ & à statu pœnitentiæ abhorrentiam, ad talemque te vitam magno animo resolve. Reflecte te item supra momentaneas delectationes, vanitates &c. quam facilis fueris ad eas sectandas, & cum infelici æternitate commutandas. Terreat te in posterum infelicissima hæc æternitas; terreat æternum illud quod cruciat; dum te inevitabl momentaneum quod delectat. Accendere etiam ardentissimo zelo, quærendi tot animas miserè pereuntes, easq; ex inferni faucibus extrahendi.

Colloquium institues ad Patrem æternum illo S. Francisci Xaverij affectu. Æterne rerum omnium effector DEUS, memento abs Te animas infidelium

infidelium & peccatorum procreatas easque ad imaginem & similitudinem tuam conditas. Ecce Domine in opprobrium tuum his ipsis infernus repletur. Memento JESUM Filium tuum, pro illorum salute, atrocissimam subijse mortem. Noli quæso Domine ultra permittere, ut Filius tuus, ab infidelibus & peccatoribus contemnatur. Sed precibus Beatissimæ Virginis, Sanctorum omnium, & Ecclesiæ Sanctissimæ Filij tui sponsæ placatus, recordare misericordiæ tuæ, & oblitus impietatis eorum, eos ex faucibus inferni potenti manu tuâ extrahe, & effice; ut ipsi quoque te vivâ fide & vitâ Sanctè actâ, agnoscant aliquando, & quem misisti, JESUM CHRISTUM; per Eumque salvati & liberati, Te per totam æternitatem cum Sanctis tuis glorificent.

In fine Pater noster, Ave Maria.

Meditatio III.

De Regno Christi.

Preludium I. Imaginare Christum obeuntem Synagogas, Oppida & pagos Iudææ, Galilææ & Samariæ, & ubique prædicantem Evangelium & Regnum DEI.

Preludium II. Pete gratiam, ut Christum Regem tuum esse agnoscas ejusque jussa & sanctissimam voluntatem in omnibus exequaris.

PUNCTUM I. Audi verba illa Psalmistæ in Persona Christi dicta Psal. 2. *Ego autem constitutus sum Rex, ab eo super Sion, Montem Sanctū ejus etc.*

Considera imò Christum Dominum non solum quatenus DEUS est, sed etiam quatenus est Homo, Regem esse. Qatenus est DEUS, REX CHRISTUS est, quia est Dominus universorum, quia titulò creationis & conservationis, per quam singulis momentis omnes res creatas conservat, titulò etiam

etiam gubernationis, quâ gubernat universa, omnia subsunt ipsius imperio, & altissimæ ejus regię potestati. Quatenus etiam Christus est Homo, est REX & Dominus, & REX Omnium Creaturarum. Regia potestas & autoritas Christo Homini convenit propter unionem cum Personâ Divinâ. Est unctus Domini unctione Spiritûs S. est REX constitutus super montem Sanctum Sion, data est ei potestas in Cælo & in terra. Pater æternus misit in terras unigenitum Filium suum accipere sibi regnû & reverti.

Considera 2dò Christum, quodd futurus esset Rex, & Prophetæ prædicaverunt & Angelus Gabriel annuntiavit. Dabit ei Dominus, sedem David Patris ejus, & regnabit in Domô Jacob in æternum. Et Sancti tres Reges Christum ut Regem inquisiverunt, adoraverunt ut Regem, datisque muneribus Regem recognoverunt. A populo insuper Israeliticò tanquam Rex est salutatùs, tandemque ob hanc causam, quod Rex esset, ad mortem est condemnatus.

Considera 3tiò Christum Dominum omnibus regijs dotibus & præstantissimis virtutibus instructu fuisse, ut pro Rege maximò, potentissimò, sapientissimò, &c. cui nullus par, vel similis esse possit, haberi debeat. Habes in Christo sapientiam majorem quàm Salomonis, fortitudinem tantam, ut & vestes ferreos confregerit, & portas æreas destruxerit, & mortem ac infernum, debellaverit. Habes liberalitatem & munificentiam in subditos majorem quàm Aslveri, ipse tibi paravit mensam adversus eos qui tribulant te, ipse suò corpore te reficit, suò sanguine potat, infinitò meritorum suorum thesaurò ditat, & divitias Bonitatis, & gratiarum suarum in te effundit. Vis nosse quanta sit gloria & Majestas Regis hujus? Licet eam Christus dum inter mortales viveret, latere voluerit

rit; nihilominus eandem aliquomodo manifestavit in suâ gloriosâ transfiguratione. Si lilia DEUS sic vestit, ut nec Salomon in omni gloriâ suâ possit illis comparari, quantò magis gloriæ, quæ ab intus fuit, Regis gloriæ Christi, à quâ idem Christus est REX gloriæ, nulla terrenorum Regum gloria cōparari potest. Si etiam nosse desideras, quantus Regis Christi amor sit in subditos; hinc agnosce. Ipse alligat vulnere nostra, ipse illis pretioso Sanguinis sui balsamo medetur, ipse ut hominem de servitute dæmonis liberaret, dedit se in pretium & redemptionem; totum se expendit in nostros usus & commoda. Ad extremum Christus pro subditis suis animam suam posuit, quâ charitate majorem nemo habet.

Considera 4to Christum Regem esse taliter, ut Regnum ipsius non sit de hoc mundo. Christus REX est, non ad exigenda tributa, quia bonorum nostrorum non eget, quod si exigit aliquod tributum, non exigit aliud, nisi amorem sui & imitationem, ut illi cor tuum dones, ut ipsum ex toto corde ames. Christus item est REX, non ad exercitum ferro armandum, & hostes visibiles, visibiliter debellandos, cum occultâ suâ virtute id præstare possit, efficacissimè, sine visibilibus armis & ferro, idque fecerit in prostratis illis militibus, qui ad se comprehendendum venerant. Sed ut dicit S. Augustinus: *Est REX per hoc, quod mentes regat, quod in æternum consulat, quod in Regnum Calorum credentes sperantes & amantes perducatur,*

Considera 5to Christum esse Regem super omnes Creaturas, esse Regem non solum hominum, sed etiam Angelorum. Ipsi ministrant & ministrabant Angeli, ipsi etiam dæmones obtemperant, subijciuntur. In Nomine JESU omne genu flectitur Cœlestium, terrestrium & infernorum. Sed maximè Christus sibi cōplacet in hoc titulo, quod

quod sit REX super Sion montem sanctum ejus, quod sit REX super populum electum, super filios Regni. Christus item est REX, ut homines eruat ex servitute diaboli. ut vocet eos in libertatem filiorum DEI. Est REX Regum, & Dominus Dominantium, ipse enim suos subditos Reges facit, eosque constituit Principes super omnem terram, vult eos dominari suis affectibus, se ipsis, & totò mundo vult esse superiores. Maximus dishonor Christi esset, inter suos subditos numerare servos & mancipia, habere serviles animas, cum ipsum servire Christo regnare sit.

Considera tandem 6to, Christum Regem maxima præmia præparasse subditis sibi adhærentibus. His paratū est regnum cælorum ante constitutionem Mundi. Ipse daturus est præmia maxima, præmia æterna, pro brevibus obsequijs, & exiguis meritis. Præmia hæc erunt, salus animæ & æterna subditorum suorum felicitas & beatitudo. Ipse DEUS, Ipse Christus, futura est merces eorum, idque merces magna nimis.

Hæc Considerans, admirare stultitiam & cæcitatem hominum, quod non adhæreant Regi huic amabilissimo, quod eū ex throno suo, hoc est ex Animâ, quæ Christi sedes, imò regnum est, quod ille sanguine suo acquisivit, ejciant, & in hoc regnò velint regnare, carnem, mundum & diabolum insensissimos Animæ, & ipsius Christi hostes.

Statue firmissimè adhæsurum te semper Regi tuo. Protestare, non agnoscere te alium Regem nisi Christum, velle te illi constantissimè servire. Postula, ut te erutum ex servitute diaboli, in servum perpetuum recipiat.

PUNCTUM II. Audi illa verba Christi apud S. Matth. Cap. 10. *Non veni pacem mittere sed gladium.* Et considera Christum Regem totum in hoc esse, ut universos Mortales suò subijciat im-

periô, ut infideles & hæreticos, ad fidem veram, peccatores ad pœnitentiam adducat, & hostes generis humani debellet, ex eorumque potestate, si quos mortales captivos detinent, eruat, ac ipsos suæ felicitatis & regni Cohæredes faciat.

Ad hoc bellum hostibus generis humani inferendum, omnes adhærentes sibi subditos, Rex Christus invitat, & eos, arma sumere jubet, *Non veni pacem mittere, sed gladium.* Illudque maximè cavet, nè cum hostibus nostris, carnè, mundô, & diabolô, pacem aliquando ineamus, ne ad tractatum faciendum descendamus, vel armistitium etiam ad breve tempus indulgeamus. Ad hoc inferendum bellum, omnes qui adhærere sibi voluerint, & te inter ipsos adhortatur, talique alloquitur oratione.

Fideles mei subditi, in animo mihi est, hocque meum est immutabile decretum & propositum, universas infidelium regiones, meæ ditioni subijcere, meos & vestros acerrimos hostes, carnem, mundum, & diabolum profligare, de ijsque triumphare bellum inferre perfidiæ, & omnibus vitijs. Ad hujusmodi bellum & armorum, societatem vos invito, ut mecum pariter contra communem hostem DEI & hominum decertetis, ut infidelium regiones, meô subijciatis imperiô, totique sitis, in perfidiâ & vitijs debellandis, & liberandis peccatoribus ex servitute peccati. Confidite, Ego vici mundum, & vos in hoc bellô feliciter triumphabitis. Hoc pervasum vobis esse volo. Quod in bellô, primus ego hostem sim aggressurus. Ipse in vobis & pro vobis decertabo, vires & robur, cui non poterunt resistere adversarii vestri, suppeditabo, totumque hostilem impetum ipse sustinebo. In perferendis injurijs, incommodis, ipse vobis præire volo. In persequendis hostibus nullis parcâ laboribus, nullis sudoribus. Corpus meum in vulnera & dolores expono, vitam denique meam, & Sangvinem libentissimè

bentissimè profundo, pro vestrà incolumitate & salute. De annonâ, com meatû, & necessarijs belli impensis, & sumptibus, ne sitis multum solliciti. Meum erit hæc providere. Præmium etiam fortitudinis vestræ, certum vos manet, illudque mihi & vobis commune. De spolijs tantum quisque participabit, quantum impendet laboris. Illud quâ maximè ab omnibus desidero, ut me præcuntem sequamini. Unumquemque vestrum paratum esse, oportebit, non aliò uti victû, vestitû, & armis, nisi quibus me utentem conspexerit. Proinde victus cuique erit jejunium, inedia, opprobria, his enim ego saturabar. Potus, erunt amaritudines, fel, acetum, salus, & conversio animarum, lacrymæ pœnitentium. His ego sitim meam restingvebam. Vestitus erit, vestis irrisoria, confusio faciei, contumeliæ, contemptus. Hæc enim sunt vestis & insignia mea, his etiam vos uti oportebit. Estque necesse, ut ad exemplum meum, talî cibò & potû reficiamini, & ut vestibus ac insignibus Regis vestri induamini, meum & vestrum hostem non aliter debellaturi.

Adhortatione hac Registui accendere, ad ei obsequendum, ad eum comitandum, & quàm perfectissimè imitandum, cum eoque contra communem hostem, strenuè decertandum.

PUNCTUM III. Audi verba illa S. Petri: *Domine tecum paratus sum & in carcerem & in mortem.* Et considera per illam Regis tui adhortationem, quam punctò præcedenti, mente perpendisti, exigi à te tuum responsum, & ultimam tuæ voluntatis resolutionem. Esne comitaturus Regem tuum, ad bellû, perfidiæ, vitij, alijsque, hostibus inferendum, esne strenuè contra ipsos decertaturus? Paratusne es, ut eò victû, vestitû, armis, & insignibus utaris, quibus usus est Rex tuus Christus, nimirum, esne paratus ad jejunia, inedias, amaritudines,

nes, ad frigus, nuditatem, cæteraque incommoda, dolores, imò & ipsam mortem, amore Regis tui, & propter imitationem ejusdem, perferendam An exoptes indui vestibus & insignibus Domini tui, Jesu Christi? nimirum an exoptes contumelias, contemptus, irrisiones, variasque confusiones, & ut pro stultô habearis? Tandem an velis Regem tuum comitari indissolubiliter, eumque quàm perfectissimè imitari?

Certè si Rex quispiam terrenus, tali adhortatione, quam aure internâ audisti, subditos suos ad bellum invitaret, cum talibus & tantis appromissionibus, omnes paratissimos se esse ostenderent. Et si quis se non offerret, sed detrectaret, cum eodem Rege contra hostem progredi, is pro inerti & ignavo, nec satis sanæ mentis homine haberetur, sannisque & irrisionibus ab omnibus impeteretur. Hæc te labes manet, has cæli subsannationes experieris, nisi Regis tui Christi, justæ obsecundaveris petitioni.

Reflecte te, à quò tempore REX tuus Christus te invitat ad bellum, vitijs & hostibus ejus inferendum, ad subjugandos infideles svavi jugo Christi, ad convertendos peccatores, ad Regem tuum per vitam sanctiorem & perfectiorem imitandum. Confundere quod suis adhortationibus, svasionibus & exemplis parùm, aut nihil, hætenus REX Christus in te effecerit. Protestare quod Christum àb hinc sequi velis, illis S. Petri Apostoli verbis, Domine tecum paratus sum etiam in carcerem & in mortem. Illis item 2di Regum 15. Vivit Dominus & vivit Dominus meus Rex, quoniam in quocunque loco fueris Rex, sive in morte, sive in vitâ, ibi erit servus tuus.

Conclude affectû & protestatione, desumptâ ex Exercitiô S. Patris Ignatij de Regnô Christi. En ô Rex supreme, ac Domine Univerforum, tuâ ego licet

cet indignissimus fretus tamen gratiâ & ope, me tibi penitus offero, meaque omnia, tuæ subijcio voluntati, attestans coram infinitâ bonitate Tuâ, nec non in conspectû gloriosæ Virginis Matris Tuæ, totiusque curiæ Cœlestis, hunc esse animum meum, hoc desiderium, hoc certissimum decretum, quod quàm proximè velim te sequi, & imitari in ferendis injurijs, & adversis omnibus, cum verâ tum spiritûs tum etiam rerum paupertate, si Sanctissimæ Majestati tuæ placuerit, me juxta statûs mei rationem, ad hæc eligere & recipere. Quod velim tuis vestibus, & insignibus indui, bellum perfidiæ ac omnibus vitijs inferre, & contra tuos & Animæ meæ hostes strenuè decertare.

In fine: Suscipe Domine universam libertatem

DIEI. V.

Meditatio I.

De Incarnatione Filij DEI.

Praludium I. Imaginare tres Personas Sanctissimæ Trinitatis consultare de modò, quò possit genus humanum per peccatum, Adæ perditum reparari. Et cum nollent illud aliter reparari, nisi dependenter à condignâ satisfactione Justitiæ Divinæ pro peccatis hominum exhibitæ, decernere ut Unigenitus DEI Filius Carnem humanam assumat, in eâque Justitiæ Divinæ satisfaciât.

Praludium 2. Imaginare hoc consilium & decretum Sanctissimæ Trinitatis, per Angelum Gabrielem in Domò Nazarethana annuntiari Beatissimæ Mariæ Virgini, ejusque assensum expeti, ut de ejus purissimò

H3

nam

nam DEI Filius assumat, in ejusque Sanctissimò utero concipiatur Salvator mundi DEUS homo.

Preludium 3. Pete gratiam ut intimè cognoscas beneficium Incarnationis Filij DEI, & ex eò cognito inflammaberis ad DEUM ardentius amandum, illique studiosius serviendum,

PUNCTUM I. Expende illa verba Joan. 3. *Sic DEVS dilexit mundum, ut Filium suum unigenitum daret.* Et considera, licèt homo creatus sit à DEO ad hunc finem; ut Dominum DEUM suum laudet, revereatur, eique serviens tandem salvus fiat, per peccatum tamen Adæ, ac deinde per peccata sua personalia, ita ab hoc fine excidit, ut impossibilis illi fuerit dicti finis consecutio.

Nam neque illum consequi potuit manente suò peccatò, & reatu per peccatum contractò, ac indignatione Divinà, quā peccatori propter peccatum indignabatur DEUS, perseverantē. Hæc enim potius exigebant, ut peccatum, Justitia Divina pœnis inferni, & æternā damnatione vindicaret. Neque etiam miser homo potuit se peccatò suò liberare, illudque tollere. Deberet enim illud tollere, per condignam satisfactionem pro peccatò, quæ & illi, & cuivis puræ creaturæ est impossibilis. Tantæ enim malitiæ & gravitatis est quodvis peccatum mortale; ut nulla pura creatura possit pro eò ad æqualitatem satisfacere Justitiæ Divinæ. Nihil ergo restabat, nisi ut post peccatum Adæ, in omnes ejus posteros, origine transfusum, & post alia peccata personalia hominum, totum genus humanum, peccati ejusdem & quorumvis personalium mortaliū pœnas in infernò lueret æternas.

Infelicem hanc hominis sortem intuetur DEUS, cujus natura Bonitas, & qui non vult mortem peccatoris, sed magis, ut convertatur, reparetur, & vivat. Ne perderet quos condidit, cogitat de remedio, de eoque asserendo consultant omnes, Sanctissimæ

Sanctissimæ Trinitatis Divinæ Personæ, & cōmunicus hic esset modus, exhibendæ DEO ab homine condignæ satisfactionis pro peccato mortali, si aliqua ex Divinis Personis naturam creatam ratiōnalem assumeret, in eaque Justitiæ Divinæ satisfaceret; concluditur & decernitur, in eō Sanctissimæ Trinitatis consiliō, ut Filius DEI unigenitus, carnem humanam assumat, in eaque se humiliet usque ad mortem, eamque crudelissimam subeundo, satisfaciāt pro peccatis generis humani, Justitiæ Divinæ.

Consilium hoc, & decretum in tempore constitutō exequuntur, eadem Personæ Divinæ. Et imprimis Pater Æternus, ex amore quo genus humanum prosequitur, Unigenitum suum Filium, de quo postea ipse testatus est: *Hic est Filius meus dilectus, in quo mihi bene cōplacui*, mittit in mundum, ut carnem humanam assumat, ut in eā humilietur, indignè tractetur ab hominibus, morte crudelissimā occidatur, Sangvinem suum in Mundi pretium fundat, & Justitiæ Divinæ pro peccatis nostris satisfaciāt; *Sic DEVS dilexit mundum, ut Unigenitum suum daret.*

Admirare Divinæ Bonitatis & dilectionis, quā mundum dilexit, magnitudinem, misce gaudio lacrymas, super tantō amoris Divini excessu. Et illud tecum perpende, Deus ita dilexit Mundum, ut Unigenitum suum daret, & tu quomodo hætenus dilexeris DEUM? Quid DEI tui amore, & ad amorem tuum in DEUM comprobandum, feceris? quid deinceps facies? Ille proprio Filio non pepercit, sed pro te illum tradidit, fecit illum pro te immolari, & Tu non immolabis DEO illas creaturas, illos amicos, illas conversationes, commoditates, sensualitates, vanitates, quibus tantum inordinatō tuō affectū adhæcisti? Perpende & illud. Ut pro tuis peccatis, satisficeret Justitiæ Divinæ, necesse fuit

Filium DEI humiliari, contemni, crucifigi, crudelissimâ morte necari, & tutantorum criminum reus, abhorrebis à tui humiliatione & contemptû, fugies crucem, nec carnem tuam spiritui rebellem, mortificabis, non vindicabis in te scelera tua, nec per pœnitentiam satisfacies Justitiæ Divinæ, adimplendo quæ desunt passionibus Christi?

Fac proposita materiæ accômodata, variosque ex tanti beneficij æstimatione, elice affectus.

PUNCTUM II. Audi verba illa Gabrielis Archangeli ad MARIAM. *Ecce concipies & paries Filium, & vocabitur Altissimi Filius.*

Considera Secundam Personam Sanctissimæ Trinitatis Filium æternum, in negotiô reparationis hominis vel maximè operatam esse, ipsiusque amorem erga genus humanum singulariter in hoc elucere mysterio. Filius enim hic Unigenitus Patris Æterni, quando venit plenitudo temporis descendit in uterum Virginis. *Exultavit ut gigas ad currendam viam à summô calô egressio ejus.* Miser homo nesciebat miseriam suam, non cogitabat se mortis æternæ reum esse, non agnoscebat, vel minus apprehendebat latam in se æternæ damnationis sententiam. In tantis is ludebat periculis, in bonis transitorijs ducebat dies suos, exultabat in rebus pessimis, & peccata peccatis accumulabat, majorem contra se provocans indignationem Divinam.

Videt hæc Altissimi Filius, ad terras properat, ruentem in perditionis baratrum, servulum detinet. à dæmonis eruit faucibus ac ejus debita adæquatô exsolvit pretiô. Rem hanc ita describit mellifluus Doctor S. Bernardus serm. 3 in Natali Domini. *Ludebam ego foris in platea, & in secreto regali cubiculi super me ferebatur judicium mortis, audivit hoc Unigenitus DEI, exijt posito diademate, sacco indutus, aspersus cinere caput, nudus pedes, flens*

ejulans, quod damnatus esset servulus suus. O admirabilem charitatem Filij DEI! dum intelligit ferri in hominem, mortis sententiam, exit posito Diademate, hoc est illâ gloriâ & Majestate, in qua fuit ab æternô, Patri per omnia cœqualis, quodammodo relictâ, & per humilitatem carnis nostræ obscuratâ, saccum induit mortalitatis nostræ, aspergit cinere caput, quia repræsentat personam peccatoris, & cum ipse peccatum non fecerit, in personâ & nomine omnium nostrum, se Æterno Patri humiliat, atque Justitiæ Divinæ tanquam verus pœnitens, quæ non rapuit, exsolvit, & pro nostris peccatis condignam exhibet satisfactionem. Venit etiam nudus pedes, quia paupertatem divitijs, contemptum honori prælegit. Tandem venit flens & ejulans, Quia nostras miseras, nostros dolores, & infirmitates, non dedignatur, ut servum morte damnatum liberet.

Ex his consideratis, deduc practica dictamina, quæ insinuat idem S. Bernardus in memorato sermone. 1^{mo} seriô apprehendendam & magno animi sensû sentiendam esse infelicitatem, & pericula miseræ animæ, ex peccatô proventientia, quandoquidem Unigenitus DEI Filius tantam super his malis nostris exhibet compassionem. Pudet, è mente Bernardi, propriam negligenter dissimulare passionem, cui tantam à Majestate tantâ, exhiberi video compassionem. 2^{do} Ex consideratione tam præstantis & excellentis remedij æstimandam esse peccati gravitatem, & periculi in quod nos conijcit, magnitudinem. Nesciebam, sanus mihi videbar, & ecce mittitur Virginis Filius, Unigenitus DEI Filius, & jubetur occidi, ut vulneribus meis pretiosô sanguinis sui balsamô medeatur. Agnosce ô homo, quàm gravia sint vulnera, pro quibus necesse est, Dominum Christum vulnerari, si non essent hæc ad mortem, & mortem, sempiternam,

H;

nunquam

nunquam pro eorum remedio DEI Filius moreretur. ³⁷¹⁰ Si Unigenitus DEI Filius peccata tua deslet, si ad avertendam mortis, in te latam sententiam, saccum mortalitatis nostrae induit, si aspersus cinere caput, nudus pedes, exit flens & ejulans, hoc est si per tantam exinanitionem, & humiliationem sui usque ad passionem, & mortem crudelissimam, satisfacit Justitiae Divinae, pro tuis delictis, tibi servulo, inter mala propria, & in maximis periculis constituto, non esse ludendum, non esse ridendum, sed per poenitentiae lamenta, desendum esse infelicem statum animae tuae, & cum plorante DEI Filio plorandum.

Fac proposita dictaminibus conformia. Ellice affectus gratitudinis, & profundissimae gratiarum actionis Unigenito DEI Filio, quod tui gratiam non dedignatus est Virginis uterum, & unionem cum carne humanam: pro tam praestanti & efficaci remedio, malis tuis allato. Tandemque ad seriam poenitentiam verbis ejusdem S. Bernardi te excita. Ergone ludam & deludam lacrymas ejus, si insanus sum & mentis inops, non sequar eum, nec simul cum lugente non lugebo.

PUNCTUM III. Audi illa verba Gabrielis Archangeli ad MARIAM VIRGINEM, *Spiritus S. superveniet in Te, & virtus Altissimi obumbrabit Tibi.* Et considera circa Incarnationis verbi Divini Mysterium, non solum Patrem Aeternum operatum esse, ex dilectione, quam dilexit mundum, mittendo Unigenitum suum Filium; nec praeterea ipsum nonnisi Filium Aeternum operatum esse, assumendo carnem & infirmitatem nostram; sed insuper Spiritus S. sua operatione, ad tantum concurrat Mysterium, superveniendo in MARIAM.

Expende ulterius, in puncto praesenti, quid, & quae egerit circa Incarnationem Filij DEI, Spiritus S. superveniens in MARIAM? Egit & quidem plurima,

plurima. Egit *1^{mo}* illud, quòd in Sanctissimâ Virgine MARIA dignum Filio DEI habitaculum præparaverit, eam ab omni non solum culpæ actualis, & personalis, sed etiam originalis labe immunem præservando, gratiâ sanctificante amplissimâ, supra omnes puras creaturas intensiore, & excellentiore, alijsque donis infusis pariter intensis & excellentibus exornando: auxilijs item gratiæ actualis efficacis, & semper victricis, fortissimis & amplissimis muniendo & adjuvando. Egit Spiritus S. illud, in Sanctissima MARIA, quòd præcipuis quibusq; privilegijs nulli unquam Sanctõrû concessis, futurâ DEI Matrem decoraverit, eamque locupletaverit meritis & virtutibus.

Egit *2^{do}* Spiritus S. illud, quòd per missum ad eandem Sanctissimam Virginem Legatum Gabrielelem Archangelum, tractatum illum toti mundo optatissimum, de Verbi Divini Incarnatione, cum eâdem Virgine perfecerit & concluderit, quòd Virgini Castissimæ inspiraverit, eamque efficaciter permoverit, ut hospitium in uterò suò, Filio DEI incarnando concederet, suum purissimum Sangvinem pro carne DEI hominis offerret, & in opus tanti mysterij consentiret, illudque humilitate suâ acceleraret.

3^{io} tandem illud egit Divinissimus Spiritus: quòd ex purissimò Virginis sanguine, membra & corpus, quod Divinitas inhabitatura erat, efformaverit, quòd Sanctissimo huic corpusculo, animam, quæ illud animaret, infuderit, quod Naturam humanam Christi, ijs donis sive naturalibus, sive supernaturalibus, quæ digna essent Personâ Fili DEI, exornaverit, illaque copiosissimè contulerit, quòd per sacratissimam unionem hypostaticam Verbum Divinum, eidem Naturæ humanæ univerit, feceritque, ut purissima illa Virgo, MATER DEI diceretur & esset, imò esset non solum DEI hominis MA-

TER, sed etiam MATER omnium nostrum, Regina mundi, & Domina omnium Creaturarum, Mediatrix inter peccatores & suum Filium, Cooperatrix nostræ salutis, & perditionis generis humani Reparatrix.

His consideratis age gratias humillimas, singulis quidem Personis Divinis, pro Beneficiò Incarnationis, in hoc tamen punctò singularissimè age gratias Divinissimo Spiritui, pro tantò gratiarum & donorum, sive Humanitati Filij DEI, sive Matri ejus Sanctissimæ, sive per horum merita toti generi humano collatorum, pro tantò inquam & tam copioso ac superabundanti thesaurò. Et ex eadem consideratione hæc erue dictamina 1^{mò} Æstimandam tibi esse tuam à jugò servitutis peccati liberationem, pro qua, ut fieret, tantum actum est ab omnibus Sanctissimæ Trinitatis Personis. 2^{dò} Summò studiò curandum tibi esse, ut finem, ad quem creatus es, consequaris, postquam non solum repositus es illi statui, in quo eum consequi potes, sed insuper tot habes media, & adjumenta ad eum facilius & abundantius consequendum.

3^{iò} Post tantum remedium ad tui curationem allatum, nullam te coram DEO excusationem habiturum, si à fine tuo excideris, si in peccata relapsus fueris, & propter hæc æternæ damnationis supplicium incurreris.

Fac Propositia, elice affectus &c.

Colloquium ad Beatissimam Virginem DEI Parentem. Cui ex intimo cordis affectu gratularis, quod in DEI MATREM, ex omnibus & præ omnibus electa sit, tantis muneribus, & privilegijs decorata, quod Mater & refugium peccatorum facta sit. Supplica eidem humillime, ut te in suam protectionem recipiat, contra hostes animæ te potentissimè tueatur, postula item, ut virtute & efficaciam meritorum Filij sui, & suam Sanctissimam intercessionem, à tuis peccatis libereris, veram de illis poenitentiam

nitentiam agas, nunquam deinceps in ipsa relabaris, & tandem finem tuum, hoc est animæ tuæ salutem feliciter consequaris.

In fine Ave Maria.

Meditatio II.

De duobus Vexillis.

Praludium 1. Imaginare quòd consistas inter duos contrarios exercitus ad conflictum paratos, quòd oculis spectes Duces horum Exercituum, conscribentes militem & sub signa, quos possunt, vocantes, quòd audias personari classica, quòd fulgore armorum feriantur tui oculi.

Praludium 2. Pete à DEO gratiam, ut relictis castris illius Ducis, à quò non aliud stipendium sperare potes, nisi mortem & damnationem æternam, illum Ducem præeligas, qui certantibus reposuit Coronam Justitiæ.

PUNCTUM I. Audi verbâ illa Job. 41. de Luciferò dicta, *Ipse est Rex super omnes Filios superbia.* Hæc audiens, intueri in campò Babylónico, Luciferū vultu terribilem, in cathedrâ igneâ & fumosâ sedentem, hominesque ad sua castra invitantem, & ad ea per suos ministros deducentem, & quo alacrius eum sequantur, promittentem honores, voluptates, divitias, permittentem omnes licentias, atque his ipsis tanquam catenis confictos mortales ad se trahentem.

Circa quod ipsum ulterius expende sequentia. Imò Ducis pestilentissimi majestatem & proprietates. Est figurâ & vultu terribilis, quia ut describit illum Job. Cap. citato. *De ore ejus lampades procedunt, tanquam teda accensa, de nari-*
bus

bus ejus procedit fumus sicut olla succensa & ferventis. Est terribilis, quia totus est, ut noceat, ut omnes secum in perniciem trahat. Quia tantæ potestatis & fortitudinis est; ut non sit potestas super terram, quæ comparatur ei, qui factus est, ut nulum timeat. Est terribilis, quia per peccatum amisit omnem gratiam, quæ sola illum verè amabilem reddere potuit. Quia per peccatum turpissimè est deformatus. Sedet in cathedrâ igneâ, ignem enim spirat. Omnes ejus suggestiones, sunt ille halitus, qui prunas (hoc est homines talibus tentationibus succumbentes) ardere facit ignibus sularum concupiscentiarum. Tentationes ejus sunt flamma, de ore ejus egrediens, inflammas eos, qui hanc flammam protinus non excutiant nec extinguunt. Sedet in cathedrâ igneâ, quia ignis æternus ipsi & Angelis ejus est præparatus; hicque ignis ubique illum comitatur, ubique cruciat, hic ignis thronus & sedes, imò & domus ipsius est. Sedet in cathedrâ igneâ, quia in sequacium suorum cordibus, ignes & flammæ iracundiæ, libidinis, Avaritiæ, &c. perpetuò suscitatur.

Sedet in cathedrâ fumosâ, quia est Princeps tenebrarum, Quia quæ promittit sibi adherentibus, vana sunt, & sicut fumus evanescunt & deficient. Admirare cæcitatem hominum, quod pestilentem hunc Ducem tam multi sequantur, nec ab eò sequendò, tali ejus majestate deterreantur.

Expende 2dò Qui & quales sunt ministri hujus Ducis. Ministri ipsius sunt imprimis alij dæmones, æquè studio nocendi animabus flagrantés, atque Dux ipsorum. Ministri hi, sunt infensissimi animæ hostes, sunt Leones rugientes, qui continuò circumeunt, & quærunt ut aliquem devorent, sunt canes per suas tentationes, & suggestiones pravæ semper latrantes & sollicitantes, qui tamen mordere non possunt nisi volentem; sunt Lupi mactantes

tes & lacerantes, sunt Angeli colaphizantes, sunt Angeli mali transfigurantes se in Angelos lucis. Sunt lictores immanissimi, catenis, hoc est, nostris ipsis cupiditatibus nosmet vincientes, & vinctos in perniciem trahentes.

Ministri præterea pestilentis huius Ducis sunt homines mali, sive exemplò suò malò corruptentes alios, sive consilio aut alienæ virtutis persecutione, irrisione, sugillatione, à virtute deterrentes, & bonorum propositorum executione ac legum, sive Divinarum, sive humanarum observatione retrahentes. Tales omnes ministri, pestilentissimo illi Duci sunt gratissimi, sunt instrumenta Luciperi, per quæ ille plus subinde lucratur, quam per ipsos Dæmones.

Expende 3tò & Considera quoniam huic Duci adhæreant? ejusque castra sequantur. Sequuntur maximè filij superbiæ. Unde etiam Dux ipse dicitur esse Rex super omnes filios superbiæ. Sequuntur quidem castra Luciperi etiam alij, nimirum avari, gulosi, luxuriosi, invidi, iracundi, acriosissimi, sed maximè Ducem hunc sequuntur filij superbiæ, hoc est homines superbi, elati, de se multum præsumentes, sui honoris æstimatores, sectatores vanitatis, ambitiosi &c. Quia tales milites in suis castris plurimos Dux ille numerat. Et licet plures ipsorum, alia vitia ad hæc castra traxerint, in eis tamen tenet eos superbiæ, dum suos errores damnare & corrigere nolunt, dum se non humiliant sub potenti manu Dei, nec humili confessione suorum peccatorum, excutiunt jugum superbi illius Ducis. Aut etiam omnes peccatores ex eo sunt filij superbiæ, quia sunt filij ex Patre diabolo, qui ab initio superbus fuit, progeniti.

Expende 4tò Quas leges statuatur suis affeclis Dux ille impius, quos militares articulos? Hæc unica ipsius lex est, ut qui sub castris illius militant, sine

sine Deo & sine lege vivant, ut in omnibus suis cupiditates expleant, ut suorum appetituum & inclinationum sensualium sive passionum sint servi, mancipia, ut tanquam muta animantia in his, quæ naturaliter norunt, corrumpantur, tandemque ut his qui sua castra sequuntur, nulla sit fides pietasque; O Legem immanissimam.

Expende 5to Adversus quem hostem, exercitus tam numerosus à malitiosissimò hoc Duce colligitur? Et noveris non contra hostem, sed contra Deum, legitimū Principē & Dominū, contra Creatorem, Patrem & munificentissimum Benefactorem, totum hunc exercitum congregari. Non alia mens est iniquissimi Ducis, nisi Deo bellum inferre, eum impugnare, laudem ipsi eripere & gloriam ejus tollere. Hoc propositum, & immutabile decretum Ducis improbi est, Deum ex suo soliò, hoc est ex cordibus & animabus hominum, in quibus tanquā in suā sede per gratiam residet, exturbare. Movet præterea sua castra idem Dux, contra justitiæ & virtutis amatores, ad expugnandam virtutem, eam è cordibus mortalium penitus ejiciendam, ut servituti Ducis hujus, totum hominum genus subijciatur & in æternam trahatur perditionem.

Expende 6to Quæ præmia quæ stipendia Dux iste daturus sit suis Militibus? Non alia stipendia solvit ille, nisi ipsa peccata, cupiditatum expletiones, vanitates, voluptates momentaneas &c. Hæc autem ipsa consequitur aliud stipendium, illud nimirum, cuius meminit Apostolus, *Stipendiū peccati mors*. Mors inquam Animæ, non solum per amissionem gratiæ Sanctificantis, sed etiam mors secunda per amissionem vitæ æternæ.

His expensis, Reflecte te, An & tu sub signis hujus Ducis non merueris stipendia, vel etiam nunc non merearis? An Dux ille ex cathedrâ suâ igneâ & fumosâ non fuscitet in te cupiditatum tuarum
 ignes,

ignes, an tibi non propinet vanitatum fumos? Reflecte te 2^{dò} An hujus pestilentis ducis non fueris aliquando minister, & instrumentum, siue pravo exemplò corrumpendo alios, siue perversis pseudopoliticis principiis, consiliò & suasionem inducendo in legum Divinarum, vel humanarum transgressionem, siue virtutis alienae sugillatione & perstriktionem, à virtute, bonis operibus, & perfectione deterrendo. Reflecte te 3^{iò} An non sis filius superbiæ, an non sentias aliam legem in membris tuis, repugnantem legi mentis tuæ, captivantem te in lege peccati. Tandem te reflecte quæ stipendia ab hoc duce acceperis, an non sensualitates, voluptates prohibitas, an non vanitates & commoda studiosius à te quæsitæ? An mors animæ, amissio gratiæ, non fuerint stipendium tuum?

Confundere coram DEO. Fac proposita: Ejura & detestare castra & signa Dæmonis. Postula ut DEUS, te, potenti manû suâ eruat, ex servitute Diaboli; & ad Christi castra transferat.

PUNCTUM II. Audi illa verba Patris æterni de Christo, Isaïæ 55. *Ecce testem populi dedi eum Ducem ac præceptorem gentibus.* Et imaginare, Christum tanquam Ducem summè amabilem, in loco humili constitutum, in amplò & amænò juxta Hierosolymam, Campo, sua signa explicare, & sub ea omnes invitare Mortales: expedire etiam suos ministros, ut omnes homines, ad se congregent & sub sua convocent signa.

Expende iterum 1^{mò} Qualitates Ducis Christi. Dux iste est Rex regum, & Dominus Dominantium, cui omni titulo famulari, & sub ejus signis militare obligaris. Est Dux amabilissimus, quia speciosus formâ, præ filiis hominum, quia omnis figura ejus, amorem spirat, quia non suum bonum & emolumentum, sed nostrum bonum quærit. Quia non vult mortem cujusquam, sed ut, omnes

vitam habeant, & abundantius habeant. Quia hic ipse Dux, vulnera nostra alligat & sanat, ipse Pharmaca propinat, ipse transit benefaciendo & sanando omnes. Est Dux amabilissimus, quia omnia providet suis militibus, vires & robur suppeditat, ut vincant & triumphent, Explicat signa sua, in loco humili constitutus, quia & consiliis a se datis & propriò exemplò humilitatem suos milites docet, Docet ab hoc inchoandum esse, in illâ, toto vitæ tempore consistendum, nec aliter Ducem superbiæ nisi humilitate debellandum. Explicat signa sua in campo: nimirum infirmitati nostræ condescendendo, planâ & facili virtutis viâ, accedentes milites ducit, ut postea ad sublimiorem perfectionem, & sanctitatis elucentur fastigium. Explicat sua signa, in amplo campo, per quod ostendit, eos qui Christi Ducis signa sequuntur, amplissimum habere campum exercendæ virtutis, faciendi in viâ perfectionis, progressûs, habere item omnem commoditatem debellandi hostis, metendi palmas, laurus, & triumphales coronas, atq; fructû centuplum colligendi. Explicat sua signa, in amænô, juxta Hierosolymam, campô, quia illis, qui Christum sequuntur, amæna sunt omnia, consolationibus abundant, & casta, eâq; verâ fruuntur voluptate. Consistunt tales, juxta Hierosolymam quæ, visionem pacis significat. Quia hi, pacem cum DEO colunt & custodiunt, de illâque, ex conscientia suæ testimoniô, sunt securi, imò eam quodammodo intuentur & vident. Et exinde serenitate animi, & magnâ, conscientia, fruuntur tranquillitate. Signa quæ Christus explicat, sunt crux, flagella, spinæ, omniaq; Passionis Christi instrumenta, quæ licet aspera videantur, consolationibus tamen cælestibus, quibus condiuntur, redduntur, suavia & amæna.

Expende 2dò Quos & Quales ministros habent

beat Dux iste Sanctissimus, per quos, sub sua signa milites convocat. Ministri ejus sunt Sancti Angeli, quibus, de unoquoque nostram mandatum est, ut eum custodiant in omnibus vijs suis. Hi, sub signa Ducis hujus invictissimi vocant nos, per internos instinctus, excitando unumquemq; ut Christo serviat, ut sub ejus signis militet, & stipendia mereatur. Ministri Ducis hujus sunt præterea Sancti Apostoli, Prædicatores Evangelij, omnesq; alii circa salutem proximorum laborantes, qui non solum verbô & doctrinâ, erudiunt multos ad justitiam, & viam DEI, in veritate docent, sed etiam bono exemplô provocant alios, ut glorificent Patrem, qui in cælis est

Expende 3rò. Quinam, Duci huic adhæreant & castra ejus sequantur? Adhærent Christo, qui non adhærent nec acquiescunt carni & sanguini, qui exuunt omnem sæculi affectum, qui Diabolo & operibus ejus renuntiant, qui abnegant semetipsos, crucem Christi tollunt, carnem suam cum concupiscentijs crucifigunt, & Christi mortificationem, in suo corpore, semper portant. Ducem hunc cælestem sequuntur, qui armis ab ipsô ministratis utuntur, ad debellandum hostem, qui induuntur loricâ justitiæ, sumunt scutum fidei, assument galeam salutis, pugnantq; in gladio spiritûs, qui Christi vestibus & insignibus, pro ejus amore & reverentiâ utuntur, optantq; contumelias, falsa testimonia & injurias pati, ac stulti haberi & reputari.

Expende 4rò. Quas leges Christus, suis militibus statuatur? Leges militum Christi, sunt per omnia contrariæ legibus Ducis infernalis. Leges militum Christi sunt: *si vis ad vitam ingredi, serva mandata: si vis perfectus esse, vade & vende omnia, & sequere me.* Lex militû Christi est, quàm perfectissimè imitari Ducem suum, ut quemadmodû ille

fecit, ita & milites ejus faciant. Lex militum Christi est: Ducis sui insignibus indui, abnegare seipsum, crucem suam tollere, & consilia Evangelica implere.

Expende 5to. Contra quem hostem Dux Christus colligit suum exercitum? Hostes hi sunt concupiscentia carnis, concupiscentia oculorum, superbia vitæ, seu caro, mundus, & Diabolus, hi hostes contra quos, militibus Christi pugnandum est, sunt quæcunque vitia, pravæque nostræ inclinationes, Passiones, & habitus. Contra hos hostes, die ac nocte decertandum est: victoriæ de his hostibus reportandæ: dummodo aggredi eos, & strenuè contra ipsos pugnare velimus, spem nobis facit Dux noster, suôq; animat exemplô: Confidite, ego vici mundum.

Expende 6to. Quæ præmia, quæ stipendia, Dux Christus daturus sit suis militibus? Et ab ore ipsius discite: *Non quemadmodum mundus dat, ego do vobis.* nimirum longè diversa esse stipendia Ducis Christi, & Ducis Babylonici. Dux Babylonicus, in stipendium dat voluptates momentaneas, Christus, æterna gaudia: ille, transitorias divitias, Christus thesauros indeficientes in cælis, ille honores mundi, & gloriam transeuntem: Christus, gloriam cælestem, & honorem illum, quô, nimis honorati sunt amici tui DEUS: stipendium & merces militum, Duci Babylonico adhærentium, sunt bona extrinseca, sensualia, temporanea: stipendium militum Christi, est gratia Divina sanctificans, & dona DEI supernaturalia, gaudium, pax, conscientiae tranquillitas exsuperans omnem sensum, consolationes internæ & spirituales, visio DEI perpetua & amor ejus Beatificus. Stipendium, quod suis solvit Lucifer, est mors, perditio & damnatio æterna: Stipendium, quod Christus solvit, est vita, salus, & æternum in cœlis præmium.

His expensis, iterum tecum dispice an sis Christi miles. Decurre singula quæ expendisti & facile advertes an ad signa & castra hujus Imperatoris pertineas.

Elice affectus, forma proposita, pete à Christo, ut te inter suos milites connumeret.

PUNCTUM III Audi illa verba Eliæ Prophetæ 3tij Regum 18. *si Dominus est DEUS, sequimini eum, si autem Baal, sequimini eum*, Et considera ex his duobus Ducibus quorum unus est Christus alter Lucifer, alterutrum omninò cuivis adeoque & tibi eligendum & uni ipsorum adhærendum esse. Nequè enim fieri potest, ut quis utrumq; hunc Ducem sequatur, cum hi duces sibi sint per omnia contrarii, unus incessanter oppugnet alium, eiq; omni conatu & viribus adversetur. Non potest etiam fieri, ut quis sit neutrarum partium, & neutri ex his ducibus adhæreat, siquidem Veritas dicit. *Qui non est mecum, contra me est*. Et S. Augustinus expressè affirmat: *Aut cum Christo, aut cum Diabolo nos esse oportet, non est locus medius*.

Quisnam vero ex his ducibus eligi debeat, ex adductis Prophetæ verbis, facile intelligi potest. Nimirum illi duci adhærendum est, & sub ejus signis militandum, qui DEUS Tuus est. *si Dominus est DEUS, sequimini illum*. Tum quia si Dux ille, quem secutus fueris, DEUS est, eò ipsò Bonitas imò fons omnis boni, adeoque summè amabilis, & per consequens summè dignus est, ut illi adhæreas. tum quia si Dux tuus DEUS erit, eò ipsò est sibi sufficientissimus, bonorumq; tuorum non indiget, adeoque si vult ut eum sequaris, in hoc ipsò non suum sed tuum bonum quærit & intendit. Tum quia si Dux tuus DEUS est, bellum quod hostibus ejus inferes iustissimum erit, victoria indubitata, præmium certissimum & merces superabundans.

Cum ergo Dux Christus

Deus

DEUS fit: DEI Filius, DEUS verus de DEO verò, Dux verò Babylonicus fit creatura, eaq; ratione peccati, & odij, quò DEUS ipsam, & vicissim illa DEUM prosequitur, ac etiam ratione suæ æternæ damnationis vilissima & infelicissima, clarum est Christum in Ducem tibi & omnibus eligendum esse.

Sed forte dices per hoc ipsum, quòd Christianus sis, pridem te Christum in Ducem elegisse. Utinam verò ita sit, sed hoc adhuc necessarium est, ut Christum non à longè solum sequaris, sed ut illi adhæreas, ut illum assequaris, quid enim prodest Christum sequi, si non contingat consequi, necessarium est ut non solum professione, quia Christianus es, sed etiam re ipsâ, Christum sequaris. Multi siquidem etiam Christiani ad pestilentem Ducem pertinent, qui nomen habent quod vivunt & mortui sunt, qui ore & fide confitentur DEUM & Christum, factis autem negant, necessarium autem est, ut si etiam re ipsâ secutus fueris castra Ducis Christi, ut constanter hæc sequaris, ne illa per peccatum aliquando deseras, & ne ad hostiles partes te transferas.

Fac reflexiones quæ ex præsentī consideratione erui possunt, protestare quòd velis militare sub Christi signis, Duciq; huic sanctissimo adhærere, & nunquam ab eo avelli.

In Colloquio pete suppliciter à Patre æternò ut ille te potenti suâ virtute & gratiâ, trahat ad Christum, ad quem nemo potest venire, nisi Pater æternus traxerit illum, nemo eidem potest firmiter adhærere, nisi ipse tenuerit eum.

Pete etiam à Christo, ut ille te ad se attractum suscipiat in suum militem, inferno terribilem efformet, nec te unquam separari à se permittat.

In fine, Anima Christi

Meditatio III.

De tribus hominum Classibus.

Preludium I. Imaginare à diversis Christo Domino proponi illam quæstionem: *Magister quid faciendo vitam æternam possidebo.* Proponitur à Legisperito Lucæ 10. Quæstioni quæstionem opponit Christus: *Quid in lege scriptum est* & solis diversis interrogationibus, res tota absolvitur, nec quidquam præterea egisse Legisperitus scribitur.

Proponit deinde eandem quæstionem dives aliquis Princeps Lucæ 18. cui cum Christus respondisset, ut non contentus observatione mandatorum, venderet omnia, daret pauperibus, & Christum sequeretur, audiens hæc idem Princeps cum non ad suum votū essent, contristatus recessit.

Preludium II. Pete à DEO gratiam quā à DEO illumineris: quomodo in negotiō salutis & perfectionis tuæ, te gerere debeas.

PUNCTUM I. Audi illa verba Proverb: 21. *Desideria occidunt pigrum, noluerunt enim, quidquam manus ejus operari: totā die concupiscit & desiderat.* Et considera, his Scripturæ verbis descriptos esse illos homines, qui in divisione hominum, de suā salute, aliquomodo cogitantium, in tres hominum classes à S. JGNATIO factas, ad primam hominum classem spectant. Hanc, dictus sanctus Pater, in suō exercitiō de his classibus, alijs verbis, sed sensu eodem, sic describit. *1ma* classis optat quidem acquisitæ rei exuere affectum, ut conciliari DEO possit; sed media & adminicula, totō vitæ tempore non admovet.

Classis hæc optat acquisitæ rei exuere affectum, optat conciliari DEO. En-desideria! idque bona & pia desideria: quia, ad salutis negotium spectantia. Quia verò, non admovet media & ad-

minicula, habes hominem pigrum: cujus manus nolunt operari quidquam. De pigro dicitur: vult & non vult piger. Tales homines sunt ad primam classem spectantes: illi pariter unum idemque volunt & nolunt. Volunt: quia optant exuere affectum ad res creatas: quia optant conciliari DEO. Nolunt: quia manus eorum nolunt operari quidquam: quia media & adminicula non admovent, sine quibus, finis non obtinetur: & quæ nolle adhibere, est nolle ipsum finem consequi.

Hujusmodi desideria inefficacia occidunt hominem pigrum, ipsoq; homines ad primam classem spectantes perdunt. Dum enim negligunt media salutis, non consequuntur salutem, Tales non habent excusationem in peccatis suis. sed sicut illis Philosophis, qui, cum cognovissent DEUM, non sicut DEUM glorificaverunt, sed evanuerunt in cogitationibus suis, cognitio ipsa DEI, ita sterilis & infructuosa, fuit in majorem condemnationem, ita eos, qui in desideriis suis, circa res salutis & perfectionis evanescunt, nec illa exequuntur, aut media adhibent, hæc ipsa desideria condemnabunt & occident.

Hujusmodi homines, sunt infirmi illi, qui ita appetunt sanitatem, ut respuant omnes medicinas, quibus, si non utantur, nullâ ratione sanari possunt. Sunt faucij, qui membri corrupti & pestilentis, suum virus, in corpus reliquum diffundentis abscissionem nullatenus pati volunt, cum tamen curari exoptent. Sunt naufragantes, qui ita ex naufragio enatare volunt, ut tabulam, si oblatam, qua salventur, nunquam arripiant & sic infelicitè pereant.

Illud vel maximè dolendum, quòd totâ vitâ non adhibeant media: quòd totâ die concupiscant & desiderant, & interim nihil manus eorum, operentur. Differunt executionem suorum desideriorum

sideriorum, propositorum, differunt poenitentiam & fructuosum circa salutem laborem, ad horam 11. diei, hoc est ad finem vitæ: sed quia noluerunt quidquam operari, cum, per bona desideria excitarentur à DEO, in pœnam talis procrastinationis, DEUS permittit, ut de die in diem, executionem desideriorum differendo, in finali impœnientiâ moriantur, adeoque quòd talia desideria ipsos occidant.

Fac reflexionem supra tua proposita, quæ sæpius elicis, sive in Sacramento poenitentiae, sive dum accedis ad Sacramentum Eucharistiæ, sive in examinibus conscientiae tuæ, in meditationibus rerum cælestium alijsque occasionibus: An hæc exequaris: an de exequendis seriò cogites: an media & adminicula abhibeas? An post repetita toties, hujusmodi proposita, vitam tuam corrigas: an non immediate statim in eisdem relabaris defectus? Vide ne hæc proposita ita inefficacia & inutilia, te mergant in interitum & perditionem.

Excute aliquando, ô! Anima mea noxium hunc torporem. Manum operi admove & ut desideria ac bona proposita tua, quam primùm exequaris, toto conatu allabora. Adhibe indufrias, adverte, quid maximè impediatur, propositorum tuorum executionem: atq; hæc impedimenta amove, vince humanos respectus, vince vanos metus, vince difficultates. Adverte etiam quæ te media, maximè juvare possunt ad exequendum, quod proponis & desideras; & quæ opportuniore ac efficaciora videbuntur, illa assume, ac teipsum urge, ut incipias: urge cum inceperis, urge iterum ut coepta perficias, nec à labore circa salutem & perfectionem tuam, unquam desistas.

Supplica Divinæ Omnipotentiae, ut non quomodocunq; tua proposita & desideria confirmet, sed ut efficiat, quatenus illa opere compleas; & ut invictâ ac insuperabili virtute gratiæ suæ, tuam,

quantumvis rebellem voluntatem, compellat, ad exequendum suæ voluntatis beneplacitum,

PUNCTUM II. Audi illa verba Marci 10. *Aecedunt ad JESUM Jacobus & Joannes, filij Zebedai dicentes: Magister volumus ut quodcundq; petierimus, facias nobis.* Et considera, hos duos Apostolos taliter Christum alloquentes, esse secundæ classis hominum, quam sic describit S. Pater JGNATIUS. Secunda (intellige hominum classis) affectum malè ordinatum auferre cupit, sed rem ita mordicùs tenere, ac DEUM potius trahere ad votum proprium, quàm relietò impedimentò, per conduci- bilio- rem statum, ad illum tendere.

Fac comparationem cum illis duobus discipulis, hominum secundæ classis. Accedunt illi ad JESUM, hi affectum malè ordinatum auferre cupiunt, quòd desiderium, est quidam motus & accessus ad DEUM. Dicunt illi: volumus ut facias, hi rem mordicùs tenent: utrique non contenti solis desiderijs, voluntatem efficacem habere & ad media adhibenda progredi videntur. Illi volunt, ut quodcundq; petierint, DEUS homo Christus ipsis faciat: hi pariter volunt trahere DEUM ad vota sua, hoc est, ut DEUS faciat, quòd ipsi volunt. In particulari, duo illi Discipuli Jacobus & Joannes petebant, ut sederent in glorià & Regnò Christi, unus ad dexteram, alter ad sinistram, de laboribus verò, de cruce ferenda, de bibendo calice passionis, ne cogitabant quidem. Etiam hi, nimirum, qui, ad secundam hominum classem spectant, in votis habent, ut per honores, gloriam, bonam famam, æstimationem, munia & functiones honorificas, ac per omnes commoditates ducantur, ut in ulteriori vitâ suâ tanquam in monte Thabor gloriose transfigurentur & ad hæc vota sua, DEUM trahere volunt. Non cogitant verò, quòd, hæc sint impedimenta, ne ad DEUM perveniant, quòd

quòd, conducibilior modus perveniendi ad DEUM fit contentū esse his, quæ de ipsis DEUS statuerit, & plenè se relinquere voluntati & dispositioni Divinæ.

Discipuli illi duo reprehensionem Christi, aliorū verò Apostolorū indignationē promeriti sunt. Hæc merentur & illi, qui in electione mediorum, per quæ ad DEUM perveniant, DEUM ad sua vota trahere & inclinare conantur. Certè magna fatuitas & dementia est, primæ & infallibili regulæ, voluntati Divinæ statuere, pro regula arbitrium & voluntatem creatam, cui illa, se conformare debeat: supremo Legislatori legem ferre, quam sequatur: velle ut Dominus universorum dependeat a placitō & nutū vilissimi sui servuli & mancipij: Regi sæculorum præscribere modum, quo mundum, & te gubernet, coronam illi detrahere: & de throno suo ipsum deturbare velle: Increatam docere sapientiam, quid illa facere, & per quæ media, te ad finem tuum ultimum, & ad se perducere debeat. Non toleranda indignitas est, quòd pulvis & atomus intumescat, & in montem exrescere velit, quòd lutum & figmentum contra fictorem suum expostulet, ut ex se, vas non in contumeliam sed in honorem efformet, quòd vile lignum, scipionem manibus nobilissimis gestandum, ex se, elaborari potius quàm titiōnem exambiat.

Dum DEUM, ad vota tua trahis, tanquam insanus & mentis inops puer, cultrum petis, quo te faucies: tanquam naufragus, ferrum vel molarem lapidem postulas, non ut enates, sed ut mergaris facilius, tanquam æger phreneticus, non medicinam, sed venenum appetis, quò te conficias: tanquam viator viæ ignarus, Ducē cæcum, quia cæcā tuā voluntatem eligis, quæ tibi, nonnisi est futura dux in præceps.

Hæc considerans reflecte te, an non sis ex hac hominum classe: an non trahis ad vota tua

DEUM? An ut ad DEUM pervenias non eligis media, quæ tibi magis placent, quæ magis ardent sensualitati & inclinationi tuæ, atque amoris proprio? An non dicis cum Petro: *Domine jube me venire ad te super aquas*: an, dimissâ naviculâ quâ securè potes ad Christum & felicem portum pervenire, non vis ambulare super aquas? hoc est, an omissâ viâ asperâ, saxosâ, non eligis viam mollem & facilem: ideoq; mari & aquis te commit- tis, non attendens firma & fixa vestigia, te, in hoc elementô in tali viâ, in tali statû figere non posse, nec prius te ambulare super aquas, quàm incipi- as mergi, & fluctibus absorberi.

Expressius loquendo reflecte te, si necdum in certô vitæ statû, es constitutus, an non velles ad eum te vocari, ad quem te vitia tua ducunt, ad quem inclinant rationes humanæ, respectus vani, amor proprius sensualis. An ad talia vota non velis DEUM trahere. Quòd si jam, in determi- nato, vitæ statû es constitutus, quisquis demum il- le est, cogita quid in tali tuô statû quæras? quid in- tendas? Quæ vota, quæ desideria tua? fortassis velles, ut DEUS te ducat viâ rosis confitâ, viâ molli & facili, per honores, per ministeria hono- rifica, per plausus, magnum nomen, bonam fa- mam, æstimationem talentorum, per pretium & amorē tui apud omnes, valetudinē firmâ & integrâ, commoditates sensuales, opes, divitias & similia.

Erubescere tantam tuam imperfectionem. Detestare & corrigere stude defectus, quos adver- tes: protestare, quòd optes & desideres, ut deinceps non tua, sed DEI voluntas fiat, ut cum DEO, ita tibi sit unum velle & nolle, ut tua voluntas, Divi- nam semper sequatur, illiq; tanquam suæ Regulæ, in omnibus conformetur.

PUNCTUM III. Audi illa verba Apostoli 1. Corinth.
10. *Sive manducatis, sive bibitis sive aliud quid faci-*

tis, omnia in gloriam DEI facite. Et considera, eos, qui juxta hanc Apostoli doctrinam, in omnibus suis actionibus, gloriam DEI quærunt, & intendunt, in tertiâ hominum classe constitui, quam sic explicat S. Pater JGNATIUS. Tertia classis affectum insincерum volens abijcere, rem ipsam vel tollere vel tenere, æquè parata est, prout ad Divinum cultum commodius fore, vel ex Divinò instinctu vel ex rationis dictamine animadverterit: nec aliam admittit relinquendæ aut retinendæ rei acquisitæ causam, præter rationem ac desiderium Divinæ gloriæ, ut quàm maxima sit. Circa quam hominum classem.

Considera ulterius Imò. Insincерum affectum non abijci, nisi per indifferentiam, & animi præparationem ad volendum vel nolendum id, quòd cum gloriâ DEI fore, ex Divinò instinctu & rationis dictamine intelligitur. Insincерus affectus est, quò non sincerè DEO adhæremus, non sincerè eum amamus. Qui sincerè DEUM amat & quærit, amat & quærit gloriam ejus, nec qualicunq; contentus est Divinâ gloriâ, sed quærit, ut quam maxima sit: non adhæret affectu, creaturis, nec aliter ipsis afficitur, nisi, in quantum conferunt ad cultum, gloriam, & amorem DEI, ac ista, magis ac magis promovent.

Considera 2dò Indifferentiæ hujus, per quam, abijciendus est affectus insincерus, in obsequiò DEI, resolutorium & regulam, secundum quam, eadem indifferentia tolli & determinari debet, non aliam esse debere, nisi gloriam DEI, ejusq; cultum, ita ut cum, te reduxeris ad plenam & perfectam indifferentiam, ex vi cujus, paratus sis ad id volendum vel nolendum, quòd cum gloriâ DEI est futurum, non ad aliud quid attendere debeas, ut te ad unum determines, nisi unicè ad laudem & gloriam DEI, ut unica, & non alia sit causa motiva omnium
vol-

volitionum & electionum tuarum, nisi ratio, spes, desiderium gloriæ Divinæ; ut hæc sit quam maxima: et ex his, ad quæ es indifferens, illud eligas, quod confert & conducit ad finem majoris gloriæ Divinæ.

Considera 3tio In his quæ circa te eveniunt dependentque non tam à tua, quam à Divinâ vel etiam creatâ quacunque voluntate; à te autem eatenus dependent, ut ea acceptes, eisq; ad cultum & gloriam Divinam utaris; qualia sunt: bona valetudo vel infirmitas, longior vel brevior vita, opes seu divitiæ, vel paupertas, honores, plausus, æstimationes, vel contemptus; in his inquam antequam eveniant, hæc tenenda est regula. Oportet te indifferentem & æquè paratum esse ad id, quod è majore gloria DEI sive ipsum beneplacitum Divinum, sive arbitrium voluntatis, & cujuscunq; potestatis creatæ determinabit, & ad DEI gloriam conferre censebitur.

Postquam verò aliqua evenierint, ea, quæ te magis assimilant Christo pauperi, contempto, humiliato, nostras infirmitates perpeffo, & viâ crucis ac tribulationis te progredi faciunt, hæc inquam libenter acceptare convenit, in his singularis habendus est gustus, persvadendumq; tibi est, per hæc, gloriam DEI quàm maximè promoveri.

Ab his verò, quæ circa te eveniunt, & videntur amoris proprio & corruptæ naturæ inclinationibus congruere, quæ cui DEUS confert, censetur illum molliori sed simul periculosiori viâ ducere: qualia sunt sunt bona valetudo, speciosa officia, honoratiora munia, felix functionum successus, plausus, respectus & affectus hominum &c: ab his inquam abhorrere, taliaque beneficia Divina timere convenit, An etiam aliqua acceptari expediat, magnâ deliberatione opus erit. Quodsi, non erit tuæ potestatis illa declinare, cautè per hæc incedendum est, tibiq; mul-

tum

tum invigilandum, ne te amor proprius decipiat; ne visco vanitatis inhæreas; omniaq; hæc magno studio, in DEI gloriam, ut hæc per te, ac illa omnia promoveatur, ordinanda erunt. In ijs verò, quæ à tuâ electione & voluntate immediate dependent, ut sunt, electio certi & determinati, vitæ statûs, acceptatio vel contemptus honorum, & dignitatum, statui tuò non repugnantium, intra statum, in quò constitutus es, electio vitæ perfectioris : in his inquam & similibus, præ oculis, unicè habere debes gloriam Divinam, illudq; eligere, quod ex Divinò instinctû, vel rationis dictamine, adverteris futurum, cum DEI gloriâ majore.

Considera 4to Per Divinum instinctum deprehendi, esse vel fore cum majore DEI gloriâ, quando acribus stimulis & forti voluntatis impulsu, de quò judicas prudenter, impulsu Divinum esse, sentis te impelli ad hoc potiùs, quàm ad aliud eligendum; idq; non ob alium finem, nisi unicè, ob finem gloriæ Divinæ promovendæ; quam hac ratione promovendâ esse magis, quàm per oppositû persuades tibi, ex internâ Divinâ illustratione. Per dictamen verò rationis, id ipsum deprehendis, quando, factò aliquò intellectûs ratiociniò, & experfis rationibus ac motivis pro utrâq; electionis parte, Divinò lumine illustratus, & auxiliò supernaturali adjutus, advertis rationes fortiores & validiores esse, pro unâ potiùs, quàm pro alterâ parte : Et quòd, talis electio conducibilior sit ad cultum Divinum, ejusq; majorem gloriam.

Considera 5to Hanc classem hominum esse, in quâ, omnes nos esse oportet, ut salutis nostræ certi & securi esse possimus. Laboriosum hoc promovendæ Divinæ gloriæ studium, esse unicam tabulam qua inter frequentia, vitæ hujus mortalis pericula, imò naufragia, salvari, & ad felicem, æternitatis portum, enatare possumus. Spes & desiderium

rium gloriæ Divinæ, est stella illa, ad quam, dum procellosum hoc navigamus mare, respicere, & quâ cursum nostrum dirigere oportet : Est medicina probatissima, quâ, vitam animæ nostræ servamus, omnesq; morbos, & infirmitates depellimus.

His consideratis, reflecte te ad singula, qualiter te, hac in parte gesseris hætenus, qualiter deinceps gerere debeas. Præpara animam tuam ad Cruces, tribulationes, persecutiones & confusiones: hæc enim tritissima & securissima via est, assequendæ gloriæ Divinæ. Nihil faciendum aggredere, nisi quod cognoveris, conferre ad DEI gloriam, camq; promovere.

Elice affectus confusionis, desiderij promovendi quàm maximè gloriam Divinam, hancque unicè respiciendi, in omnibus tuis actionibus. Erue ex his omnibus considerationibus, & reflexionibus, convenientia proposita, illorum exequendorum tempora, occasiones, circumstantias & modum designa.

In colloquio Postula à DEO gratiam ut iuxta illud Isaïæ 48. *Laude mea infranabo te, ne intereas*, ut inquam te laude & gloriâ suâ infranet. Confitere te tanquam indomitum equum, tuis pravis inclinationibus & malâ voluntate in præceps in interitum ferri, & nisi, te hōc frænō detinuerit manus Divina, omnino peritutum. Solus DEUS efficere potest, ut non intereas, ut in omnibus illi consentias, si te tali circumduxerit frænō.

In fine, Anima Christi.

DIEI VI.

Meditatio I.

De tribus modis seu gradibus
Humilitatis

Præ

Preludium 1. Imaginare Christum humiliatū usque ad pedes Judæ, humiliatum item cum exhibitione sui, usque ad mortem Crucis.

Preludium 2. Postula gratiam, quā illuminatus, cognoscas in quō stet vera humilitas, ut illam consequi possis.

PUNCTUM I. Audi illa verba Matth. 19, *Si vis ad vitam ingredi serva mandata.* Et illa 1. Petri 5 *Humiliamini sub potenti manu DEI.* Et considera primum modū humilitatis consistere in hoc, ut DEO aliquid prohibenti, vel præcipienti, sub obligatione peccati mortalis, humiliter obediamus, & talia ejus præcepta, imò & præcepta, humana sub mortali obligantia, sanctè observemus, quæ servare est humiliari sub potenti manu DEI, sub illâ scilicet, quæ potest animam mittere in gehennam. Hunc humilitatis gradum S. Pater Ignatius his proponit terminis: *Primus Humiliatis modus hic est ad salutem necessarius, ut me penitus subdam Divinæ legi observandæ, atque ut Mundi quidem totius oblatō mihi Dominiō, vel extremō vitæ discrimine obiectō transgrediar ex deliberatō mandatum ullum Divinum vel humanum, quod quidem peccati mortalis vinculo nos obliget.*

Expende singula. Et *Imprimis:* Observatio hæc mandatorum, sub peccatō mortali obligantium, est vera humilitas, est enim subjectio Creaturæ rationalis, suo Creatori, tanquam supremo Domino & Legislatore, cū recognitione supremæ ejus potestatis, idque est subjectio in rebus difficilibus, quia in rebus sensui repugnantibus, idque cum jacturâ & dispendiō totius mundi, imò cum ipsius etiam vitæ discrimine, est subjectio non solum legibus Divinis, sed etiam humanis, si tam hæ, quam illæ, obligent sub mortali.

2do Hic modus humilitatis, est necessarius ad salutem, nam impletio & observatio mandatorum,

requiritur, ut quis salutem consequatur. Dicit enim Veritas æterna: si vis ad vitā ingredi, serva mandata.

3^{tiò} Hic modus humilitatis requirit in nobis eam animi constitutionem, ut æ oblatō quidem totius Mundi dominio, vel vitæ discrimine objectō, resolvat se quis ad transgressionem præcepti sub mortali obligantis. Quare ad perfectionem hujus gradus non sufficit, ita legi sub mortali obliganti subijci, ut illam deliberatè non transgrediamur, si ad transgressionem invitetur, brevi, & momentaneâ voluptate, si invitetur privatō aliquō & particulari emolumentō, & lucrō moderatō bonorum fortunæ, vel famæ, & honoris, sed, ut quis primum humilitatis conscendat gradum, necessarium est, ut ne totius quidem Mundi Dominiō, supremisque honoribus & maximis voluptatibus oblatis, paratus sit propter hæc, mandatum graviter obligans transgredi. Et hæc est illa humilitas Christiana, de qua dicebat S. Agatha Virgo & Martyr. *Multò præstantior est, Christiana servitus & humilitas, regum opibus ac superbiâ.* Parum item est, nec sufficit ad conscendendum hunc humilitatis gradum, si quis non transgrediatur mandata sub mortali obligantia, propter evitanda aliqua minora vel leviora mala, ut ad evitandam indignationem amici, item ad avertendum damnum, qualia communiter & ordinariè evenire solent in bonis famæ, fortunæ, corporis, etiam ad declinandum vitæ discrimen non debes deliberatè transgredi, mandatum sub mortali obligans.

4^{tò} Ad eundem humilitatis gradum, ejusque perfectionem spectare videtur, ut non solum objectō vitæ corporalis discrimine, sed etiam objectō discrimine vitæ & salutis æternæ, non transgrediaris ullum mandatum, sub mortali obligans, hoc est, si de animæ tuæ salute ageretur ac evitanda morte æternâ, pænisque inferni ex una parte, ex altera parte ageretur de committendo etiam unico peccato

to mortali, essetque necessariò, alterutrum eligendum; potius deberes eligere mortem æternam & pœnas inferni, quàm in peccatum mortale consentire.

Humilitatis, vitam corporalem aspernantis, nec ejus objectò discrimine adduci se permittentis ad committendam culpam lethalem, habes exempla in S. Casimiro Regio Poloniæ Principe, qui mori potius elegit, quàm labe factatâ suâ pudicitîâ fœdari: in Sanctò item Ludovico IX Galliarum Rege, qui hanc humilitatem edoctus à Matre suâ sanctissimâ, S. Blancâ Regina, constitutum firmissimè habuit, priùs mortem oppetere, quàm in lethale peccatum consentire. Humilitatis verò, vitæ insuper æternæ, & salutis animæ renunciantis, nec talis vitæ discrimine objectò resolventis se in transgressionem mandati, obligantis sub mortali, exemplum habes in S. Anselmo Canthuariensi Archiepiscopo, qui sæpius protestari solitus fuit: *Si hinc peccati horrorem, inde inferni dolorem, corporaliter cernerem; & necessariò unum eorum immergi deberem, priùs infernum, quàm peccatum appeterem.* Idem Sanctus, Cœlo etiam renuntiabat, si cum peccato illud obtenturus esset; ut habetur lib. de Beatit. *Mallem priùs à peccato innocens, gehennam intrare, quàm peccati sorde pollutus, Calorum regna tenere.*

Hæc considerans erue inde sequentia dictamina: *1mum.* Propter nullum quodcunque bonum consequendum, etiam propter totius mundi Dominium, committere te debere peccatum mortale.

2dum Propter nullum bonum possessum, ulteriùs refinendum, illiusque jacturam ac damnum avertendum, etiam pro retinendâ & defendendâ vita, committere te debere, ullum peccatum mortale.

3tium: Ad avertenda, etiam quæcunque mala quantumcunque magna, quæ fortè sustines, non debere te risolvere in peccatum mortale.

Atum ad avertenda mala, quæ nondum pateris, timere tamen potes, & quæ fortè imaginariis tibi evenitura, nullatenus tibi committendū esse, ut transgrediaris mandata, sub peccatō mortali obligantia.

Reflecte deinde te, an primum hunc humilitatis, jam conscenderis gradum? scito verò, conscendendum omnino esse, si vis, ut in cœlum ascendas, & ad Cœlum pervenias. Percurre singula, quæ expendisti, & fac reflexiones convenientes.

Fac item proposita, ac etiam protestationes à Sanctis, Casimiro, Ludovico, & Anselmo usitatas. Confundere, si fortè necdum hunc gradum attigisti. Quod si conscendisti jam eundem, age Divinæ Bonitati gratias, humilia te sub potenti manū DEI? & postula ut DEUS, eadē potenti manu suā in hoc humilitatis gradū, firmum te & constantem teneat, ne ex eō aliquando decidas.

PUNCTUM II. Audi illa verba Christi Matth. 18. *Quicumque se humiliaverit sicut parvulus iste, hic est major in Regno Cœlorum.* Et considera secundum humilitatis gradum, à S. Patre Ignatiō per hoc describi: ut fixō animō, ad divitiās, & paupertatē, honorem & ignominiam, breviter vitam, & longitudinem, æquē sim propensus, ubi æqualis est Divinæ laudis, & salutis meæ occasio: utque nullā vel humanæ quantæcunque felicitatis vel propriæ mortis, conditione propositā, adducar unquam ut culpam, licet venialem tantum, decernam admittere. Sic descriptus, secundus gradus humilitatis, videtur expressus esse sufficienter, per similitudinem humilitatis parvulorum, in adductis Christi verbis. Parvuli enim non sunt solliciti de divitijs, honoribus, longitudine vitæ; sed ad hæc videntur æquē indifferentes, atque ad paupertatem, ignominiam & breviter vitam, itā ut horū vel illorum electionem & tolerantiam, persvadeat illis facile, Parentum propriorum voluntas vel conditio.

Idem.

Iidem per suam simplicitatem, & innocentiam, non solum suis Parentibus, sunt obsequentes, in rebus majoribus & gravioribus, sed etiam in minimis.

Porro ut ad hunc secundum, humilitatis gradum ascendatur.

Necessarium 1^{mo} est, ut fixò animò, simus æquè propensi, ad divitias & paupertatem, ad honorem & ignominiam, &c. ubi æqualis est Divinæ laudis, ac salutis nostræ occasio. Ad humilitatem enim veram spectat, ut non quæramus nosmetipsos sed DEUM: ut nostra commoda, emolumenta & nosmetipsos, postponamus honori, & gloriæ Divinæ. Jam verò qui determinati, vel certè magis propensi sunt ad quærendas divitias, honores, & similia, si laudis Divinæ, major sit occasio per paupertatem, ignominiam, hi seipsos, sua emolumenta & commoda quærunt, atque præferunt DEO, ejusque laudi & gloriæ. Qui etiam, dum æqualis est occasio laudis & gloriæ Divinæ, sive per divitias, & honores, sive per paupertatem & ignominiam, non sunt æqualiter propensi ad utraque, sed magis sunt inclinati, & determinati ad divitias & honores, illi seipsos, suaque bona & commoda, & non solum DEUM, ejusque gloriam quærunt & æstiment; adeoque in verâ humilitate deficiunt, quæ DEUM ita præfert; ut perfectè hominem, ejusque omnia bona, DEO subijciat ac postponat, & hæc propter DEUM, contemnere faciat.

2^{do} Necessarium est ad acquirendum secundum humilitatis gradum, ut nullâ vel humanæ quantæcunque felicitatis, vel propriæ mortis conditione, adducamur unquam, ut culpam licèt venialem tantum committamus. Hanc animi dispositionem exigit, non solum ipsa DEI dignitas, & excellentia, ut hunc, ne leviter quidem offendamus, non solum item, peccati venialis malitia & odibilitas, quæ tantum est, ut veniale non possit assumi, pro mediò ad

consequendum etiam maximum bonum, aut evitandum quodcunque malum, cum non sint facienda mala, ut eveniant bona : Sed insuper, eandem dispositionē & præparationē animi exigit ipsa subjectio Naturæ rationalis creatæ, suo Creatori, Supremoq; Domino ac Legislatori; ut creatura hæc humiliet se Deo, ejusque legi subijciat, etiā tunc, dum hæc solum obligat sub veniali.

Hic humilitatis gradus, non est quidem simpliciter necessarius, ad salutem, ut primus, facit tamen, ut quis abundantius vitam habeat, & per media perfectiora, consequatur salutem, & ut sit major in Regno Cælorum, ut item nihil hominem retardet in obtinendâ salute. Per accidens etiam potest esse, ad salutem necessarius, quatenus qui non contendit, hunc gradum humilitatis conscendere, etiam de primo gradu decidit.

Ex his consideratis hæc apud te conclude & statue firmiter, 1^mo quod omnem affectum ad tua commoda, honores, bonam famam, valetudinis firmitatem, vitæ longitudinem ita sis moderaturus, ut non magis ad hæc propendeas, quàm ad opposita, si utraque æqualiter, Divinam promovebunt gloriam, & te ad tuum finem consequendum juvabunt. 2^do quod nullum veniale, maximè deliberatum sis commissurus, propter quodcunque bonum, quantumcunque illud fuerit, consequendum, vel malum, etiam maximum avertendum. Licet verò aliqua venialia humilitati specialiter repugnantia numerentur, qualia sunt : dicere aliquid in laudem sui : vanam laudem ex suis actionibus appetere : ex fine [vanæ gloriæ aliqua facere, complacere sibi in sui æstimatione, plausibus, & similibus, præferre te alijs : moveri invidiâ, si alij laudentur, lætari, si contemnantur, si contemnaris, affligi, si reprehendaris, excusare te ipsum, tuasque actiones : & similia, tamen non solum hæc, sed etiam quæcunque venialia

nialia secundo humilitatis gradui repugnare, pro certo & indubitato habebis & omnia ac singula, studio præcipuo cavebis. Fac iterum reflexiones convenientes, elice affectus, & proposita, Divinamque opem ad ea exequenda implora.

PUNCTUM III. Audi illa verba Christi Matth.

II. *Discite à me quia mitis sum, & humilis corde.* Et cogita, tertium humilitatis gradum consistere in perfecta imitatione humilitatis Christi. S. P. Ignatius hunc humilitatis gradum, ita explicat. Tertius est modus humilitatis absolutissimæ, ut priores jam duos adeptus, etiam si nullò superaddito, laus DEI par foret; ad maiorem tamen imitationem Christi, eligam potius, cum eò paupere, spretò, & illusò, pauperiem, contemptum & insipientiæ titulum amplecti, quàm opes, honores, & sapientiæ exultationem.

Expende singula 1^{mò} Ad hunc humilitatis gradum conscendendum, necessarium esse, ut quis priores duos, humilitatis gradus sit adeptus. Frustra enim vult sequi consilia, qui præcepta Divina negligit: frustra laborat in perfecte imitando Christò, ejusque perfectione, exactè in se exprimendâ, qui necdum habet rudimenta vitæ Christianæ.

Expende 2^{dò} Etiam si nullò superaddito laus DEI par foret &c. hoc est, etiam si seclusâ imitatione humilitatis Christi, & independentè à tali fine & respectu, ex alijs circumstantijs & rationibus præcisè consideratis, laus DEI par foret ex paupere, contemptu, atque ex opibus, honoribus: in quocumque indifferentia ad utrumque curanda est, tamen propter imitationem humilitatis Christi eligendam esse, pauperiem, contemptum, insipientiæ titulum. Quod si independentè ab hoc fine & respectu imitationis Christi, major laus DEI esset ex uno, quàm ex alio, certum est, illud esse eligendum, ex quò major laus DEI est futura.

Expende 3tîo Ad maiorem imitationem Christi pauperis, spreti, illusi, pauperiem, contemptum, insipientiæ titulum eligenda, esse. Hôc ipsô enim, quod Christus hæc elegerit magnum fecit pretium & æstimationem paupertati, contemptui, ut hæc eligi debeant præ oppositis. Hôc ipsô ista magis conducunt ad perfectionem, siquidem Christus, qui est idea omnis virtutis & perfectionis, hæc præelegit. Hôc ipsô, major DEI gloria est, ex præelectâ pauperie & contemptû, cum magis sit inde laus DEI & gloria, quod Christum Filium DEI imitemur. Hôc ipsô denique certior esse potes, salutis tuæ consequendæ: illâ enim certius obtinetur, per paupertatem, contemptum, & similia, siquidem Christus qui est Dux & Magister noster, Viâ, Veritas, & Vitâ, Hanc viam per paupertatem contemptum, & tribulationes ostendit ad salutem? hæc exigit à sequentibus sua signa. Cùm è contra à Christi signis avocet, & ad sua signa invitet diabolus, propositis divitijs, honoribus, ac per hæc, mortales, in perditionem trahat.

Reflecte te, & tecum recogita, quem habes animum ad conscensionem huius gradus humilitatis. In meditatione de Regnô Christi, invitavit te idem Christus Rex tuus, ut iisdem insignibus & vestibus induaris, quibus ille induebatur si tunc necdum te resolvisti, iterum te invitat in præsentî, vide quid te facere conveniat. Illud noveris in nullô vitæ statû, quemquam Sanctorum (quisque verò status plures magnos Sanctos numerat) ad magnam perfectionem & Sanctitatem aliter conscendisse, nisi conscensô hóc tertiô humilitatis gradû. Quare etiam tibi, conscendendus est, si nolis esse trivialis tantum & imperfectus DEI, servus. Quò verò paratior, & promptior sis, ad ferendam & eligendam paupertatem, contemptum, insipientiæ titulum, & similia: ipse te contemnere sude, de te sentias

sentias quàm abjectissimè, reputes te peccatorum maximum, ipsò Diabolò & damnatis pejorem, Dei gratià & quibuscunque ejus beneficijs, ac etiam aliorum consortiò indignissimum, reputa nihil tibi deberi; non deberi tibi ullum honorem, ullam æstimationem, ullos respectus, actiones tuas plenas esse defectibus, & imperfectionibus. Opta, ut in tuis talentis, non advertatur nisi ad solos defectus, & ut ea, quæ possent æstimari prætereantur. Ad omnes tuas laudes, tanquàm tibi indebitas, atque si tui essent irrisoriæ, confundere. Lætare, si parvi æstimeris ab alijs, si tua talenta extenuentur, si alijs postponaris. Quære occasiones tuæ humiliationis & contemptûs, suscipiendo obsequia proximorum viliora, ad eas functiones, Dei gloriam promoventes, promptè te offerendo, quæ te magis contemptibilem reddunt.

Colloquium triplex, primum ad Beatissimam, postulandò, ut quæ humilitate suâ placuit Altissimo, impetret tibi perfectissimam humilitatis Filij sui imitationem. 2^{um} ad Christum Hominem, ut impetret à Patre æterno hanc ipsam gratiam.

3^{tium} ad Patrem æternum, ut annuat petitioni Christi Domini, & intercessioni Sanctissimæ ejus Parentis.

In fine: Anima Christi.

Meditatio II.

De fine & obligatione Homi-
nis Christiani, ac medijs ad su-
um finem.

Praludium 1. Imaginare Christum Dominum datum esse, non solum in Redemptorem Mundi,

K₅

sed

sed etiam in Ducem, veritatis Magistrum, & exemplar omnis virtutis, ac perfectionis, quem si sequantur Christiani, doctrinam ejus impleant, & exempla imitentur, magnum hinc adjumentum habent, ad finem suum consequendum.

Preludium 2. Pete gratiam, quâ illuminatus possis cognoscere, finem & obligationem hominis Christiani, ac etiam media, ad hunc finem consequendum, atque ut his medijs juvari possis.

PUNCTUM I. Audi illa verba Christi Joan. 10. *Ego veni ut vitam habeant, & abundantius habeant:* Et considera finem, hominis Christiani hunc esse debere, qui etiam est finis cujusvis hominis, nimirum ut Dominum DEUM suum laudet, revereatur, eique serviens, tandem salvus fiat. Cum aliquâ tamen differentiâ circa modum, quô DEUM laudare, revereri, eique servire homo Christianus debet, cum aliquâ item differentiâ circa salutem, quam consecuturus est. Finis itaque hominis Christiani est, ut non solum sacri Baptismi susceptione, & verâ fide in Christum, sed etiam bonis operibus, & vitâ Christianâ hoc est conformi doctrinæ Christi, & ejus, veræ Ecclesiæ, confiteatur se DEUM & CHRISTUM nōsse: et ut illustratus veræ fidei lumine, intra Ecclesiam à Christô ipsô, supra firmam petram, hoc est, supra Petri fidem fundatâ, DEUM in essentiâ unum, in Personis trinum laudet, vitâ & actionibus, doctrinæ Christi conformibus, eundem revereatur, observatione non solum præceptorum decalogi, aliorumque legis Naturæ, sed etiam præceptorum Christi Evangelicorum, & præceptorum ipsius Ecclesiæ, eique taliter serviens, tandem salvus fiat.

Hic ipse, cujusvis Christiani finis expressus est, brevibus illis Christi verbis: *Veni, ut vitam habeant & abundantius habeant:* Finis cujusque Christiani à Christo intentus, eique præfixus est, ut vitam, (vi-
tam

tam spiritualement animæ intellige) non quomodo-
cunque, sed abundanter habeant. Porro vita ani-
mæ duplex est, una, quâ anima, in hoc adhuc cor-
pore mortali existens, vivit DEO per gratiam san-
ctificantem. Altera vita animæ est, quâ post mor-
tem carnis, anima DEO vivit, per æternam felicitate-
tem, ejusque visionem & amorem. Cura igitur, &
singulare studium, hominis Christiani esse debet, ut
utramque hanc animæ vitam, abundantius habeat.
Quia verò vita illa felicissima, quâ anima DEO vi-
vit in gloriâ, & Patriâ cœlesti, consequitur vitam il-
lam, quâ anima existens in corpore, DEO vivit per
gratiam, talisque vitæ est præmium, cui tanquam
suò merito proportionata respondere debeat, eâ ra-
tione ut qualis vita præsens animæ, & quàm abun-
dans, fuerit, tam abundans, aut potius proportionate
superabundans, futura sit vita cœlestis; ideo om-
nes vires, & omnia studia homini Christiano con-
ferenda sunt unicè, ut vitam animæ per gratiam,
dum in corpore vivit, habeat, & abundantius, imò
abundatissimè habeat.

Per hoc autem, mi Christiane, vitam animæ,
per gratiam habes, quòd DEUM verum & JE-
SUM CHRISTUM, propter tuam salutem missum in
mundum, vivâ fide cognoscas; quòd cognoscas il-
lum, & confitearis non solum ore, & intellectû tuò,
sed omnibus potentijs tuis, omnibus sensibus; om-
nibus actionibus & operibus tuis, quòd omnia of-
ficia tua dicant DEO: *Domine quis similis tibi?* siqui-
dem ex oraculò Sapientiæ Incarnatæ: *Hæc est vi-
tâ aternâ* (hoc est ad felicem æternitatem homi-
nem ordinans, & vitæ illi æternæ præludens) *ut
cognoscant te solum DEUM Verum, & quem misisti
JESUM Christum.* Habes vitam animæ, si rege-
neratus in Christo per baptismum, gratiam ba-
ptismi conservas & custodis, & peccata mortem
animæ afferentia sanctè caves & declinas. Si
etiam

etiam eandem gratiam, & innocentiam baptismalem, per grave peccatum fortè amissam, per Sacramentum pœnitentiæ reparare studuisti, ejusque conservationi, majori supra teipsum vigilantia & sollicitudine, invigilas.

Hanc ipsam animæ vitam habes abundantius, si gratiam Sanctificantem in baptismô acceptam, vel etiam post sui amissionem per Sacramentum pœnitentiæ restitutam, non solum conservare sed etiam per majora, & majora semper incrementa augere studes, Sacramenta Ecclesiæ frequentando, eaque cum dispositione conveniente suscipiendo, pietatis, & charitatis opera exercendo, in virtutibus homine Christianô dignis proficiendô, consiliâ Christi adimplendo, exempla imitando, ejusque merita & satisfactionem usurpando, & tibi appropriando.

Habes vitam abundantius, si abundas in omne opus bonum, si facis, ut justitia tua abundet, plus quàm scribarum & Phariseorum, nec permittis, in implendis præceptis Religionis tuæ, vincite ab infidelibus & hæreticis, eorumque studiô circa implenda præcepta per sectas ipsorum præscripta.

Hæc considerans fac reflexiones, quæ cura tua sit & fuerit hætenus circa consecutionem finis hominis Christiani? Qualis item sis Christianus? an non solo nomine, an non ex charactere tantum in Baptismô acceptô? an non ille? qui ore confiteris te nosse Christum, factis autem negas? An DEUM laudes & reverearis, juxta Christi & Ecclesiæ ejus doctrinam & institutionem? in templis DEO & Christo in Eucharistiâ præsentem quam reverentiam & honorem exhibes? An de illâ tuâ laude, quam DEO reddis non verificetur illud: *Non est speciosa laus in ore peccatoris* An in omnibus tuis actionibus cultum DEI & gloriam intendas & quæras!

Refle-

Refleſte iterum te; quomodô DEUM reverearis! An timorem DEI, præ oculis habeas? percurrere breviter ſive legis Naturæ, ſive legis Divinæ ſcriptæ præcepta, ac etiam præcepta Evangelica, & præcepta Eccleſiæ, & cogita, quâ curâ & ſanctitate, illa obſerves?

Refleſte te ulteriùs An Anima tua vivat DEO per gratiam? An hanc vitam abundantius habes? quâ ſolicitudine ſtudes, hanc vitam conſervare, ac etiam augere? An Sanctiſſimum, Eucharistiæ Sacramentum ad vitam, an certè ad iudicium manduces? quàm frequenter ſive ad hoc cæleſte epulum; ſive etiam ad Sacramentum Pœnitentiæ accedas? cum quâ diſpoſitione, quô fructû & cùm quantô vitæ ſpirituâlis & gratiæ augmentô hæc Sacramenta ſuſcipias? Quantum abundes in opera miſericordiæ, & charitatis, & utrum in omne opus bonum? An juſtitia tuâ abundet, plus quàm ſcribarum & Pharifæorum, ſeu plus, quàm multorum hæreticorum & infidelium? an in iudicio DEI non confundent te multi Ethnici & infideles, virtutum naturalium exercitio & frequentatione, ac etiam vitæ conformis rationi rectæ honeſtate? an non confundent te illæ in tribunalibus, comitijs comitiolis, variorum iudiciorum ſubſellijs, hæreticorum & diſſidentium ſententiæ, vota & deciſiones? certè confundet non unum Catholicum, illa quædam conſcientiæ in hæreticis teneritudo, in reddendô unicuique quod ſuum eſt, in perſolvendis punctualiter, famulitio promeritis ſtipendijs, in dandâ condictâ mercede, artificibus & operarijs. Confundent non unum, acatholicorum opera miſericordiæ, liberales in pauperes eleemoſynæ, data indigentibus ſubſidia, paternus ſubditorum amor, proximi dilectio, opere ipſo comprobata, obſervatio accurata feſtorum, aliaque bona opera.

Ex his factis reflexionibus habebis copioſam
mate-

materiam tuæ coram DEO confusionis & humiliationis, ac opportunam occasionem faciendorum propositorum, circa vitæ tuæ emendationem & reformationem.

PUNCTUM II. Audi illa verba Deuter. 32. quibus sacra Scriptura describit modum, quô DEUS populum Israël ex Ægypto eductum in terram promissionis induxit: *Invenit eum in terrâ desertâ in locò horroris & vastâ solitudinis. circumduxit eum & docuit, & custodivit quasi pabillam oculi sui. Dominus solus Dux ejus fuit.* Et considera in his verbis intelligi posse, plura expressa media perveniendi, ad finem homini Christiano præfixum.

Imum medium est, provida & sollicita Divinæ Bonitatis de salute nostra, cura, quæ non expectat, ut prius ad DEUM veniamus, sed ipsamet nos quærit, non tantum per Incarnationem, Nativitatem, Conversationem Filij DEI in carne assumptâ cum hominibus, passionem & mortem ejusdem, sed etiam nunc, perfectô redemptionis nostræ opere, quærit unumquemq; nostrum adducendo ad gratiam Baptismi, ante cujus susceptionem fuimus in terrâ desertâ, in locò horroris & vastæ solitudinis, quia tunc, cùm essemus gratiâ sanctificante spoliati, ac in statû peccati originalis, quærit nos, media salutis, quæ intra solam Ecclesiam Catholicam habentur, & haberi possunt, providendo & ordinando. Quærit per gratias prævenientes, liberaliter nobis, sinè nostris meritis collatas.

Quò consideratò, agnosce in hóc mediò magnum tibi præstitum esse beneficium, profiteri cum S. Augustinò: *Antequam ego nascerer, filius Ancille tuæ, Domine spes mea ab uberibus Matris meæ, tu me prævenisti, preparans mihi semitas, quibus incederem, & venirem ad gloriam Domûs tuæ, priusquam formares me, in utero, novisti me, & quidquid tibi placuit ordinasti de me.* 2dum

2^{um} medium consequendi, finis hominis Christiani, est Divina Bonitas, non solum nos præveniens, & ad Catholicam vocans Ecclesiam, mediaque salutis pro nobis ab æternò disponens, sed insuper in Ecclesiâ jam constitutos, & gratiâ DEI præventos, instruens nos & custodiens. Considera, quò descendat Bonitas Divina, ut non solum quærât hominem, in terrâ desertâ, in locò horroris & vastæ solitudinis, cumq; inveniât; sed etiam, ut inventum ducat, gressus ejus formet, dirigat in viam salutis, & ne aberret, custodiat, ut pupillam oculi sui, hoc est, ut non solum ad gratiâ justificationis perducât; sed in hâc præterea constitutum, ducat viâ mandatorum suorum, & ne ab hâc aliquando declinet, instruat, tum per externam Ecclesiæ, & ministrorum ejus prædicationem, tum per interiores illustrationes, quomodo in viâ salutis progredi debeat, tandemq; illum custodiat, ut pupillam oculi, ne deinde, suâ pravitate, vel fraudibus hostium, generis humani, à gratiâ ipsius consequenter à salute æternâ excidat.

Hoc considerato Erumpe in affectum; Scio Domine, quia non est, hominis via ejus, nec ejus est, ut dirigat gressus suos. Quod ergo non valet perficere homo, hoc supplet Divina Bonitas, formans gressus ejus, instruens cum tanto amore, quia ut pupillam oculi sui custodiens. Gratias age pro his medijs salutis tuæ. Confide de obtinendâ à te felicitate æternâ. Confundere, si DEO ducente, dirigente, ut pupillam oculi sui te custodiente, ex viâ mandatorum ipsius deflexisti.

3^{ium} Medium homini Christiano, pervenienti ad vitam immortalem, & æternam felicitatem est, quòd Dominus solus Dux ejus factus sit, ut Christiani sine errore, & cum omni facilitate, ac sine aberrandi periculò, incederemus, non Prophetis, non Angelis commisit nos deducendos, sed ipse-

ipfemet DEUS Dux noster effe voluit. Filius unigenitus Patris, à Regalibus fedibus venit ut nos deducat in terrâ promiffionis, hoc eft in Patriam cæleftē, nobis appromiffam.

Ducit autem nos triplici modo 1^{mo} Cæleftibus doctrinis, à fe ad noſtram inſtitutionem, in Evangelio & Eccleſiâ relictis. 2^{do} ſuò proprio exemplò, quòd dedit in exercitiò omnis generis virtutum. 3^{tiò} Comparatò nobis infinitò meritorum ſuorum theſaurò, ex quò non ſolùm habemus pretium redemptionis noſtræ, de ſervitute peccati, ſed etiam habemus, & habere poſſumus, impenſas longiſſimi ad felicem æternitatem itineris, ſcilicet tam gratias actuales, quàm gratias habituales, & dona habitualia, quorum ipſorum providendorum, alia rursus providit nobis media, ſcilicet inſtituta à ſe Sacramenta.

Reſpecte te, qualiter uſus ſis hòc ſalutis tuæ, tam præſtanti & efficaci mediò? fuit ne tibi Chriſtus Dux ad ſalutem & in reſurrectionem, ex inveteratis peccatis tuis? Quomodo te juvit ſuâ doctrinâ, ut vitam haberes & abundantius haberes? Quomodo uſus es Sacramentis? Eſne ſecutus ductum præceptorum & conſillorum Chriſti? An inſtiteris veſtigijs virtutum illius? Quantum te juverint gratiæ Divinæ, ex meritis Chriſti tibi collatæ? An quidquid tibi deſuit, uſurpaveris in tuum commodum, ex vulneribus Domini tui JESU Chriſti?

Elice affectus 1^{mo} gratiarum actionis pro tam efficaci ſalutis tuæ mediò, dicens cum S. Auguſtino: *Querebam ego viam ad fruendum te & non inveniebam, donec amplecterer Mediatorem DEI & hominum JESUM Chriſtum DEI Filium, vocantem me, & dicentem: ego ſum via, veritas & vita.*

2^{do} Confuſionis & humiliationis tuæ coram DEO, quòd alium, quæſteris vel ſecutus fueris Ducem, quòd ſecutus fueris aliquando mundum,

car-

carnem, sensualitatem, amorem tuum proprium, inordinatum aliquem affectum, qui tibi fuerunt Duces in præceptis. 3^{to} Firmi propositi & protestationis, quod abhinc solum hunc Ducem sequi velis, vivendo juxta doctrinam, præcepta, ac etiam juxta aliqua saltem ejusdem tui Ducis Christi consilia, imitando ipsius virtutum exempla, charitatis, misericordiæ in pauperes, patientiæ, humilitatis, resignationis in Divinam voluntatem, amoris inimicorum, & aliarum virtutum similium, utendo infinito thesaurò meritorum Christi, obediendo inspirationibus Divinis, cooperando gratijs excitantibus, frequentando & dignè suscipiendo Sacramenta.

Protestare dicens: valete Duces alij, quos hæcenus sequebar, & sequens in viâ salutis errabam. Abhinc solus Dominus Dux meus erit. 4^{to} tandem postula à Christo ut tuus ille Dux semper esse velit, & ut te in Patriam cælestem feliciter inducat.

PUNCTUM III. Audi illa verba Psal: 104. de ipsdẽm Israëlitis ad terram promissionis euntibus dicta: *Expandit nubem in protectionem eorum & ignem, ut luceret eis, per noctem.* Et considera, homini Christiano, ut finem suum consequi possit, etiam hoc provisum esse medium, quod DEUS expandit nubem in protectionem ipsius.

Per hanc nubem intelligi potest ipsa singularis DEI providentia, quæ suis gratijs, contra insultus & tentationes inimici nos protegit, non permittens nos tentari supra, quàm possumus, sed faciens cum tentatione, gratiæ suæ adjuvantis proventum.

Tu intellige per hanc nubem, matrem Sanctissimæ DEI Parentis affectum, quò illa omnes fideles prosequitur. Hæc est illa nubes, quæ pluit nobis Justum, cujus desiderio illi tenebantur, qui dicebant: *Rorate cali desuper & nubes pluant justum.* Hæc est nubecula illa quasi vesti-

gium hominis, quòd in illa expressit DEUS homo, ex utero illius in mundum procedens. Hanc nubem expandit DEUS, super omnes Christianos, ut hæc illos protegeret contra æstus vindictæ & furoris Divini, ut ex hac nube decidat pluvia, quam segregavit DEUS hæreditati suæ, scilicet : ut per manus Mariæ omnes gratias, omnia dona & beneficia accipiant. Sub hac protectionis nube si quis peregrinari velit, & ad cœlum contendere, magnum adjumentum habet perveniendi ad terminum vitæ & felicitatis æternæ.

Considera deinde medium insuper aliud esse, quòd in consequendo fine suo Christiani singulariter juvari possunt, custodiam Sanctorum Angelorum, Patrocinium Sanctorum Patronorum. Hi sunt ignis ille nobis datus, ut luceat per noctem. Sunt ignis ratione amoris DEI & zeli salutis animarum nostrarum, quò æstuant. Sunt ignis illuminans : illuminant enim nos Sancti Angeli Custodes nostri, suis instinctibus & illustrationibus, in viam salutis nos dirigendo. Illuminant alij sancti, virtutum suarum exemplis, dum in vita hac mortali viverent, à se relictis, ut ea imitemur. Ignes hi Sanctissimi, semper quidem nobis lucent, sed maximè lucent in nocte, in nocte inquam tentationis, tribulationis, tristitiæ, desolationum, impetrando nobis gratiæ Divinæ, hanc noctem dissipantis; splendorem, impetrando lumina cælestia, consolationes spirituales, serenitatem animi, & potestates tenebrarum cum suis tenebris dispellendo, sed maximè lucent in nocte, quam nobis facit vitæ nostræ occasus, faciuntque ut ipsorum præcipuè intercessione, ingrediamur viam æternitatis, eoq; perveniamus, ubi nobis lux gloriæ cælestis illucescet & lucebit in æternum.

Fac reflexiones supra te ipsum; & cogita quantas tuas fæditates protexerit Mater Sanctissima.

Ex

Expende: quòd DEI irati vindictam, justitiæ Divinæ fulmina non effugisses, nisi hæc nubes te protexisset. Reflecte te: quòd ætus tuarum cupiditatum, desideriorum, tentationum, tantopere tibi non noceat, cui hoc debeas? An non nubi huic sanctissimæ, te à tali æstu protegenti? quòd illa pluvia gratiarum illustrantium, excitantium, sanctorum propositorum copiosè in te decidat, nubi huic expansæ debes, eidem debes tot alias gratias, nimirum conversionem tuam, pœnitentiam, extirpationem pravorum habituum, amotionem occasionum peccandi, aliq; innumera DEI beneficia.

Reflecte te rursus: quòd illumineris in nocte tribulationis, tentationis; in nocte quam in anima faciunt peccata tua, habere te beneficio ignis illius, qui tibi lucet in nocte: nimirum beneficiò S. Angeli Custodis tui, debesq; id instinctibus & monitionibus ipsius. Habes item ex beneficio Sanctorum Patronorum tuorum, quorum non solum exemplò ad virtutem provocaris, sed etiam ex eorum intercessione & patrocínio lumen & splendorem excipis.

Reflecte te tandem, quàm gratus tanti affectus existeris, sive Sanctissimæ DEI Parenti, sive S. Angelo Custodi, sive alijs Sanctis tutelaribus tuis?

Elice actus gratiarum actionis pro singula ri protectione & illuminatione, quam experiris; Confusionis propter ingratitudinem tuam. Fac. proposita circa cultum Matris Beatissimæ, sanctorum Tutelarium tuorum, circa reverentiam exhibendam Sancto Angelo Custodi tuo.

Colloquium ad Beatissimam, S. Angelum, & Sanctos Tutelares tuos, quibus supplica, ut semper quidem, sed vel maximè in nocte illa, in quam, te moriente, corporis tui claudentur lumina, suo tepatrocínio protegant, omnesq; dissipent animæ tenebras; illudq; efficiant, ut Anima tua, lumine gratiæ sanctifican-

ficantis, & plurium meritorum, illustrata, è corpore prodeat, & in splendoribus ac consortio eorundem ipsorum sanctorum, locum inveniat.

In fine sub tuum Præsidium.

Meditatio III.

De Imitatione Vitæ, Doctrinæ & Virtutum Christi.

Preludium 1. Imaginare, quòd præ oculis habeas Christum Dominum, ejus Doctrinam & prædicationem audias, & in eo spectes quascunq; perfectiones & omnis generis virtutes.

Preludium 2. Pete à Patre æternò gratiam, ut possis te conformare imagini Filij ejus.

PUNCTUM I. Audi illa verba Isaïæ 6. *Parvulus natus est nobis, & filius datus est nobis.* Et considera, quòd inter alios fines adventus Christi in mundum, hic non postremus fuerit, ut tanquam sapientissimus mundi Magister nos erudiret, quæ ratione DEUM laudare, eum revereri, ipsi servire, ac demum ad ipsum pervenire debeamus, ut tanquam supremus Dux & Dominus, milites castra sua sequentes, partim suâ Doctrinâ, partim exemplo instrueret; quomodo eum imitari, sub ejus signis militare, hostesq; suos mundum, carnem, & diabolum debellare debeant.

Considera ulterius Christum hanc Discipulorum suorum & militum institutionem, à sua statim nativitate inchoasse; ut meritò, dum adhuc parvulus esset, nobis datus, nobis natus esse diceretur. Percurre multas circumstantias nativitatis & teneræ ætatis Christi; et ex ipsis discas, qualis discipulus, qualis miles Christi esse debeas. Et imò quidem Considera Paupertatem Christi nati, & ejus

in

in paupertatem amorem. Christus infans tanto amore ferebatur in paupertatem, ut eam pro matre habuisse videatur.

Ex paupertate tanquam matre nascitur, quia ex pauperrima Virgine: Paupertas Christum deponit in præsepio, paupertas vilibus involvit pannis, paupertas pascit, paupertas salutat, in pastoribus invisit & complectitur. quomodo igitur illi non Mater paupertas? Nulla re Christus tanquam propriâ disponit. Accipit munera à Magis, ea nec digito quidem tangit, sed his disponebant MARIA & JOSEPH. Illa tunc non nisi penes ipsum dispositio fuit: dabat potestatem filios DEI fieri, dabat gratiam, lumen cæleste, dabat Spiritum Sanctum.

Ex hōc Ducis & magistrati tui exemplō discē, non debere te affectu immoderato affici opibus & divitijs, nec illas inexplēbili quærere appetitū. Discē non debere te abhorrere à paupertate Christi, nec eam vilifacere, quā Christus tantī æstimavit, quinimō desiderā, ut pauper pauperem, nudus nudum Christum sequaris, si DEI hæc voluntas fuerit, vel Divina vocatio, aut ratio salutis tuæ id postulaverit.

Considera 2dō. Puritatem hujus infantis plusquam Angelicam, quia Divinam. Nascitur sine peccato, nascitur ex Matre ab omni labe immuni, ex Matre ante partum, in partu, post partum Purissima Virgine. Et hoc exemplō excitare, ut ad puritatē quam maximā animæ & corporis enitaris.

Considera 3tiō. Obedientiam parvuli JESU, quomodo sit subjectus Matri suæ, quomodo in omnibus permittit se tractari secundum ejus placitum, ad omnia paratus, sive ut manibus sustentetur, sive ut præsepio deponatur, sive ut Mater illi super gēua sua blandiatur, sive ut pannis confringatur; et discē debere te tuis Præpositis, Magistratibus, & cuicunq; jurisdictioni, habenti supra

te potestatem, ita subiectum & ita tractabilem esse, tanquam si infantulus esses.

Considera 4to Alias virtutes Christi nascentis. Temperantiam & abstinentiam ipsius, modico lacte pascus es, omnium incommodorum tolerantiam, in frigore nascitur, lecti ejus asperitatem, sua Mater reclinavit eum in præsepio; & ipse in fæno jacere pertulit. Considera humilitatem DEI nascentis, descendit ad stabulum, inter animalia collocatur, Pastores suscipit, eorumq; munera non dedignatur. Considera zelum Christi, hunc ille statim ab infantia exercuit, quo die Christus natus est, ab hoc die Salvator mundi exstitit, *Natus est hodie Salvator mundi* Non verbis, sed vi quadam interna traxit ad se Pastores, & Magos suæ sanctitatis radijs illuminavit. Disce has virtutes à Duce & Magistro tuo, easq; imitari stude.

Similem tui institutionē per exempla Christi habere potes in Circumcisione ipsius. Ex qua, Christi patientiam, & carnis mortificationem usque ad sanguinis effusionem intelliges, tolerantiam item omnium confusionū, despectuum, contumeliarum. Christus peccatum non contraxit, peccatum non fecit, nulli peccato obnoxius fuit, pro peccatore tamen haberi voluit, pœnam peccati sustinuit, castigare in se peccatum, cuius non fuit reus, permisit. Ut discas, quomodo & tu carnē tuam tractare debeas, ut discas castigare in te peccata tua propria, ut discas confusiones, pœnitentias, reprehensiones, etiā sine culpa tua, patientissimè prompto animo tolerare.

Ex fuga Christi in Ægyptum, discce pati persecutiones, discce indifferentiam ad omnem locum, sisq; paratus ibi commorari, ubi spes erit major Divinæ gloriæ per te promovendæ, & DEO majus præstandi obsequium. Disce resignationem in DEI voluntatē, ejusq; omnē circa te dispositionem.

Ex remansione Christi in templo, discce affectum

sectum ad res spirituales, in ijsq; gustum habere stude. Disce, relictis tuis Parentibus, consanguineis, amicis, relictis etiam mundó, si DEUS ad id te elegerit, exire de terra tua, de cognatione tua, & de domo Patris tui. Disce obsequio Divino te addicere, & occupari in his, quæ sunt Patris æterni. Disce, posthabitis quibuscunq; rationibus, & respectibus humanis, gloriam Divinam quærere. Disce libenter tractare res Divinas, cum doctis & Sanctis conversari, cum ijsq; spiritualia miscere colloquia.

Ex vita Christi abscondita, disce tuam etiam vitam debere esse in Christo absconditam. non debere te quærere vanitates, honores, apparentias, magnæ hominû æstimationē. Per multos vitæ suæ annos Christus latere voluit, ut & tu latere velis, nec in publicum prodeas, nisi quando DEI gloria, vel proximi obsequium, aut boni communis amor id à te postulabit; Ut ignorari, teq; pro minimo reputari velis.

Christus antequam mundo innotesceret, antequam prædicationem sui Evangelij inchoaret, crescebat ætate, sapientiâ, & gratiâ coram DEO & omni populo, ut scias, à tua ad DEUM conversione, ab infantia vitæ perfectionis, continuò te in virtute proficere, & in perfectione Christiana crescere oportere, idq; non solum coram DEO, sed etiam in oculis hominum, ut videant opera tua bona & glorificent Patrem Cælestem, hoc est, ut tuò exemplò ædificentur, & accendantur ad DEUM glorificandum, illique servendum.

Fac reflexiones, præsentis materiæ servientes, supra vitam tuam antea actam, reflexiones item supra vitam tuam sequentem, qua ratione eam instituire debeas. Elice affectus accommodatos, Proposita etc: Pete à Christo, ut suis exemplis addat gratiam fortem, & victtricem, quæ te

excitet ad eadem quàm perfectissimè imitanda. Advolvere infantilibus Christi pedibus, eosq; arctissimè complectere, lacrymis ob malè transactam vitam tuam profusis abluc, benedictionemq; postula ad vitam aliter instituendam dicens. Non dimittam te ô benignissime JESU, nisi benedixeris mihi.

PUNCTUM II. Audi verba Christi Joan: 10. *Si sermoni non creditis, propter opera quæ ego facio credite.* Atq; pro materia hujus & sequentis puncti, assume doctrinam Christi & vitam ejusdem, ab inchoata prædicatione Evangelij, ad tempus Passionis. Doctrinam hóc Punctô considera. Hæc quatenus ad mores & vitam rectè instituendam ordinatur, continet præcepta Evangelica, & sanctissima Christi Consilia. Præcepta obligant sub peccato ut servantur, Consilia ex se non obligant, promovent tamen perfectionem hominis.

Præcepta Christi Evangelica sunt: de faciendâ pœnitentiâ, de dando bono exemplo alijs, de reconciliatione proximô ante muneris oblationem, de amovendis proximis occasionibus peccandi, de diligendis inimicis, de non irascendo, de fugiendâ vana gloria, de curanda attentione in orando, de moderando affectu ad res temporales, de moderandâ nimia solitudine circa necessitates corporales, de cavendo judicio temerario, de cura ad animam pertinentium, de rerum spiritualium & sacrarum reverenti tractatione, de tenenda via salutis, de curandâ simplicitate, de adhibenda correctione fraterna, & si quæ sunt similia.

Consilia Evangelica sunt, de servandâ paupertate spiritûs, de esuriendâ & sitiendâ justitia, de patienter ferendis persecutionibus, de curandâ perfectione, de sequendo Christo, de exuendo seculi affectu, de exercendâ humilitate, de relinquendis omnibus, & distribuendis pauperibus, de servandâ

virginitate

virginitate & ducenda vitâ continenti. de ponenda anima pro proximis eorumq; salute, de benefaciendo inimicis, & alia his similia.

Reflechte te supra singula sive præcepta sive Consilia Evangelica, & expende quid singula velint. Reflechte item te, an & quomodo præcepta Evangelica hætenus observaveris? & quomodo in posterum ea sis observaturus? Reflechte etiam te, quid animi habeas ad sequenda Christi consilia? In quocunq; demum statu vitæ vivis, vel victurus es, aliqua saltem Consilia Christi à te observari convenit, non est securum negligere omnia, timenda est illa Divina comminatio Prover. 1. *Despexisti omne Consilium meum. ego quoq; in interitu tuo ridebo.*

Fac proposita, convenientes elice affectus.

PUNCTUM III. Audi illa S. Gregorii Magni verba: *Omnis Christi actio, nostra est institutio.* Et verba hæc applica exemplis & actionibus Christi quas fecit ab initio prædicationis Evangelii, ad tuam usq; Passionem. Percurre aliquas &, ex illis disces plurima.

Et imprimis Considera Baptismum Christi. Per hujus susceptionem docet nos, humilitate, conciliandos esse hominum affectus, quò facilius ad DEUM trahi & converti possint, siquidem ipse Christus, humilitate, quia humili susceptione Baptismi Joannis, conciliavit sibi animas Discipulorum ejusdem, ut eum sequerentur. Docet item, quantum alijs etiam, ijs qui te inferiores sunt, deferre debeas, neminemq; contemnere, cum ipse Joanni, se inferiori, tantum detulerit, ut voluerit ab eo baptizari. Docet præterea, quòd aliorum acta, labores, pro gloria DEI susceptos, laudare; approbare, & pretium ipsorum apud alios facere conveniat, cum ipse Christus, Baptismum Joannis, sua illius susceptione approbaverit. Docet tandem

debere te frequentare baptismum pœnitentiæ, quem Christus non est dedignatus suscipere. Per baptismum hunc, tu intellige Sacramentum pœnitentiæ, actusq; & statum pœnitentiæ.

Considera 2da Victoriâ ex superatis tentationibus à Christo reportatâ. Tentavit Christum dæmon triplici tentatione in deserto. Inprimis tentavit illum gulâ. *Dic ut lapides isti panes fiant*, Deinde tentavit eum elatione, & præsumptione, volendo ut Christus DEUM tentaret, ex pinnaculo templi se deorsum mittendo, tandem tentavit illum idololatriâ & quadam apostasiâ à DEO. Omnia regna mundi & eorum gloriam Christo ostendendo & offerendo. *Hæc omnia dabo tibi si cadens adoraveris me*. Omnes has tentationes Christus fortissimè superavit, superavit verò per actus oppositos. Gulam vincendo gustu in rebus spiritualibus, & in verbo DEI, Præsumptionem in DEO tentando, vicit per illa verba: *non tentabis Dominum DEUM tuum*. Avaritiam & idololatriam superavit adoratione veri DEI. *Dominum DEUM tuum adorabis*. Idq; hæc superavit, tela tentatoris retundendo armis ex Scriptura desumptis, dæmonem contemnendo, à se abigendo, nullasq; disceptationes cum eo habere volendo. Ex quo exemplo discies fortitudinem in superandis tentationibus, constantiam in resistendo eisdem, quantumvis frequentes, continuæ, & molestæ fuerint, discies modum, quo superare debeas.

Considera 3ta Orationem Christi, quantum gustum Christus in ea habuerit, ad eam sæpius se subtrahebat, & in ea pernoctabat. Qualiter item Christus in ea se gesserit, procidebat in faciem suam. Patri æterno ad omnia se offerebat, tædia si quæ patiebatur, invictò animò tolerabat, & orandi assiduitate vincebat. In oratione conformitati cum

eum divina voluntate studebat. Disce à Christo hunc orandi modum & has orationis virtutes ac perfectiones.

Considera 4to Conversationem, & modum agendi Christi cum Discipulis suis. Fuit omnibus amabilis, fuit suavissimus, exhilarabat omnes suo conspectu tanti suos æstimabat, ut eos non diceret servos, sed amicos. Tanta inter illos vivebat humilitate, ut inter eos esset, quasi qui ministrat. Ita fovebat eorum ad se fiduciam & amorem, ut Joannes supra pectus ejus recubuerit; sua Doctrinâ ita animos Discipulorum devicerat, ut ab eo avelli non possent.

Considera 5to Labores Apostolicos Christi, & modum agendi cum his, quorum salutem quærebat. Et disce indefatigabilitatem in laboribus, disce Misericordiam & commiserationem supra pauperes, quando quidem Christus miseretur super turbas. Disce occasione tuorum laborum non exigere propria commoda, non exigere respectus, favores aliorum, singularitates, cum Christus in suis maximis laboribus tanta incommoda passus sit, ut non haberet ubi caput reclinaret. Disce contemptum honorum, plausuum; siquidem Christus fugit, cum eum vellent facere Regem, siquidem tot & tanta patrando miracula, prohibuit hæc propalari, in Patrem æternum omnia hæc referre solitus. Disce unicam in omnibus sectari Gloriam DEI, ut DEUS clarificetur, cum Christus id semper intenderit & à Patre petierit; clarifica nomen tuum, Disce æquô animô tolerare invidias, contumelias, sinistras operum tuorum interpretationes, extenuationem eorum, quæ bene agis pro gloria DEI. Disce libertatem spiritûs nullis respectibus superabilem.

Reflecte te quàm procul sis ab exemplis Ducis tui, corrige in posterum quæ corrigenda adverti.

teris, fac propofita, elice affectus.

In Colloquio pete à Christo, ut te in locum Judæ fufcipiat, & fuâ doctrinâ, ac exemplis efformet ex te vas electionis portans nomem fuum coram gentibus.

In fine. Anima Christi, Pater noster.

DIEI VII.

Meditatio I.

De Imitatione Christi Patientis.

Praludium I. Imaginare Christum patientem, & in fua paffione non folum Patientiæ, fed etiam & aliarum virtutum exempla dantem, ad eaque fequenda te invitantem.

Praludium II. Pete à Christo gratiam, ut hæc exempla quàm perfectiffimè imitari poffis.

PUNCTUM I. Audi illa verba Christi Joan: 13. *Exemplum dedi vobis, ut quemadmodum ego feci ita & vos faciatis.* Et confidera in Paffione Christi plurima virtutum ejus elucere exempla, fecundum quæ efformari debent difcipuli & milites ejus. Iterum decurre præcipua Paffionis hujus myfteria, ac in ijs vide multiplicia virtutum Christi exempla, quæ imiteris.

Et imprimis confidera orationem Christi in horto. Ante orationem Christus patitur tædia, pavores, trifitias, ut te doceat contra tædia, trifitias, &c: Orationem effe præfentiffimum remedium, ut fcias in oratione non debere te promittere tibi confolationes, cæleftisq; fuavitatis abundantiam, fed potiùs te experturum ariditates & defolationes, neq; tamen ob hanc caufam ab oratione de

sistendum esse. Orat Christus ante passionem suam, ut scias, nullum negotium, præcipue arduum, & difficile, sensibus & sensualitati repugnans, debere te aggredi, absq; prævia oratione. Maxima & optima præparatio ad omnes labores, ad quævis ardua pro DEI gloriâ agenda & patienda, est oratio. In hac vires & robur est quærendum, ut quasunque difficultates & molestias superare valeas. Orat Christus, & Pater æternus calicem passionis ipsi propinat, ut discas hunc maximum fructum orationis tuæ esse debere, si DEUS tibi suum calicem propinet, hoc est si te faciat: aliquid pro nomine suo pati. Ut discas non alias in oratione quærendas tibi esse consolationes, nisi gustum calicis Christi, eò omnes tuæ debent collimare intentiones, ut calicem salutaris de manu Domini suscipias, hoc est, ut æquò animò feras quasunque cruces, flagella, amaritudines, confusiones, contemptus, persecutiones, quas immittet manus Domini.

Orat Christus, & ab Angelo de cælo confortatur, ut discas non esse tibi sperandum, quòd sis ab Angelo de cælo confortandus, ut tædia, mærores, tristitias & tentationes quasunque fortè animò ferre & superare possis, nisi prius ad orationem recurreris, Angelus etiam Christum non confortat nisi orantem.

Orat, & prolixius orat, ut tibi longior oratio & meditatio sapiat. Prolixius orans Christus factus est in agonia; oratio enim constans fortem te facit, facit luctatorem in agone decertantem, facit ut mundo & carni moriâris, soli autem DEO vivas. Hinc etiam discas, orandum tibi esse ad defectionem virium, ad deliquia, ad agonem. Orans Christus sudore sanguineo perfunditur, ut discas orationis beneficio te obtinere, ut tentationibus tuis usq; ad sanguinem resistas, ut in laborando pro gloria DEI nullis sudoribus parcas.

Considera 2dò Proditionem Christi à Juda. Proditur Christus orbis Magister, à Juda discipulo. O quanta ingratitude ? proditur osculò, ad quod imò ad artissimum amplexum Christus Judam admisit, ejus sceleris conscius. O quantus in Christo inimicorum amor ? Proditur post abjectionem Christi ad pedes proditoris in cænaculo factam. O quanta Judæ obliuio ? Proditur à Juda, qui in hoc impio proposito, sanctissimum Corpus Christi, in Sacramento Eucharistiæ tunc primùm instituto, suscepit. O sacrilegium ? proditur, post Christum levissimò pretiò venditum. O depretiatio ? proditur in sensissimis Christi hostibus, nimirum, Sacerdotum Principibus, eorum ministris, & immanissimis lictoribus. O crudelitas ? Ex hac Judæ proditione discce, debere te præparare ad omnes ingrattitudines, laborum tuorum circa proximos non aliam tibi pollicearis mercedem, nisi ingrattitudinem. Discce inimicos tuos affectu & amore speciali complecti, nec aliter injuriam vindicare, nisi amoris contestatione, & obsequiorum ac etiam beneficiorum exhibitione. Discce humilitate devinciendos esse peccatores, ut eos DEO lucreris, etiam tunc dum nulla cujusquam fructus spes affulget. Discce quò deducant sacrilegia : sacrilega illa in cænaculo susceptio sacratissimi Christi Corporis, Judam ad tantam deduxit malitiam, ut Christum in mortem proderet ac deinde, ex desperatione, laqueò vitam finiret. Discce ulterius, ut Christi pretium quàm maximum habeas, ne Christum pro re levi, pro parvo emolumento, pro momentanea voluptate, & sensualitate vendas. Tandem ex eadem proditione discce, non debere te Christo esse meliorem, Christus maximis suis hostibus tradi voluit, & tu ubiq; hostes habiturum te noveris, si Christi volueris esse miles & Discipulus.

Fac reflexiones, affectus, & proposita materix accomodata.

PUN

PUNCTUM II. In alijs adhuc mysterijs Christi Passionis, exempla virtutum, à tuo Duce & Magistro tibi, data intueri.

Et imprimis considera flagellationem Christi. Flagellatur Christus, virgis, spinis, catenis, unguibus, ut memineris te ad multa flagella preparari debere, multa siquidem sunt flagella peccatoris. Flagellatur Christus immanissimè, ut tu patienter feras flagella paternæ manûs. Flagellatur filius DEI, ne tibi grave videatur, si tu flagelleris filius iræ & servus peccati: Flagellatur ad columnam alligatus, ut & te tua columna, hoc est voluntas & beneplacitum DEI, cui te alligare debes, teneat, dum te DEUS permittet gravissima pati & sustinere flagella. Ante flagella denudatur, ut & tu tuorum defectuum denudationes æquò animò feras, imò ipse vulnera tua medico spirituali, hoc est Confessario & conscientiae tuæ directori, forti & genoroso animò detegas. Flagellatur Christus innocens, nè tu tot criminu reus, sine flagellis esse velis, ne tibi in ulteriori vita, poenitentiae tuorumq; peccatorum poenae, in hac vita perferendae, sint graves, flagellatur toto corpore, ut & tu mortificatione ejus toto corpore circūferas.

Considera 2da. Coronationem Christi coronâ spineâ. Christus postquam contempsit coronam regalem, coronatur coronâ spineâ. ut cum S. Catharina Senensi discas coronae aureae in hac vita praeligere spineam. Coronatur spinis caput tuum Christus, ne tu sub spinoso capite, sis membrum delicatum. Caput sapientiae aeternae spinas recipit in coronam, ne tu laurus appetas, & tuorum talentorum, ingenij, eruditionis, doctrinae, eloquentiae, activitatis pretia & aestimationem, ne cum licentiosis juvenibus corones caput tuum rosis. Christus sepit aures suas spinis, ut & tu sepias aures tuas adversus omnes mundi, carnis & daemonis suggestiones, & ad omnes tentationes obsurdescas.

Pro-

Profundè penetrent caput Christi spinæ, ut ex tuo capite expungant omnes vanitates, cogitationes terrenas, sensuales, mundanas. Coronatur Christus in Regem dolorum, ne tu sis voluptatum, sensualitatum, tuorumq; commodorum mancipium.

Considera 3tio. Crucis bajulationem, fert crucem Christus, ut sciaste, nisi crucem tuleris, Christi militem & discipulum esse non posse. Hæc sunt arma, quibus DEI & tuos hostes debellare te oportet. Timet crucem diabolus, sed maximè illam, quam Christum sequentes deferimus. Fert crucem Christus gravissimum, ut discas nulli cruci, etiam si ei ferendæ te imparem judicares, si tibi à Divina manu & voluntate imponatur, humeros tuos te subducere debere. Faciet DEUS cum tentatione proventum, addet robur & vires, ut quantumvis crux gravis fuerit, illam ferre & sustinere valeas. Fert crucem Christus, ad quam secum ferendam angariari debuit Cyrenæus de villa. Tu tecum dispice, an & tu ad crucem Christi ferendam, hoc est: ad ferendas confusiones, contemptus, afflictiones, & persecutiones angariari & compelli non debeas. Si tibi crux Christi, si labores pro Christo, tua incommoda, mortificationes, & pœnitentiæ ad vindicanda peccata susceptæ, graves sunt, si ab his abhorres, tanquam à furca & ligno maledicto, si ad hæc compelli debeas, si hæc ex necessitate quadam, quod hæc evitare non possis, non verò ex amore crucis Christi, & ex gustu in ipsa cruce, sustinere consuevisti, Cyrenæus es, idque Cyrenæus de villa, hoc est, villani, abjecti, & vilis animi. Vilis enim & abjecti animi est crucem Christi fugere, & ad eam ferendam necessitate cōpelli.

Reflecte te supra vitam tuam, supra flagella, spinas, & bajulationem crucis tibi impositæ, quò animò hæc pertuleris hætenus? & cogita quomodo tibi hæc deinceps exemplò Christi perferenda?

Fac

Fac proposita elice affectus gratitudinis, compassionis, confusionis, doloris, aliosque similes.

PUNCTUM III. Audi illa verba Exodi. 25. *Inspice, & fac secundum exemplar, quod tibi in monte monstratum est.* Et considera in monte Calvariae propositum tibi esse exemplar, cui præcipuò studiò te cõformare debes. Tale exemplar est ipse Christus cruci pro tuâ salute affixus.

Ex Cruce tanquam ex Cathedra (Cruce siquidem secundum S. Augustinum, facta est Cathedra Magistri docentis) docet te Christus, docet suos milites & discipulos, quid agere, quid in Duce suò imitari debeant, idque ita docet exemplò, ut doceat simul & verbo, imò non unò verbò, sed septem verbis, de Cruce prolatis docet, magnamque nobis conatur persuadere perfectionem.

Orando pro crucifixoribus: *Domine dimitte illis, quia nesciunt, quid faciunt*, docet nos amorem inimicorum nostrorum, docet orandum esse pro persecutoribus nostris, ostendit quales imprecationes nostræ esse debeant.

Per Verbum: *DEUS DEUS meus ut quid dereliquisti me.* docet in afflictionibus doloribus, morbis ad Orationem confugiendum esse, postulanda tunc vel maximè Divinæ gratiæ auxilia, ne nos tunc DEUS derelinquat, ne auxiliante suâ gratiâ destituat.

Per verbum: *sitio* docet, ut sitiamus Justitiam, ut sitiamus majora & majora semper pro gloria DEI pati, ut desideremus saturari opprobrijs, confusionibus, ut sitiamus perfectionem & salutem sive nostram, sive proximorum nostrorum.

Per Verba ad Latronem dicta: *Hodie mecum eris in Paradiso*, docet nos, de salute nostra, post quantacunque peccata à nobis commissa, non desperandum esse, si in toto corde ad DEUM convertamur, docet in nostris afflictionibus & doloribus,

spe æternæ retributionis & gloriæ animum erigendum esse, illudque quàm maximè à nobis curari debere, ut in supremo vitæ nostræ momento audiamus à Christo *Hodie mecum eris in Paradiso*:

Per Verba: *Ecce Mater tua, Ecce Filius tuus* securos nos reddit, de materno Sanctissimæ DEI Parentis in nos affectu, docet etiam, quanto amore debeamus in eandem ferri? non alio scilicet, nisi affectu filiali tanquam in Matrem nostram. Docet, in maximis nostris afflictionibus, angustiis tribulationibus, dum videmur à DEO derelinqui, ad hanc Matrem recurrendum esse, docet curandum nobis esse, ut tantæ Matris filij esse mereamur, ut filialem ipsi testemur affectum, fiduciam, & reverentiam.

Per illa verba: *In manus tuas commendo Spiritum meum*, docet enitendum nobis esse, ut per hanc vitam, quâ in corpore mortali vivimus, spiritus noster sit semper in manibus DEI, sit inquam per gratiam ejus sanctificantem, ne quando per peccatum ex his manibus infeliciter elabamur; magis tamen curandum esse, & spiritum nostrum manibus Divinis ferventiùs commendandum, in afflictionibus, doloribus & tentationibus nostris, atque in cruce, dum hanc patimur. Maximo autem studiô allaborandum esse, ut dum spiritus noster per mortem à corpore dividetur, non in alias manus deveniat, sed à manibus Divinis suscipiatur, & in eis tota æternitate quiescat.

Tandem per verbum, *Consummatum est*, docet Christus, consummanda esse omnia, consummanda esse ea, quæ propter DEUM, Justitiam, patimur, suumque finem acceptura. Docet, sicut passionis Christi consummatio præcessisse debuit, ut redimeremur, ita ut salvemur, nostrorum bonorum operum consummationem necessariam esse, nec opera nostra bona aliter nobis profutura, nisi in quantum

quantum consummata fuerint, hoc est, si in ipsis ad mortem perseveraverimus.

Ex eadem Crucis cathedra docet Christus exemplo milites & discipulos suos, & eosdem in præcipuis virtutibus instituit, ita ut verè dicatur, exemplar in monte nobis monstratum esse, quod nos in spicere & imitari oportet. Affigitur Cruci Christus, ut discas etiam te Cruci Christi configi debere. Vita Christiana secundum præcepta & consilia Christi instituta, è mente S. Augustini *Crux est & Martyrium*, huic Cruci si Christianus es, affigi debes. Tribus clavis Christus suæ Cruci affixus est. Tu quoque affigi debes tribus clavis, affigi debes Fide, Spe, & Charitate, affigi debes taliter, ut unò clavò tecum simul affigatur Cruci Christi concupiscentia carnis, seu tua caro, præcipuus animæ tuæ hostis, alterò clavò ut affigatur concupiscentia oculorum, seu mundus, alter animæ hostis, tertio clavò ut cruci affigatur superbia vitæ, seu diabolus. Porro Christi & tuæ Cruci affiges concupiscentiam carnis, si renuntiaveris carnis voluptatibus, saltem illicitis, sensualitatibus immoderatis, nimio commodorum appetitui, affiges Cruci concupiscentiam oculorum seu mundum, si inordinatum affectum ad divitias & rerum omnium affluentiam exueris, affiges Cruci superbiam vitæ, contemnendo propter Christum honores, æstimationem, apud homines, favores & respectus, omnesque vanitates. Tres clavi affigentes Cruci carnem mundum & diabolum, debent esse, mortificatio carnis, Paupertas Spiritus, humilitas.

CHRISTUS in sua Cruce ita constanter persistit, in eaque mortuus est, ut nullis irrisionibus, contumelijs opprobrijs, nullis promissionibus induci potuerit, ut de Cruce descenderet. Disce exemplo Magistri tui & tibi in cruce fortiter permanendum esse, nec unquam de cruce descendendum. Propono

fitata tua, quæ statuisti, ita tibi exequenda sunt, ita in eorum executione persistendum, & perseverandum est, ut nullis virtutis tuæ irrisionibus, nullis persuasionibus, à benè cæptis retraharis, ut in vita Christiana, præceptis & consilijs confromi tanquam in Cruce, cui te affixisti, superatis quibuscumque tentationibus, ad mortem usque perseveres.

In Colloquio statue ante oculos tuos Christum durissimæ Cruci, amore tui affixum, sanguinē ex sacris vulneribus ac toto corpore copiosissimē profluentem : Intuere invictā patientiā sustinentem crudelissimæ mortis suppliciū & inclinato capite morientem. Audi etiam de cruce clamantem & te alloquentem. Vide homo quæ pro te patior, ad te clamo qui pro te morior. Eique supplica humillimē ut tali & tam dolentī spectaculo movearis ad detestanda & deslenda peccata tua, ad illum ipsum propter te cruci affixum, toto cordis affectu amandum; ut etiam Doctrina sapientissimi hujus Magistri, ex Crucis cathedra tibi tradita, cordi tuo altè infixā hæreat. eamque exequi studeas, tandem ut patientiæ, aliarumque virtutum Christi, patientis & morientis exempla quā perfectissime imiteris & cum ipso in Cruce ad mortem usque perseveres.

In fine, Anima Christi.

Meditatio II.

De Resurrectione & Ascensione Christi ac de Spiritûs S. missione.

Praludium 1 Imaginare quod spectes gloriam Christi resurgentis, in cœlū ascendentis atq; in dextera Patris sedentis, & Spiritū S. imittentis in discipulos

Praludi-

Praludium 2 Postula gratiam ut ex hac Christi gloria & Spiritus S. missione, derives aliquid in bonum animæ tuæ.

PUNCTUM I. Audi illa verba Pauli Apostoli ad Roman. 6. *Quomodo Christus surrexit a mortuis per gloriam Patris, ita & nos in novitate vite ambulemus.* Et considera Resurrectionem Christi, ejusque modum debere esse exemplar & ideam novitatis vitæ, in qua omnes quidē Christiani, sed maxime illi qui exercitia S. Patris Ignatij peragunt, & ex ipsis sunt prodituri, ambulare debent. Quod ut melius assequaris, expende proprietates & circumstantias Resurrectionis Christi, ex his enim cognitis, intelliges, qualis vitæ tuæ novitas esse debeat, & quomodo in hac tibi sit ambulandum?

Et *Inprimis* Noveris Resurrectionem Christi fuisse veram, juxta illud: *Surrexit Dominus verè*, non fuisse verò resurrectionem phantasticam, simulatam, & apparentem, non fuisse talem, qualis existimatur fuisse resurrectio Samuelis, dum hic in gratiam Regis Saul à Pythonissa fuit suscitatus.

Unde colliges etiam novitatem vitæ tuæ non debere esse fictam, apparentem, & simulatam, sed debere te ambulare in novitate vera, hoc est conjuncta cum vera mutatione morum & actionum tuarum.

2do Resurrectio Christi à mortuis fuit perfecta & stabilis, hoc est talis, ut Christus post illam amplius non moreretur, qualis futura est resurrectio omnium Beatorum pro die Judicii, qui tunc ita resurgent, ut amplius non sint morituri. Non fuisse verò Resurrectionem Christi similem resurrectioni Lazari, aut alicujus alterius à Christo vel quopiam Sancto resuscitati, siquidem hi iterum mortui sunt, de Christo autem canit Ecclesia. *Christus resurgens à mortuis, jam non moritur, mors illi ultra non dominabitur.* In tali & tu ambula novi-

tate scilicet in novitate perfecta, in novitate stabili & immutabili, ut stabiliter Christo adhæreas, præcepta & consilia ejus sequaris, ejus vestibis & insignibus induaris, ut ea, quæ tibi in his exercitijs **DEUS** inspiravit, sanctè exequaris, & constanter in ijs exequendis perseveres, ut gratiæ tibi datæ & dandæ fortitudo in vincendis tentationibus, & debellandis animæ tuæ hostibus sit perpetua, indefectibilis, & nullâ unquam vetustate corrumpenda.

3^{ti}o Christus surrexit cum quatuor dotibus gloriosi sui corporis, scilicet cum claritate, subtilitate, seu penetrabilitate, agilitate & impassibilitate. Si miles dotes requirit vitæ tuæ novitas, in qua ambulare debes, requirit claritatem exclusivam profunditatis & obscuritatis animi, hoc est talem claritatem, ex vi cujus tua conscientia & interior animæ tuæ status confessario, Conscientiæ tuæ directori, ac etiam Superiori si quem nactus es, vel nactus fueris, clarissimè pateat. Requirit item eadem novitas vitæ tuæ subtilitatem & penetrabilitatem. Ratione talis dotis, Christus habuit, ut nullum corpus illi obfisteret, nihilque impediret, quominus de loco quocunque in alium quò vellet, se transferret, omniaque ipsi pervia essent. Et tu ex his exercitijs subtilitatem & penetrabilitatem efferre debes, ut caro spiritui rebellis, sensualitas tua, affectus terreni, in **DEI** servitio & continuò in virtute progressu, te non impediant, ut nullæ difficultates obfistant, nihilque sit quod te in via salutis & perfectionis retardet, sed omnia tuæ fortitudini & magnanimitati sint pervia. Ulterius resurrectione Christi habuit dotem agilitatis ex vi cujus, Christus velocissimè ex uno loco in alium quantumcunque distantem transire potuit. Similem agilitatem debet habere novitas vitæ tuæ, ut in te nullus reperiatur torpor, ut tepiditas & acedia locum non habeat, sed ut ambules in fervore spiritus ut sis promptus

ptus ad omnia, ad quæ te *Deus* suis inspirationibus & motionibus vocat, & *Spiritus Sancti* impellit gratia. Tandem *Christi* resurgentis *Corpus Sanctissimum*, habuit dotem impassibilitatis, quod nullis vulneribus, doloribus, injurijs, nulli corruptioni esset obnoxium. Similem impassibilitatem novitas vitæ tuæ habere debet, ut virtus & perfectio tua, nullâ re lædi, & ne in minimo quidem offendi imminui aut corrumpi possit, ut illi nihil prorsus noceat non noceant prava aliorum exēpla, non occasiones non conversationes nocumentum quodpiā afferant non linguæ malevolorum, non crises, & censurationes, non ulli respectus humani.

4^{to} *Christus* postquam surrexit à mortuis *Matri* suæ *Sanctissimæ* imprimis apparuit, visendum etiam se præbuit *Petro* & *Magdalenæ* pœnitentibus, *Discipulos* ad sepulchrum currentes de resurrectione suâ edocuit, laborantibus adfuit, spiritualia colloquentibus, comitem se adjunxit.

In tali novitate & tibi est ambulandum, ut sæpius ante *Beatissimam Virginem* compareas, affectum ad eam filialem induas, vitæque tuæ emendatione eam solari & ipsi placere velis. Ut laxiorum & dissolutorum familiaritatem & conversationem fugias, illis verò te communices quos verè emendatos & pœnitentes, atque cum *Deo* conjunctos conspicias. Ut laboriosis, in via virtutis currentibus, & charitatem atque animorum unionem amantibus, te familiarem reddas. Tandem ut ijs qui spiritualia tractant, & colloquuntur de rebus Divinis, socium te libenter adjungas, ac eorum conversatione delecteris.

5^{to} denique *Christus* resurgit à mortuis, cum 5. vulnere suorum sacris stigmatibus seu clavorum & lanceæ signis, ac vestigijs in corpore suo glorioso relictis. Per quod docemur, novitatem vitæ nostræ non futuram similem & conformem resur-

rectioni Christi, nisi stigmata Domini nostri IESU Christi in corpore nostro portaverimus. Stigmata Christi in nobis expressa, hoc est continua & in rebus omnibus quæsitæ corporis mortificatio, probat quod in vitæ novitate ambulemus.

Ille in novitate vitæ conformi resurrectioni Christi ambulat, cujus manus, dura & aspera, ac labores pro gloria DEI graviores non refugiunt, & per hoc ipsum ostendunt se esse perforatas, ac signatas cicatricibus. Cujus pedes vulnerati declarant, quod via virtutis, spinis ac vepribus horrente incedant. Cujus latus apertum, clamat se esse crucentam amoris sedem.

His consideratis reflecte te, qualis vitæ tuæ novitas sit futura abhinc, & cum qua novitate ex his collectionibus es proditurus; certè cum novitate vitæ est tibi hinc prodeundum. Christus surrexit, ut suam virtutem Divinam ostenderet juxta promissionem illam; *Solvite templum hoc & in triduo reedificabo illud*, pariter vitæ tuæ novitas ostendet, an virtute Divinæ gratiæ ipsius in te sit reedificatum templum Spiritus S? quod per tuam licentiosam legibusque Divinis difformem vitam destructum fuerat.

De Christo dicit Apostolus Paulus: Si Christus non surrexit, inanis est prædicatio. Nisi & tu in novitate vitæ ex his collectionibus prodieris, vana est S. Patris mei Ignatij per hæc exercitia prædicatio, inanis labor gratiæ Divinæ. Ut Christus resurgeret, inter alia, etiam hoc incentivum & motivum fuit, ut expleret vota & satisfaceret expectationi Matris suæ sanctissimæ, & sua resurrectione afferret eidem solatium, ut item satisfaceret expectationi Apostolorum, aliorumque Discipulorum, & omnium Credentium. Pariter & tuam Resurrectionem & vitæ novitatem expectat MATER DEI Beatissima, expectat S. Angelus Custos, SS. Patroni tui, expectat tota Curia cœlestis,

flis, ex seria & constanti tua ad DEUM conversione & vitæ in melius reformatione, gaudium & solatium acceptura.

Excita te ad hanc vitæ novitatem, in eaque te ab hinc ambulaturū, forti & invicto animo statue, atque à Christo Resurgente postula, ut virtute suæ Resurrectionis faciat te in novitate vitæ ambulare.

PUNCTUM II. Audi Verba Deuteron. 32. *sicut aquila provocans ad volandum pullos suos & super eos volitans, expandit alas suas.* Et cogita Christum in gloriosa sua Ascensione, esse veluti aquilam magnarum alarum. Aquila hæc expandit alas, quatenus ascendit in Cælum elevatis manibus. Volitat autem super pullos suos, quia spectantibus, Apostolis & discipulis levatur in Cælum. Eadem aquila provocat ad volandum, dum corda nostra secum in cælum trahit, & suo exemplo docet, ut ascendamus, & quomodo ascendere debeamus. Immorare paulisper contemplationi Ascensionis Christi &.

Considera ulterius imò Christum in cælum ascendere corpore, ut tu ascendas corde, prout Christianos omnes adhortatur. Augustinus. *Ascendamus cum Christo interim corde: cum dies ejus promissus advenerit, sequemur & corpore.* Porro ascendes corde in cælum, si ascensiones disposueris in corde tuo, quas ipsas dispones, continuo in virtute & perfectione crescendo, eundo de virtute in virtutem. Dispones, ascensiones in corde, si per Meditationem æternorum & Cœlestium, cor tuum illic ascendit, quod in cor hominis non ascendit. Disponimus ascensiones in corde si ibi nostra fixa sunt corda, ubi vera sunt gaudia. Ascendis corde in cælum per frequentes mentis ad DEUM elevationes. Quas ipsas ascensiones etiam nunc dispone, statuendo frequentem talium elevationum usum,

per usurpatas orationes ejaculatorias, frequentes intentionis renovationes, & per sæpius elicitos breves actus amoris DEI, Fidei, Spei, contritionis, desiderij videndi DEUM aliosque similes. Ascendis corde; si ex occurſu cujuscunque creaturæ accipis occasionem, DEUM Creatorē laudandi, glorificandi, & super omnia amandi. Tandem ascendis corde, dum non adhæres affectu ad res terrenas & sensuales, sed hunc à terra omnino avellis & abstrahis ut liberiùs amore tuo & mente in DEUM ferri possis.

Considera 2dò Quòd Christus ascenderit in cælū, impressis & relictis in monte, ex quo ascendit, vestigijs pedum suorum, ut scias vestigijs Ducis tui, per illius perfectam imitationem insistendum esse. Vestigia hæc ostendunt viam, quā ad astra eundum est, quā nisi iveris, cum Christo nunquam ascendes. Porro vestigia à Christo relictā, sunt via Crucis, via Mortificationis, hæc enim Christus in cælū ivit, hanc tibi Christus reliquit, ut sequaris vestigia ejus.

Considera 3tò Christum in cœlos ascendisse elevatis manibus, unde discas ascendere cum Christo non posse eos, quorum manus sunt remissæ, & languentes, verū manus ejus, qui vult cum Christo ascendere, elevatas esse debere, hoc est ferventes in opere, & omnia instanter agentes. Manus ascendentis in cœlum non debent ad terram demitti, non debent extendi ad iniquitatem, sed debent elevari per sublimes intentiones, per actus meritorios intensos, heroicos, ea operando quæ Angelorum ministerio ante DEI conspectum deferri, DEOque præsentari possunt. Ascendit Christus elevatis manibus, quia in illis cicatrices ferebat, quas Patri æterno præsentaret. Quia in manibus ferebat thesaurum meritorum suorum. Tu etiam si cœlum ascendere desideras, vacuis manibus ne compareas, debes multa aggregare, quæ in tuis manibus & manipulis feras. Ad Cœlum ascendentes veniunt

unt cum exultatione portantes manipulos suos.

Considera 4to Christus ascendit, nube illum suscipiente ab oculis Discipulorum, per quod docet, ut & tu ascendas, necessarium esse, ut nubes illa Sanctissima, quæ nobis in carne humana, velatum DEUM depluit, hoc est Beatissima DEI Parens, te suscipiat, & materno complectatur affectu, suæque intercessionem in cælum attollat. Docet etiam tunc te cum Christo ascensurum, si latueris, & latere volueris, si gloriam mundi contempseris, si multa tua bona opera & mortificationes latere volueris.

Considera 5to. Christus ascendit videntibus Discipulis & in cælum euntibus intuentibus, ne tu tibi frustra blandiaris, de tuo in cælum & ad magnam perfectionem ascensu, si non ascendas videntibus alijs, hoc est si tua virtus non emicat exterius, si bono exemplò non præluces alijs. Necessarium quidem est, ut multa tua bona opera sint nube tecta, ut sint in abscondito, qualiter tectæ esse debent mortificationes, & plura opera tua bona, tuæ libertati plenè relicta, cæterum simul est necessarium, ut illa opera, quæ sunt præcepta, & ad quæ, aliquâ ratione multis communi, obligaris, videantur ab alijs, fiantque illis videntibus. Ascendit Christus in cælum videntibus discipulis, non est enim difficile ascendere in cælum, inter homines spirituales cælestia meditantibus, DEUM & cælum intuentes. At inter eos, quorum oculi sunt in finibus terræ, inter homines vanitatem, commoda sensuality spectantes & sectantes, inter eos qui terrena sapiunt, qui terræ & carni immergi sunt, ascensus in cælum est difficilis, & vix non impossibilis juxta illud *Cum Sancto Sanctus eris, cum perverso perverberis.*

Considera 6to Ascendit Christus loquens de Regno DEI. Loquentes enim vana, secularia, terrena &c. non ascendent. Hoc est indicium, quod quis cum Christo ascendat in cælum per communiones

miones Sacras, usum Sacramentorum, pia opera, Examina conscientiae, meditationes rerum caelestium, si in confessoribus libenter audiat & loquatur de Regno DEI, de rebus Divinis, de rebus ad salutem spectantibus.

Considera 7mò Christus ascendens captivam duxit captivitatem. Etiam tu, ut cum Christo ascendas, per frequentes actus fidei, captiva intellectum tuum in obsequium fidei, ut ascendas per actus aliarum virtutum, per observationem praeceptorum DEI, & quarumcunq; legum, captiva voluntatem, intellectum, potentias, & sensus omnes, in obsequium legis & voluntatis Divinae. Si voluntas tua, sensus, passionis, & quaecunq; potentiae aliae gemunt in captivitate daemonis, educ eas ex hac captivitate. Educ hos captivos è domo carceris, ita enim fiet ut ascendens captivam ducas captivitatem.

Considera 8vò. Christus ascendens ita ascendit, ut ipse sit qui & descendit in inferiores partes terrae, ut loquitur Apostolus. Et tunc maxime te ascensurum noveris, si te humiliaveris, si per demissionem & vilem tui aestimationem descenderis infra omnes. Tunc ascendes in caelum, dum descendes in inferiores partes terrae, hoc est in sepulchrum, & infernum, per fructuosam mortis & poenarum inferni considerationem.

Tandem eodem Apostolo attestante : *Christus ascendit, ut impleat omnia*: Ad ascensum enim requiritur, ut quis impleat omnia, quae in lege sunt, ut nullus apex de lege praetereat, ut impleat omnem Iustitiam, qui haec non implet, is descendit, non ascendit.

Reflechte te supra ascensus tuos, reflechte te supra vitam tuam praeteritam, ut desleas errata tua, & supra vitam futuram, ut scias quae ratione tibi cum Christo sit ascendendum.

Elice

Elice affectus materiæ servientes, tandem à Christo ascendente postula ut jubeat te suis vestigijs ad se ascendere, ut te in hoc ascensu potenti suâ gratiâ juvet, & cor tuum secum in cælum trahat.

PUNCTUM III. Audi Christum per Prophetam dicentem Ezech: 36. *Dabo vobis cor novum, & spiritum novum ponam in medio vestri.* Atq; hæc verba missioni Spiritûs S. in Apostolos accommoda, eaq; de tali missione intellige. Circa quam

Considera 1mo Spiritum S. etiamsi sit coæternus Patri & Filio, ab ipsisq; ab æterno procedat, dici tamen Spiritum novum, tum ex eo quòd venerit, cum tanta gratiæ, aliorumq; donorum plenitudine, cum qua nunquam ante venerit in veteri lege, tum ex eo quòd Spiritus S. venerit in Apostolos cum nova lege Christi, cum lege gratiæ, per quam abolita est lex vetus, tum ex eo; quòd Spiritu sancto adveniente, nova facta sint omnia, quòd tunc maximè Spiritus S. orbi innotuerit. Quia item venit in forma insolita, venit in igne corda purificante, venit in lingvis igneis & dispersitis.

Considera 2do Cum descensu Spiritûs S. in Apostolos, datū esse iisdem cor novum. Ante adventum Spiritûs S. Apostoli propter metum erant in unum congregati, unius domûs angustijs continebantur, pedem inde efferre non audebant: excordes erant & sine corde. Adveniente Spiritu Sancto datum est illis cor novum, quia datum est animi robur ad superandas quascunque difficultates, ad tolerandas persecutiones, ad respectus contemnendos, tormenta quævis sustinenda, & mortem pro Christo fortiter subeundam. Datum est illis cor novum, quia cor docile, Spiritus Sanctus docuit eos omnem veritatem, docuit omnia. Datum est illis cor novum, quia cor sanctum, virtuosum
cor

cor amore DEI æstuans, ardens & flagrans zelo animarum, studio propagandi gloriam DEI, desiderio fundendi sanguinem pro Christo.

His consideratis reflecte te supra Exercitia spiritualia S. P. IGNATII quæ agis, & ex parte majore egisti. Tempus hoc, tempus illud fuit quod Christus daturus tibi erat spiritum novum. An hic spiritus in te descenderit, tecum dispice. Accepisti plenitudinem gratiarum, si merita cumulaſti, si gratiam sanctificantem & alia dona habitualia auxisti, si gratias illustrantes & excitantes plures tibi contulit DEUS, si inspiravit proposita practica & efficacia, si ad hæc exequenda contulit robur & animum. Accepisti spiritum novum, si deinceps vives & animaberis spiritu novo, juxta legem gratiæ, juxta legem Christi, juxta legem quam Digitus Paternæ dexteræ Spiritus Sanctus, per inspirationem sanctorum luminum, propositorum, per electionem statûs, vel certè sanctioris vitæ, intra tuum statum, in tabulis cordis tui descripsit. Accepisti spiritum novum, si in igne, hoc est in fervore, in magnis ardoribus & Divini amoris incendijs descendit in te Spiritus Sanctus, si igne hoc, & lingua & cor tuum fuerint purgata.

Reflecte te deinde an acceperis cor novum, hoc est contra omnia adversa obduratum, nullis cedens difficultatibus, in viâ virtutis & perfectionis occurrentibus, an acceperis tantum animi robur, ut omnes pusillanimitates, vanos metus; humanos respectus superare valeas; An acceperis cor docile, an practicè cognoveris, quis finis sit tuæ creationis? quæ obligatio serviendi Deo, ipsum amandi, imitandi Christum, quis finis, quæ obligatio hominis Christiani? quæ necessitas vivendi Christianè?

An acceperis cor virtuosum? & sine indutus virtute

tute ex alto ? An flagras amore DEI ? zelo propriæ perfectionis ? zelo salutis animarum ? desiderio promovendæ gloriæ DEI ? fundendi pro Christo sanguinis ?

Fac proposita & defectus toto hoc tempore commissos per ferventem exercitiorum decursum corrigere stude.

In colloquio invita ad cor tuum Spiritum Sanctum, & postula, ut cum gratis copiosissimis in te descendat, atq; cor novum in te creet, cor illius ipsius igne ardens & æstuans.

In fine Veni Sancte Spiritus.

Meditatio III.

De gloria Cælesti, & æterna Beatitudine.

Praludium 1. Imaginare S. Stephanum Protomartyrem, dum lapidaretur, contemplantem gloriam cælestem & in cælis apertis intuentem Dominum J E S U M stantem à dextris virtutis DEI, taliq; contemplatione animatum, mortem fortiter subiisse.

Praludium 2^{um} Pete à DEO ut exemplò S. Protomartyris, ita contempleris gloriam Sanctorum, ut accendaris ad perferenda quævis adversa, & ad fortiter ac strenuè cum hoste animæ tuæ decertandum.

PUNCTUM I. Audi illa verba Psal: 86. *Gloriosa dicta sunt de te civitas DEI*, Audi item illam definitionem communem Beatitudinis: Beatitudo est status omnium bonorum agregatione perfectus. Et considera gloriam illam Beatorum, quam DEUS præparavit diligentibus se,] tantam esse, ut quamvis non possit pro merito magnitudo

tudo ejus explicari, juxta illud Apostoli : *Nec oculus vidit, nec auris audivit, nec in cor hominis ascendit, quae preparavit DEUS diligentibus se.* De illa nihilominus quidquid gloriosi est dicibile, non im merito dici debeat. Quodcunq; bonum verè ac propriè tale, nulli inhonestati, turpitudini, aut malitiæ permistum cogitari potest, illud in illa sanctorum beatitudine & gloria reperiri censendum est, si non in se formaliter, saltem in aliquo eminentiore & perfectiore. Quod ut melius assequaris,

Expende 1^{mo} In illa beatitudine & gloria Sanctorum, nihil aliud futurum, nisi solum & purum bonum, hoc est nullam habens admistionem miseriæ. Hic dum vivimus, versamur in valle lacrymarum. Ipsa gaudia & solatia, lacrymas ex oculis nostris eliciunt. In illa gloria, *Absterget DEUS omnem lacrymam ab oculis sanctorum.* In hac vitâ sumus inter continuas mortes, inter multa pericula, inter insidias, latrocinia. Continuo nobis luctandum est cum hostibus animæ, ipsorum insultus ita nobis molesti sunt, ut tædeat nos plerumq; vivere; morbis continuo affligimur, egestatem patimur, in siti, famè, frigore, nuditate, totq; alijs miserijs vitam præsentem ducimus, gravibus obruimur laboribus, pascimur pane in sudore vultus nostri, tot & tantis ærumnis incessanter concutimur. In patria illa cælesti *neq; mors neq; luctus, neq; clamor neq; dolor erit ultra.* Summa ibi securitas, pax perpetua, magna tranquillitas. Ibi thesauri indeficientes, ad quos fur non appropriat, & quos nec tinea nec rubigo corrumpit. Ibi ver perpetuum, requies opulenta. Ibi sancti requiescent à laboribus suis, ibi exultabunt, sicut qui exultant in messe, nullus ibi contemptus sed summus honor.

Expende 2^{do} Magnitudinem illorum præmiorum

miorum, in hoc etiam futuram: Quòd status ille Beatorum complectetur omnes non quidem brutales, seu homini cum brutis cōmunes, ad quas, ex corruptione naturæ per peccatum vitiatæ, inclinamur, sed complectetur alias voluptates ordinis altioris, exuperantes omnem sensum. Quidquid te honestè oblectare potest, totum id eminenter continebit status ille beatitudinis. Imaginare hortorum, pratorum, fontium amœnitatem. Patria illa cælestis erit paradisus amœnissimus, consitus pulcherrimis floribus, arboribus semper virentibus, maturos eosq; suavissimos fructus spargentibus; ibi pascetur agnus inter lilia, reperietur illic fons saliens in vitam æternam. Imaginate urbium, palatiorum, splendores. Illam cælestem Jerusalem bene descriptam habes in Apocalipsi S. Joannis. Ipsa *Civitas aurum mundum simile vitro mundo, & fundamenta muri civitatis omni pretioso lapide ornata, & duodecim porta duodecim margarita sunt. & platea civitatis erit aurum mundum tanquam vitrum pellucidum.* Mansiones ibi amplissimæ & plurimæ, singuli Beati splendida palatia, imò amplissima & opulentissima regna possidebunt. Imaginare ulterius lauta & splendida convivia. In illa cælesti Patria celebrabuntur nuptiæ agni. Homo DEUS faciet cœnam magnam, assidebunt beati mensæ exquisitissimis instructæ dapibus. Ipse tunc Christus præcinget se & ministrabit, epulabuntur omnes in conspectu DEI, propinabitur illis vinum germinans virgines, bibent Sancti de illo genimine vitis, de quo se bibiturum, in regno Patris sui, ipse Christus appromisit. *Torrente voluptatis potabit DEUS electos suos, & illi inebriabuntur ab ubertate domus DEI.* Imaginare concentus suavissimos, aures & animum demulcentes, In cœlo concentus Angelici audientur, ibi omnis generis musica personabunt instrumenta, ibi can-

N

ticum

ticum audietur, quod solæ virgines cantare poterunt. Imaginare conversationes doctas, gratas, amænas, honestas. In cœlo conversationes erunt nobilissimæ, quia cum solis Regibus & principibus, cum hæredibus cœli, regni ac etiam DEI filijs, imò cum ipso Christo, beatissima DEI Matre, & quod maximum est, cum ipsa sanctissima Trinitate. conversationes illæ sunt futuræ doctissimæ, quia cum sapientissimis, quorum unusquisq; erit plusquàm Salomon, intuitivè enim DEUM videndo quisq; Sanctorum cognoscet clarissimè omnia, quæcunq; ad ejus perfectam beatitudinem scitu erunt digna & necessaria. Conversationes illæ erunt amænissimæ, quia cum personis gratissimis; quisq; Beatorum erit conformis imagini filij DEI, qui est speciosus formâ præ filiis hominum. Quia cum personis summè felicibus, quia erunt inter Sanctos summo amore mutuò se prosequentes, & arctissimâ conjunctos amicitia; erunt conversationes honestissimæ, quia inter Beatos DEO ipsi immersos, DEUM mente continuò versantes, & ejus voluntati, quæ est suprema omnis honestatis regula, maxime conformes. Tandem imaginare quæcunq; cogitabilia bona, status ille beatitudinis omnium horum bonorum aggregatione erit perfectus.

Expende 3tò Magnitudinem illam beatitudinis, derivandam in omnes Beatorum sensus. Visus fruetur conspectu sanctissimæ Christi Humanitatis jam glorificatæ, conspectu Matris DEI Beatissimæ exaltatæ supra omnes Angelorum choros, conspectu corporum glorificatorum Sanctorum. Videbimus gloriosa Martyrum vulnera pro Christo tolerata. Videbimus corpora illorum Sanctorum, eorumq; gloriam, quibus in terris specialius afficiebamur, quibus conviximus. Fruetur insuper Visus ineffabili illa claritate, splendore, Ma-
jestate

jestate, opulentiâ cælestis illius Jerusalem.

Auditus svavissimis concentibus recreabitur concentu illius trisagij: Sanctus, Sanctus, Sanctus, Dominus; illius cantici quod canent Virgines Agnum sequentes. Recreabitur auditus, dum percipiet continuas jubilationes, exultationes, glorificationes DEI, mutuas inter Sanctos tantæ felicitatis gratulationes.

Gustus fruetur nectare illo-cælesti, illa ineffabili svavitate convivii, nuptiarum Agni & cænæ magnæ.

Odoratus satiabitur svavissimo odore omnis generis florum, aromatum, lignorum, satiabitur odore gratissimo, quem glorificata Sanctorum afflabunt corpora; odore illo Incensorum, quæ incessanter DEO offerentur. Tactus demum suam voluptatem habebit tum ex detibus glorificati corporis, tum ex pretiosissimis vestibus, quibus tegentur corpora Sanctorum, tum ex reclinatorijs moliter stratis, in quibus corpora Sanctorum requiescent,

Expende 4to & considera felicitatem illam etiam in potentias animæ derivandam, etiam hæc suis disfluunt delicijs. memoria recordatione tot DEI beneficiorum sibi in vitâ concessorum tot mediocorum salutis à DEO benignissimè provisorum, bonique sui eorundem usus; recordatione illorum periculorum, ex quibus misericordiâ DEI erepti sunt. Dicentq; exultantes Beati: laqueus contritus est & nos liberati sumus Recordatione præterea brevium vitæ hujus ærumnarum, quæ tantæ felicitatis causa ipsis exstiterè, eritq; tunc dulce meminisse quod hic dulce fuit pati.

Intellectus summam habebit felicitatem & beatitudinem ex DEO viso, seu clarè & intuitivè cognito, ex cognita intuitivè essentia DEI, attributis & perfectionibus Divinis ex visis omnibus & singulis Sanctissimæ Trinitatis Personis. Ex cognitione altissimorum circa se consiliorum DEI. Ex cognitione seriei

prædestinationis, & gratiarum, per quas DEUS te salutem consequi voluit. Percipiet præterea intellectus felicitatem ex cognitione clara & perfecta tot & tam variarum creaturarum, naturæ & proprietatum earundem, ex cognitione meritorum Christi, omnium actuum elicitorum ab ejusdem humanitate, ex cognitione gratiæ sanctificantis, & aliorum donorum collatorum Beatissimæ, totq; alijs Sanctis. Fruetur intellectus magna voluptatē ex apprehensione suæ aliorumq; Beatorum felicitatis. Ex illis judicijs, quibus approbabit quæcunq; ante recta judicabat, quibus judicabit quàm vana & vilia fuerint, propter quæ multi exciderunt ab æterna felicitate, quàm item modica illa fuerint? quàm leves & exigui labores? pro quibus illi tam copiosa retribuitur merces. Fruetur adhuc intellectus singulari voluptate ex discursibus & illationibus, quas tunc circa salutem suam formabit, quomodo à fine suo excidisset, si certis occasionibus se non subduxisset, si alium vitæ statum elegisset, si non vixisset juxta statum ad quem vocatus est, si certos defectus non præcavisset, non correxisset. Tandem voluntas perfruetur ineffabili gaudio, & sui appetitus summè expletivo, ex amore summi Boni, scilicet DEI per intuitivam visionem cogniti, & gaudiò quò superabundabit de tanto possessio bono, perfruetur item singulari voluptatē ex amore sanctissimæ Christi Humanitatis, pretiosissimæ DEI Parentis, Sanctorumq; aliorum ejusdem secum beatitudinis consortium; ex variarum virtutum actibus statui illi beatitudinis non repugnantibus, quos voluntas Beati tunc eliciet; ex summa sua conformitate cum Divina voluntate, ex implacabili adversus peccata & reprobos odiò.

Expende 5to et postremo quòd Beatitudo illa Sanctorum, duplicem complectetur partialem beatitudinem. unam quā beatificabuntur ipsæ animæ

nimæ Sanctorum, alteram quâ post resurrectionem corporum ipsa etiam Sanctorum corpora glorificabuntur. *1ma* Consistit in visione clara & intuitiva DEI, quâ DEUM videbimus facie ad faciem, & in amore fructivo DEI. Visione hac DEI & amore reddentur Beati summè felices, his plenissimè explebitur ipsorum appetitus, contemplatione summæ illius pulchritudinis increatæ ita abripiuntur, ut nihil aliud possit illos oblectare, quod non sit conjunctum & compossibile cum tali visione. Vi talis beatitudinis Sancti efficiuntur similes DEO, in seipso felicissimo, *cum apparuerit, similes ei erimus quoniam videbimus eum sicuti est.* Per illam DEI, visionem & amorem, introibimus in potentias Domini, DEO perfectè uniemur, imò in DEUM quodammodo transformabimur. Altera partialis beatitudo consistit in glorificatione ipsa corporum, hoc est in quatuor dotibus gloriosi corporis, & in felicitate in ipsos sensus & potentias exteriores derivanda.

*His consideratis, cogita & conclude apud te 1mò quod non sint condignæ passionēs hujus temporis ad futuram illam gloriam, quod quævis adversa magno animò sint tibi perpetienda, ut illam gloriam cœlestem assequaris, quod omnî studiò curare debeas, ne ab illa Beatitudine excludaris. Conclude. 2dò Cælum tibi contemplanti, & magnitudinem præmij illius cœlestis consideranti, quantum omnia terrena, transitoria, sensualia vilescere & sordere debeant, sicut sordabant meo sancto Patri: IGNATIO, cujus frequens ille actus erat; *sordet mihi terra, dum cælum aspicio.* Quod item infelicem te existimare debeas, quamdiu felicitate illa non potiris, *infelix ego homo, quis me liberabit de corpore mortis hujus?**

Conclude 3tò. Quàm meritò conversatio tua in cœlis continua esse debeat, quod ibi oportet

teat corda fixa esse, ubi vera sunt gaudia. conclude *postremò* quantum tibi aspirandum, quò desiderio anhelandum ad supernam illam Patriam, quantum tibi mors sit exoptanda, ut quàm primum DEO frui possis, quàm familiaris ille actus Apostoli esse debeat: *Cupio dissolvi & esse cum Christo.*

Fac proposita materiæ præsentì servientia, et pete, ut DEUS, amore Patriæ illius cœlestis, te plenè ad se trahat, ut spe illius gloriæ te roboret, & accendat ad fortiter contemnendas transitorias, sensuales voluptates, & ad strenuè pro illa gloria decertandum.

PUNCTUM II. Audi illa verba *imà* ad corinth. 15. *Alia est claritas solis, & alia lunæ, & alia claritas stellarum, stella enim à stella differt, sic & resurrectio mortuorum.* Quæ intellige de inæqualitate Beatitudinis, qua Beati in cœlo præmiabuntur, nimirum quanta est differentia inter claritatem solis, claritatem lunæ, claritatem stellarum, idq; sive hæ secum invicem, sive cum sole, aut luna comparentur, tanta erit differentia inter beatitudinem & felicitatem Sanctorum. Sicut enim Sancti in hac vita in æqualia habuerunt merita; ita in cœlo inæqualia recipient præmia, DEO retribuente unicuiq; secundum opera ejus.

Inæqualitas hæc erit *imprimis* secundum beatitudinem essentialem; quamvis enim omnes Beati in hoc futuri sunt pares, quia omnes videbunt DEUM facie ad faciem, & sicut est in se, seu intuitivè, omnes etiam eundem amore frutivo amabunt, qui amor necessariò visionem ipsam consequetur; tamen illi beati qui DEUM in terris perfectius amabant, perfectius ejus præcepta & consilia observaverunt, perfectius virtutum Christi exempla imitati sunt, majori fortitudine & resistentiâ tentationes superârunt: hi, inquam, in cœlo perfecti

festius & clarius DEUM videbunt, perfectiusq; eundem amabunt, ita ut tanta differentia claritatis visionis Beatæ in diversorum meritorum Sanctis sit futura, quanta differentia est inter claritatem solis, claritatem lunæ, & claritatem stellarum.

Erit deinde inæqualitas hæc quo ad beatitudinem accidentalem, siquidem specialem habebunt gloriam, qui amore Christi reliquerunt omnia, eum nudum nudi secuti sunt, quales sunt religiosi hi enim sedebunt super sedes 12. judicantes duodecim tribus Israël. Aliam gloriam habebunt viri Apostolici, laborantes circa salutem proximorum (qui enim erudiunt multos ad justitiam, fulgebunt sicut stellæ, (stellas intellige primæ magnitudinis, aliam gloriam habebunt qui corpora sua tradiderunt ad supplicia, sanguinemq; pro Christo fuderunt, hi enim accipient laureolam martyrij; aliam gloriam, qui intaminatum virginitatis florem conservârunt, hi accipient laureolam virginitatis, sequentur etiam Agnum, & cantabunt canticum, quod nemo alius cantare poterit. Propter suam humilitatem, S. Franciscus seraphicus, sedem superbi luciperi occupabit; aliam & aliam in sua perfectione inæqualem accipient gloriam: qui jam in hac, jam in illa virtute, specialius excelluerunt.

His. Consideratis reflecte te, quantum tibi accumulanda sint merita, qua intentione, teneritudine, appretiatione amandus DEUS, quam felix es futurus, si propter Christum, non reipsa tantum, sed etiam affectu, reliqueris omnia, si Christum per imitationem perfectam secutus fueris? cogita quô zelô debeas curare salutem proximorum tuorum. Quam cautè custodiendus sit thesaurus virginitatis & castitatis? quantum debeas appetere, ut quam plurima pro Christo patiaris, ac etiam sanguinem pro DEO fundas? quantum curare de-

beas ut excellas in humilitate, tui ipsius abnegatione, cæterisque virtutibus, quarum singulae specialia sua habebunt præmia.

Fac proposita elice affectus.

PUNCTUM III. Audi illa verba Daniel. 12. *Tulgebunt sicut stella in perpetuas aeternitates.* Et considera hanc præcipuam Beatitudinis Sanctorum futuram proprietatem, quod sit futura æterna, sitq; duratura in æternum, in perpetuas æternitates. Non modicum felicitatis hinc accedet Beatis, quod scient suam beatitudinem non terminandam unquam. felices putamus eos Principes, qui plures annos regni sui; gloriæ & terrenæ hujus felicitatis numerant, quàm felices sunt futuri, qui cum Christo sint regnaturi perpetuò. Quæ nunc major est Regum sollicitudo, quæ illos inquietare solet? an non illa, ne illis aliquando regnum & vita eripiat? Hæc sollicitudo homines in summis honoribus constitutos reddit infelices. In Beatis nulla talis sollicitudo erit, sed summa securitas, quòd Regni ipsorum & regnandi cū Christo non erit finis.

Cogita iterum quid sit æternitas? non solum infelix illa, sed etiam beata æternitas, duobus illis adverbijis sufficienter exprimitur *Semper, nunquā.*

Exardesce amore perennis illius & æternæ felicitatis, sint tibi omnia quaecunq; pro Christo temporaliter pateris levia, & dulcia, propter spem æternæ illius retributionis, sæpiusq; mente & animò revolve illud Apostoli: *Momentaneum & leve tribulationis, æternum in nobis gloria pondus operatur.*

In colloquio Pete à Christo, ut amore cœlestis illius Patriæ cor tuum inflammet & accendat, ut hoc igne succensus, ipsi quàm ferventissimè servias, ut ea omnia quæ pateris & sustines, præ magnitudine amoris & desiderij gloriæ illius, appareant tibi levia & momentanea.

In fine: Pater Noster

DIEI VIII.

Meditatio I.

De amore DEI & proximi.

Preludium I. Imaginare non solum propter identitatem Naturæ, sed etiam propter perfectissimum amorem, quò Divinæ Personæ se amant, & secum sunt conjunctissimæ, earundem Divinarum Personarum perfectissimam unitatem.

Preludium 2. Pete à DEO, ut sicut Pater æternus, & filius ejus Unigenitus, ac Spiritus Sanctus, unum sunt, ita & tu, per amorem DEI, sis cum DEO quid unum.

PUNCTUM I. Audi illa verba Proverb. 23. *Fili mi prabe cor tuum mihi.* Et considera, quòd DEUS, dum cor à te petit, petat à te amorem & dilectionem, ut ipsum ames. Quod ut obtineat petit cor à te tanquam Pater, petit tanquam à filio, & quodāmodo per filialem obtestatur affectū, Patri nihil magis debetur à filio, quàm amor & dilectio.

Petitionem hanc ut melius & penitiùs intelligas,

Considera ulterius imò. Quòd DEUS tuum amorem exigit à te suo amore. Ut tu illum ames tanquam filius, ille te amat tanquam Pater. Ille dicit: *In Charitate perpetua dilexi te.* Ille te dilexit ab æterno. Ille ex sua dilectione quā te diligit, creavit te, redemit, vult te salvare. Ille te amat totò se, totā suā essentiā, omnibus suis perfectionibus & attributis. Amat te suā omnipotentiā, creando te, conservando, & in momenta, alia & alia beneficia conferendo. Amat te DEUS sua immensitate, est tibi præsens, ut in ipso sis, vivas, & movearis. Amat te suā æternitate, dum facit, ut

ipſi còexiſtas, idq; etiam tunc, dum illum offendiſ; amat te ſua miſericordiâ, tuæ ſuccurrendo miſeriæ, ad pœnitentiam te provocando, pœnitenſi peccata benigniſſimè condonando : Amat ſua juſtitia, quando propoſitis præmijs te in vitat, ut ipſi ſervias, dum comminatione pœnarum deterret, nè illum offendas, dum te caſtigat temporaliter, ut in æternum parcat. Amat te ſua felicitate, ejus te participem facere volendo, ut cum ipſo felix ſis & regnes in æternum.

Amant te omnes Perſonæ Sanctiſſimæ Trinitatis. Amat Pater, Unigenitum ſuum Filium dandò pro tua ſalute. Filius æternus amat te carnem humanam aſſumendo, in ea ſe humiliando ad exinanitionem, & mortem acerbiffimam ſubeundo, ut pro peccatiſ tuiſ condignâ exhibeat ſatiſfactionem. Amat Spiritus S. cum tot doniſ ſupernaturalibuſ in te deſcendendo, animam tuam inhabitando, & ſuiſ gratijs te inceſſanter ad bonum excitando.

Conſidera 2dò. Quòd DEUS exigit à te, ut cor tuum illi non alteri præbeaſ, ipſumq; ex toto corde amaſ, ut nihil amaſ contra DEUM, ſeu ejus bonitati & amori repugnans, ut nihil amaſ magiſ, quàm DEUM, ut nihil ita amaſ ſicut DEUM, ut nihil amaſ præter DEUM, propter ſe, aut propter aliud quod non eſt DEUS, ut omnia amaſ propter DEUM & in DEO, ac in tantum, in quantum hæc DEUS vult propter ſe amari; etiam te ipſum amare non debet, amore repugnante bonitati DEI ejusq; amori, vel amore amorem DEI imminuente, imò ut amaſ DEUM, debet te ipſum odiſſe & abnegare. Etiam æternam animæ ſalutem debet amare, non quia hæc tibi bona eſt, non quia te felicem æternaliter reddet, ſed quia per ipſam aſſequeris, ut DEUM dilectione æterna, immutabili, & perfectiſſimâ amaſ.

Conſidera 3tio. Quòd DEUS à te exigit amorem.

morem operativum, exigit ut sermones ejus hoc est præcepta & consilia serves, ut non mente tantum, non verbò, sed re ipsa & opere DEUM ames. De amore DEI dicit Gregorius magnus. *Amor DEI otiosus non est, operatur enim magna, si est, si verò operari renuit, amor non est.* Et ipsa Veritas incarnata Christus, pro amoris indicio constituit observationem suorum sermonum. *si quis diligit me, sermones meos servabit.*

His consideratis, reflecte te supra amorem & dilectionem qua DEUM diligis. Et imprimis Reflecte te, an amorem Divinum, quo te DEUS amat, amore reddis, certè si amare piget, redamare non pigeat. Amat te DEUS ab æterno, & tu amastine DEUM à primò rationis tuæ usu? an cum primo evigilas, amorem DEI in te excitas? amat te DEUS charitate perpetua, constante, & indefectibili, et tua erga DEUM charitas estne perpetua, constans, & immutabilis? ô quoties hanc per peccata tua ex corde exclusisti. Amat te DEUS totò se, omnibus suis perfectionibus, amant te omnes Personæ Divinæ; quidquid DEUS est, amor est. Et tu amasne DEUM totò te, ex toto corde, ex totâ animâ, ex omnibus viribus tuis? amantne DEUM omnes Potentiæ tuæ?

Reflecte te 2dò. An cor tuum totum creatori tuo DEO exhibeas? cor nullam divisionem pati potest. Si illud divides vivere desinis, te ipsum & cor tuum perdis. si etiam affectum & amorem tuum, in DEUM & in creaturas divides, nec DEO vivis, nec DEUM amas, & vitâ & amore DEI te spolias. Vide etiam an non ames aliquid amoris DEI repugnans? An non magis aliquid ames, quàm DEUM & non propter DEUM & in DEO? An ames DEUM supra te ipsum, supra commoda tua sensualia, supra vitam tuam

imò supra salutem animæ tuæ?

Reflecte te 3110. An amor tuus quò DEUM amas, sit operativus? Quid & quantum in totâ vitâ tuâ feceris amore DEI? quam magnum illud est quòd in te operatus est amor hic Divinus. Ex magnitudine operum, quæ aliquando amore DEI fecisti, metire tuum erga DEUM amorem. Amor enim DEI operatur magna, si est. Quod si nihil hactenus vel exiguum quid propter DEUM egisti, confundere, fateare, quòd ne inceperis quidem amare DEUM. Tecum ipse dispice quid adhuc facere possis ex amore DEI, ad illudq; faciendum, quantumcunq; id fuerit, te resolve. Propone quòd DEUM amare velis amore summæ appretiativo DEI, contemptivo rerum omnium, creatarum, propter DEUM, amore efficaci, amore operativo.

Elice actum amoris DEI tibi; fac deinceps familiarem: *Serò te cognovi, serò te amavi pulchritudo tam antiqua tam nova. Va tempori illi quo te non amavi. Diligam te Domine fortitudo mea. tu scis Domine quia amo te propter te, & quidquid amo propter te, amo in te propter te, ac te in omnibus. Diligo te Domine plusquam me, imò me ipsum odi & averfor ut te, amem. Diligo te ex totò corde, ex totâ anima ex tota mente mea, ex omnibus viribus meis. Offero tibi cor meum in holocaustum ut ignis aoris tui integrè illud absumat, ita te totò corde amo, ut si mille corda haberem, mille te cordibus amare vellem. Da ut amem te constanter, immutabiliter, ut amem super omnia. Amorem hunc cum gratia tua mihi dones.*

PUNCTUM II. Audi illa verba Joan: 15. *Majorem hanc dilectionem nemo habet, ut animam suam ponat quis pro amicis suis &c.*

Considera imò. Dilectionem illam, quæ circa DEUM immediatè versatur, de qua puncto præcedenti, magnam esse; cæterum hac dilectio-

ne major est illa, quæ ita porrigitur in DEUM, ut etiam extendatur ad proximum, ex vi cujus ita DEUS amatur propter se, ut etiam et proximus ametur propter DEUM.

Magna Charitas est DEUM amare, & ex ejus amore ipsum laudare, revereri, eiq; servire; sed major charitas est quæ efficit, ut non solum ipse DEUM laudes, reveréaris, eiq; serviās, sed etiam, ut proximi, tuā operā & labore ad DEUM conversi, DEUM ament, laudent, reveantur, eiq; in sanctitate serviānt. Magna Charitas est ita DEUM amare in hac vitā, ut & post mortem, obtenta animæ salute, DEUM ames per totam æternitatem. Sed major charitas est, quæ etiam alios quā plurimos perducit ad cælum, ut & ipsi DEUM perpetuò ament. Magna Charitas est sermonēs DEI servare, nullum mandatum Patris celestis transgredi, consilia Christi implere, exempla ejus imitari, vestibus & insignibus ejus indui; sed major est charitas, quod hæc ipsa ita præstas, ut etiam eadem alijs persvadeas.

Magna in DEUM Charitas est: ex amore ipsius relinquere mundum, relinquere omnia, abnegare seipsum; sed major charitas est, relicto Mundo & relictis omnibus, ex amore DEI, lucrari DEO tot parvos mundos, quot homines, animas quā plurimas à mundi amore abstrahe-
re, DEOq; subicere, & facere, ut totus mundus, in animabus conversis, post Christum abeat.

Magna Charitas est offerre DEO te ipsum, offerre illi munera præstantissima, offerre illi quidquid præstantissimum, & amabilissimum habes; sed major Charitas est, præter teipsum offerre munera illa pretiosissima, scilicet Animas, de quibus Climacus Cap. 18. ad Pastorem, *Nullum DEO munus à nobis gratius offerri potest, atq; cum animas ad Penitentiam deductas illi consecramus.* Non est

tanti totus mundus atq; pretium unius animæ. Unius animæ pretium omnibus præstat, quia pretium Divini sanguinis est.

Tandem magna Charitas est, liberales facere eleemosynas, esurientes reficere, operire nudos, sed major Charitas est animas ad DEUM adducere, vitam per peccatum amissam animæ dare, eamq; à mortuis resuscitare, primâ stolâ, id est gratiâ sanctificante, exutos, & nudatos iterum vestire, Animas ab inferni prædone spoliatas, donis & thesauris cælestibus locupletare, famelicos fame pereuntes, & siliquis porcorum se pascentes, pane verbi Divini, pane Cælesti, pane Eucharistico reficere. Omnibus Eleemosinis præfert S. Chrysostomus supra Epist. 2 ad Corinth. cap. 3. Conversionem animarum, dum dicit: *Si immensa pauperibus eroges, plus tamen effeceris, si unam converteris animam.*

PUNCTUM III. Circa eadem verba Joan. 15 Considera 2dò quid sit ponere Animam pro amicis. Ponere animam pro amicis, seu proximis, est totum se impendere spiritualibus proximorum obsequijs, nullos abhorretere labores, nullis parcere sudoribus, incommoda perferre, adversa perpeti, difficultatibus, imò periculis se objicere, ut proximos tuos DEO & cælo lucreris; laboribus circa salutem animarum immori, velle item vitam ac sanguinem profundere, ut animas è faucibus inferni eripias, idq; reipsa præstare, si talis se offerat obsequij occasio, in qua propter lucrandas DEO animas, vitæ jacturam subire oporteat.

Ponere animam pro amicis, est adhuc non solum vitam corporalem pro æterna proximorum salute exponere, sed etiam non aliam laborum circa proximos mercedem velle, nisi salutem animarum. Et optare cum S. JGNATIO *Societatis JESU* Fundatore, ut laborum tuorum præmia disse-

rantur

rantur, etiam cum periculo amissionis eorundem, & salutis æternæ, ut interim animas DEO lucrari, & spiritualia obsequia proximis impendere possis. Ponere animam pro amicis, est non aliter velle consequi salutem animæ propriæ, nisi tot alijs ad salutem æternam perductis, & taliter, ut tuæ etiam saluti renunties, si non sint salvandi illi, circa quorū salutem desudas, quem aliquando eliciuisse fertur S. Maria Magdalena de Pacis, cū diceret: *Domine si non facis mihi hanc gratiam dandi animas, quas peto, dicam & ego nolle me ad possidendam gloriam pervenire, quam mihi preparasti.*

Considera 3^{ti}o Ponere taliter animam pro amicis, esse dilectionem quā major haberi non potest. Talis enim dilectio non solum operatur magna, sed operatur opus, quō præstantius esse non potest, operatur opus Divinum, imò omnium Divinorum Divinissimum, laborem enim circa salutem animarum ita appellat S. Dionysius Areopagita, dum dicit: *Omnium operum opus Divinissimum est cooperari DEO ad salutem.* Ut quis pro DEO, cui se totum debet, pro Christo, qui pro se mortuus est, moriatur, dilectio tanta sperari potest. Pro Bono enim (dicam ego pro summo Bono) forsitan quis audeat mori, si tamen quis ponat animam pro Creatura, pro hominis salute, pro peccatore, res hæc charitatem maximè commendat, sicut charitatem Christi commendat, quod mortuus sit pro peccatoribus. ponere animam pro DEO a quo pro tali dilectione salutem æternam es consecuturus, est charitas cui facillè admisceri potest amor bonus ille quidem & honestus, talis tamen, quo perfectior dari potest, nimirum potest admisceri amor ille, quem docti appellant amorem concupiscentiæ, fieri enim facillè potest, ut aimes DEUM, & animam pro illo ponas, quia ab ipso salutem animæ tuæ es consecuturus, quia tibi DEUS bonus est

est, cum respectu ad te ipsum & tuum bonum, at ponere animam pro amicis ex amore DEI, ita ut etiam salutem animæ tuæ postponas saluti Proximorum, est sublimis benevolentiae amor, est amor ab omni respectu boni proprii depuratus, in solo DEO ejusq; bonitate unicè conquiescens, adeoq; est dilectio, quâ major haberi non potest.

His consideratis, tecum dispice, quam in te animi dispositionem & præparationem sentias ad hanc reipsa & opère exercendam excelsam in DEUM charitatem, Divinissimum hoc opus cooperationis DEO & Christo circa salutem proximorum. Resolve te ad illud, excita in te desiderium tam sublimis dilectionis, protestare, velle te non uno tantum corde, sed millenis, imò omnibus omnium mortalium cordibus ad DEUM, si fieri posset, per te adductis, eundem quàm perfectissimè amare. Protestare te paratum esse, amore DEI, pro æterna proximorum salute, animam tuam ponere, & sanguinem profunderè. Postula, ut tantæ charitatis victima esse possis.

In colloquio pete à SSmo Spiritu, qui charitas & amor increatus est, ut cor tuum quàm maximè ampliet, ut te accendat illo dilectionis igne, ex vi ejus, animam tuam ponas pro amicis tuis, pro salute proximorum tuorum, pro quibus dominus noster JESUS Christus non dubitavit tradi manibus nocentium.

In fine: Veni Sancte Spiritus.

Meditatio II.

De conformitate voluntatis nostræ cum voluntate Divina.

Praludium I. Imaginare summam conformitatem

mitatem voluntatis humanæ, Christi cum voluntate Divina Patris æterni.

Praludium 2dum. Pete à DEO, ut per conformitatem voluntatis tuæ cum Divina, Christum imitari possis.

PUNCTUM I. Audi illa verba Psal. 29. *Domine in voluntate tua præstitisti decori meo virtutem.* Et considera, quòd sicut omnes aliæ creaturæ, à voluntate DEI, omnem decorem, omnem virtutem & perfectionem suam habent; quia ab hac voluntate habent non solum suum esse, sed etiam omnia illa, quæ se perficiunt in suo esse; ita & homo omnis quidem, sed maximè Christianus habens curam salutis animæ suæ, à voluntate Divina accipit, & accipere debet decori suo virtutem, quod ut melius cognoscas.

Considera ulterius imò Decora & ornamenta hominis Christiani in cælum tendentis esse observationem præceptorum, & consiliorum Evangelicorum, executionem inspirationum Divinarum, Sanctorum item propositorum, & omnigenæ virtutis exercitia. Hæc ergo decora omnem virtutem, omnem æstimabilitatem habent à voluntate DEI, sicut moneta pretium suum habet à voluntate Principis & ejus sibi impressa effigie, ita ut nisi DEUS voluisset, nisi aliqua præcepisset, aliqua consuluisset, nisi inspirâisset sancta desideria & proposita, nisi cõhortatus fuisset ad exercendas virtutes, nunquam hæc habuissent eam gratiam, eam æstimabilitatem & virtutem, quam defactò habent.

Considera 2dò Non ab omni voluntate Divina nostris operibus præstari virtutem. Actiones enim peccaminosæ, quæ fiunt ex voluntate DEI permissiva, suntq; maxima dedecora, nullam æstimabilitatem habent vel habere possunt, sed potius à contraria DEI voluntate, quæ tales actiones prohibet, & cui sunt diffformes, habent, quòd sint ma-

læ, quòd sint vitiosæ. Ab illa etiam voluntate Divina, quâ DEUS miseretur impio, ut non discat Justitiam, ex quâ item DEUS iratus dat quod petis, cum tamen propitius neget quod petis, actiones, & opera nostrâ non desumunt eam, quæ secundum DEUM est, laudabilitatem. Sed nec illa voluntas Divina, quâ DEUS accommodat se nostræ voluntati, dum DEUM trahimus ad vota nostrâ, ut ipse velit ea quæ volumus, hæc inquam voluntas non magnam virtutem refundit in actiones nostras.

Voluntas igitur DEI à quâ præstatur operibus nostris gratia, pretium, virtus, & æstimabilitas, est potius illa, quâ DEUS castigat filios, corrigit errantes, ad pœnitentiam perducit, per quam DEUS præcipit quod sibi placet, consulit bonum, ad illudq; propositis præmijs varijsq; motivis invivat, & cor hominis internâ suâ gratiâ trahit & inclinat. Talis item voluntas est quâ DEUS malum prohibet, ab eoq; pœnarû comminatione deterret. Verbo, virtus, pretium, & æstimabilitas præstatur nostris operibus à voluntate Divina beneplaciti, seu approbativâ boni, & displicente sibi in malò.

PUNCTUM II. Occasione eorundem Psalmi verborum considera ulterius *310*. Quòd à voluntate Divinâ non æqualem virtutem & laudabilitatem accipiant bona nostra opera; siquidem nec voluntas Divina æqualiter sibi complacet in omnibus, nec æqualiter vult omnia. Quia nec omnia sunt æqualiter appetibilia, nec æqualiter conducunt ad DEI gloriâ. Unde etiam Apostolus vult, ut probemus, quæ sit voluntas DEI bona, perfecta, & beneplacens, quibus verbis videtur insinuare voluntatem DEI aliam esse perfectam, aliam non æquè perfectam, quòd ipsum ita intelligi debet: omnem quidem voluntatem DEI secundum se & suum esse, quod esse est esse ipsius DEI fons om-
nis

nis perfectionis, esse perfectissimam, sed ex parte objecti & termini voliti non omnem esse perfectā, sed alia est perfecta, alia perfectior, alia minus perfecta, quod nihil aliud est, nisi unius actus divini objectum esse perfectius, alterius verò actus objectum esse minus perfectum. Et sic in sensu explicato plures actus voluntatis Divinæ svasivæ putantur esse perfectiores, quàm sint actus voluntatis præceptivæ, plerumq; enim ea objecta, quæ consuluntur, sunt perfectiora, quàm quæ præcipiuntur. Inter actus svasivæ voluntatis, voluntas illa quæ nos movet & excitat, ut præeligamus Paupertatem, contemptum, insipientiæ titulum, viam crucis & tribulationis, præeligamus inquam divitiis, honoribus, bonæ famæ, hominum æstimationi, est perfectior, quàm illa voluntas, quæ nonnisi vellet nos indifferentes esse ad Paupertatem vel divitias, ad honorem vel ignominiam. Perfectior voluntas illa est, quæ nos movet ad ea, quæ in nobis sunt cum majore nostri victoriâ, cum majore repugnantia sensualitati, & amoris proprio, per quæ magis gloria DEI promovetur, & quæ ad nostram perfectionem & animæ salutem magis conducunt.

Considera 4to. In tantum a voluntate Divina nostris actionibus præstari virtutem & æstimationem; in quantum hæ sunt conformes voluntati Divinæ; conformitas enim illarum cum voluntate DEI bona, perfecta, beneplacente, facit tales actiones sanctas, virtuosas, præmiò dignas, siquidem omnis honestatis, adeoq; & sanctitatis in actionibus nostris principium & Regula est voluntas Divina, ipsis per conformitatem seu conformationē earundē actionum dictæ voluntati applicata.

Considera tandem 5to. Eò perfectiorem esse actionem quancumq; nostram, quò magis & perfectius hanc conformitatem participat, quæ item conformatur voluntati perfectiori, hoc est perfectiora

etiora à nobis requirenti. Idq; perfectior & magis laudabilis est actio, quæ non solum secundum se, independenter ab explicita & expressa intentione operantis est conformis voluntati Divinæ, sed etiã quæ eidẽ est conformis ex intentione expressa operantis, ex studio & conatu, quò quis studet cognoscere voluntatem DEI bonam, perfectam, beneplacentẽ, eiq; cognitã, tanquã regulã, studet conformare suas actiones, hoc singulariter intendendo, ut expleat gustum & beneplacitum Divinum, ita ut nihil velit, nihil amet nisi quod vult & amat DEUS, idq; ideo quia amat, quia vult DEUS.

PUNCTUM III. Post considerationem eorum, quæ duplici puncto priore proposita habes, converte te ad te ipsum, & fac reflexiones sequentes.

1^{mo} An omnes actiones tuæ sint decora à voluntate Divina suam pulchritudinem & virtutem habentia an non potiùs aliquæ? fuerint maxima tuã dedecora? quòd in ijs voluntati beneplacenti Divinæ te non conformaveris, sed potiùs contravereris eidem, contra legem agendo eamq; transgrediendo?

2^{do}. Reflecte te quantũ studeas conformare, voluntatem tuam voluntati Divinæ beneplacenti & perfectæ? Esne sollicitus, ut cognoscas voluntatem DEI perfectam, ut cognoscas quòd DEO magis placet, ut praeligas, quòd est magis perfectũ, quòd magis promovet gloriam DEI, in qua DEUS magis sibi complacet.

3^{io} Reflecte te an non subinde volueris, ut DEUS sequeretur voluntatis tuæ nutum, ut id DEUS faceret, quòd tibi placet, non verò ut tu faceres, quòd à te vult DEUS.

4^{to}. An conformitatem cum voluntate Divina, tanquã tuæ voluntatis Regulã, unicẽ intenderris, & ad eam respexeris in tuis actionibus, an non potiùs aliquam vanitatem? Hæc ipsa exercitia an feceris

feceris ex intentione explendi gustū & beneplacitum Divinum, & cum eo studio, ut illud quàm perfectissimè expleres? an non potius ex vano aliquò respectu, idq; cū multis imperfectionibus, Divinæ voluntati repugnantibus? An quidquid agis, ideo agis quia vult DEUS id à te fieri, quia in hoc sibi complacet, quia per talem actionem magis conformaris voluntati Divinæ?

5to. Tandem te reflecte an hoc optes & desideres, ut in te, per te, & circa te, fiat voluntas Divina perfecta beneplacens, hoc est talis voluntas, quæ sit magis promotiva tuæ perfectionis? An non soli voluntati præceptivæ te conformare studeas, non sollicitus de conformitate cū voluntate Divinâ svasivâ, hoc est de implendis consilijs & sanctis inspirationibus Divinis. Esne paratus, ut voluntas Divina in ulteriori vita tua ducat te viâ asperâ, per cruces, per adversa, per afflictiones, confusiones, tuiq; humiliationes & depressiones, per morbos item & infirmitates, aliaq; his similia? fortè tibi magis placet alia Divina voluntas? illam voluntatem & Providentiam circa te exerceri fortè desideras, quæ te ducat per prospera, per commoda, per favores, honores, prætia tui, promotiones, aliaq; his similia.

Statue quæsiturum te abhinc in omnibus gustum, voluntatis Divinæ, perfectæ, beneplacens, hanc te unicè intenturum, supra id deinceps potissimam aversionem & reflexionem habiturum, quid DEO placeat & quid magis placeat? resolve te ad omnem DEI voluntatem; propone non solum voluntati præceptivæ, sed etiam voluntati svasivæ Divinæ, omnibusque motionibus, quibus tuam voluntatem movebit, & excitabit, te conformaturum. Protestare paratum te esse ad omnia, sive te DEUS velit ducere per adversa, sive per prospera, sive per infami,

am, five per bonam famam, five per valetudinem, five per infirmitatem, five per afflictiones & cruces, five per solatia. Imò humiliter à DEO postula, ut in te fiat voluntas DEI bona, beneplacens, & perfecta. illa scilicet, quæ magis repugnat inclinationibus tuis, amoris tuo proprio, ut DEUS te affligat, conterat, humiliet tua virtutem infirmitatibus, adversitatibus, contemptu, abiectione tui, ac multiplici cruce exerceat. Utq; in his omnibus hoc unicum & maximum sit tuum solatium, quia id DEO placet, quia DEUS vult.

In colloquio elice sequentem resignationis in DEI voluntatem affectum.

O supreme rerum omnium Domine, En quâ possum perfectissimè voluntatem meam in tuum transfundo beneplacitum. Hoc unicè amplecti & velle in totâ vitâ mea desidero, quod placitum fuerit tuæ Sanctissimæ voluntati. Statue igitur de me benignissime DEUS, quidquid tibi placet cui placere non potest nisi gloria tua & salus mea. Utere me tanquam re tuâ, tanquam mancipio. En Domine ut jumentum factus sum ante te, ad omnem nutum tuum, paratum cor meum DEUS, paratum cor meum; doce me facere voluntatem tuam, non quod ego volo, sed quod tu de me statuisti ab æterno, hoc de me fiat. Affligens me Domine afflige, omnes in me congere cruces, afflictiones, persecutiones. Auge Dolores, auge & patientiam.

In fine: Suscipe Domine universam liberat. c.

Meditatio III.

Concludens Exercitia Spiritualia S. P. JGNATH.

Preludium I. Occasione illorum verborum

I. Co-

1. Corinth. 4. *Spectaculum facti sumus mundo, & Angelis, & hominibus*, Imaginare quod in te proditurum, seu prodeuntem ex hac sacra solitudine, oculi omnium sint convertendi. Fies spectaculum mundo; observabit ille an sis adhuc de hoc mundo? quâ ratione deinceps mundo uti voles? an quæres ea quæ mundi sunt? Fies spectaculum Angelis bonis & malis. Boni gaudebunt super tuâ conversione & pœnitentiâ, mali invigilabunt, ut abstractum te à castris Luciperi, ad eadem rursus te reducant. Fies spectaculum hominibus, quorum pleriq; considerabunt, quem fructum ex hac sacra solitudine referes, quæ vitæ & morum in te sequetur mutatio.

Preludium 2dum. Postula à DEO gratiam, quâ confirmet id, quod per hæc exercitia in tuâ anima est operatus.

PUNCTUM I. Audi illa verba S. Pauli Apostoli ad Galat: 5. *State, & nolite iterum iugo servitutis contineri.* Et imaginare, quod S. Angelus Custos tuus, aut etiam S. Pater JGNATIVUS, cujus Exercitia Spiritualia hoc oetiduo egisti, te alloquatur. Stetisti tandem post tot errores & deviationes tuas, stetisti in viâ rectâ, in viâ Justitiæ. In viam virtutis & perfectionis Christianæ directus es à Spiritu Sancto, per tot Sancta lumina, ejusq; in spirationes, per tot salutaria proposita, quæ formâsti, per tot agnitas veritates, quas ante vel ignorâsti, vel nunquam ita atq; nunc expendisti. In viam salutis deductus es, per tuam in toto corde ad DEUM conversionem, per seriam de peccatis tuis à te actam pœnitentiam. Vide ergo ut fles in gradu tuo, ne ab hac viâ, in quam deductus es, devies & desectas aliquando. In beneceptis persiste, in exequenda Divinâ voluntate, in inspirationibus Spiritûs Sancti, bonisq; tuis propositis adimplendis progredi stude, nullæ te difficultates, nulli

vani respectus, nullæ humanæ rationes à recto dimoveant. Sis fortis & constans, in quibuscunq; tentationibus superandis. Exclusisti jugum servitutis peccati, per deplorata vitæ antea actæ peccata, per ejuratam mundi, carnis, & dæmonis servitutem, à castris improbißimi Ducis Luciperi, ad castra Christi transiisti. Vide ergo ne iterum collum tuum jugo durissimæ servitutis peccati & diaboli subijcias, potiùsq; svave Christi jugum suscipe, ad illud ferendum forti animò te resolve, illiq; portando assvesce.

Hæc audiens, alacrem & paratum te ad exequenda Sanctissima hæc monita sive Sancti Angeli custodis tui, sive S. Patris JGNATII, tui in his exercitijs directoris, ostende. Statue firmiter, quòd in his quæ bene cæpisti, sis perseveraturus, imò ulteriorem in virtutibus in exequenda Divinâ voluntate, & bonis tuis propositis, progressum curaturus. Renova proposita totò hóc Collectionum tempore formata, ea deinceps sæpius in memoriam revocare, & ipsorum executioni invigilare stude. Existima inchoasse te primùm curam salutis tuæ, per hæc exercitia bonum semen in animâ tuâ tantummodò seminatum esse, post illa finita ad te pertinebit facere, ut semen hoc in herbam, & culmum excrescat, multiplicemq; accentuplum ferat fructum. Fovendum erit frequenti Sacramentorum Pænitentiæ, & Sanctissimæ Eucharistiæ usu, per non intermissam faciendi singulis diebus examinis conscientiæ consuetudinem, quotidiana rerum cœlestium, per aliquòd tempus, saltem per mediam horam meditatione, item pij alicujus & Spiritualis libri lectione, sedulò virtutum exercendarum studiò. Custodiri etiam bonum hoc semen debet, ne volucres, hoc est animæ tuæ hostes, ex corde tuò illud auferant. Custodiendæ erunt sensu corporis portæ, vitandæ conversationes periculosæ,

Iosæ, amovendæ peccandi occasiones &c: Attendendum quoq; erit, ne à spinis cogitationum mundanarum, terrenarum cupiditatum, & vanitatum, hoc ipsum semen sanctarû inspirationû & propositorum suffocetur. Ad hæc omnia te excita, propositis obfirma, & deinceps sanctè exequi stude.

PUNCTUM II. Audi illa verba 2^{dæ} Petri 2.

Melius erat ijs non agnoscere viam justitiæ, quàm post agnitionem retrorsum converti ab eo, quod illis traditum est, Sancto mandato. Hæc audiens mente revolve & cogita. Quantum tibi DEUS beneficium contulerit? quòd conversionis tuæ ad DEUM vitæq; melioris, & sanctioris, per DEI gratiam in his exercitijs primum jeceris fundamentum, quòd viam Justitiæ agnoveris? Ex fructibus hoc tempore collectis, ex perceptis tot Divinis luminibus, motionibus & excitationibus tuis ad bonum, metiri potes. Non poteris deinceps conqueri non cognovisse te viam Justitiæ, viam salutis, non habuisse illustrationes sanctas, gratias Divinas excitantes; abundantissimè DEUS tibi contulit hæc omnia, ostendit viam per quam ambules, ostendit, quâ ratione, & per quæ media, finem tuum, æternam scilicet animæ salutem & felicitatem consequi debeas, non fecit taliter òni nationi, nec Judicia sua, consilia sua, voluntatē, & beneplacitū suum, æquè alijs, atq; tibi manifestavit. Age gratias, cum profundissima humiliatione tui, liberalissimæ bonitati Divinæ, pro munifica tot, tantorumq; suorum donorum, per hoc tempus tibi collatorum, profusione. *Misericordias Domini in æternum cantabo. Fecit mihi magna qui potens est.*

Quoddum facis, considera: hæc Divina beneficia, attento amore in te Divinò, ex quò collata sunt, attentâ item ipsorum præstantiâ, efficaciâ, & magnitudine, attentis præterea commodis & utilitatibus, quæ asferre nata sunt, si ijs convenienter uti

volueris, hoc est: si Divinis inspirationibus obediens fueris, & agnitâ viâ Justitiæ & salutis ambulaveris. Hæc inquam Divina beneficia, quò magis, attentis illis omnibus, convenit æstimari, eò etiam magis hæc ipsa timenda esse, si post agnitionem viæ Justitiæ, post tot lumina & excitationes, ac motiones voluntatis tuæ, non responderis gratiæ Divinæ, sed converteris te retrorsum, ad tua vitia antiqua, si redieris ad inveteratos habitus, si post tuas concupiscentias abieris, si iterum ad castra Diaboli pestilentissimi ducis, quæ ejurarâsti, te transuleris, carni & mundo adhæseris, eaq; viâ ire volueris, quæ retrorsum, hoc est ducit ad infernum & interitum; deniq; si à mandato sancto, quod tibi traditum est, de vita in melius reformanda ac sanctè deinceps instituenda recesseris, voluntatem DEI, præcepta & Consilia Evangelica neglexeris & contempseris; melius tibi erat non agnoscere viam justitiæ, quàm post agnitionem retrorsum converti.

Ex quo enim tot & tanta beneficia DEI accepisti, de illis ipsis rigidior tibi ratio reddenda erit. cui enim plùs datum est, plùs requiretur ab eo. Gravius & severius judicium te manet; scienti enim & non facienti bonum, majus judicium est ipsi. Minùs excusabilis eris coram DEO, attestante Veritate æterna, *Si non venissem, & locutus non fuisset, peccatum non haberent, nunc autem excusationem non habent de peccato suo. Surgent in Judicio DEI viri Ninivite, & condemnabunt te*, quòd illi ad prædicationem Jonæ egerint pœnitentiam, tu verò post tot Spiritûs Sancti locutiones ad cor tuum, impœnitens in tuis peccatis permanseris, vel post modici temporis pœnitentiam ad eadem peccata facillè redieris; surgent illi omnes, qui ex his ipsis Sancti JONATHAN excercitijs peractis, magnos perceperunt & retulerunt fructus, & in alios mutati, vitam deinceps sanctam instituerunt, & hi omnes

omnes condemnabunt te, nisi & tu in alium mutatus fueris, & in posterum sanctius vixeris.

Hæc exhorrescens, firmissimè statue, à viâ Justitiæ, quàm agnovisti, nunquam te recessurum, nec conversurum unquam retrorsum. Electiones etiam tuas bonas, inspirationes Divinas, pia desideria, Sancta proposita, omnesq; tuas resolutiones, ad executionem te omnino deducturum. Protestare dicens cum S. Job. *Justificationem, quam capi tenere, non deferam.* Confitere inconstantiam & mutabilitatem tuam, supplica supremo Numini, ut te fortem, & immobilem efficiat, tibi det non solum faciem, sed etiam cor, & voluntatem tuam, tanquam silicem & adamantem, qui nullis temptationum ictibus, etiam validissimis, concuti, nullis artibus dæmonis emolliri, & ad vitium flecti possit.

PUNCTUM III. Audi Apostolum Paulum ad Hebr. 6. dicentem. *Impossibile est eos, qui semel illuminati sunt, gustaverunt etiam donum caeleste, & participes facti sunt Spiritus Sancti, & gustaverunt bonum DEI verbum, virtutesq; venturi seculi, & prolapsi sunt, rursus, renovari ad Penitentiam*

Et considera horrendam hanc Apostoli sententiam verificari de prolapsu illorum, qui postquàm peregerunt S. Patris JONATHAN exercitia, per illa non redduntur meliores, sed rursus post illa, ad antiqua sua redeunt vitia. De agentibus hujusmodi exercitia.

Verificatur primò quòd sint illuminati; ubi enim magis illuminari poterant? certè qui ad tanta lumina, quanta in his exercitijs habuerunt, cæcutiunt, cæci sunt & Duces cæcorum.

2dò. Verificatur de iisdem, quòd gustaverint donum caeleste; consolationes sæpius acceptæ, lacrymæ ipsæ, quas expressit poenitentia, pax, & tranquillitas conscientie, fervor spiritus, heroicæ

resolutiones, sancta proposita, omnesq; gratiæ Divinæ, sunt donum cæleste. Hoc donum quis est qui hoc tempore, hoc loco non gustaverit?

3^{to} Verificatur de illis, quod participes facti sunt Spiritûs Sancti, quia participes facti sunt tot instinctuum & inspirationum sanctarum. Hoc tempore in hoc sacrô secessu expectavimus promissionem Patris cælestis, nec dubium est quod eam acceperimus, descendente in unumquemque nostrum cum suis donis Spiritû Sancto.

4^{to}. Adhuc verificatur de iisdem, quod gustaverint bonum verbum DEI, quia gustaverunt verbum salutis, verbum vitæ æternæ, verbum legis & perfectionis, quando tale verbum cum gustu susceperunt, loquente illud ad cor ipsorum Spiritû Sancto, juxta promissionem factam, animæ ad hanc sacram solitudinem descendenti : *Ducam eam in solitudinem, & loquar ad cor ejus.*

5^{to} tandem verificatur & illud, quod gustaverint virtutes venturi sæculi. Has enim gustaverunt per contemplationem gloriæ Christi resurgentis, in cælum ascendentis, & ad dexteram Patris sedentis. Per contemplationem item gloriæ cælestis, quam DEUS Justis & electis præparavit, & aliquando retribuet pro meritis ipsorum.

Hi ergò si prolapsi fuerint, & ad suæ vitæ præteritæ iuveterata vitia, ad scandalosas laxitates, tepiditates, pravos habitus, ad incautas & periculosas conversationes, si redierint, si neglexerint Divinas inspirationes, à suis propositis recesserint, & leges Divinas, aut etiam humanas in conscientia obligantes, transgressi fuerint. De talibus pronuntiat Apostolus, quod impossibile sit eos renovari rursus ad pœnitentiam, scilicet non est sperabile, ut hi aliquando verè corrigantur ut seriam, sinceram, eamq; constantem agant pœnitentiam, ut in viam salutis, à qua volentes deflexerunt, reduci,

& ad faciendam vitæ emendationem fructuosam flecti possint. consequenter valde metuendum est, ne tales æternam animæ damnationem incurrant.

Neq; hi vani sunt terrores; constans siquidem est Theologorum doctrina: seriem gratiarum Divinarum, dependenter à quibus aliqui salvandi erant, seu filum prædestinationis, etiam levi defectu, imò & neglectu gratiæ excitantis ad id, quod nonnisi consilij est, quantò magis gravioribus delictis, interrumpi posse. Quod si hoc filum interrumpatur, miser ille incidit in aliam seriem providentiæ Divinæ, in quâ habiturus est auxilia & gratias, quas culpâ suâ reddet inefficaces, & quibus habitis, tentationi succumbet, in grave ac etiam in plura gravia peccata incidet, & in finali impœnitentia è vitâ decedens, æternum damnabitur. Hæc interruptio filii prædestinationis, & fortè gratiarum, dependenter à quibus aliquis salvandus erat, si alicui defectui vel peccato alligatur, maximè illi vel illis, quæ post tot lumina, post tot proposita, & promissiones, quot in exercitijs S. Patris JGNATII concipi solent, committuntur. Et hinc puto natum esse illud quorundam Ascetarum effatum: quem exercitia S. JGNATII non corrigunt, nec ipse corriget infernus.

Iterum hic exhorresce omnes defectus & relapsus tuos, & vide, quàm cautus esse debeas. Quomodò, post hæc exercitia, sit tibi timenda etiam minima cujusvis defectus umbra. Rursus propositis te obfirma, & propone sæpius te usum horrendâ hâc consideratione adductorum Apostoli Pauli verborum, quâ facilius te ipsum in virtute, voluntatis Divinæ & propositorum tuorum sanctorum executione, continere possis.

Colloquium instituendum ad pretiosissimam DEI Parentem, à quâ humiliter postula, ut ipsa, quæcunq; in his recollectionibus bene egisti, cogitasti,

tâsti, statuisti, imò integra exercitia à te peracta, in manus suas Sanctissimas suscipiat, & Sanctissimæ Trinitati, suoq; amabilissimo Filio præsentet, & ad majorem DEÏ Gloriam, explendumq; gustum & beneplacitum voluntatis ejus, tuæq; animæ salutem & perfectionem, offerat, defectus omnes & imperfectiones contegat, excuset, ac pro ipsis deprecetur, copiosamq; à Sanctissima Trinitate benedictionem, ad vitam meliorem ab hinc inchoandam, & sanctè deinceps instituendam, juxta exemplar tibi à Christo monstratum, & juxta lumina à S. Spiritû immissa, impetret.

In fine: Te DEUM laudamus.



t, in
inae
ad
&
alu-
im-
pre-
ne-
an-
ex-
ina

C
t
e
8
n
I

P A R S II.

In Qua

Continentur Medita-
tiones, quæ particulari
exigentia, devotioni,
& usui diversæ conditio-
nis & statûs hominum,
In octiduo Exercitio-
rum spiritualium ser-
vire possunt.



Meditatio I.

De peccatorum gravitate.

Preludium I. Imaginare Christum à lictoribus in horto Getsemani comprehensum, conculcatum, catenis & funibus constrictum, indignè tractatum, & ad ulteriora Passionis suæ tormenta, ac etiam ad mortem ipsam ductum.

Preludium 2 Postula à Deo gratiā, ut fructuosè cognoscas, quas & quantas injurias peccatum irrogat Christo, imò omnibus etiam creaturis, & ut à peccato, hac ejus gravitate deterrearis.

PUNCTUM I. Audi Christum per Prophetam dicentem Psal. 29. *Quæ utilitas in sanguine meo, dum in corruptionem descendo?* Et considera per peccatum Christo, Passioni, infiniti valoris meritis, & pretiosissimo Sangvini ejus, gravissimam irrogari injuriam.

Gravissima Christi injuria est, quòd frustretur sine adventus sui. Finis adventus Christi fuit, ut homines vitam haberent, & abundantius haberent; peccatum homines vitā spoliāt, vitam eripit, & inducit mortem. Gravis injuria Christi, quòd impediatur fructus adventus illius. Fructus adventus Christi esse debuit, attestante Propheta, ut auferretur peccatum, consummaretur iniquitas, finem acciperet prævaricatio; quæ tamen finem non accipit, nec auferitur peccatum, dum de novo committitur imò plura & plura accumulatur. Meritorum & Sanguinis Christi idem omnino finis, idem fructus, esse debuerat. Hòc enim pretio

et & vita animæ nostræ constitit, & à servitute peccati redempti sumus. Quanta igitur injuria Christi est, dum Christus nostrâ culpâ non consequitur finem & fructum meritorum suorum, & copiosè effusi sanguinis, Sentit gravissimè Christus hanc suam injuriam, dum apud Prophetam conqueritur Jsaïæ 49. *In vanum laboravi, sine causa, & vanè consumpsi fortitudinem meam.*

Ulteriùs gravissima injuria Christi est, quòd iterum flagelletur, crucifigatur, ostentui habeatur; hoc etiam nunc præstat peccatum, secundùm Apostolum dicentem *Rursus crucifigentes Christum in cordibus vestris.* Gravissima injuria DEI hominis seu Christi est, quod in conculcationem veniat, irrogatur hæc injuria Christo per peccatum juxta illud: *Tota die conculcavit me homo.* Gravissima adhuc injuria ejusdem Christi est inde, quòd is qui venit propter salutem omnium, sit in ruinam multorum, quòd ipsius adventus sit occasio damnationis plurium, sit occasio tot offensarum DEI. Si non venissem, peccatum non haberent, nunc autem excusationem non habent in peccatis suis; quòd in opprobrium Sanguinis Christi, tot animabus, pretioso hoc Sanguine redemptis, repleatur infernus, maximè verò quod repleatur infernus illis, qui aliquando dealbaverunt stolas in sanguine Agni, quales sunt homines Christiani, Sanguine Christi aliquando abluti, tum in Baptismo, tum per aliorum Sacramentorum susceptionem. Has injurias Christus patiens, meritò dolet & conqueritur. *Quæ utilitas in sanguine meo, dum in corruptionem descendendo.*

Hæc considerans fac reflexionem suprate ipsum. Quòd & tu sæpius impediveris in te ipso finem & fructum adventus Christi, meritorum & sanguinis ab eo fusi. Hoc certè sanguine pastus, poteras abundantissimè vitam habere, ipso irrigatus

tus, poteras fructum centesimum ferre, & omne auferre peccatum.

Fac reflexionem quàm crudelis Christi crucifixor fueris? quanta is in corde tuo tormenta, ignominias, opprobria, cruces sustinuerit? quoties à te conculcatus, sub tuis pedibus ingemuerit? cogita an Christus sæpius non fuerit tibi in ruinam? quam excusationem habebis in peccatis tuis, à Christo redemptus, illiusq; præceptis, consilijs, exemplis, tanto labore instructus? Cogita an per peccatum actuale, quod post Baptismum, primum commisisti, & per quod te evacuaſti à Christo, illiusq; meritis, an sanguis Christi non descenderit in corruptionem? Cogita iterum an post deplorata à te peccata tua, & in Sacramento pænitiæ abluta & deleta, per sæpius commissos relapsus, rursus Sanguis Christi non venerit in corruptionem. Omnino venit per omnes & singulos lapsus, tunc vero vel maximè venit Sanguis Christi in corruptionem, quando indignè Sacramenta pœnitentiæ & Corporis Christi, aliaq; suscepisti, quando ad sacram Eucharistiam in peccato mortali non expiatio accessisti. Ita tunc Sanguis Christi descendit in animam tuam in suo stercore computrescentem, atq; si in fœtentem & fœdissimam sentinam missus fuisset, imò gravior longè illa est Sanguinis Christi cuntumelia, quàm hæc esset.

Exhorresce immanem hanc tyrannidem & crudelitatem. Totus contremisce considerans: an Sanguis Christi, qui tuâ culpâ toties in corruptionem descendit, non est tibi futurus in æternam animæ tuæ perditionem & damnationem? Serio cogita an tuâ animâ, in opprobrium Sanguinis Christi, quo tam sæpè abluitur, non sit aliquando replendus infernus? execrare nefanda crimina tua, concipe odium quàm maximum, odium implacabile adversus quodvis peccatū lethale.

Hæc

Hæc cogitatio fit tibi adversus omnes tentationes remedium: ergone ego finem & fructum adventus Christi sceleribus meis impediam? ergone vim & virtutē meritō Salvatoris mei ipsiusque pretiosissimi Sanguinis evacuabo? ergo iterū Christum amore mei in cruce mortuū, in corde meo crucifigam, rursus crucē ei ignominiosissimam erigā? num fortē Filium DEI conculcabo? O JESU qui salutis animæ meæ desiderio, in crucem es actus, nunquid ideo in cruce extensus es, ut mihi esses in ruinā? Nunquid in mundum ideo venisti ut ego peccatū haberē, & non potius, ut ab ejus servitute liberarer? O anima mea ideo ne Sanguis Christi pretiosissimus tam copiosē in te defluit, ut descendat in corruptionem? ut sit tibi in perditionē? ut in opprobrium Sanguinis hujus, te o anima aliquando repleatur infernus? o misera voluptas o perversa voluntas mea, tu ne tantorum malorum causa existes? ergone in Christicidā, in Christi crucifixorem me transformabis? tune Filium DEI pedibus meis conculcandum obijcies? ergone per te stabit ut Christus sit mihi in ruinam, ut Sanguis, ejus in corruptionem veniat ut sit mihi in perditionem æternam? Tune in opprobrium Sanguinis Christi me præcipitabis in infernum: Absit Domine, non fiet tibi hoc, ut à me talia sustineas. O anima mea excute peccati jugum & servitutem, o detestanda voluptas, quid est quod aliquando in te consenserim? moriar prius, quàm ut in te deinceps consentiam.

PUNCTUM II. Audi illa verba Tobiae 12.
Qui faciunt peccatum & iniquitatem, hostes sunt animæ suæ. Et cogita per peccatum quodvis maxime lethale, ipsi animæ peccatoris gravem irrogari injuriam. Hostem magis infensum & capitalem peccator habere non potest, quàm seipsum si peccet; nullus hostis animæ magis nocere & plura ac majora damna inferre valet, quàm ipse peccator eidem inferat. Alij hostes quàmvis nocendi stu-

diosissimi, nocere animæ non possunt, nisi voluntas peccatoris accedat, & per hanc, si in peccatum, in quod inducunt, consentiat, unice nocent.

Ac imprimis peccator vitam animæ suæ eripit, eâq; privat, peccato nimirum quovis mortali animam conficit, ut DEO amplius non vivat sed sit cadaver exosum ac detestabile.

2do. Peccatum animam spoliât ingentibus bonis, ut ait S. Laurentius Iustinianus *Unius peccati consensu immensas amittit divitias*, nimirum amittit gratiam sanctificantem, dona supernaturalia infusa, omnia merita, merendi potentiam, aptitudinem & condignitatem, aliaq; his similia.

3to. Peccatum tollit in anima imaginem DEI, ad quam formata est, & turpissimi monstri speciem inducit.

4to. Peccatum facit DEUM hostem animæ, est causa, ut anima à DEO relinquatur, odio habeatur, DEUSq; illam persequatur.

5to. Peccatum animam omnibus Sanctis exosam & abominabilem facit, facit illam gravissimè fætere, ut hunc fætozem non ferens S. Angelus Custos, longissimè à tali anima abscedere debeat.

6to. Omnes creaturas armat contra animam peccato inquinatam

7mo. In anima producit molestissimum conscientie vermem, qui eandem affligit gravissimè.

8vo. tandem animam constituit in præsentissimo damnationis æternæ periculo, aufertq; omnem salutis securitatem.

Omnia hæc sunt gravissima animæ mala per peccatum causata, ut merito peccator hostis isq; perniciosissimus sit animæ suæ,

Etiam hæc consideratio moveat te ad concipiendum odium & horrorem peccati, moveat amor animæ tuæ, cujus iacturæ & damno, ne totius quidem mundi lucrum comparari potest. juxta

Juxta illud: *Quid prodest homini si mundum universum lucretur anima verò sua detrimentum, patiatur?*

Hortare te ipsum, ut non sis deinceps crudelis in animam tuam, utens illis Ecclesiastici verbis: *Miserere anima tua placens DEO.*

PUNCTUM III. Audi Apostolum ad Rom: 8. dicentem. *Omnis creatura ingemiscit.* Et considera per peccatum non solum Christo, non solum animæ ipsius peccatoris, sed etiam cuivis alteri creaturæ, gravem inferri injuriam.

Inferitur inprimis injuria Sanctissimæ DEI Parenti Virgini Mariæ. Eò ipsò quòd inferatur injuria Filio Mariæ, DEO homini, inferitur injuria & Matri. Mater Sanctissima injuriam Filij sui non potest sentire, nisi tanquam injuriam propriam. Cruci affigis Christum, lanceâ cor JESU petis, gladium infigis pectori Mariæ, animam ejus pertransit gladius. Si etiam nunc dum Christus impassibilis est, peccator per peccatum rursus crucifigit in corde suo Christum, etiam nunc idem in eodem corde suo, gladiò transfigit animam Mariæ.

2dò. Inferitur injuria S. Angelo Custodi, cujus gravis injuria est, quòd ejus insinuationibus à peccato retrahentibus non obediatur, quod ei præsentem exhibeatur reverentia, sed in ejus conspectu & præsentia talia patrentur, quæ homine præsentem & spectante non committerentur, quòd Custos hic Sanctissimus contemnatur, procul ablegetur, in locum ipsius, hostis animæ Diabolus advocetur, eiq; cedere cogatur.

3iò. Inferitur & irrogatur injuria alijs Sanctis Cælitibus. Si enim aulici magni alicujus terreni Principis in aula ejus commorantes, conspectu ejus fruquentes, favores, gratias, honores, & suam omnem felicitatem ab eodem Principe accipientes, injuriam ipsi irrogatam, pro injuria propria habent, eamq; gravissimè sentiunt; à fortiori cæli cives & inco-

læ, DEI ipsius aulici & intimi cubicularij, in summis honoribus & felicitate suprema ex viso illo & possesso summo bono consecutâ constituti, injuriam ejusdem ipsius DEI & Christi, sentiunt, ut propriam.

4^{to}. Quævis etiam aliæ Creaturæ injuriam DEI ut suam ferunt amarissimè. Quævis creatura dicitur & est essentialiter serva DEI. Cùm ergo injuria Domini sit simul injuria servi, injuria Creatoris est injuria creaturæ. Deinde injuria vel violentia quædam est cujusq; rei, si impediatur in consecutione finis sui. Finis aliarum creaturarum est, ut juvent in eo hominem, ut Dominum DEUM suum laudet, revereatur, eiq; serviat, ac tandem salvus fiat. Hunc finem non consequuntur creaturæ, si homo peccet, quin potius peccato hominis impediuntur, nè obtineatur idem finis, quantâ igitur afficiuntur injuriâ, quanta illis infertur violentia ? Ulteriùs creaturæ omnes clamant, ut homo DEUM amet, suum Creatorem agnoscat, laudet, illiq; serviat, si nihil efficiant, potiùsq; homo, tentatione victus, si DEUM contemnat, odio habeat, ipsumq; oppugnet, dolore hinc afficiuntur & ingemiscunt.

Sed vel maximè ingemiscunt, si peccator aliquibus illarum abutitur ad offensam DEI, vel talem affectet abusû. Expostulavit aliquando asina cum Balaam, quòd illam cæderet nolentem progredi, contra voluntatem DEI, illis verbis miraculose prolatis *cur me cedis* ? si loqui possent plures creaturæ, expostularent sæpius cum peccatoribus quòd illis ad ea quæ legè DEI sunt prohibita, uti velint.

Hæc considerans etiam exinde agnosce gravitatem cujusvis peccati, illiusq; odium & horrorem concipe.

Conclude hoc vel simili affectu: Gemit Christus

flus se à peccatore conculcari, dolet sanguinem suum in corruptionem descendere, ergone ludam & deludam lacrymas ejus? Deslet miserabilem sortem suam anima, nunquid non miserebor illius, placens DEO? ingemiscit omnis creatura ad offensam sui Creatoris, & ego solus exultabo in rebus pessimis? Quis dabit capiti meo aquam? & oculis meis fontem lacrymarum & plorabo die ac nocte.

In fine : Pater noster.

Meditatio II.

De peccatorum gravitate.

Præludia eadem quæ meditationis præcedentis

PUNCTUM I. Audi Apostolum dicentem ad Roman. 5. *Non sicut delictum ita & donum.* Et applica hæc Apostoli verba ad excessum, quo peccatum mortale suâ malitiâ excedit bonitatem cuiusvis operis boni puræ creaturæ, atq; considera: Delictum & peccatum grave seu mortale, tantæ esse malitiæ, ut nullû donû, quod à nobis DEO offerri, potest nullû nostrum meritum, nullus actus bonus puræ creaturæ, malitiæ peccati comparari possit. Unde si in una lance poneretur injuria, quam DEO irrogas per unum aliquod peccatum mortale, in altera autem lance reponerentur actus intensissimi à te elicti charitatis DEI, humilitatis, obedientiæ, mortificationes rigidissimæ, orationes, zelosissimæ prædicationes, profusio sanguinis propter DEUM, nondum sicut delictum, ita esset donum, omnibus his præponderaret peccatum, omnia tua merita, minùs placerent DEO, quàm ei-

dem displiceret peccatum, minorem per hæc omnia deferres DEO honorem, quàm intuleris contemptum per peccatum.

Demus adhuc, quòd illi tui actus charitatis, humilitatis, & alij quàm plurimi, illæ mortificationes, jejunia, orationes, labores Apostolici continentur centum aut pluribus annis, peccatum autem, quod in uno oculi ictu perpetratum sit. Non sicut delictum ita & donum, omnia hæc tua merita nondum ad bonitatem, & parem gravitati & malitiæ peccati pervenerunt. Addantur ulterius lanci illi, in qua reposita sunt tua bona opera, addantur inquam merita Beatissimæ Virginis, merita Sanctorum, Angelorum, Apostolorum, Martyrum, Confessorum, Virginum, omnium Sanctorum, merita totius Ecclesiæ, imò creet DEUS plures mundos, & quantumcunq; illos multiplicet, multiplicentur etiam & crescant in immensum merita hominum & Angelorum, qui in pluribus illis diversis mundis sunt exstituri, adhuc erit verum dicere, non sicut delictum ita & donum, bonitate suâ hæc non adæquabunt malitiam, & gravitatem unius peccati mortalis, per hæc omnia non refarcitur injuria personalis DEO per peccatum irrogata, magis DEO displicebit peccatum, quàm universa illa placebunt.

Sicut enim quantumcunq; multiplicentur creaturæ rationales, tamen omnium illarum etiam collectim & simul acceptarum dignitas & excellentia nunquam pertingit, aut pertingere potest ad mensuram dignitatis & infinitæ excellentiæ DEI, ita quantumcunq; multiplicentur merita, & obsequia talium creaturarum, hæc tamen etiam collectim accepta, non pertingent ad tantam excellentiam & æstimabilitatem, quanta gravitas & malitia est offensæ, quâ offenditur Persona Divina infinitè digna. Siquidem merita & obsequia quæcunq;

cunq; purarum creaturarum æstimabilitatem suam habent à dignitate & excellentia personarum merentium, quæ puræ creaturæ esse supponuntur. Offensa verò Divina, gravitatem & æstimabilitatem suam habet à Persona Divina, summæ, infinitæ, nec adæquabilis unquam excellentiæ, quæ offenditur.

*His consideratis expende ulterius 1^{mo} Quàm extrema sit hominis resolvētis se in lethale peccatum amentia, velle contrahere debitum, cui exsolvendo nullā ratione par esse potest, velle tantum malum perpetrare, cui nullum obsequium, tam ipsius offensoris, quàm omnium creaturarum simul sumptarum æquale inveniri potest. Rei hujus adeo vivam apprehensionem habuit S. Maria Magdalena de Pasis, ut morti vicina cum magno animi sui sensu exclamaverit : *Ego ex hoc mundo decedo, antequam possim, vel potuerim comprehendere quomodo una creatura velit offendere Creatorem & patrare peccatum mortale,**

2^{do}. Expende quantum debeas DEO tuo si velis pro peccatis tuis, aliquatenus etiam, non condignè satisfacere. Notum ex historijs, quæ fecerit, quantum in se ipsam sævierit S. Christina Virgo, occasione tormentorum & pænarum purgatorij, quæ ipsi aliquando in mentis excessu præsentatæ fuerunt, ut ex his pænis animas liberaret. Magis tu in teipsum sævire debes, plura propter DEUM facere, & majora exhibere obsequia, ut aliquomodo Justitiæ Divinæ satisfacias pro lethali offensa, à te vel alijs perpetrata, cum inter tormenta vitæ hujus & pænas purgatorij possibilis sit, dari aliquam æqualitatem, quam inter quæcunq; obsequia, seu quamcunq; puræ creaturæ satisfactionem & inter gravitatem offensæ mortalis, quā offenditur DEUS,

3^{tio} Expende non debere te unquam resol-

vere in peccatum mortale ex quocunq; fine, quantumcunq; honesto & laudabili, &c propter ullum bonum. Cùm enim nullius peccati mortalis gravitatem adæquare possit sua bonitate ullum bonum creatū, nullum meretur, ut propter illud offendatur DEUS & tantum malum perpetretur.

Elice deinde affectus detestationis & odij peccati, deplora tuam cæcitatem & stultitiam in offendendo DEO, quòd tam parvi penderis, DEUM graviter offendere, quòd tam facilis fueris ad perpetrandum tantum malum. Fac firma proposita amplius non offendendi DEUM peccatò maximè gravi & mortali, dicens cum Psalmista: *Juravi & statui custodire legem tuam.* Fac item propositum de vita deinceps ducenda, in austerà, & rigida pœnitentia, in vigilijs, in abstinentijs in jejunijs, afflictionibus corporis, ferventissimis actibus amoris DEI, contritionis, humilitatis, obedientiæ, aliarumq; virtutum, ut hac ratione aliquomodo satisfacias Justitiæ Divinæ pro peccatis, quibus summam ejus excellentiam offendisti, cùm certus sis, gravitati & malitiæ peccati mortalis, nullum obsequium in sua bonitate æquale te exhibere posse. Fac tandem propositum propter nullum bonum, nullum tuum commodum & emolumentum etiam spirituale, quantumvis sperares, hac ratione quàm maximè promovendam gloriam Divinam, te aliquando commissurum quodpiam peccatum. Postula à DEO supplex gratiam, quâ adjutus, nunquam deinceps DEUM offendas. Postula item gratias quibuscunq; mortalibus, ut hi pariter nunquam DEUM offendant, ut peccata præsertim mortalia non committantur ab hominibus, vel certè quàm maximè minuantur.

PUNCTUM II. Audi verba ejusdem Apostoli Pauli ad Rom: 5, *Reconciliati sumus DEO, per mortem Filij ejus.* Et considera etiam ex eo gravitate in

tatem peccati mortalis. Quòd ut reconciliaremur DEO per peccatum offenso, necesse fuerit Filium DEI, hominem fieri, & pro peccatis nostris in carne humanâ, condignam exhibere satisfactionem, talemq; satisfactionem exhibitam, & reconciliationem hominum cum DEO factam esse per mortem Filij DEI crudelissimam. Duo specialiter apprehende & ex utroq; gravitatem peccati cognosce, nimirum, quòd ad reconciliandum DEO, hominem, opus fuerit satisfactione Filij DEI. Deinde quòd hæc satisfactio à Filio DEI Incarnato, non aliter exhibita sit, nisi per acerbissimam & crudelissimam mortem ejusdem.

Et imò quidem tanta gravitas est peccati mortalis, ut ad reconciliandos homines DEO, per tale peccatum offenso, & ad satisfaciendum ad æqualitatem justitiæ Divinæ pro eodem, necesse fuerit Filium DEI, hominem fieri, & satisfactionem hujusmodi exhibere. Cum enim nulla pura creatura imò nec omnes etiam, quantumcunque multiplicatæ, collectivè sumptæ, potuerint exhibere obsequia, sive intensione, sive numero & multititudine, quantumvis crescentia, quæ tantæ excellentiæ & bonitatis essent, ut peccati etiam unius mortalis gravitatem adæquarent, ut visum est puncto præcedente; clarum est nullam puram creaturam quantumcunq; gratiâ Divinâ alijsq; donis Divinis exornatam, ac ne omnes quidem puras creaturas simul sumptas, potuisse exhibere DEO condignam satisfactionem pro peccato mortali. Hæc enim condigna esse non potest, si non adæquet suâ excellentiâ & æstimabilitate gravitatem offensæ mortalis. Cum verò unigenitus DEI Filius in carne humana assumpta, potuerit exhibere DEO & Justitiæ Divinæ obsequia tanti valoris, excellentiæ, & æstimabilitatis, imò longè majoris, quàm sit gravitas peccati mortalis, quævis enim

nim obsequia DEI hominis æstimabilitatem & valorem suum non solum accipiunt à Persona Filij DEI à qua exhibentur; quemadmodum offensa mortalis suam gravitatem & æstimabilitatem desumit à Persona Divina quæ offenditur; sed insuper merita Christi æstimabilitatem suam à Persona Filij DEI habent, longè perfectiori modò, quàm sit modus, quò suam gravitatem desumit offensa DEI mortalis, à Persona Divina offensa. Habetur exinde, necesse fuisse, ut una ex Personis Divinis, v: g: Filius DEI homo fieret, & in carne assumpta Justitiæ Divinæ satisfaceret, ad peccatores DEO reconciliandos, eosq; viâ condignæ satisfactionis liberandos à peccato.

2dò. gravitas peccati mortalis hinc æstimanda est, quòd Christus satisfactionem pro peccatis nostris exhibuerit per tot obsequia, labores, sudores, pertot & tam sublimes virtutum actus, per tot ærumnas, dolores, tantorum cruciatuum perpeffionem, tantam sanguinis effusionem, ac etiam ignominiosissimâ & crudelissimâ in cruce mortē. Potuit Christus quocunq; suò minimò obsequiò satisfacere condignè pro quibuscunq; etiam infinitis peccatis mortalibus, omnium hominum & Angelorum, etiamsi plures mundi creati fuissent, idq; pro peccatis quantumcunq; enormibus, tamen ut ostenderet gravitatem peccati mortalis, hujusq; gravitatis apprehensionem faceret hominibus, & quò melius odibilitatem tanti mali detegeret, non nisi tot laboribus, tot sudoribus, tot impensis, tot & tantis obsequijs satisfacere voluit. Unico actu humilitatis suæ, subijciendo se ex. gr. Matri suæ Sanctissimæ, potuit Christus satisfacere pro peccatis omnibus etiam gravissimis, Et tamen ut satisfaceret pro peccatis nostris, humiliavit se usq; ad abjectionem sui ad pedes Judæ, humiliavit se usq; ad exinanitionem, usq; ad ignominiosissimam mortem.

Potuit.

Potuit Christus satisfacere condignè unicò obedientiæ actu, idq; in rebus facilibus, ad quæ sentiret inclinationem, & tamem obediens fuit totâ vitâ suâ, obediens fuit non solum Patri æterno, non solum Matri suæ Sanctissimæ, & suo Patri putativo S. JOSEPHO, sed etiam obediens fuit hominibus sceleratis, obediens fuit Cæsari, Regibus, Principibus Sacerdotum, Præsidibus, Satellitibus imò etiam ipsis lictoribus, idq; obediens fuit in rebus difficillimis, quia in suscipiendo & acceptando præcepto mortis, in exhibendo suo sanctissimo corpore ad durissima tormenta. Potuit Christus satisfacere, pro totius mundi peccatis, in primo suo in mundum adventu, in conceptione vel nativitate sua, satisfecit verò per tanti temporis annorum nimirum 33 & amplius labores, per tot sudores, operatus est salutem nostram in medio terræ, in conspectu universæ Hierosolymæ illum ad mortem posulantis, & deridentis. Potuit adhuc Christus satisfacere sine ullo corporis sui vulnere, vel certè per modicum aliquod sibi inflictum vulnus. Voluit tamen satisfacere per tot sibi inflicta vulnera, ut à planta pedis usq; ad verticem capitis non esset in eo sanitas. Potuit satisfacere per effusionē unius guttæ pretiosi sui sanguinis, vel certè per sanguinem in circumcisione effusum, voluit verò satisfacere totius sui purissimi sanguinis, usq; ad ultimam guttam effusione, sanguine ex toto corpore, etiam ex ipso corde Christi Sanctissimo, profluente. Deniq; Christus potuit satisfacere morte aliqua leviori, & pœnis mitioribus, mortem tamen oppetiit crudelissimam & maximè infamem, sustinuit tormenta acerbissima. Voluit autem hoc modo (ut aliàs dictum est) satisfacere, ut homines agnoscerent gravitatem & fæditatem suorum peccatorum, quam certè non facile æstimarent & apprehenderent, si Christus leve aliquod obsequi-

um

um & facilè, in satisfactionem pro peccatis nostris, Justitiæ Divinæ exhibuisset.

His consideratis, agnosce ô Anima mea gravitatem & fæditatem peccatorum tuorum. Admirare Filij DEI charitatem, ex qua se in mortem crudelissimâ tradidit, ut te Patri suo æterno reconciliaret. Reflechte etiam te & cogita; Non satis fuit amorì Christi erga te, ut unò obsequiò, unâ aliquâ humiliatione, illò suò suspiriò: *Pater dimitte illis* satisfaceret pro peccatis tuis Justitiæ Divinæ, quâvis unum etiam obsequium, una humiliatio, unum suspirium haberet omnem condignitatem & sufficientiam ad extinguendum omne jus in DEO ad irasci homini propter peccatum, ad satisfaciendum plenè & adæquatè Justitiæ Divinæ pro peccatis totius Mundi, ad reconciliandos peccatores Patri suo æterno. Tot obsequia tam ardua posuit, tam copiosâ redemptione te redemit, ut agnoscas gravitatem tuorum delictorum, neque ultra ad hæc revertaris, iterumque te in servitutem peccati conjicias. Ut item intelligas te etiam satisfacere debere pro peccatis tuis. Non dubitavit Christus post effusionem sacratissimi sui Sangvinis in Circumcisione, post abjectionem sui humilem ad pedes Judæ, tot alia tormenta, & mortem subire acerbissimam, & tu dubitabis, post tui à Christo redemptionem, an aliquid in satisfactionem pro peccatis tuis facere & ex parte tua conferre debeas? Pater æternus propter tua scelera ita non pepercit Filio suo, ut etiam morte funestissimâ eum percussisset, tu voles, ut nihil tibi mali accadat, ut nihil pro tuis delictis patiaris, ut nihil DEO offeras. Existimas non debere te adimplere, quæ Christus & Justitia Divina deesse Passionibus, Christi & à te adimpleri voluit. Ut denique intelligas non debere te parvâ satisfactione pro peccatis tuis esse contentum, sed debere te rigidam. agere poenitentiam,

tiam, configi te debere cruci Christi, & mortificationem ejus ferre, debere te, castigatione tui corporis, jejunijs, fame, siti, nuditate, humiliationibus tui, alijsq; operibus satisfactorijs, ad mortem usq; exsolvere peccata tua, & de propitiato peccato quoad vivis, non debere te esse sine metu. Quæ deinceps exsoluturus es, nunc deslere incipe peccata tua, quæ tantorum cruciatuum & mortis Christi causa exstiterunt.

O amabilissime DEUS ! tantane peccatorum meorum est gravitas, ut Unigenitus Filius tuus carnem nostram assumere, in eaq; immanissimè excrucuari, & mortem ignominiosam subire debuerit? Tantane peccati mei gravitas, ut Christum ad pedes Judæ depresso, sub pedibus conculcantium prostraverit, ut Christū humiliari & exinaniri oportuerit? Tantumne est peccati mei pondus, ut ex purissimo Filij DEI corpore, omnem ipsius sanguinem cum vita & anima expresserit? potius ego hoc pondere ad ipsum infernum deprimi debueram. Lapis hic molaris duræ meæ cervici alligari debuerat, ut me in stagno illo ardente demergeret. O Amor cordis mei, exosculor vulnera tua, quæ tibi amor mei inflixit; ad pedes tuos cruci affixos desleo peccata mea, pro quibus ut satisfaceres crucem ascendisti.

PUNCTUM III. Audi verba illa Jerem : 2. *Scito & vide : quia malum & amarum est, reliquisse te Dominum DEUM tuum.* Et considera nullum tantum esse malum, nihil tam amarum esse debere, atq; est dereliquisse Dominum DEUM; atq; malum & amarum est quodvis peccatum, præcipuè grave, contra DEUM commissum. Nimis amaræ afflictiones nobis videntur, quibus frequenter à DEI manu concutimur & flagellamur, amara est vita, ut etiam vivere tædeat, si continuis premamur ærumnis, & adversitatibus, mors etiā, imò

& ipsa mortis memoria plurimis amara est. Juxta illud: *O mors quàm amara est memoria tui?* Dies magna Judicij Divini, & vox illius, amara est futura, in eaq; tribulabitur fortis, juxta Sophoniam Prophetam; malus deniq; & amarus infernus est; quia etiam animas cruciabit, quæ amaritudine potissimum cruciantur. quia ibi amaritudo erit, ibi fletus & stridor dentium.

Nihilominus comparatione peccati, dulcia hæc sunt & svavia. Peccatum est virus & venenum amarissimum, est fel draconum, & venenum aspidum insanabile, illud morsu amarissimo mordet, & necat peccatorem. Inter omnia mala, dereliquisse Dominum DEUM, ita malum & amarum est, ut hoc nonnisi malum & amarum censi debeat. Quod ipsum ex eo ulterius est, quia solum peccatum est malum culpæ, afflictiones verò quæcunq;, ærumnæ item, mors, infernus, aliaq; hujusmodi, sunt pænæ. Porro sola culpa est malum, cum nullatenus DEUS culpam velit, nec eam velle & in ea complacere sibi possit, velit autem DEUS & possit velle pœnam, quia vult illam ex suppositione peccati, in eaq; sibi complacet, tanquam in re Justitiæ Divinæ debita, & ab ea exigita.

Deinde, malum culpæ est tantum malum, ut propter nullum bonum consequendum, etiam propter supremam felicitatem eligi & appeti prudenter possit, ut item non sit eligibile ad declinanda quæcunq; alia mala, juxta illud: non sunt facienda mala, ut eveniant bona. Jam verò mala illa, quæ in pœnam infligi solent, nec habent rationem culpæ, bene & prudenter eligi possunt, sive ad consequendum aliquod bonum singulare, sive ad evitanda alia mala ejusdem generis & rationis, tantò magis ad evitandum malum culpæ, ad quod etiam evitandum, non solum possunt, sed etiam debent præeligi & exoptari.

Ex hac consideratione deduces: omnes vitæ hujus ærumnas, cruces, afflictiones, mortem etiam ipsam, imò & infernum præoptare te debere, quàm ut DEUM offendas; & ut declines malum illud & amarum, quod est dereliquisse Dominum DEUM tuum, seu, ut declines quamcunq; culpam, quodcunq; peccatum.

Deduces iterum: omnes amaritudines hujus vitæ, omnes ærumnas, debere tibi dulcescere, ut per illas possis te liberare à malo culpæ, quod unicè mali & amarū est. Frequenter ad graviores amaritudines avertendas & depellendas, adhibes amaritudines, sed leviores. Ut interiora depellamus tormina, morborū item mala, & amaritudines, utimur amara potione & medicinâ. Amaritudo peccati, quæ & gravissima & maximè periculosa est, depelli potest amaritudine pænitentiae. si amarè desleveris peccata tua, si in amaritudine fuerit oculus tuus, absterges gravissimam amaritudinem culparum tuarum. Desle itaq; amaris lacrymis peccata tua, pœnitentijs, afflictionibus, mortificationibus & quibusvis asperitatibus hoc malum depelle, dulcescant tibi hæc omnia, ut non te cruciet & conficiat illud malum, & amarum, quod est dereliquisse Dominum DEUM Creatorem tuum. Fac proposita, elice protestationes & varios affectus.

In colloquio à Christo cruci affixo postula, ut amarissima sua morte & passione liberet te ab amaritudinibus quarumvis culparum & peccatorum, & ut dulcoret tibi amaritudinem statûs pœnitentiae, quam agere debes, ut item dulces tibi reddat lacrymas, quibus deplorabis peccata antea vitæ tuæ, omnesq; mortificationes, quas rigidas & asperas convenit te assumere, ut ad implendas ea, quæ desunt Passionibus Christi.

In fine: Anima Christi.

Meditatio III. De effectibus peccati mortalis

Praludium 1. Imaginare prælium instrui à peccatore contra DEUM, vicissimque à DEO contra peccatorem. Pro parte peccatoris, simul cum ipso, decertant Draco & Angeli ejus, & totus infernus. Pro parte DEI contra peccatorem armatur omnis Creatura.

Praludium 2. Postula à DEO gratiam, quâ illuminatus cognoscas in bello hoc injusto, certò succubiturum peccatorem, & in maxima conjiciendū mala & pericula.

PUNCTUM I. Audi illa verba Prov. 15. *Longè est ab Impijs-DEUS.* Et considera: quòd DEUS quem admodum justis adest, & adesse censetur, speciali-ori quodam modo, adest enim illis per gratiam sanctificantem, per charitatem in cordibus ipso-rum diffusam, per quam etiam se habitare in iisdem profitetur. Adest item justis per gratias actual-les speciales, & specialem circa eos suam benevo- lentiam & providentiam exercet, adest adhuc ipsis singulariori protectione & auxilio, illos contra ho- stes eorum defendendo; Ita è contrario DEUS ab impijs longè abest; abest per privationem gratiæ sanctificantis & donorum supernaturalium infuso- rum, abest per subtractionem gratiarum specialium actualium, suæq; specialis benevolentiae, abest de- nique per denegationē protectionis, auxilij & de- fensionis contra hostes animæ ipsorum, tentatio- nesq; & insultus dæmonum.

O quàm miser ille est, à quo DEUS ita elon- gatur. Infelices tales DEUS appellat Osee 9. *Va illis, cum recessero ab eis.* Non est ita miser infan- tulus, à quo, inter urticas & vepres positò, sua re- cessit

cessit mater, Cæcus item absq; viæ duce in præcipitio constitutus, aut grex ovium in solitudine, in medio luporum à pastore derelictus: atq; est misera & infelix anima peccatoris, à qua DEUS recessit. Quid superest animæ taliter a DEO derelictæ? an non illud, quod Zachar. 11 dicitur. *Non pascam vos, quod moritur, moriatur, quod succiditur, succidatur.* An non hoc, ut lupi infernales & infensissimi animæ hostes dæmones, in talem animam irruant, ad perdendam eam, certatimq; exclament. *DEUS dereliquit illum, persequimini & comprehendite eum, quia non est, qui eripiat.*

Hôc consideratô, exhorresce talem à DEO derelictionem, time, ne à te DEUS aliquando recedat, & se elonget. Quia verò DEUS neminem derelinquit, nisi à quo derelinquitur, & ab ijs tantum recedit, qui prius ab eo recesserunt, time & præcave, ne per peccatum à DEO aliquando elongeris, & Creatorem tuum prius derelinquas. Protestare coram DEO, quòd ipsi adhærere velis, dicens: *Mihi autem adherere DEO bonum est.* Postula etiam à DEO, ne te permittat à se elongari, nec ille te à te elonget, usus illis Psalmistæ verbis. *DEUS, ne elongeris à me, DEUS meus in auxilium meum respice.*

PUNCTUM II. Audi illa verba Psal. 5. *Odisti omnes qui operantur iniquitatem, & Sapient. 24. Odio sunt DEO impius & impietas ejus.* Et considera, quòd DEUS propter peccatum non solum derelinquat peccatorem, sed etiam, quod gravius est, odio aversetur & peccatum ipsum, & ratione peccati, peccatorem. Circa hoc odium Divinum peccati & peccatoris, tria considera.

1^{mo} Quòd DEUS verò & propriò odiò prosequatur peccatum. Peccatum enim è diametro opponitur DEO, peccatum est offensa supremæ majestatis, est læsio summæ excellentiæ Divinæ, pec-

catum est oppositum essentiae, omnibusq; perfecti-
onibus DEI, est oppositum omnibus & singulis Per-
sonis Divinis, est oppositum actibus DEI liberis.
Cum ergo DEUS necessario seipsum amet, idq;
summè amet, necessario sibi in seipso suisq; perfe-
ctionibus conplaceat, consequens est, ut necessario
aversetur & odio habeat omne id, quidquid sibi
suisq; perfectionibus adversatur; Ex duobus enim
oppositis, sibiq; maximè repugnantibus, quò ma-
gis prosequimur unum, eiq; affluimur, eò magis al-
liud oppositum aversamur & detestamur.

Considera 2dò DEUM ita aversari peccatum,
& ratione peccati, peccatorem, ut hæc sola nonnisi
aversetur & odio habeat, nihilq; præterea ultra
hæc; quod ex eo est, quia DEUS diligit omnia
quæ fecit, & nihil odit eorum quæ fecit. Solum
autem peccatum est, quod DEUS non fecit. Is
enim solus peccatum, ut tale, facit, qui ad illud
concurrit cum inclinatione, complacentiâ, & ex
propria electione ac determinatione. DEUS au-
tem, etiam si concurrat ad peccatum ex ratione
causæ primæ seu universalissimæ, non concurrit
tamen ad illud cum inclinatione & complacentiâ,
nec ex determinatione & electione voluntatis suæ
Divinæ, sed potius concurrit cum summa abhor-
rentia & renitentia, ac nonnisi ut determinatus à
voluntate creata. Si autem DEUS odit pecca-
tum, odit & ipsum peccatorem, tanquam Autho-
rem peccati, tanquam præcipuam & principalem
causam rei tam sibi exosæ & abominabilis, tanquã
illum, qui servire sibi facit DEUM in iniquitati-
bus suis.

Considera 3tîo odium peccati à Natura &
essentiâ DEI ita inseparabile, & tam arctè Divini-
tatis fundo annexum esse, ut, si DEUS peccatum
odiò non insequeretur, eò ipso desineret esse DE-
US: sicut enim DEO essentialis est amor sui, ita
debet

debet eidem essentiale esse odium peccati, tanquam rei DEO ejusq; perfectionibus maximè repugnantis; odium vero peccatoris ejusmodi est, ut licet DEUS peccatorem ut talem, hoc est stante & permanente ipsius peccato, non possit non odisse, sicut non potest non odisse peccatum; nihilominus odium peccatoris secundum se spectati, non est essentiale DEO, quia non est essentiale peccatori ut peccatū ipsius semper maneat, sed hæc felicitas ipsius in hac vita est, quod peccatum ipsius tolli ac remitti possit. Sublatō verò ac remissō peccatō, non solum DEUS non odit peccatorem, sed etiam ipsum in gratiam recipit, recipit in filium, ac singulari prosequitur amore.

Hoc Divinum odium peccati, sufficiens motivum esse deberet ad hominem à peccato retrahendum. Dignus certè DEUS est, ne hoc odium ipsius adversus peccatum provocetur, ne à te materia & objectum odij Divini ac perpetuæ displicentiæ ponatur. Odium etiam ipsius peccatoris, quo DEUS fertur in peccatorem propter peccatum, si penitiō inspicitur, tantæ efficacis est, ut vivax illius apprehensio à peccato retrahere valeat. Certè filius cavet offensam amantissimi sui Patris, subditus cavet offensam clementissimi Principis, servus optimi sui Domini, ne iram & indignationem ejusdem incurrat. Quidni pariter creatura retrahetur timore à peccato, ne odium Creatoris sui provocet, ipsumq; concitet ad indignationem.

Hæc considerans, reflecte te, an odium Divinum, quò DEUS odit peccatum, ita vivaciter apprehenderis, & apprehendere soleas, ut te illud retrahere soleat à peccato? si te non retraxit aliquando, an saltem post patratum peccatum seriò recogites, quàm grave sit, odium incurrisse Divinum? Plures subditos, apprehensio iræ Principis terreni, & promeritæ à se illius indignationis, tantum per-

culit, ut intra breve tempus, ac etiam sæpius morte repentinâ illos enecaverit. Apprehensio indignationis Divinæ per peccata tua promeritæ, nolim ut mortem tuam corporalem causet, sed potius ut ad vitam & vitam meliorem te adducat. Age, & felicitate tua utere, quam habes, quod possis à peccato liberari, Deoq; reconciliari offenso, ne te propter tuum peccatum odio habeat, Adhibe media, ut peccatum, quod cōmisisti, in anima tua non maneat; nec perseveret, per seriam pænitentiam illud delere stude; ita enim fiet, ut DEUS non solum te odio non habeat, sed etiam, ut te in gratiam & filium recipiat.

Reflecte iterum te, quantô odiô tu oderis peccatum, an odiô summô? an odiô perpetuô? & totâ æternitate duraturô? an aliquatenus simili illi odiô, quô illud ipsum DEUS odit? An solum oderis peccatum, & teipsum propter peccatum, quantum diu eidem es obnoxius? Cura ut odiô verò & propriô, odiô implacabili prosequaris peccatum, ut nihil præterea oderis ultra peccatum. Peccatorem si odisti propter peccatum, ita illum odi, ut velis illum à peccato liberari, ut illum velis ex peccato consurgere, ut simul illum ames secundum se, ut optes & desideres conversionem & salutem ipsius, eumq; quàm maximè juves, ut cum DEO in amicitiam redeat, Deoq; serviat in sanctitate. Nam etiam Divino odio, quo DEUS odit peccatorem propter peccatum, est in DEO conjunctum desiderium conversionis ipsius, & amor salutis ejusdē. Ita DEUS odit peccatorem, propter peccatum, ut ipsum benignissimè juvet, auxilia gratiæ suæ illi conferat, ut ad ipsum redeat & convertatur.

Elice affectus, fac proposita accommodata. In omnibus peccandî occasionibus sit tibi deinceps præ oculis odium Divinum, quô DEUS peccatum & peccatorem odit. Urgente tentatione ita te ipsum
alloque

alloquere. Ergone anima mea DEUM tuum ad iram & indignationem concitabis? nunquid non ipse Pater tuus est? nunquid non supremus Princeps, nunquid non ille Dominus & Creator tuus,

PUNCTUM III. Audi DEUM dicentem Psalm.

17. *Persequar inimicos meos & comprehendam, & non convertar donec deficiant. Confringam illos, nec poterunt stare, cadent subtus pedes meos.* Et considera, quod DEUS non solum derelinquat peccatores illis gratia habitualē, pluresq; gratias suas actuales & protectionem suam subtrahendo, non solum odio prosequatur & aversetur, sed etiam eosdem gravissimè persequitur, suasq; injurias vindicat. Porro in persequendis peccatoribus, DEUS aliquatenus eum modum & rationē tenet, quā tenet Rex aliquis vel Princeps terrenus in persequendo suo hoste.

Curat ille 1^{mo} ut hostem, hostilemque; exercitum in arcto teneat, illumq; cingat, & quasi comprehendat, nec permittit ipsum pedem efferre extra castra, ut commeatum conquirat, & commoda sua, & vitæ conservandæ subsidia habere possit.

2^{do} Curat hostem attenuare, vires illius minuire, ut semper magis ac magis deficiat.

3^{tiò}. Attenuatum hostem confringit, ac ita potentiam ejus frangere nititur, ut ultra non assurgat, nec possit stare subtus pedes ejus.

Simili modò persequitur DEUS inimicos suos, nimirum peccatores. 1^{mo}. persequitur illos comprehendendo, hoc est, tenet eos in arcto, per varias tribulationes, ærumnas, afflictiones, morbos, multaq; alia flagella, ut peccator queri debeat; *Circumdederunt me mala, quorum non est numerus.* Talibus adversitatibus arctat & cingit DEUS peccatores, ut se tandem dedant, & DEO subijciant, ut veniam rebellionis & perduellionis suæ postulent, suumq; legitimum deprecentur Dominum.

2^{do} DEUS, peccatoris quem persequitur, imminuit vires, non solum corporales, sed etiam spirituales & supernaturales, subtrahit illi multa auxilia gratiæ suæ, permittit ut illis quæ ipsi offert, non utatur, nec iisdem cooperetur in tentationibus & peccandi occasionibus, ut deficiat & succumbat.

3^{io} DEUS confringit peccatorem, permittendo frequentiores & graviores ipsius lapsus, ut de peccato in peccatum proruat, ut plures contrahat peccaminosos habitus, ut continuò cada, nec possit stare subtus pedes ejus, consequenter DEUS illum calcatur in furore suo, & suis pedibus conterit, dat ipsum in reprobum sensum, tandemque morte illum malâ & supplicijs perdit æternis.

His consideratis, exclamabis cum Apostolo: *Horrendum est incidere in manus DEI viventis. Dānabis deinde multos annos tuos, quod contra DEUM assurrexeris per peccatum, ipsumque provocaveris, ut te tanquam suum inimicum persequatur. Deprecaberis postea humiliter offensum à te Numen, & dices: Contra solium, quod vento rapitur, ostendis potentiam tuam, & stipulam siccam persequeris? scribis contra me amaritudines, & consumere me vis peccatis adolescentie meae.*

In colloquio ad vulnera Christi Crucifixi confugies à facie furoris Domini, petens suppliciter, ut Christus intra sua vulnera te recipiat, ibique abscondat.

In fine: Anima Christi.

Meditatio IV.

De effectibus peccati mortalis.

Præudia eadem quæ meditationis præcedentis.

PUN-

PUNCTUM I. Audi Psalmistam dicentem Psal. 149. *Exaltationes DEI in gutture eorum, & gladij ancipites in manibus eorum, ad faciendam vindictam in nationibus.* Et considera: his psalmi verbis exprimi odium, quò Sancti DEI feruntur in peccata & peccatores. Hi, ita DEUM, quò æternaliter fruuntur, laudant, exaltant, & benedicunt, ut simul justò quodam zelò abripiantur contra peccatores, eorumque peccatum tanto odio habent, ut nisi status beatitudinis & felicitatis ipsorum eos redderet immortales, moritari essent præ dolore & tristitia, quando vel unicum intelligunt patrari peccatum. Offendis DEUM graviter? Mater Beatissima & Sancti DEI morerentur præ displicentia & indignatione ac odiò adversus peccatum, si mori possent.

Rationem hujus reddit S. Gregorius. Quia Sancti DEO jam fruantes, cum pervisionem Beatificam sint uniti DEO, & absorpti ab essentia ejus, nihil aliud possunt velle, quàm velit DEUS, nihil amare, in nullo alio delectari, nisi quod amat & quò delectatur DEUS, nihil etiam possunt aliud odisse, quàm quod DEUS odiò prosequitur. Cum ergo DEUS summè oderit peccatum, in eo sibi maximè displiceat, dolore cordis sui Divini tangatur intrinsecus, quoties videt patrari scelera, etiam Sancti summè oderunt peccatum, summè sibi in illo displicent, de illo, quò fiat, maximè dolent, & quodammodo tristantur. Certè amor, quò in DEUM adhuc in hac vita mortali ferebatur vir secundum cor DEI, tantò Zelò eundem accenderat adversus peccatores, ut præ indignatione & odiò peccati, tabesceret & deficeret, sicut ipse de se ipso testatur. *vidi prævaricantes & tabescebam.* Quidni pariter aliquomodo Beatificus ille amor, quò Beati DEUM in cælis amant, non simili zelo accendat corda eorumdem?

Accen-

Accendit certè, idque non solum ut odio habeant peccata, sed etià ut odio habeant ipsos peccatores, ut eos persequantur, ut contra eos armentur, ut gladios ancipites arripiant ad ulciscendam injuriam DEI, & faciendam vindictam. Hic zelus aliquando ipsius Christi armavit manum, à Cruce avulsam, cruore ejus proprio, ut hunc in faciem cujuspiam obstinati peccatoris projiceret. Idem zelus armavit manus Sanctorum Mercurialis & Arthemij Martyrum contra Julianum Apostatam Imperatorem, idem armavit manum item S. Francisci Seraphici, contra aliquem Prælatum, Religiosos Ordinis à se instituti persequentem.

Contingit quidem aliquando, quod Beatissima & Sancti DEI opponant se iræ & justitiæ Divinæ, suisque precibus vindictam DEI cohibeant. Hoc tamen contingit ex eo, quod DEUS illis specialiter inspiret, voluntatemque eorum moveat, ut pro nobis intercedant, quod nunquam alias fieret, si sequerentur instinctum, quò zelant honorem DEI.

Fac reflexiones supra teipsum, & considera, an & tu non contristaveris gravi peccato mortali Matrem Beatissimam? an ex oculis S. Angeli Custodis tui non expresseris lacrymas? An quempiam Sanctorum non armaverit zelus gloriæ Divinæ ad faciendam de te vindictam?

Exhorresce peccatum, detestare illud quàm maximè, advolvere pedibus Matris Sanctissimæ, & defleas cæcitatem tuam, quòd tu degener filius, gravissimo dolore, ob patratam à te Verbi Divini Incarnati offensam, tanquam gladiò transfixeris pectus, cor, & animam Sanctissimam Divinissimæ hujus Matris. Postula veniam à S. Angelo Custode tuo, Sanctisque Patronis & omnibus Cælitibus, quòd eos contristaveris, & ad justam indignationem & ulciscendam DEI injuriam provocaveris. Fac proposita, & protestare curaturum te, ut sicut

San-

Sanctis illis spiritibus & cæli civibus mæroris causa exististi peccando, ita iisdem facias gaudium in cælo super te maximo peccatore pœnitentiam agente.

PUMCTUM II. Audi Job dicentem *cap. 17. *Dies mei transierunt, cogitationes meae dissipatae sunt, torquentes cor meum. Noctem verterunt in diem.* Et Considera his verbis exprimi, quod conscientia peccati commissi sit carnifex crudelissimus, sit sævissima ultrix, vindictam sumens ex peccatore. Non solus DEUS, non tantum Sancti DEI, sed & ipse peccator est vindex suorum scelerum. Conscientia mala est vermis nunquam moriens, semper rodens & torquens cor peccatoris. *Hæc est prima & maxima peccantium pena,* (ut ait Ethnicus Philosophus Seneca,) *peccasse*; hæc facit, ut fugias nemine persequente, ut omnia timeas, omnia suspecta habeas. De peccatore verificatur illud, quod idem Job cap. 15 dicit: *sonitus terreus in auribus illius semper, & cum pax sit, ille semper insidias suspiratur.*

Talem carnificem expertus est saul, ut interfici voluerit, non ferens angustias animæ suæ, dū diceret ad quempiam: *Sta super me & interfice me, quoniam tenent me angustiae,* angustiae inquam conscientiae eundem redarguentis, propter crudeliter à se jugulatos Sacerdotes Nobe, cum Hebraica versio habeat: *interfice me, quia tenent me ora vestimenti sacerdotalis.* Talem carnificem ex propria conscientia nactus fuerat Antiochus Rex, cū diceret: *Nunc reminiscor malorum, quae feci in Ierusalem, recessit somnus ab oculis meis, & concidi & corruui corde praesollicitudine, & dixi in corde meo, in quantam tribulationem deveni, & in quos fluctus tristitiae?* Ab hoc carnifice cruciabatur Tiberius Cæsar, de quo sic habet Tacitus: *Tiberium non fortuna, non solitudines protegebant, quin tormenta pectoris sui, suasque*
ipse

ipse pœnas fateretur. Hic liſtor Apollodoro, de quo reſert Plutarchus, per ſomnium pellem detrahebat, & ferventi ac bullienti Aheno immergebat, cum illa exprobratione. *Ego tibi horum Cauſa ſum, Ego Conſcientia te torqueo.* Conſcientia Theodorico Regi Italiae, caput Symmachi inique occiſi inceſſanter obijciebat, eumque tandem conſecit. Hujus tormenta non ferentes tot alij, de rupibus ſe præcipitaverunt, alij ſuffocaverunt ſe aquis, alij laqueo vitam finiverunt, pugionibus ſe conſoderunt, alij præ triftitia contabuerunt.

His conſideratis, refleſte te ſupra teipſum, an & tu non es aliquando traditus immani huic Carnifici, ab eo excrucian- dus? Et propriâ experientiâ ſcies, quantum vermis hic ſæviat & cruciet? Item refleſte te, an etiam nunc non torqueat te conſcientia tua, & noveris contra has conſcientiæ torturas, unicum remedium eſſe, ſi virus quod viſcera tua rodit, per ſinceram pœnitentiam, integrâ peccatorum tuorum Confeſſionem, & per veram vitæ emendationem evomas & eiicias. Exhorreſce hunc tortorem, time peccatum, ne DEUS per conſcientiam tuam te arguat, & ſtatuat contra faciem tuam. Deſſe peccata tua, quæ hunc in te vermem generant. Procide cum lacrymis ad pedes ſupremi Numinis, dicens cum Job: *Peccavi, quid faciam tibi ô Custos hominum? quare poſuiſti me contrarium tibi, & factus ſum mihi met ipſi gravis? cur non tollis peccatum meum? & quare non auſers iniquitatem meam.*

PUNCTUM III. Audi illa verba Sapien. 16 *Creatura enim tibi faſtori deſerviens, xardeſcit in tormentû adverſus injuſtos* Et iterum Cap. 5 *Accipiet armaturam zelus illius, & armabit Creaturam ad ultionem inimicorum.* Et conſidera non ſolum Sanctos armari contra peccatorem, non ſolum ipſum peccatorem eſſe ſibi tortorem & ultorem ſceleris

sceleris sui, sed insuper omnes alias Creaturas adversum eundem exardescere & concitari, ut eum persequantur, ut ulciscantur in illo injuriam sui Creatoris, ipsi noceant, eumque perdant.

Et sic ignis, sicut quondam descendit in Sodomam & Gomorrhā, hasque Civitates cum suis habitatoribus in favillam redegit, ita & nunc, nisi prohiberetur à DEO, descenderet ad urendos & cruciandos quosvis peccatores. Aqua, sicut temporibus NOË, ruptis cataractis cæli, omnem carnem delevit & demersit, paucis animabus servatis, sicut fluctibus suis & tempestate consurrexit contra Jonam non obsequentem mandato DEI, ita etiam nunc peccatores obrueret & in profundum demergeret. Terra, sicut absorpsit rebelles & seditiosos Core, Dathan & Abiron, ita inclinatione sibi innata, vellet quodammodo quemvis absorbere peccatorem, videturque aliquam pati violentiam, quod illos sustineat. Non sunt invitandi montes & colles, ut cadant super peccatores, ipsosque obruant, proprio impulsu caderent & obruerent eosdem, si DEUS permetteret. Aër quoque, sicut olim in vindictam peccati David sustulit pestilentia septuaginta millia virorum, ita & nunc sæviret in transgressores legum Divinarum.

Aliæ quoque Creaturæ, simili (ut sic loquar) feruntur zelô contra peccatores; quantâ reverentiâ ursi, Leones, tigrides lambebant aliquando pedes Sanctorum Martyrum, tantâ è contrario ferociâ discerperent peccatores & hostes DEI; ita Leones nunc arriperent & ossa peccatorum comminuerent, sicut comminuerunt ossa Assyriorum, ad quorum iniquam accusationem Daniel in locum Leonum missus fuerat. Ursa etiam lacerarent discolos & protervos, quemadmodum ad maledictionē Elifai laceraverunt quadraginta duos pueros; serpentes morfu suo necarent impios, sicut necabant

Israelitas

Israelitas in deserto igniti serpentes. Aliæ etiam Creaturæ, maximè illæ, quibus peccator ad DEI offensam abusus est, si tot vires haberent, sævissimè cum peccatore agerent; DEIQUE & suam injuriam atrocissimè ulciscerentur. Quarè meritò peccator post peccatum ab omnibus Creaturistimere debet, meritòque illud dicere potest cum Caim *Omnis qui invenerit me, occidet me.*

Postremo ipsi Dæmones, qui peccatorem suis tentationibus in peccatum inducunt, sunt acerrimi hostes ejusdem. Illi vellent quàm maximè nocere peccatori, vellent ipsum perdere & in suam trahere damnationem, continuo se DEO offerunt ad colligenda hæc zizania: *Vis? imus, & colligimus ea ad comburendum.* Illorum voces sunt quibus se animant contra peccatorem: *DEVS dereliquit eum, persequimini & comprehendite eum, quia non est qui eripiat.* Hanc suam hostilitatem frequenter exercent, aliquando immanibus spectris terrefaciendo peccatores, aliquando in præcipitia, in loca palustrosa eos deducendo, occasionibus obijciendo, in quibus lethalia referunt vulnera, nocendo ipsidem per veneficas & præstigia, quod non tam facilè justis facere permittuntur.

Ratio tantæ hostilitatis Dæmonum in peccatores est. Quia dæmones gravissimè indignantur, quòd homo, habendo tot auxilia gratiæ ad superandas ipsorum tentationes, illis non utatur, sed succumbat tentationibus, quòd habendo tot salutis media, illa negligat, quòd melior non fiat longâ patientiâ DEI, conversionem ipsius expectantis, quia præterea, dum peccata hominum multiplicantur, dæmones vident, suam augeri & crescere damnationem.

His consideratis, reflecte te, quoties & tu meruisti, ut ignis te absumeret, Cælum te fulmine feriret, aqua suis fluctibus involveret, àer pestilentiam inficeret

ficeret. Admirare quomodo post patratum à te hoc & illud peccatum, non discerpsent te urfi, lupi non dilaniaverint, viperæ, serpentes, aspidēs suis moribus non enecaverint. Admirare quomodo Dæmonum rabiem evaseris? Admirare in his omnibus Dei patientiam, & longaminitatem, Creaturas omnes ne tibi noceant, cohibentem. Admirare tuā, et aliorum peccatorum in Deo offendendo audaciam, simulque in differenda pœnitentia procrastinationem & tarditatem.

Per modum Colloquij concludere hoc affectu. O quanta Misericordissime Deus, tua bonitas & Clementia! Manus tua potentissima detinuit fulmina, ne me ferirent. Tu orbem terrarum firmasti, ut me sustineret, Tu posuisti terminos aquæ, ne me demergeret, àërem ad respirandum mihi concessisti, ut viverem, Tu conclusisti ora Leonum, tu feroces ursos & lupos in sylvis, serpentes in terræ cavernis, detinuisti, ne mihi nocerent. Tu infernalem Draconem alligasti, ne in miserum peccatorem sæviret. Tu me ex tot casibus, ex tot mortibus eripuisti. Et ego tantā clementiā male usus sum, ut peccatis peccata cumulare. Nunquid ergo ampliùs offendam te? an divitiās Bonitatis Tuæ contemnā? Si vides Domine me adhuc peccaturum, fulmine tuo priùs me ferias, igne absumar, absorbeat me puteus, obruat procella, Aer inficiat, Terra os suum aperiāt, atque devoret. Percutiat Leo, discerpat ursus, lupus laceret me, serpentes & viperæ venenoso morfu interficiant, Dæmon obsideat, omnes Creaturæ in me sæviant, antequam peccem, ut offensam Divinæ Majestatis tuæ impediāt, Absit verò ut offendam te, ut Creaturæ Tuæ patratum à me ulciscantur scelus & justas de me in eorum, criminum, postquam commissa fuerint, sumant pœnas.

In fine Pater noster

R

Medi-

Meditatio V.

De malis quæ per peccatum incurruntur.

Preludium 1. Imaginare Peccatorem in prælio adversus DEUM suscepto infelicitè succubuisse, multaque mala & vulnera lethalia ex conflictu retulisse.

Preludium 2. Postula gratiam ut hanc infelicitatem peccatoris fructuosè agnoscas, & ut tam peccatum, quam illa mala, quæ peccatum consequuntur declinare possis.

PUNCTUM I. Audi illa verba Psalm 10 *Pluet super peccatores laqueos* Et Ezech. 3 *Si conversus fuerit iustus à justitia sua, & fecerit iniquitatem ponam offendiculum coram eo.* Et considera inter alias pœnas hanc etiam peccati pœnam esse, quòd DEUS pluatur in peccatores, laqueos, quòd coram illis ponatur offendicula, ad quæ dum impingunt, labitur pes eorum, & de peccato in peccatum, cadunt.

Tales laquei & offendicula sunt imò occasiones proximæ peccandi in quas ex Divina permissione peccatores se conijcunt, & quas cum te neantur & possint, à se amovere non student.

2^{do} Laquei & offendicula sunt prava aliorum exempla, conversationes cum laxis, dissolutis, liberæ Conscientiæ, imò perversis hominibus.

3^{to} Laquei & offendicula sunt, tentationes graves, continuæ, molestæ, quibus tandem ex perversa sua voluntate cedit & succumbit peccator.

4^{to} Laquei sunt, Principia perversa, Resolutiones conscientiæ nimium laxæ, tum ab alijs tum à Conscientiæ directoribus & Confessarijs subinde datæ. Si peccator incidat in Confessarium laxum, adulato-

adulatorem, qui pœnitentem laxè resolvat, vel dissimulet & taceat, nec monstret gravitatem peccatorum, Resolutio vel etiã silentium, talis confessarij est lequeus peccatoris, quo ita capitur, ut audentius deinde in pristina relabatur peccata.

5^{to} tandem laqueus & offendiculum peccatoris est levitas & dissimulatio, nimia indulgentia & omisso justæ animadversionis ob peccatoris delicta, sive propriorum Parentum, sive Magistratum, sive quorumcunque Superiorum, quibus subiectus est. Dum enim delicta peccatoris ab his dissimulantur, nec pro merito puniuntur, peccator reditur audacior ad alias transgressionis, dicitque: *Ecce peccavi & quid mihi triste accidit.*

Hæc considerans perpende ulterius laqueos & offendicula hujusmodi poni ante peccatores, in pœnam peccati originalis, sed vel maximè in pœnam peccatorum personalium, cuique homini propriorum. Perpende item laqueis hujusmodi plena esse omnia, ita ut nullum sit vitæ genus, quod aliquibus saltem laqueis & offendiculis non sit obnoxium, ut nullus mortalium sit, qui inter tales laqueos non versetur, qui in aliquem subinde non incurrat, quamvis non æquè sint multiplices in quovis vitæ genere, nec æquè periculosi. Alij enim hominum versantur inter frequentiores, alij inter minus frequentes, vel certè versantur extra occasiones peccandi saltem graviter, aliqui licet versantur inter occasiones peccandi, hæ tamen respectivè ad ipsos non sunt proximæ. Alij vivunt in medio nationis pravæ, inter homines discolos, & in omnem licentiam effusos, alij vivunt in gente sancta, populo acquisitionis, in Collegio Apostolorum licet etiã in hoc subinde inveniatur Judas filius perditionis. Aliqui graviores, alij leviores experiuntur tentationes.

Quibusdam, etiam tales tenduntur laquei, ut si in illos incidant

statim strangulentur, suffocentur, & vitam animæ miserè perdant, talia ponantur, offendicula, ut ad ea gravissimè & lethaliter concutiantur, & ad ea allissi illico in præceps ruant, alijs ponuntur offendicula, quæ pedes & vestigia cruentant, sed vitam non eripiunt, tales tenduntur laquei, ut eos evitare, & se ex illis faciliè extricare valeant.

Nostra interest, ut continuâ vigilantia & circumspeditione utentes, hos; quantum fieri potest laqueos declinemus. Certe providè & sapienter agit, qui sciens plures esse vias vel semitas ad aliquem terminum, quantum una laqueis & offendiculis ita plena est, ut pedem etiam movere non possis, quin in aliquem laqueum incidas, vel in offendiculum impingas, idque plena est laqueis & offendiculis periculossimis, in quæ non incidis, nisi cum gravissima concussione, vitæque & salutis tuæ dispendio. Alia via habet quidem & ipsa laqueos in deceptionem transeuntium positos, sed non ita frequentes, habet offendicula, sed non tam multa, nec tam periculosa, Alia rursus via longè adhuc paucioribus laqueis & offendiculis nec multum periculosa est obnoxia & impedita. Hanc postremam minimè periculosam, minimè difficilem viam & semitam qui ingreditur & præeligit, is certè agit providentissimè & sapientissimè.

Reflecte te an & tu non veriseris inter huiusmodi laqueos & offendicula, & an inter hæc? inoffenso pede hactenus in via salutis processeris. Recollige te, quos laqueos hostis animæ tuæ tibi obijciat, & quibus magis te illaqueat? quomodo te geras in occasionibus peccandi? an proximas dimittas? quâ fortitudine superes tentationes potissimum graviore? an pravis aliorum exemplis & conversatione non corrumperis? An gravioribus tuis peccatis non promerearis, ut *Deus* super te pluatur laqueos periculosos, & saluti animæ tuæ nocentes

De malis quæ incurruntur per peccatum. 236

centes aut nocituros. Reflechte te, quâ deinceps tibi viâ procedendum sit, ut non incidas in laqueum Diaboli, ut non aberres nec deslektas à termino felicitis æternitatis, sed potiùs cum maiori spe & securitate salutem tuam consequaris. Postula Divinam gratiam quâ illuminatus, possis effugere omnes laqueos, & insidias inimicorum superare, ut deinde in felici æternitate possis Deo laudem decantare. *Laqueus contritus est, & nos liberati sumus.*

PUNCTUM II. Audi Ecclesiasticum dicentem Cap. 3 *Peccator adjiciet ad peccandum & Psal. 68 Appone iniquitatem super iniquitatem eorum.* Et considera, inter ingentia damna & mala quæ causat peccatum, esse etiam illud, quod unum peccatum impellat in aliud. Peccata ordinariè solitariè non incedunt, commisisti unum, in unum te resolvisti, facilius rues in aliud. Peccatum, est ignis ad perditionem devorans, ignis inquam, non solum quia omnia bona, omnia merita tua perdit & devorat, sed quod sit sæcundissimus in tot alijs similibus ignibus, scilicet in alijs pluribus peccatis producendis. Peccatum est simile ferro magnete affricto, sicut enim hoc trahit ferrum aliud, ita & peccatum unum trahit post se aliud. Peccatum est circulus, cum alijs circulis unam longam catenam efficientibus connexus. Est Abyssus, sed illa de qua Propheeta dicit: *Abyssus abyssum invocat.* Hanc concatenationem peccatorum videtur expressisse S. Jacobus Apostolus dum dicit: *Qui in uno deliquit factus est omnium reus,* hoc est: reus est, seu meretur, ut in alijs omnia peccata prolabatur.

Expende quanta hæc sit pæna peccatoris? quantum malum? magnum malum est vel semel Deum graviter offendisse. Per unum etiâ peccatū gravissima Deo irrogatur injuria, impugnatur Essentia Divina, Attributa Dei, omnes Personæ Sanctissimæ Trinitatis, & actus Dei liberi. Per unū peccatum gravis irrogatur injuria Deo homini seu Christo, ipsi pecca-

tori, & omnibus creaturis. Unum peccatum provocat iram & indignationem Beatissimæ, Sanctorum Angelorum, & Sanctorum Omnium, facit, ut ipse peccator sit acerrimus sibi ipsi hostis, omnesque Creaturas contra ipsum armat. Unum denique peccatum spoliât animam peccatoris, omnibus meritis, spoliât gratiâ Sanctificante & donis infusis spoliât vitâ spirituali, & inhabilem reddit ad merendum. Si igitur tantum malum est, semel graviter peccasse, quantum malum est, iniquitatem super iniquitatem apposuisse. Hoc est malorum omnium maximum, quo malo majus, ne Divinæ quidem Justitiæ brachium potentissimum, peccatori infligere potest, dum culpæ culpis cumulantur. Hæc pœna est, quam DEUS permittere quidem potest, velle autem voluntate beneplaciti, & complacere sibi in ea, etiam ex peccati commissi suppositione non potest, quomodo DEUS potest velle multas alias pœnas. Hanc pœnam in tantum DEUS infligit, in quantum peccatori, quem ab æterno prævidit peccaturum, certaque sua auxilia oblata ad superandam tentationem, inefficacia redditurum, confert talia auxilia, nec succurrit per gratias efficaces, quibus ille gratijs destitutus ex sua pravitate & malitia, labitur, atque tentationi succumbit.

His expensis exhorresce gravissimam hanc pœnam. Exhorresce quodvis peccatum, quod ad tantam indignationem DEUM provocat, ut tam gravi imò omnium pœnarum gravissimâ pœnâ peccatorem puniat. Detestare præteritæ vitæ tuæ scelera, supplica supremo Numini, ut te, quibuscunque alijs pœnis puniat, & aliter in te vindicet tua crimina, non puniat autem te pœnâ hac gravissima, ut apponat iniquitatem super iniquitatem tuam.

PUNCTUM III Audi Ecclesiasticum dicentem Cap. 5 *De propitiato peccato noli esse sine metu.* Et considera, inter mala, quæ affert peccatum mortale

tale, esse & illud, quod in tota vita hominis omnem tollat salutis securitatem. Qui aliquando Deum graviter offendit, in eam incidit miseriam, ut licet poenitentiam agat, semper timere debeat, an sibi remissum sit suum peccatum.

Potest quidem scire peccator, Catholicâ edoctus fide, quod Sacramentum Poenitentiae ad tollenda peccata post susceptum commissâ baptismum, sit singularissimum remedium, sit inexpugnabile scutum, quo protegere nos possumus contra fulmina & ictus Justitiæ Divinæ, quod sit secunda tabula, quæ post peccati naufragium potest nos salvare, & in qua nobis enatandum est, potest scire, quod idem Sacramentum sit Civitas refugij, ad quam confugientes rei mortis, à morte liberantur, quod sit piscina probatica, in quam descendentes infirmi possunt curari à quacunque animæ infirmitate, non Angelo, sed Spiritu Sancto movente & educente aquam lacrymarum, ex corde contrito peccatoris, & sacerdote in Sangvinis Christi bulneo, peccatricem abludente animam. Hæc, inquam, peccator pro certis & indubitis veritatibus habere potest & debet.

Cæterum non potest esse certus, an Sacramentum Poenitentiae ad delenda peccata institutum, debite ab ipso sit susceptum, eique ritè & valide collatum. Non potest scire, an illo, impervio vindictæ Divinæ, scuto se muniverit, an certè loco hujusmodi scuti, telam aranearum facillè dirumpendam, in suam defensionem & protectionem non adhibuerit. Nescit an tabulam illam secundam, per quam ex naufragio salvari debuit apprehenderit, an non potius lignum aliquod putridum, quo demergendus est, nescit an portæ Civitatis refugij, sibi ad eam confugienti patuerint, an ad Civitatem refugij confugerit, an non potius erraverit, & aliò diverterit, ubi non poterit salvari.

Nescit an motus ille, quo excitatus fuit ut descenderet in piscinam probaticam, in qua sanandus erat & per quem motum,eductæ sunt lacrymæ ex corde ipsius, an fuerit motus Spiritûs Sancti, fueritne motus gratiæ Divinæ supernaturalis, an certè motus aliquis merè naturalis. Nescit, ille dolor, illæ lacrymæ quibus deflevit sua peccata unde sunt ortæ, ex quali motivo, an ex motivo supernaturali, an certè ex affectione aliqua & voluntatis inflexione merè naturali.

Quod ipsum ut meliùs penetres, rem propositam sic intellige. Potest peccator Fide Divinâ edoctus credere, Sacramentum pœnitentiæ esse à Christo institutum, ad tollenda peccata, post Baptismum commissa, habereque vim & virtutem delendi quæcunque peccata, ex Meritis infinitis Christi, in eodem Sacramento inclusis & contentis. Penes Sacerdotes atiam legitimè ordinatos & approbatos esse potestatem reinittendi peccata, & hoc Sacramentum, fidelibus verè pœnitentibus ministrandi. Potest etiam ac debet scire peccator, partes essentielles huius Sacramenti esse 1^{mò} Confessionem omnium peccatorum formaliter integram, factam coram Sacerdote legitimè ordinato & requisitam jurisdictionem habente. 2^{dò} Dolorem supernaturalem, universalem de peccatis commissis, ex motivo, quale requirit Concilium Tridentinum, qui dolor excludat voluntatē peccandi, sitque conjunctus cum firmo proposito de non peccando deinceps. 3^{tiò} absolutionem à Sacerdote legitimè ordinato & habente jurisdictionem, verbis ad id constitutis, peccatori pœnitenti collatam, ex intentione faciendi quod facit Ecclesia. Insuper peccator pœnitens potest scire, quod fecerit confessionem & absolutus sit. Nihilominus scire & certitudinem habere non potest, an sua confessio fuerit integra, integra inquam non tam materialiter
aliter

aliter, quàm potius formaliter, an verò ratione alicujus defectus non fuerit mutilata, non potest scire, Sacerdos apud quem sua peccata est confessus, fueritne legitimè & validè ordinatus, an habuerit jurisdictionem requisitam. Non potest item scire, dolor suus quem elicuit, fueritne supernaturalis & ex quali motivo, potest dubitare an suum propositum fuerit firmum & excludens voluntatem peccandi, tandemque neque hoc potest scire, an forma absolutionis fuerit valida, an non vitiata aliqua ratione, ob defectus supra insinuat potestatis, ordinis, vel jurisdictionis in Ministro, vel ob defectum intentionis in eodem talis, qualis ad valorem requiritur.

His consideratis admiraberis stultitiam illorum, qui liberius peccant in spem veniæ & deletionis suorum peccatorum obtinendæ per Sacramentum Pœnitentiæ. Reflectes te deinde supra tuas Sacramentales confessiones, an illis meritò fidere possis, quid de illarum integritate, quid de dolore de & firmitate tui propositi sentire debeas, Et facile agnosces de propitiato (ut existimas) peccato non debere te esse sine metu. Quodsi adverteris aliquos defectus commissos esse circa tuas confessiones, dolorem, & similia, defectus hos corrigere stude, per frequentes contritionis perfectæ actus, per confessionem generalem, per subjectionem totius vitæ tuæ peccatorum sub terminis saltem generalibus, subjectionem inquam clavibus Ecclesiæ in quovis Sacramento Pœnitentiæ quod aliquando susceperis.

Fac circa hæc proposita.



Meditatio VI.

De quibusdam peccatorum pœnis.

Preludia eadem quæ meditationis præcedentis.

PUNCTUM I. Audi Spiritum Sanctum, Sapient. 2. dicentem: *Excæcavit illos malitia eorum.* Et iterum Sophon 1. *Ambulabunt ut cæci quia Domine peccaverunt.* Et considera inter alia damna, quæ infert peccatum, & inter alias pœnas peccati, esse excæcationē peccatoris, quod misera anima in tenebris exiit, quam excæcationem ut melius penetres

Considera ulterius, per peccatū triplici modo excæcari peccatorem.

Imò per hoc, quod peccator post suos lapsus & in peccatum resolutiones, lumen negligat, nec curet proficere, ex privilegijs & gratijs Christianæ & Catholicæ Religionis, dumque ei fax accensa præ oculis ponitur ab ea se avertat, vel oculos claudat. Porro fax accensa ab Ecclesia, ad illuminandum peccatorem, est Lex Divina, quæ per Ministros Ecclesiæ omnibus fidelibus intimatur & proponitur, talis fax, sunt Præcepta & Consilia Christi, Evangelium illius, & verbum DEI scriptum & traditum juxta illud Psal. 118 *Lucerna pedibus meis Verbum Tuum ex lumen semitis meis* Facem hanc præferunt Concionatores, Confessarij, alijque homines Spirituales & Apostolici, unicuique suam obligationem præ oculis ponentes, demonstrantes gravitatem peccati, horrorem judicij Divini, acerbissimam pœnarum, ostendentes quàm periculosus sit status peccatoris, prædicantes magnitudinē Bonitatis & Misericordiæ Divinæ expectantis peccatores ut convertantur, eosdemque si convertantur misericorditer

ricorditer fuscipientis, docentes tandem modum quo jugum peccati excuti, & peccator Deo reconciliari possit, Accenditur præterea fax per exempla Sanctorum, per quæ peccatores ad meliorem frugem, ad virtutem & Sanctitatem & ad poenitentiam faciendam incitantur ac provocantur. Peccatores autem avertunt oculos, ab hac Ecclesiæ face, eosdemque claudunt, quando omnes illas occasiones fugiunt, in quibus, a tali face illuminari possent, vel si hæc fax ob oculos illorū ponatur, illi tamen media salutis ipsis proposita negligunt, contēnunt, videre & apprehendere nolunt, nec unquā salubria aliorū consilia in seriā considerationē venire permittunt

2do Per peccatum peccatores excæcantur eā ratione, quod peccatores destruant & debilitent mentis suæ oculos, memoriam, & intellectum, vel inquirendo resolutiones nimium laxas & liberās, quæ licentiæ ipsorum habenas laxant, vel non frænando suas passiones, sed his omnia permittendo. Passiones hujusmodi sibi ipsis relictæ, nec per rectam rationem frænatae, ita quandoque mentis aciem hebetant & obtusam reddunt, ac omnem ejus vigorem tollunt, ut Intellectus ad fundum rerum, quæ ad salutem spectant, per cognitionem debitam non perveniat, nec substantiam sperandarum, rerum penetret ac perspiciat, proindeque non possit, aut veriùs nolit rectum de rebus Divinis formare judicium, quandoque ita perturbant rationis tranquillitatem, ut opposito modo de rebus judicet quam mereantur. Quandoque etiam eadem passiones si illis liberè indulgeatur, vehementiā suā intellectum ita sopiunt, ac in cōstatū redigunt, ut non nisi terrena sensuality & carnalia percipiat, Spirituality verò & æterna non apprehendat, nec assequatur, nec percipere velit juxta illud Apostoli *Animalis homo non percipit ea que sunt spiritus* & juxta assertum Augustini. *In homine carnali tota ratio intelligendi est consuetudo cernendi.*

31^o Peccatum excæcat peccatorem irritando & provocando Patrem luminum, ut ab eo peccator cæcitate percutiatur. Percutiatur autem à Deo peccator cæcitate, in pœnam sui peccati, tum per denegationem vivacium illustrationum & luminum efficacium, quando Deus confert quidem peccatori illustrationes, sed tales, ut videndo, per suam malitiam non videat, negat autem eas illustrationes, quibus illustratus videndo videat, hoc est ita videat, ut operetur salutariter, & cooperetur gratiæ Divinæ. Tum permissione occasionum, in quibus peccator seipsum excæcaturus est, abijciendo & rejiciendo lumina sancta, & principia ac dictamina æternæ veritatis ac Sapientiæ, & conquirendo dogmata falsa, politica, Mundo ejusque sapientiæ, non Deo conformia. Tandem Deus percutit cæcitate peccatorem non impediendo sed permittendo, ut Dæmones peccatoribus oculos eruant, ipsosque cæcos reddant. Qui ipsi in tantum excæcant animam peccatricem, in quantum ex memoria ipsius eradunt omnium rerum sacrarum imagines & species, nimirum Dei præsentis recordationem, vivam impressionem cruciatuum, tormentorum, ac diræ mortis amore nostri à Christo susceptorum, in quantum tollunt cogitationes sanctas de Cælo, de Matris Beatissimæ in homines amore & patrocínio, de æternitate, alijsque rebus, his similibus. In locum verò talium cogitationum depingunt in memoria, sensualium, sædorum & infamium phantasmatum repræsentationes. Deinde, in quantum in intellectu obliterant, & tollunt dictamina & principia sancta, judicia vera & spiritualia, imbuunt verò eundem Intellectum principijs falsis, sæcularibus & pseudopoliticis. Postremo Dæmones peccatori oculos eruant, in quantum voluntatem inclinant, suisque tentationibus pertrahunt, ut recedat à propositis bonis & salutaribus, formet verò destinatio-

nēs & resolutiones malas ac perversas.

His consideratis, reflecte te supra teipsum, singula pereurrendo. An & te non excæcaverit malitia tua, & desle cæcitatem tuam. Quodsi nullas in anima tua tenebras inveneris, humiles Deo redde gratias, quod te de tenebris, vocaverit in admirabile lumen suum. Quod si in anima tua deprehenderis aliqua saltem cæcitatibus initia, surge & illuminare, quia venit lumen tuum. Omnes dispelle tenebras, noli esse rebellis lumini, quod tibi Deus immittit. Dum lucem habes, ambula in luce. Fac proposita &c. In faciem tuam deinde pronus procide, à supremoque Numine supplex lumen postula, illis Psal. 66. verbis: *DEUS misereatur nostri, & benedicat nobis, Illuminet vultum suum super nos, & misereatur nostri.*

PUNCTUM II. Audi Job dicentem Cap. 41. *Cor ejus indurabitur tanquam lapis & stringetur tanquam incus malleatoris.* Et considera etiam hanc gravissimam pœnam peccatoris plerumque esse, quod cor illius obduretur tanquam lapis. Obduratio hæc pertinet ad voluntatem, sicut excæcatio principaliter pertinet ad intellectum. Sequitur tamen obduratio excæcationem.

Porro obduratio consistit in eo, quod cor peccatoris ita durum, intractabile, & inflexibile reddatur, ut neque monitis, concionibus, & pijs exhortationibus, neque pœnis inflictis emolliatur, neque bonis aliorum exemplis, corrigatur, neque inspirationibus gratijsque Divinis flectatur, ut à malo averti possit.

Taliter induratum fuit cor Pharaonis, quem neque prodigia per Moysen monstrata, neque tot plagæ, ipsi, ejusque populo à Deo inflictæ, neque exhortatio Moylis & monitiones nomine Dei factæ avertere poterant à persequendis Hebræis, citiusque persuadere, ut dimitteret populum Israel. Ta-
liter

liter item fuit induratū cor Judæ proditoris, qui pariter neque Christi humilitate, ad suos pedes se demittentis, neque nimiam ipsius charitate, suo corpore & sanguine Judam pascentis, & ad osculum oris sui Divini admittentis, neque comminativā illā adhortatione: *va homini illi, per quem Filius hominis tradetur, melius, si natus non fuisset homo ille*, neque tot alijs beneficijs, optimi sui Magistri, ejusque sanctitate & innocentia, deterri potuit ac dimoveri, ab impio suo proposito tradendi Christum.

Obduratio hæc oritur communiter ex triplici capite 1^{mo} ex frigida & valde remissa, aut nulla simpliciter applicatione intellectus ad consideranda & expendenda motiva spiritualia, vividā verò & forti apprehensione ac consideratione motivorum inclinantium ad sensualia. 2^{do} ex habitu peccandi bene radicato, & ortā hinc vehemētissimā inclinatione appetitus sensitivi ad oblectamenta sensuum. 3^{to} ex validissimis & frequentibus suggestionibus Dæmonis, quibus peccator invitatur ad peccandum, Dæmone id unicè intendente, ne sibi, bene possessa præda, aliquando effugiat. Cum interim idem peccator juvetur à Deo auxilijs aut remissis, aut talibus, quæ ipse contemnit, & inefficacia reddit.

Eadem obduratio iuducitur tali viā, ut docet D. Bernardus lib. 1 de Consideratione. *Primum peccatum importabile tibi videtur, processu temporis, si assuescas, non judicabis adeo grave, paulo post nec senties, paulo post etiam delectabit; ita paulatim in cordis duritiam itur.*

Hæc considerans, expende, an cortuum non incipiat indurescere? quā flexibilem te ad bonum experiaris? quem in te fructum faciant Exhortationes, Conciones, & monitiones sanctæ? an illustrationes & gratiæ Divinæ flectant voluntatē tuam? Utrum beneficia Dei moveant te ad ipsum
aman

amandum, & ferventer eidem serviendum. Expende item, si fortè jam aliquam sentis duritiem in corde tuo, ex quo fonte illa promanavit. Tandem reflecte te, quâ viâ, an non viâ à S. Bernardo insinuatâ processeris, ad duritiâ cordis tui, & insensibilitatem in transgrediendis liberè præceptis Divinis.

Fac proposita de duritiâ hac tollendâ, vel certe eâdem impediendâ, ne in te locum aliquando habeat. Recurre tandem ad Christum Crucifixum, ab eo postulans, ut ille cor tuum lapideum, cor adamantinum, pretiosissimo Cordis sui Sangvine emolliat, ab eoque omnem auferat duritiâ.

PUNCTUM III. Audi illam Christi comminationem Pharisæis factam Joan. 8 *In peccato vestro moriemini* Et considera horrendam multorum peccatorum pœnam esse, impœnitentiam finalem. Quod aliqui peccatores, non solum per sua peccata excæcentur, non solum cor illorum obduretur, sed quod tandem finaliter impœniteres in peccato moriantur. Non omne quidem peccatum, nec in omnibus peccatoribus tali pœnâ hoc est impœnitentiâ finali punitur, cuivis tamen peccatori hæc pœna maximè est formidanda. Quod ut melius intelligas.

Confidera ulterius juxta Sanctorum Patrum & Theologorum communem doctrinam & unanimem consensum, fundatum in sacra Scriptura. Unicuique hominum, imò & Angelis, præfixam & constitutam fuisse, & esse certam mensuram & certum numerum peccatorum, quo expleto, ille, qui talem mensuram implevit, facere pœnitentiam negligit, omniaque auxilia, quæ DEUS illi confert ad pœnitendum, abijcit, & inefficaciâ reddit. Interim verò DEUS, vel filium vitæ talis hominis abruptit, vel certè usum rationis ita eripit, ut ipsū nunquam deinde restituat, vel licet restituat, peccator

cator tamen non utitur unquam hac commoditate, ad salutariter poenitendum. Quo fit, ut miser ille peccator, impoenitens in suis peccatis, vel peccato moriatur, æternamque incurrat damnationem.

Et in primis Quod Deus certā mensurā & numerū peccatorum cuiusvis homini præfixerit clarè colligitur ex illis Sapientiæ 11 verbis: *Omnia in mensura, numero, & pondere posuisti*. Certe si Deus omnium animalium in mundo sibi succedentium, omniumque rerum, quæ aliquando existituræ sunt, numerū constituit, si omnes capillos, capitis, si omnes cogitationes & motus voluntatis nostræ in numero habet, consequens est, quod etiam certum numerum ac mensuram peccatorum cuiusvis hominis statuerit, certosque terminos suæ malitiæ præfixerit, quos ille transgressurus non est. Colligitur eadem veritas ex verbis Christi Matth. 33 *Implete mensuram Patrum vestrorum & ex illo Genesis 15. Nondum completæ sunt iniquitates Amorrhæorum.*

Quod verò completā tali mensurā peccatores impoenitentiā finali puniantur, & in peccatis suis moriantur, docet id expressè S. Augustinus de vita Christiana Cap. 3 *Illud sentire nos convenit, tamdiu unumquemq; à patientia DEI sustineri, quamdiu nondum suorum peccatorum terminum finemque compleverit, quo consummato, eum illicò percuti, nec ullam illi veniam jam reservari.* Id ipsum repetit expendens illud Genesis: *Nondum completæ sunt iniquitates Amorrhæorum.* dum ait: *Quo exemplo manifestissime instruimur & docemur. singulos secundum peccatorum suorum plenitudinem consummari, & tamdiu, ut convertantur, sustineri, quamdiu cumulum suorum non habuerint peccatorum consummatum.*

Circa quam mensuram, hæc adhuc duo considera. imò. Mensuram hanc non esse eandem & æqualem omnibus præfixam. Angeli uno tantum patrato

patrato peccato, mensuram sibi præfixam compleverunt. Regi sauli mensura constituta fuit duplex inobedientia, quam utramq; postquam cōmisit, reprobatus est, & á DEO abjectus. Damasco, Tyro, Gazæ, & Edom mensura designata fuerunt 7. Peccata, ut habetur *Amos 1mò* Israelitis in deserto talis fuit præfixa mensura, ut si decies rebellarent contra Dominum, non essent ingressuri terram promissionis, & quia mensuram hanc impleverunt, post decimam rebellionem DEUS prohibuit eos ab ingressu terræ promissionis.

2dò. Quanta determinatè mensura peccatorum sit unicuiq; præfixa, id nemini innotescere. Sicut ultimum Judicij diem voluit DEUS nobis esse occultum, ut timeretur omnis dies, sic DEUS voluit occultam esse mensuram peccatorum pro unoquoq; constitutam, ut quævis mensura, & quodvis peccatum, atqvè si illud ultimum foret, timeretur.

His consideratis, expende diligenter, si timenda tibi est impœnitentia finalis, quam certè maximè timere debes, cū illam infallibiliter consequatur damnatio æterna, timendum tibi quoq; esse, ne impleas mensuram peccatorū tibi præfixam, quia hanc consequitur impœnitentia finalis. Quod si exhorrescis completionem mensuræ, & numeri peccatorum, exhorresce quàm maximè quodvis peccatum mortale, cum ignores an per illud non sis completurus mensuram tibi præfixam. Post tot tantaq; scelera patrata, fortè non multum superest addendum, ut mensuram tuam compleas.

Propone firmissimè vitaturum te, studio quā maximo, quodvis peccatum.

In colloquio petes à Domino DEO tuo, ut non permittat te implere mensuram peccatorum tuorum, sed gratiam tibi talem conferat, quā adjutus, crescas in virtute, perfectione, & sanctitate,

juxta mensuram plenitudinis Christi. Procides etiam ad pedes Christi crucifixi, & obnixè postulabis, ne subjaceas illi ipsius sententiæ: *in peccato vestro moriemini* Sed potius, ut ex thesauro suorum meritorum, det tibi gratiam finalem, in eaq; felicem mortem.

In fine: Anima Christi.

Meditatio VII.

De damnis quæ infert peccatum mortale.

Praludia eadem quæ duarum meditationum præcedentium.

PUNCTUM I. Audi Ezechielem dicentem cap. 18. *Si averterit se justus à justitia sua, & fecerit iniquitatem, omnes justitias quas fecerat, non recordabuntur.* Et considera: inter gravissima damna quæ infert peccatum mortale, etiam hoc esse, quod spoliaret hominem omnibus justitijs quas fecit, & omni merito vitæ æternæ; quod totum id, quidquid meritorum collegit per totam suam vitam in gratia DEI transactam, quidquid laudabile & cælo dignum fecit, id totum per peccatum mortale perderet ita, ut si post peccatum mortale, nullâ pœnitentiâ deletum, quis moreretur, ipsius opera bona & meritoria in gratia DEI aliquando facta, ad nihil ipsi prorsus prædescent, nec ullo præmio præmiarentur.

Et sic, si aliquis instar Dominici loricati in corpus suum annis plurimis atrocissimè sævisset, si jejunijs se attenuasset, vexasset cilicijs, flagris concidisset, catenis aculeatis cruentasset, & postea lethalis criminis reus moreretur, hæc omnia non essent in recordatione apud DEUM. si plures ad Christum gentes

gentes convertisset, quàm Indiarum Apostolus S. FRANCISCUS Xaverius, plura quàm S. Augustinus, vel D. Thomas, in Ecclesiæ emolumentum elucubrasset volumina; plures Thomâ Canthuariensi Archiepiscopo persecutiones & odia ob Ecclesiæ defensionem tulisset; si ex amore DEI, propter fidei confessionem, plura sustinuisset tormenta, quàm Clemens Ancyranus, si in contemptu mundi Alexium, in paupertatis rigore Franciscum Assisinatem, in claustro monachorum Lirinensium sanctitatem, in deserto Anachoretas Thebaidis, in columnis prodigiosos Orientis Stylitas imitatus esset, & post hæc omnia, mortali peccato inquinaretur, & in hac iniquitate moreretur, omnis ille meritorum thesaurus, omnis sanctitas & virtus periret, essetq; in perpetua oblivio ne apud DEUM.

Exclama hîc: ô jacturam, ô infelicitatē, ô miseriam cruentis lacrymis deplorandam! admirare cæcitatem hominum, qui hanc jacturam non agnoscunt nec apprehendunt, quinimò arbitantes per peccatum se plurimum lucrari, post tam funestum detrimentum, audent exultare, sicut exultant victores captâ prædâ, dum dividunt spolia. Detestare odiò insensissimum peccatum, latronem hunc immanissimum, hostem capitalem, qui inhiat omnibus meritis, omnibus virtutibus tuis, qui his omnibus te spoliât, manumq; suam mittit ad omnia desiderabilia tua.

PUNCTUM II: Audi DEUM apud eundem Prophetam dicentem: *Si averterit se Justus, & fecerit iniquitatem, nunquid vivet? non vivet; in prevaricatione sua, qua prevaricatus est, & in peccato suo quod peccavit, in ipsis morietur.* Et cogita: quòd peccatum mortale non solum meritis, virtutibus, omnibusq; bonis operibus, hominem spoliet, sed etiam spoliet eundem ipsâ vitâ, vitamq; ei eripiat. Si spoliaret hominem aliis nonnisi illius bonis, to-

lerabile hoc damnum, reparabilis jactura esset manente vitâ, sed cùm vitâ etiam spoliatur, jactura hæc non est facilè reparabilis. quæ enim consequuntur ad vitam, reparari possunt si vita maneat; si auferantur simul cum vitâ, irreparabilia sunt, quia non est Principium talis jacturæ reparativum.

Spoliatur autem peccatum vitâ, non vitâ corporali, quæ corpus vivit & animatur, scilicet spoliatur gratiâ sanctificante, quæ est vitâ animæ nostræ, per quam DEO vivimus, idq; vivimus participes & consortes naturæ Divinæ, dependenter à qua, exercemus omnes operationes vitæ. Hac vitâ ita nos spoliatur peccatum mortale, ut per illud homo fiat sædissimum cadaver, DEO & Angelis abominabile. Idq; peccatum spoliatur peccatorem vitâ animæ indispensabiliter, ut non sit possibile hominem in peccatum mortale labi, & tamen vivere in anima, spoliatur autem illum hac vitâ in ipso actu peccati mortalis; peccatum enim ita est impossibile cum gratia sanctificante, ut multi opinantur Theologi, sicut tenebræ sunt impossibiles cum luce.

Jacturam hanc utinam sentirent homines. Mors corporis ita est amara, ut vel ipsa memoria ejusdem sit amara. Mors animæ ita non apprehenditur, ut non sit qui recogitet. De juvene à Christo resuscitato in porta civitatis Naim, dicit S. Augustinus. *Illius mors visibilis visibiliter plangebatur, illorum qui in anima quotidie moriuntur mors nec queritur nec videtur.* Compatere cordialissimè omnibus his in anima mortuis. mortem illorum sanguineis desse lacrymis.

Reflecte te deinde num & tu DEO vivas? an non possit tibi dici. *Nomen habes quòd vivas, & mortuus es.* An non sis Lazarus quatrIduanus jam sætens? Si vivis vitâ spiritali, supernaturali, vitâ animæ tuæ, agnosce gratiam, agnosce misericordiam

cordiâ DEI, dicens cum Psalmista: *Secundû miseri- cordiâ tuam vivificasti me.* Time, ne peccatum hanc tibi aliquando vitam eripiat quod si in anima mortuus es, recurre ad fontem vitæ, humili & contrito corde ab Authore vitæ pete vitam, & tribuet tibi. convertere ad Dominum DEUM tuum quem dereliquisti, & ipse conversus vivificabit te. Funde lacrymas deplorans mortem tuam, & Christus moriens spirabit in te spiritum suum, ut ipsi vivas, imò ipse in te vivat.

PUNCTUM III. Audi DEUM per Oseam dicentem cap. 9. *Radix eorum exsiccata est, fructum nequaquam facient.* Et cogita, inter alia mala, quæ causat peccatum mortale, etiam hoc esse, quod omnia bona opera, quæ homo in statu peccati mortalis facit, sint omnino infructuosa, non sunt meritoria, nec unquam à DEO præmianda.

Cujus ratio est. Quia tunc homo non est in gratia DEI, non est in charitate, sed ab illa per peccatum est evacuatus, eandem simul cum gratia sanctificante multisq; alijs habitibus supernaturalibus amittit. Jam autem, quod fit ab homine gratia habituali & charitate destituto, nihil prorsus valet nulliusq; est meriti, ut dicit Apostolus. *Si linguis hominum loquar & Angelorum, charitatem autem non habuero, nihil sum, & si distribuero in cibos pauperum, omnes facultates meas, & si tradidero corpus meum ita ut ardeam, charitatem autem non habeam, nihil mihi prodest.* A gratia sanctificante habetur omnis condignitas & valor operum supernaturalium hominis justî, ratione cujus sunt meritoria vitæ æternæ. Obsequia quæ exhibentur à filio DEI ad- optivo, æstimantur: quæ ponuntur à servo & mancipio peccati, contemnuntur, nullumq; pretium habent. Gratia sanctificans est radix, à qua fructus boni operis suum vigorem, succum, & maturitatem habere debet. Si radix exsiccata fuerit, nullus

fructus haberi potest. Si gratia sanctificans per peccatum est deperdita, nullum opus peccatoris potest esse fructuosum, & vitæ æternæ de condignò meritum, sed sicut peccator mortuus est DEO, ita & omnia opera ejus in peccato facta, mortua sunt.

Et sic, si peccator oret, oratio ipsius non exaudietur, sicut non est exaudita oratio Antiochi, de quo scriptura dicit; *Orabat scelestus DEUM à quo non erat misericordiam consecuturus.* Imò oratio peccatoris est DEO execrabilis, juxta illud Prov. 28: *Qui declinat aures suas ne audiat legem, oratio ejus erit execrabilis.* Sive laudet DEUM peccator, eumq; honoret, quocunq; Religionis vel alterius virtutis actu, laus hæc non est grata & accepta coram DEO, ut dicitur Eccles. 25 *non est speciosa laus in ore peccatoris.* Sive ulterius peccator sacrificia offerat, si ve corpus suum affligat, se ipsum mortificet, Eleemolynas faciat, si ve quæcunq; alia pia opera exerceat, nulla ex ipsis meritoria erunt. Reflecte te, an & quot tua opera bona perdidideris? an etiam omnes tuæ mortificationes, jejunia, abstinentiæ, aliq; actus virtutum & opera misericordiæ in æternitate præmiabuntur? non præmiabuntur certè quæ in statu peccati mortalis egisti.

Deplora jacturam talium operum tuorum. Proponc curaturum te, ut omnia quæcunq; à te bene & laudabiliter agentur, fiant in gratia DEI, ut verò certior esse possis. Statùs gratiæ, præmissa debita conscientiae tuæ discussione, cum vero dolore de peccatis tuis, & firmo proposito de non peccando, accede ad Sacramentum poenitentiae, emunda conscientiam tuam, & restitutam gratiam sanctificantem conservare, imò semper augere stude.

Fac etiam tibi familiarem actum contritionis perfectæ, eumq; sæpius de die, sed præcipuè, dum aggressurus es aliquod opus bonum, aliquam
actio-

actionem, quæ quantum ex se est, postulat esse meritoria, elice, ne tale tibi opus pereat.

In colloquio elice actum contritionis. O bonitas infinita DEUS meus, agnosco & confiteor, per peccata, quibus Majestatem tuam Divinam miser ego & infelix offendi, multa me multa & damna incurrisse, plurimum pœnarum, à te mihi justè infligendarum, reum me existitisse, multa quæ habere potui impedivisse bona. Interim hoc maximè, imò hoc unicè doleo, quòd te DEUM summum & omne bonum meum offenderim, quòd malum coram te, & contra te, qui es summè bonus, omni amore dignus, & summè amabilis, feci. Damno stultitiam & malitiam meam; amore tui, & propter solam tuam amabilissimam bonitatem, cui quodvis peccatum meum repugnat, omnia & singula, ex toto corde detestor; ad omnes pœnas, quas merui, me tuæ Justitiæ Divinæ offero; vindica Domine in scelesto peccatore illatas tibi omnes injurias. Hoc unicum, non propter me, qui omni tua gratia & favore indignissimus sum, nec ullum meum quæro bonum, sed propter temetipsum benignissimè effice, ne te ultra offendam in æternum, quem non offensurum unquam firmissimè statuo.

In fine: O DEUS ego amo te etc.

Meditatio VIII.

De pœnis & damnis ex peccato provenientes.

Preludia eadem quæ meditationum immediate præcedentium.

PUNCTUM I. Audi illa verba Sapientis Prov.

24. *Cogitatio stulti peccatum est.* Et considera effectum

atum peccati etiam hunc esse, quòd hominem reddat stultum & amentem. sis licet versatissimus in omnibus humanis scientijs, sis ingenij perspicacissimi, limatissimi Judicij, prudentiæ non vulgaris; si peccas; per hoc ipsum stultus factus es. sapientissimus fuit Salomon, qui tamen Senex factus, propter suas libidines, ad eam devenit dementiam, ut mens ejus averteretur à DEO. Sapientes fuerunt Ethnici illi Philosophi, de quibus Apostolus ad Rom. 1. *Qui tamen, cum sapientes essent stulti facti sunt, quia cum cognovissent DEUM, non sicut Dominum glorificaverunt, sed evanuerunt in cogitationibus suis.* Epulonem illum Evangelicum sua avaritia nonne stultum reddidit, etiã ipsius sapientiæ Incarnatæ iudicio; *stulte, hac nocte animam tuam à te repetent.* Talem suam stultitiam agnoscunt, & tota æternitate deplorabunt licentiosi illi juvenes apud Sapientem. *Non insensati vitam illorum astimabamus insaniam & finem illorum sine honore etc.* Et iterum: *ergo erravimus.*

Et sanè extrema dementia est, velle DEUM infinitæ majestatis, ejusq; summam & infinitam bonitatem offendere. Grandis stultitia est, si creatura, vermis, pulvis, atomus, bellum inferat Creatori, Enti perfectissimo essentiæ nobilissimæ. Si formica leonem superare velit. Summa stultitia est propter momentaneam voluptatem, privare se veris æternis gaudijs, & voluptatibus, addicere verò æternis pœnis & cruciatibus. Si magna stultitia fuit Esau quòd pro lentis edulio vendiderit suam primogenitam. Major stultitia est uniuscujusq; peccatoris, quòd jus hæreditatis æternæ, vendat pro vili brevis voluptatis dulcedine, quæ gustata mortem ipsi generat æternam.

Hæc considerans, reflecte te supra præterita peccata tua, & recogita an hæc non fuerint verè & propriè tales stultitiæ? confundere quòd ita aliquando

quando desipueris. Trade te plenè & integrè sub institutionem Sapientiæ Incarnatæ, & propone curaturum te, ut in te, existente in schola veritatis æternæ, cogitatio stulti, hoc est peccatum, locum non inveniatur.

PUNCTUM II. Audi verba illa Psalm. 48. *Homo, cum in honore esset, non intellexit, comparatus est jumentis insipientibus, & similis factus est illis.* Et considera, quod peccatum non solum hominem insipientem faciat, sed etiam eundem transformet in bestias, jumenta, & bruta animantia.

Idq; peccatum aliquando homines ita transformavit in bestias, ut exterius Jumenta esse apparerent, speciemq; exteriorem brutorum haberent, ex speciali & extraordinaria pœna & vindicta DEI. Et sic aliquando superbia Nabuchodonosor regem transformavit in bovem, ut habetur Daniel. 4. Luxuria & libido transformavit Tiridatem regem Armeniæ in porcum, ut refert Metaphrastes apud Surium. Alium quempiam Blasphemia transformavit in canem. Hæ tamen transformationes sunt rariores.

Cæterum transformationes internæ, & in anima, frequentiores & quotidianæ sunt: semperq; quodlibet peccatum transformatur hominem in aliquam belluam & brutum, non quidem quoad externam speciem, sed quoad internam animi constitutionem, DEO & Cælitum oculis patentem. Et ita superbia transformatur hominem in leonem aut in pavonem; Ira transformatur in tigrides, ursos, & genimina viperarum; gula transformatur in rapaces & voracissimos lupos; lascivia transformatur in mulos & equos, in porcos & sues in volutabro luti lotas; avaritia transformatur in struthiones non ferrum sed aurum vorantes, in corvos, quæ possunt, rapientes, & asservantes; Invidia transformatur in canes, acedia in testudines hypocrisis in dolo-

fas vulpes. Morum pestilentia, quâ fortè corrup-
pis alios, transformat te in draconem.

Imò peccata non solum faciunt peccatores
similes bestijs, sed etiam peiores ipsdem. Certè pec-
catores sunt ipsis quoad hoc similes, quòd, sicut
bestiæ solo sensu & appetitu sensitivo ducuntur, suas-
què sensuales sequuntur inclinationes, ita & pecca-
tor non ratione, sed sensu, & appetitu, ac inclina-
tionibus sensualibus ducitur & regitur. Simul ta-
men peccatores sunt peiores bestijs.

Imò ex eo, quia belluæ per suas inclinatio-
nes ad sensuality, per suas concupiscentias, non
avertunt se à suo fine, ad quem à suo Creatore
ordinatæ sunt. Homo verò per quodvis pec-
catum avertitur à suo fine.

2dò Quia, ut ait S. Chrysostomus Hom. 3. in
Joân. si aliquæ belluæ sunt crudeles, carnivoræ,
gulosæ, effrænes in suis concupiscentijs, hoc in il-
lis non potest esse vitiosum, cum ratione & liber-
tate destituantur, quâ refrænent suas inclinationes &
concupiscentias. Crudelitas autem, gula, luxuria,
ira, & his similia, in homine semper sunt vitiosa,
quia homini sunt voluntaria, & libera, imò sunt
adinventiones ejusdem. Ex qua ratione etiam E-
thnicus Philosophus Aristoteles putavit homines
brutis peiores 1. Politic. cap. 2. Dum dicit: *Ho-
mo separatus à lege & iustitiâ, est pessimum omnium
animalium, quia habet arma rationis ad explendas
concupiscentias & savitias, quæ non habent alia ani-
malia.*

3 sò Quia belluæ habent à natura sua præ-
fixos terminos suorum appetituum, quos non trans-
grediuntur. Et sic nulla bellua etiam voracissi-
ma plus cibi sumit quàm indigeat, nullæ vel ra-
rissimæ, quæ prolem suam interficiant & tollant,
nulla quæ seipsam enecet. E contra nulli sunt ter-
mini

mini concupiscentiæ, & licentiæ in homine, quos idem peccando non transgrediatur.

4to Tandem, quia inclinationes pravæ variorum animantium etiam si illis sint naturales & in fundo essentiæ illorum radicatæ & infixæ, tamen hæ inclinationes curatione, pœnisq; vel beneficijs, in pluribus animalibus corriguntur. Homo autem ratione præditus, sub potestate, & dominio habens suos appetitus & inclinationes, nullis beneficijs à DEO acceptis, aut pœnis sibi inflicis corrigitur, & à peccando revocari potest.

His consideratis, reflecte te supra teipsum, & fode parietem domus tuæ, atq; ingredere interiora hujus domus, scilicet animæ tuæ & vide abominationes pessimas quas fecisti. Et ecce similitudo reptilium, animalium, & universa abominatio. Reflecte te an fastus tuus, & superbia non te transformavit in leonem, aut certè in ipsum dæmonem propter superbiam de cælo præcipitatum? An propter iracundiam tuam, non sis sævus ursus, tigris, aut vipera morsu suo lethaliter vulnerans? an voracitate & ingluviè lupum non referas? an per incontinentiam non sis factus sicut equus & mulus, aut tanquam sus in volutabro luti? Reflecte te an avaritia in corvum, invidia in canem; acedia & tepiditas non transformaverit te in testudinem, an non sis vulpes dolosa ob hypocrisim & fraudes atq; in sincerum agendi modum tuum. An non sis draco pestilens alios pestilentibus tuis moribus vel colloqijs corrumpens & inficiens.

Erubescere tantas abominationes, confundere brutis te pejorem existisse propter aversiones tuas ab ultimo finè tuo, propter abusum rationis, tuæquè libertatis. quòd tua ratio non frænaverit concupiscentias & inclinationes tuas ad malum, sed etiam arma tibi ministraverit ad easdem explendas. Confundere quòd tuus appetitus sensua-

lis, tuæ passiones, licentiæ, sensualitates nullis terminis contineri potuerint, non terminis honestatis, non timoris DEI, non amore virtutis, non legibus, & præceptis Divinis ac humanis, non sanctis aliorum exemplis, sed potius quod omnes hos terminos toties sis transgressus. Confundere tandem, quod cicurari, & ad nutum DEI reformari non potueris tot & tantis DEI beneficijs copiosè in te profusis, tot & tantis poenis, quibus DEUS à sua offensa conatur te detertere. Fac proposita, omnibus vitijs, quæ in te deprehendes, contraria. Ad extremum postula gratiam, quâ adjutus, omnes in anima tua abominationes atq; similitudines reptilium & animalium, corde tuo ejicias & tollas, illiq; altè imprimas, ac in eo efformes imaginem Christi Crucifixi, per crucifixionem carnis tuæ cum suis concupiscentijs, & perfectam imitationē & expressionem Christi Crucifixi in vita & moribus tuis.

PUNCTUM III. Audi illa verba S. Petri dicentis 2. Petri 2do. *A quo quis superatus est, ejus servus est.* Verba item Eliæ Prophetæ ad Achab. 2. Reg. 21. *Venundatus es, ut faceres malum in conspectu Domini.* Et considera hominem etiam hoc malum incurrere per peccatū, quod fit dæmonis, & peccati servus ac mancipium.

Servus imprimis & mancipium dæmonis est peccator ex eo. Quia per peccatum homo vincitur, debellatur, & superatur à dæmone, porro jure gentium, Victus, seu ille qui in bello superatur, est servus victoris. Resistis tentationi? vincis suggestiones dæmonis? vincis & superas dæmonē, ducis in triumpho victum draconem infernalem, estq; tunc dæmon servus tuus, & mancipiū. Consentis ei? liberè ejus tentationi cedis peccatum committis: à dæmone superatus es, ille te expugnavit & vicit, suoquē subjecit jugo, adeoq; factus es servus & mancipi-

um dæmonis. Servus insuper dæmonis peccator est, quia in servum eidem est venundatus. *Unus quisq; enim* (ut ait S. Augustinus) *animam suam Diabolo vendit, accepto tanquam pretio, dulcedine temporalis voluptatis*, qui secundus modus est incurrendæ servitutis. Non existimandum est, quòd dæmon gratis nobis offerat vetitas voluptates. Quisquè peccator hunc tacitum contractum, hoc illicitum pactum quasi universale inicit cum dæmone. Da mihi illam voluptatem, fas mihi sit indulgere sensualitati, vanitati, &c. Fruar hac oblectatione, & ego dabo tibi animam meam, tuum ero mancipium. adeoq; hoc cotractu posito, peccator si peccat, si potiatur voluptate prohibita, si contra legē indulgeat sensualitati &c. Fit servus & mancipium Diaboli.

Idem peccator, peccando fit etiam servus peccati, juxta effatum æternæ veritatis; *Qui facit peccatum, servus est peccati*. Quod si plura committat vitia, non unius tantum domini, sed multorum servus est, ut monet S. Ambrosius. *Qui pluribus subjectus est vitijs, multis se Dominis addixit*.

Servitus hæc dæmonis & peccati gravissima debet esse cuivis peccatori. 1^{mo} Ex eo quia homini libero, in libertatem vocato, quævis servitus gravissima esse debet; homo verò ante peccatum est liber, & in libertatem Filiorum DEI vocatus. 2^{do} Quia peccator hanc servitutem patitur apud insensissimum suum hostem, talis enim peccatoris hostis est Dæmon & peccatum. 3^{io} Ex eo, quia Dæmon & peccatum crudelissimè tractant hoc suum mancipium scilicet peccatorem; tenent ipsum vinctum gravissimis compedibus, vinctum non ferro sed ferrea voluntate, vinctum consuetudine peccandi, gravissimisq; tentationibus. Continud miser peccator, propter importunitatem suggestionum, & vehementiam tentationum, exequitur vo-
luntatem

luntatem hujus Tyranni. 4^{to} Tandem ex eo hæc servitus gravissima est, quia dæmon & peccatum peccatorem trahunt & præcipitant in ipsius perniciem, atq; perpetua in inferno tormenta, absq; ulla spe redemptionis & liberationis ex illa æterna servitute.

His consideratis, fac reflexiones supra te ipsum, quoties & tu jago servitutis hujus collum tuum submitisti! quoties victus & superatus es à dæmone & peccato? quàm frequenter animam tuam dæmoni vendideris pro vili pretio? quot illicitos contractus cum dæmone feceris! si etiam nunc sentis te in hac servitute esse, ingemisce & excute gravissimum hoc jugum. Prælige jugum Christi suave, prælige libertatem filiorum DEI, noveris te à Christo emptum esse pretio magno, statue in posterum Christo te famulaturum, ipsiusq; servum & mancipium fore.

In colloquio, pete à Christo, ut merito Passionis suæ à servitute dæmonis & peccati te liberet, dicatq; tibi: *servus meus es tu, in te gloriabor.* pete etiam à pretiosissima DEI Parente, ut & illa te à potestate dæmonis & peccati creptum, in servum suum & mancipium recipiat, nec permittat amplius venire in servitutem Diaboli.

In fine: *Pater noster. Ave MARIA.*

Meditatio IX. De pœnis peccati.

Praludia Eadem quæ præcedentium meditationum.

PUNCTUM I. Audi sapientem Proverb. 14. *Justitia elevat gentem. Miseros autem populos facit peccatum.* Et Psal. 13. *Multa flagella peccatoris.* Et

CON-

confidera, quòd peccatum faciat peccatorem etiam corporaliter miserum. Eundemq; subijciat etiam in hac vita plurimis flagellis. DEUS enim ulciscendo suam offensam, etiam hîc plerumq; punit temporaliter & flagellat peccatores, Idq; non illos tantum ipsos flagellat qui peccârunt, sed propter unius quandoq; Personæ peccata, flagellat tota Regnâ, totas Provincias, totas communitates. Ita propter peccatum Pharaonis, DEUS flagellavit totam Ægyptum, propter peccatum David, totum Regnum Domûs Jacob. Propter peccatum Achan, punivit totum exercitum Isràêliticum.

Flagella hæc aliquando sunt damna in bonis fortunæ, aliquando damna in bonis famæ, aliquando damna in bonis vitæ vel corporis.

Flagella in bonis fortunæ sunt: egestas & fames, quam egestatem DEUS permittit vel per bella & vastationes factas ab hostibus & militibus, vel per exundationes & eluviones, vel per furta & latrocinia, per maleficia, sterilitates, murium, locustarum grassationes, aliaq; his similia. Flagella in bonis famæ & honoris sunt: contemptus, vilipensiones, humiliationes, infamiæ, famosi libelli, aliaq; hujusmodi. Flagella in bonis vitæ & corporis sunt mortes, morbi varij acuti, molesti, diuturni, sunt pestilentia, vulnera, mutilationes &c.

Hæc omnia flagella DEUS permittit in pœnam peccati. Permittit egestatem & famem secundum illud Deuteronomii. 28. *Si audire nolueris vocem Domini DEI tui, mittet DEUS super te famem & esuriem, & percutiet te Dominus egestate.* Permittit etiam contemptum, vilipensionem & similia, juxta illud 1. Reg. 2. *Quicumq; honorificaverit me, glorificabo eum, qui autem contemnent me, erunt ignobiles.* Et iterum Deuter. Eodem cap. 28. *Si audire nolueris vocem Domini DEI tui, eris perditus, in proverbium & fabulam omnibus populis, omni-*

iniqui; tempore calumniam sustinens. Permittit denique; DEUS, in pœnam peccatorum, morbos, pestilentias, mortes, juxta maledictiones & imprecationes positas in citato capite Deuteronomij. Percutiat te Dominus febris & frigore, ardore & aestu & aëre corrupto ac rubigine. Tradat te Dominus corrumpentem ante hostes tuos, percutiat te Dominus ulcere Ægypti, ulcere pessimo, sanariq; non possis à planta pedis ad verticem capitis.

His consideratis, reflecte te, an aliqua ex his flagellis Christianitas, & Ecclesia, totum Regnum, Palatinatus, cōmunitas in qua vivis, universa familia & domus non patiatur propter peccata tua? An belli contra Christianitatem, belli in Regno tuo & Patria, vastationis urbium, oppidorum, pagorum, per incursiones hostium, militum licentias, non sint causa peccata tua? An vilipensiones, contemptus, humiliationes sive tui sive aliorū, non permittantur in pœnam culparum tuarum! An hæc non provocaverint iram DEI, ut per pestilentiam tanta hominum fieret strages, ut etiam nunc pecora peste absumantur. Alias præterea pœnas & flagella DEI expavesce.

Humilia te sub potenti manu DEI, confitereicens: *Quaecunq; fecisti Domine, in recto judicio fecisti, quia peccavimus tibi.* Offer te ad omnia flagella Justitiæ Divinæ, postulans humiliter, ut hæc DEUS avertat à tota Christianitate, Regno Poloniæ, Palatinatibus tuis, communitate in qua vivis &c. sed ut tu ipse totam pœnam, quam peccatis tuis meruisti, sustineas.

PUNCTUM II. Audi Ecclesiasten dicentem cap. 7. *Ne impie agas multum, ne moriaris in tempore non tuo.* Job item cap. 15. dicentem: *Impius, antequam dies ejus impleantur, peribit.* Et iterum cap. 22. *Viri iniqui sublati sunt ante tempus suum.* Et considera etiam per hoc puniri peccata, quod

quod anni & dies impiorum breventur, quod peccator moriatur ante tempus illud, quod DEUS constituerat & præfixerat, si peccatis suis non accelerasset mortem.

Mors infidet quidem equo pallido & macilentio, ut vidit S. Joannes in sua Apocalypsi; cæterum concitato veniet passu, si stimuli & calcaria admoveantur. Porro stimulus mortis peccatum est. Hôc admotô stimulo insecuta & affecuta est Absalonem & in quercu suspendit, eodém stimulo ad ditô, affecuta est Athanasium Orientis Imperatorem, celeri passu per palatium fugientem, cum aliquot ante mortem diebus apparuisset ei in somno persona terribilis calamû dextrâ, librum sinistrâ præferens ac dicens: En ob perversitatem fidei tuæ, quatuordecim tibi vitæ annos deleo.

Hôc stimulo & calcari adhibito assequitur & præmaturè rapit, omnibus sæculis, tot juvenes, in vitia & omnem licentiam effusos, ut moriantur in tempore non suo. Idq; rapit illos, in tempore non suo, hoc est antequam perveniant ad annos quos victuri erant, si vitam Christianè, & juxta præceptorum DEI præscriptum instituissent, rapit illos in tempore non suo, hoc est, dum minimè sunt ad mortem præparati. In tempore non suo, hoc est in ipsis vitijs, in tempore non bene collocato, imò in tempore miserè perduto, dum nihil computant temporis sui, DEI ac suæ salutis curæ impensî.

Hæc considerans fac reflexionem supra teipsum, & cogita, quid etiam DEUS de te statuerit, post tua prævisa crimina, post tot tam liberas legum Divinarû & humanarum transgressionem? An non illud constituerit, ut moriaris in tempore non tuo? Paratus DEUS fuerat longum tempus vitæ tuæ præfigere, Si Christum ut Patrem, Ecclesiam ut Matrem, accurata præceptorum & consiliorum

ab ipsis datorum observatione honorâsses. si in honorem Matris DEI Beatissimæ, & ex amore ipsius à pluribus delictis abstinuisses: item S. Angelo Custodi, tanquam Patri Tuo reverentiam in gravioribus offensis Divinis illo præsentē vitandis exhibuisses, juxta illam promissionem Divinam *Honora Patrem tuum & Matrem tuam, ut sis longævus super terram.* Paratus fuerat DEUS vitam tibi adjicere, casu quo continens esses, corpusq; tuum diversis mortificationibus, abstinentijs & jeunijs castigares. Prorogasset vitam tuam & annos tuos multiplicasset, si tu fidē tuam in tot Confessionibus per varia proposita, promissiones ac etiam forte per aliqua vota vel Juraamenta ei obligatā, integrā & illæsā servasses. Sed quia prævidit te, in Christum, Pretiosissimam DEI Parentem, S. Angelum Custodem, & Ecclesiam, impium, immorigerum, & degenerem futurum filium, ex quo prævidit fore te gulosum, sensualem, incontinentem, immortificatum, corpori tuo nimium indulgentem, illudq; in escam vermium saginantem: ex quo prævidit te legum suarum, propositorum, promissionum. & votorum tuorum sacrilegum transgressorem, & violatorem: format DEUS decretum ut moriaris in tempore non tuo, pluresq; annos vitæ tuæ delet. Et forte decernit DEUS, ut rapiaris in tempore non tuo, hoc est, non præmissā ullā dispositione & præparatione ad mortem, non bene collocato transactæ vitæ tuæ tempore, imo etiam ultimo vitæ & mortis tuæ tempore simul cum anima tua infelicitè perduto.

Exhorresce justā hanc in te ultionem DEI. mortem tuam semper præ oculis habe, ne moriaris in tempore non tuo. Honora DEUM Patrem tuum, honora Christum, Ecclesiam Matrem accuratā legum suarum observatione, honora Matrem Beatissimam S. Angelum Custodem, ut sis longævus
super

super terram. sis abstinens, mortificatus, & adijciet vitam. Serva in omnibus fidem semel DEO datam, & anni vitæ tuæ non delebuntur. Supplica supremo vitæ & necis Arbitro ut moriaris in tempore tuo, hoc est, quod in felici æternitate pro tuo haberi & computari possit.

PUNCTUM III. Audi S. Joannem in sua Apocalypsi cap. 21. dicentem: *Pars illorum* (idest, peccatorum) *erit in stagno ardenti, igne & sulphure, quod est mors secunda.* Et considera post omnes peccatoris pœnas hanc supremam & totâ æternitate luendam esse, quod pars peccatoris futura sit in stagno ardenti. Seu ultima peccatoris pœna est infernus, ejusq; tormenta & mors secunda. Circa gravitatem & atrocitatem pœnarum inferni habetur meditatio de inferno. Nunc circa mortem secundâ, quæ prædicitur esse futura pœna peccatorû.

Considera 1^{mo} Quid sit mors secunda? Per mortem secundâ non intelligitur mors secunda corporis, cum enim hominibus statutum sit semel mori, etiam peccatores non moriuntur duplici morte corporis, adeoq; non moriuntur morte corporis, secundâ, intelligitur potius mors secunda animæ, sicut enim animæ duplex est vita, una, per quam anima, dum adhuc conjuncta est corpori, vivit DEO per gratiam sanctificantem, altera vitâ, quâ anima soluta corpore, vivit DEO in gloria & felicitate cælesti per visionem DEI & amorem ejus fructivum, ita duplex est mors animæ, una quæ privat animam vitâ illâ, quâ, dum est in corpore, vivit DEO, per gratiam sanctificantem. Altera mors animæ est, quæ privat animam vitâ, quam haberet in gloria & felicitate cælesti, & quâ viveret DEO per visionem ipsius & amorem fructivum: mors siquidem nihil aliud est, nisi privatio vitæ. Hæc ergo mors altera animæ, est & dicitur mors secunda, quia illam priorē consequi-

tur, nec mors hæc dari potest, nisi illa mors animæ, ex vi cuius anima, non vivit DEO per gratiam, præcesserit.

Eadem mors, quæ post mortem corporis peccatores & damnati, DEO moriuntur, est mors æterna, qui enim tali morte moriuntur, per totam æternitatem non sunt unquam victuri, non sicut illi, qui moriuntur in anima per privationem gratiæ, in pœnam peccati mortalis, inductam. Hi enim ita moriuntur, ut adhuc vivere possint & frequenter vivant, si stante vitâ corporis, ad misericordiam DEI confugiunt, pro suisq; peccatis, pœnitentiam, qualis ad salutem est necessaria, agunt. Hanc mortem secundam dicit S. Joannes fore partem peccatoris in stagno ardente, quia cum supplicijs æternis ignis infernalis, mors illa secunda est conjungenda, nec ab illis unquam dividenda. Damnati ad mortem secundam illi ipsi erunt, qui damnabuntur ad rogam infernalē, seu ad ignem æternum.

Considera 2da Quodd licet peccator per quodvis peccatum mortale mortem primam, quæ consistit in privatione gratiæ sanctificantis incurrat, talisq; morte post quodvis peccatum mortale immediate moriatur; tamen non post quodvis peccatum moritur morte secundâ, hæc enim mors non necat animas nisi corpore solutas, seu post mortem corporis, cum ergo peccator post peccatum non moriatur statim morte corporis, sed frequenter, à longanimitate Divina sustineatur, ut resipiscat & pœnitentiam agat, anima peccatoris non moritur morte secunda statim post peccatum, potestq; hanc mortem evitare, si ad DEUM convertatur, eiq; per pœnitentiam reconcilietur.

Considera 3ia Quodd mors secunda quamvis non infligatur statim post peccatum peccatori, sicut infligitur mors prima, tamen mortis ejusdem reatus

reatus, non minùs atq; reatus inferni & damnationis æternæ, per quodvis peccatum mortale, in curritur, & cuius tali peccato ac etiam privationi gratiæ, quam peccatum demeritoriè causat & infert, est dispenfabiliter annexus, ita ut peccator per hoc ipsum, quod DEUM graviter offenderit, jam sit reus mortis secundæ & æternæ, jam sit damnatus ad talem mortem, habeatq; contra se laram mortis ejusdem sententiam.

Confidera 4to. Et recogita quantum reatus hujus apprehensio peccatorem quemvis deberet percellere? si quis propter sua crimina ad mortem corporalem damnatus, in carcere detineretur, ad tempus pro executione sententiæ destinatum, quantis ille lacrymis infelicitatem deploraret, quantis tristitiæ fluctibus absorberetur, nullaq; humana admitteret solatia, quoscunq; ad se accedentes, mortis nuntios esse existimaret, aut certè eos, qui ipsum ad locum supplicij deducerent. Si modus aliquis & spes affulgeret suæ liberationis, quantâ solitudine & studiò modum illum ariperet, adhiberet media, epem & gratiam aliorum posceret, nihilq; non ageret, ut mortis suæ mutaretur sententia, illeq; mortem effugeret.

Peccator post quodvis peccatum mortale, quàmvis adhuc in corpore vivit, detinetur corporis sui carcere, damnatus ad mortem æternam, educendus aliquando ex hoc carcere ad audiendam talis mortis sententiam, & hac morte tota æternitate plectendus.

Et sentitne tantum malum suum? minimè. Dolendum sanè quod pleriq; peccatores non agnoscant hanc miseriam & infelicitatem, gaudent in tantis suis malis, & exultant in rebus pessimis. ludunt, & ducunt in bonis dies suos, immemores, quod sint brevè educendi è carcere, & coram DEI Judicis tribunali statuendi, ad audiendam suæ damnationis sententiam, quodve

in puncto ad inferna sint descensuri.

O utinam recogitarent ! utinam sibi providerent, & dum adhuc possunt placare Judicem, quamdiu possunt à mortis absolvi sententia, modos & media artiperent, illis uterentur ad evadendam mortem & supplicia æterna!

His consideratis tecum ipse dispice, & tuam consule conscientiam, an in pœnam peccatorum tuorum, non debeatur tibi pars in stagno ardente, an non sis reus mortis secundæ, mortis æternæ? reatum hunc mortis, quantum & quo fructu apprehendas? an ejus apprehensione deterearis à peccato? an movearis ad deploranda commissa peccata? quantum sollicitus es, ut DEUM Judicem, placatum & propitium tibi reddas? omnino stude, maturè causam hanc componere, quia nescis, quâ horâ ad Divinum rapiendus es Judicium. Novit Dominus mutare sententiam, si tu mutaveris vitam tuam. Age seriam pœnitentiam, peccata tua desle, vitamq; in melius mutare stude.

Colloquium institui potest per sequentem affectum. Benignissime DEUS, agnosco bonitatem & longanimitatem tuam, quâ me sustines misericordissimè, mortis æternæ reum, & expectas, ut supplex pro obtinenda venia ad te revertar. Fateor nolle te mortem meam, sed magis ut ad te fontem vitæ recurram & vivam. En ad te in toto corde meo quod in lacrymas solvi & colliquescere vellem, redeo, & ex toto corde detestor omnia & singula peccata mea, propter tuam immensam bonitatem. Non mea terrent me pericula, sed tua bonitas attrahit, ut detester peccata mea, ut te amplius non offendam. Nolo Domine, nolo unquam te offendere, tuâ potenti gratia, inconstantem me & ad omne malum proclivem adjuva & effice, ut te non offendam unquam in æternum.

In fine: suscipe Domine.

Me

Meditatio I.

De purgatorio.

Praludium I. Imaginare fornacem ardentissimam taliter vel magis succensam, atq; fuit succensa fornax Babilonica, ex qua flamma erumpebat cubitis quadraginta novem. Imaginare item in hanc fornacem mitti animas leviorum culparum & poenae temporalis exsolvendae reas.

Praludium II. Postula à DEO, ut atrocitatem poenarum purgatorij, intimè agnoscas, illarumq; fructuosa consideratione movearis, sive ad evitandas easdem poenas, sive ad juvandas animas, quae in his poenis detinentur.

PUNCTUM I. Audi illa verba Malachiae. 3. *Purgabit filios Levi, & colabit eos quasi aurum & argentum.* Quae ipsa intellige de illis animabus, quae flammis purgatorij expiantur.

Et considera 1^{mo} Animas purgatorij non incongruè intelligi per filios Levi. Hæ sanctae animae constitutae & destinatae sunt ad ministerium Tabernaculi testimonij: unde etiam inter flammis ardenti suspirant desiderio cum Regio Vate, *Quam dilecta Tabernacula tua Domine, concupiscit & deficit anima mea in atria Domini.* Illae præparantur, ut intrent Sancta Sanctorum, ut compareant & ministrant coram Domino & in templo sancto ejus, ut offerant sacrificia Justitiae, sacrificia cordis contriti & humiliati, manipulos primitiarum seu bonorum suorum operum & meritorum, ut offerant victimas & holocausta ex immolata DEO sua voluntate, ex immolatis terrenis affectibus, inclinationibus, passionibus, amore proprio, & seipsis.

Considera 2^{do} Easdem animas etiam cum auro & argento comparari, & per hæc significari posse.

posse. Aurum sunt & argentum animæ, quæ in flammis purgantur: quia mors per quam à corpore divisæ sunt, pretiosa existit in conspectu Domini. Aurum sunt, propter auream suam charitatem, quæ cum viverent in terris, corruscabant, & in qua ad mortem permanserunt. Sunt argentum propter candorem & nitorem conscientiæ, à culpis lethali- bus liberæ. sunt aurum & argentum destinata ad ædificium cælestis Hierusalem, quæ ædificatur ut civitas, estq; tota aurum mundum. Sunt tandem aurum & argentum, ex quibus efformantur electio- nis vasa præstantissima, in cælesti mensa appo- nenda, & ori Divino admovenda.

Confidera 3^o. Quòd DEUS animas homi- num in gratia ejus decedentium ex hac vita, levi- um tamen culparum & pœnæ temporalis exsolven- dæ reas, purgatus sit tanquam aurum & argen- tum. Aurum & argentum non purgantur perfecte nisi dissolvantur & colentur, porro non dissolvun- tur nisi igne validissimo: Pariter & sanctæ purgato- rij animæ, purgabuntur igne vehementissimo & ardentibus flammis, DEUS colabit filios Levi tan- quam aurum & argentum. Purgationem hanc describit DEUS per Ezechielem cap. 2. *Congrega- bo vos congregatione argenti, aris etc. In medio for- nacis & succendam in ea ignem ad conflandum.* Quare imaginare à Justitia Divina succensam for- nacem talibus flammis, quæ vim habeant ad con- flanda metalla, in hanc ergo fornacem taliter suc- censam congregabuntur purgandæ animæ, congre- gatione argenti, ut conflentur, purgentur, & depu- rentur. Non ita argentum dum liquatur, ignescit, & totum in ignem quodammodo transmutatur, quomodo sanctæ illæ animæ, vehementiâ ignis purgatorij ignescunt, ac totæ ab illo igne penetra- buntur. O quàm miseranda hæc fors ipsarum!

PUNCTUM II. Ex occasione eorundem ver- borum

horum Malachiae Prophetæ considera 4^{to}. Quid in hoc auro & argento, hoc est in sanctis purgatorii animabus, flammis, succensæ illius fornacis purgabitur? purgabitur & hac ipsa purgatione depelletur rubigo, excoquetur scoria, separabitur pretiosum à vili. Aurum & argentum separabitur à metallis vilioribus & terrenis, ab ære, ferro, stanno, plumbo, & similibus, auferetur quidquid vitiosum & tædum est, & aliquam inspergit maculam: hoc est, opera charitatis & actus virtutum excellentium & heroicarum, depurabuntur à scorijs & rubigine imperfectionum, separabuntur, à defectibus vanitatis, tepiditatis, à mundano pulvere, quò religiosa etiam corda subinde sordescunt. Omnia hæc excoquentur. Culpæ etiam aliæ veniales, in vita non expiatae, tunc expiabuntur. Reatus item pœnæ temporalis manens post sublatas culpas lethales non exsolutus plenè in vita, in pœnis illis atrocissimis exsolvetur.

Considera 5^{to}. quousq; purgabuntur sanctæ illæ animæ? In tantis illis miserijs, hæc futura est ipsarum felicitas, quòd pœnæ illæ quantumvis atroces, non sint futuræ perpetuæ & æternæ. Sed quarumdam animarum, protrahentur ad diem supremi Iudicij, ultra quem nullius animæ, pœna purgatorii producet; aliarum purgatio citius expeditur. Uniuscujusq; verò tandiu pœnæ & purgatio sunt duraturæ, quousq; aurum illud & argentum, hoc est anima, plenè & perfectè non depurabitur, quousq; non auferetur tota rubigo, quâdiu non excoquetur ad purâ scoria, quâdiu ab illo auro & argento non separabitur omne æs, ferrum, stannum, plumbum, & quidquid vile, terrenum, & maculosum est, ita ut non maneat nisi aurum præstantissimum, aurum pellucidum & sine macula, aurum totum mundum, tanquam vitrum mundum, hoc est, eousq; durabunt pœnæ illæ unicuiq; debita.

debitæ, quousq; non expiabuntur omnes culpæ veniales, quousq; non tolletur totus reatus pœnæ temporalis.

Confidera 6^{to}. Pœnas illas, quemadmodum quoad durationem, ita & quoad intensiōem & gravitatem suam, non futuras æquales, comparatè ad ònes animas: sicut auri & argenti cuiusq; purgatio non æquali igne nec æquali tempore absoluitur. Maiore igne & tempore opus est ad excoquendam multam scoriā, & nimiam rubiginem, ad separanda item diversa metalla æris, ferri stanni, plumbi, atq; ad hæc ipsa absumenda, quā opus sit ad depellendas leviores maculas & sceditates. Pariter & animarum sanctarum purgatio, non æqualibus pœnis, nec æquali tempore absolvetur, maioribus & gravioribus pœnis, ac longiori tempore purgari debebunt animæ, quæ plurimum & graviorum culparum invenientur reæ, & quæ maiora habebunt exsolvenda debita. Minoribus & brevioribus pœnis purgabuntur, quæ ad minus exsolvendum tenebuntur. Unicuiq; illud dicetur: *Non exibis hinc, donec solveris ad novissimum quadrantes,*

PUNCTUM III. Ad teipsum mentem converte & cogita atq; in bonitate DEI confide, quod & tu sis de filiis Levi, spectes ad populum electum, quod sis assumendus, ut in Cælesti templo & tabernaculo ministres coram Domino. Existima quod per gratiam Divinam, sis aurum & argentum, quatenus (ut fortè potes opinari) manes in charitate & gratia DEI sanctificante, quatenus nullius peccati mortalis, quod ritè non expiaveris, es tibi conscius. Confide in Misericordia DEI, quod non sis damnandus ad pœnas inferni & ignem æternum.

Si tamen auro huic & argento admista sunt æs, ferrum, stannum, plumbum, scoria, rubigo, pul-
veres

veres, sceditates, pluresq; maculae, purganda haec omnino erunt. Purgaberis tanquam aurum & argentum, proiiceris in fornacem, in qua DEUS ejusq; Justitia succendet ignem ad conflandum aurum & argentum, scias atroces tibi poenas in purgatorio sustinendas esse. Aurum & argentum non infertur in caelestes thesauros, nisi plenè mundum & depuratum! nihil enim coinquinatum intrabit in Regnum Caelorum.

Tales tibi sustinendae erunt poenae in purgatorio, nisi hic aurum tuum, hoc est conscientiam & animam tuam ab omnibus maculis & immunditijs mundaveris, nisi poenas, quas in altera vita exsoluturus esses, hic potius exsolveris, per sacrificia, elemosynas, mortificationes, Jejunia, usum sacramentorum, usum indulgentiarum, per opera misericordiae, charitatis, aliarumq; virtutum actus.

Si sapiens es, exillima in hac vita potius satisfaciendum tibi esse Justitiae Divinae, hic satius exsolvendas poenas. Facile hic DEUM placare potes, parvo hic contentus erit, parum licet de tuo contuleris, si ex vulneribus Domini tui JESU Christi usurpaveris, quod tibi deest, totum exsolves quod debes. Tempus vitae praesentis est tempus illud, quo miseretur Deus, humiliter ergo ad ejus misericordiam recurras, & si quod dare potes, conferas in exsolutionem tui debiti, remittet tibi universum debitum tuum.

Age ergo quod potes. Post mortem quando mitteris in illum purgatorij carcerem, rigidissimè à te exigetur omne debitum & minimus ac novissimus quicunq; quadrans. Non poteris tunc in exsolutionem dare de tuo, non poteris quidquam mereri. Merita etiam & satisfactionem Christi non poteris tibi usurpare, ad exsolvenda tua debita, frustra quoq; ad misericordiam Divinam recurras quia transibit tempus miserendi. Unicum re-

stabit, ut luas pœnas, & harum satisfatione ex solvas debita tua. Eligè proinde quod tuo bono consultius est, decerne & statue in hac vita exsolviturum te tua debita & non in altera. Constitue, quid pro expiandis peccatis tuis nunc agere debeas.

In Colloquio supplica humilimè misericordiæ Divinæ ut in exsolutionem delictorum tuorum acceptare velit pretium Sanguinis Unigeniti Filij DEI Domini nostri, tuamq; pœnitentiam & modica opera tua bona in gratia Divina & ex gratiæ ejusdem auxilio facta, nec post mortem tuam exigat aliam exsolutionem in purgatorii flammis.

In fine: Pater noster.

Meditatio II. De purgatorio

Preludia eadem, quæ meditationis præcedentis.

PUNCTUM I. Audi illa verba 2. Machab. 11. *Sancta & salubris cogitatio est pro defunctis exorare, ut à peccatis solvantur.* Circa quæ.

Confidera 1^{mo}. Defunctos, qui in Domino moriuntur hoc est, qui in gratia DEI ex hac vita decedunt, communiter manere ligatos, ligatos inquam culpis levioribus, quas in vita non expiarunt, & obligatione luendi temporales pœnas.

Quemadmodum Lazarus in morte sua ligatus fuit insitis; ita & animæ iustorum dum per mortem educuntur è corpore, ligantur & constringuntur vinculis, quibus se in vita implicarunt. Hisq; vinculis hoc est peccatis suis vinctæ & ligatæ mittuntur in fornacem purgatorii, sicut jussu Regis in fornacem Babilonicam missi fuerant ligati tres pueri Hebræi.

Confidera 2^{do}. Solutionem vinculorum qui-

bus animæ purgatorii vinciuntur duplici modo fieri posse, vel per pœnas ipsas, earumq; perpeffionem, quam satisfaffionem vocant ita ut ad solutionem à vinculis animæ cuiuspiam opus sit ut ipsa purgatorii flamma, vincula, & funes peccatorum absumat & exurat, quibus absumptis tunc primum anima soluta, est expedita, ut in cælum feliciter evolet. Alter modus, quo vincula animarum sanctarum solvi possunt, est per satisfaffionem. Nimirum si Filio DEI similis, descendat in fornacem; disrumpat illa ipsa vincula, faciatq; medium fornacis tanquam ventum roris flantem, & solutas animas educat ex fornace. Hoc est si à quopiam exhibeatur obsequium æquivalens pœnis, ad quas luendas tenetur anima. Tale enim obsequium vim habet disrumpendi vincula, & solvendi à peccatis, ita ut amplius Iustitia Divina pœnas, per quas solvatur anima, exigere non possit.

PUNCTUM II. Circa eadem verba 2. Machab. considera 3^{id}. quod animæ purgatorii non possint se ipsas solvere à peccatis, nisi luendo pœnas, & per satisfaffionem, quæ gravissima ipsis & molestissima est. Per satisfaffionem verò nullatenus possunt se ab his vinculis liberare, sunt enim ligatæ & vinctæ, sunt viribus omnibus destitutæ, non habent talia gratiæ Divinæ auxilia, ut quidquam salutariter & meritoriè agere possint, per quod sibi indulgentiam & pœnarum remissionem promereantur. Quodsi aliquid operantur bene, & laudabiliter, id non cedit in ipsarum commodum, ita ut per hoc pro suis peccatis & pœnis satisfacciant: siquidem sunt extra statum viæ & meriti. Quare ut per satisfaffionem, à peccatis & pœnis solvantur, satisfaffio pro ipsis, ab alijs poni debet. Quod officij relictum est potissimum hominibus in hac vita adhuc degentibus. Hi in eo statu sunt constituti, ut & sua peccata expiare, pro
 ipsq;

ijsq; satisfacere possint, & satisfactionē exhibere pro animabus purgatorij. Ipsis concessum est, ut sint Angeli DEI, ut sint similes Filio DEI, & per suam charitatem atq; applicationem operum satisfactoriorum, aliorumq; mediorum descendant in fornacem purgatorij, ut solvant & disrumpant vincula peccatorum, quibus animæ illæ constringuntur & detinentur, ut ignem quo cruciantur exstinguant, & ipsas animas inde educant.

Confidera 4^{to}. satisfactionem illam, quā ab hominibus in hac vita degentibus solvuntur defuncti, seu animæ purgatorij à peccatis suis, fieri per orationem. *Sancta & salubris cogitatio est, pro defunctis exorare, ut à peccatis solvantur.* Orationis nomine venit, quidquid habet vel habere potest rationem operis satisfactorij, si per intentionem sanctam applicetur animabus purgatorij & offeratur DEO, atq; exhibeatur in solutionem pro peccatis earum. Talia opera sunt sacrosancta Missæ sacrificia pro defunctis oblata, eleemosynæ & opera misericordiæ, mortificationes corporis & jejunia, orationes, preces & sancta ad DEUM suspitia, Indulgentiæ, quæ per modum suffragij animabus applicari possunt, & quæcunq; bona opera atq; virtutum maximè heroicarum exercitia. Per hæc omnia animæ à peccatis solvi, & à pœnis liberari possunt. Offers Missæ sacrificium vel curas offerri pro defunctis, efficis ut Filius DEI Christus descendat in fornacem purgatorij, & disrumpat vincula peccatorum, quibus animæ vinctæ tenebantur, ut sanguinis sui rore refrigeret ardores flammarum piacularium, ut animas inde liberet & educat. Facis eleemosynas & opera misericordiæ, cogita, quod non sic aqua exstinguit ignem, sicut eleemosyna exstinguit peccata animarum purgatorij, & ignem ad earum expiationem succensum. Castigas corpus tuum, mortificationibus, jejunijs affligis

affligis, partem pœnarum in te suscipis & cum atrocioribus permutas, ne illæ animæ rigidius à Justitia Divina puniantur. Orationes etiam tuæ & preces frequentes ac etiam assiduæ, si in gratia DEI constitutus, eas ad DEUM fundis, multum juvant animas purgatorij. *Multum enim valet deprecatio iusti assidua.* Angeli Sancti, qui ante DEI conspectum deferent orationes & obsecrationes tuas, mittentur ut in fornacem purgatorij descendant, solvantq; animas à peccatis, & educant in refrigerium.

Per Indulgentias etiam quas animabus applicas ex Thesauo meritorum Christi & Ecclesiæ, solvis quadrantes novissimos, quos exsolvere tenentur animæ, & quos ut exsolvant detinentur in carcere.

PUNCTUM III. His consideratis reflecte te, quot & quàm faciles modos habueris & habeas in potestate tua, per quos juvare potuisti & potes animas in purgatorij flammis detentas. Cogita felicem te esse, si aliquam illarum à peccatis solvisti, & ex purgatorij ignibus liberasti. Noveris talem animam hujus beneficii totâ æternitate gratam tibi futuram. Si nihil egisti, & agis, duri cordis & pectoris es, qui tantâ calamitate non flecteris, cum facile succurrere possis.

Cogita plures fortè animas esse, quas DEUS per te liberari voluit, quas si liberare neglexeris, infelices illæ cogentur totum suum debitum luendo, promeritas pœnas exsolvere, expectant illæ à tanto tempore, à tot annis, inter continuos gemitus & suspiria, ut illis succurras. Ergone pro illis liberandis nihil ages? excitare ad illis succurrendam, ipsarum calamitate, pœnarum, quas sustinent gravitate, & acerbitate, ac etiam Sanctorum, talibus animabus succurrentium exemplis, S. Christianæ, quæ durissima quæq; patiebatur & exquisitis mortifi-

mortificationibus se cruciabat, ut animabus purgatorij opem ferret. S. Gertrudis, & tot aliorum Sanctorum, qui omnem fructum satisfactorium quorumvis suorum bonorum operum, animabus his donabant, in easq; transfundebant. Sancti Nicolai Tolentini, qui suis quotidianis sacrificijs & orationibus animas studiosissimè juvare conabatur. Tot Regum & Principum, qui plura sacrificiorum millia pro animabus suorum amicorum fieri curarunt, fundationes amplas fecerunt, confraternitates pro liberandis animabus instituerunt.

Vide quid te etiam facere conveniat? fac proposita. Deprecare sanctas illas animas, quòd nihil vel parum, pro illis liberandis egeris. Corrige stude, animabus hujusmodi, quam maxima suffragia & subsidia etiam ab alijs afferenda, à Divina verò misericordia requiem æternam ipsis donandam precare.

In Colloquio supplica humiliter Patri Misericordiarum, ut cor tuum & aliorum corda flectat ad misericordiam & commiserationem super animabus purgatorij, quatenus eas juvare vestris suffragijs velitis, & ut eas educat benignissimè ad requiem opulentam, & felicitatem æternam.

In fine: Pater noster

Meditatio III. De purgatorio.

Preludia eadem quæ meditationis primæ de purgatorio.

PUNCTUM I. Audi illa verba Christi Matth. 5. *Beati misericordes, quoniam ipsi misericordiam consequentur.* Item illa Psal. 40. *Beatus vir qui intelligit super egenum & pauperem in die mala liberabit*

berabit eum Dominus. Et considera omnem, quidem misericordiam quam præstamus pauperibus & egenis laudabilem & salutarem esse, Divinamq; nobis promereri misericordiam, sed maximè illam quæ exhibetur animabus, post mortem pœnam purgatorij luentibus. Quod ut melius assequaris.

Considera ulterius *imò.* Misericordiam illā, si cætera sint paria æstimabiliorem & magis meritoriam esse 1. quæ exhibetur ijs, qui non solum pauperes sunt, sed simul maximè miserabiles & calamitosi. 2. quæ exhibetur egenis & pauperibus ita viribus & quibuscunq; alijs medijs destitutis, ut non possint quidquam operari, ex labore manuum suarum vivere, & vitæ sustentandæ ac miseriæ sublevandæ necessaria sibi providere. 3. Quæ præstatur pauperibus sanctis, & DEO singulariter gratis & acceptis, de quibus quòd tales sint certò tibi constat. 4. quæ exhibetur egenis & pauperibus, quorum egestas & calamitas licet vera sit, non est tamen patens, oculis illam non intueris, gemitus & lamenta non audis, sed tantum ex relatione aliorum, & per fidem cognoscis dari pauperes valde indigentes, ab omnibus derelictos, non potentes prodire, ut suam miseriam & calamitatem spectandam exhibeant, & stipem emendicent.

Animæ purgatorij sunt hujusmodi pauperes, & egeni, non solum enim sunt indigentissimi, ita ut indigentia major, quàm sit eorum, cogitari non possit, sed etiam sunt maximè calamitosi & afflictissimi. Sunt pauperes visu destituti, ipsorum vox illa frequentissima est. *Quale mihi gaudium, qui in tenebris sedeo, & lumen cali non video,* qui non video Lumen Increatum, Lumen oculorum meorum, cujus visione summè felix & Beatus aliquando tandem efficiar, qui non video Christum, qui est lux vera illuminans omnem hominem, non video Sanctissimam MARIAM pulchram ut Luna, elegantiam

electam ut sol, qui non video astra Cæli, nimirum Beatos jam cum Christo regnantes. Animæ illæ sanctæ, sunt pauperes in carcerem dati, propter aliqua debita, quæ contraxerunt in vita, nec extolverunt, nunc verò non habent unde solvant, sunt pauperes qui gravissimis cruciantur tormentis, pœnisq; & satisfatione, contracta exsolvunt debita. 2dò. Animæ purgatorij sunt pauperes viribus ita lapsi & destituti, ut non possint operari, non possint ex labore manuum suarum exsolvere debita sua. Manus ipsarum constrictæ & ligatæ sunt, ut nullos modos adhibere, nullas industrias exercere possint, quibus pretium solutionis acquirant. O quam felices essent, si ipsis concederetur ad vitam regredi! ô quam instanter agerent? quantâ curâ & solitudine laborarent, ut universum debitum reddere possent! 3. Animæ purgatorij sunt pauperes omni commiseratione digni, sunt pauperes sancti, DEO grati & amabiles, sunt Filij DEI, sunt sponsæ Cælestis Sponsi. Misericordia illis exhibita non potest non esse nisi DEO acceptissima. Quia maximè grata est Patri, misericordia, quæ exhibetur charissimo ejus filio in calamitate constituto, grata est sponso misericordia, quæ exhibetur amabilissimæ suæ sponsæ. : deniq; grata est amico misericordia, quæ exhibetur intimo suo amico & cui eam exhiberi maximè desiderat. 4. Tandem animæ purgatorij sunt pauperes, quarum homines mortales non intuemur miseriam & calamitatem. Præstat quidem DEUS gratiam quibusdam animabus, ut in flammis appareant, ut opem visibiliter ab hominibus viventibus implorent: sed hæc rarissimè fiunt, aliæ animæ communiter in carcere detinentur, nec ex illo prodire permittuntur. Ex fide tantum habemus, purgatorium dari, in eoq; animas. Quod ipsum utinam vivâ fide crederemus, utinam hac fide excitaremur ad succurrendum miseris illis animabus

animabus. Multæ ex illis sunt omni destitutæ suffragio, sunt in oblivione apud homines, tanquam mortui à corde, sunt in terra oblivionis, multæ expectant, certæ alicujus ac determinatæ personæ suffragia, aliquæ expectant suffragia tua, ut tu illis succurras & fortè inter hos pauperes sunt Parentes tui, fratres, sorores, amici, Benefactores tui, quibus specialiter obligaris ex pietate, charitate, ex promissione & assecuratione tua, ipsis in morte facta, fortè etiam quibusdam animabus obligatus es ex Justitia, propter detenta à te ipsorum pia legata, suppressa testamenta, accepta ea, quæ in subsidium animæ cedere debuerant, non persolutos census, per varias inscriptiones constitutos. Misericordia in has animas ipsis quidem maximè desiderabilis, tibi verò multum salutaris est futura. Sicut è contra immisericordia valde tibi est eritq; perniciofa. Judicium tibi est sine misericordia, si ut teneris non facis misericordiam, aut verius Justitiam.

PUNCTUM II. Considera 2^{do}. Quod misericordiæ, quæ lexercetur in animas purgatorij, præmium futurum sit misericordia exhibenda illis ipsis, qui faciunt misericordiam, qui misereantur pauperum illarum animarum, etiam ipsi misericordiam consequentur. Quamdiu in corpore vivimus, replemur multis miserijs, multis malis & calamitatibus obnoxij sumus, adeoq; & ipsi egemus, egibimusq; semper misericordiâ, idq; non solum in hac vita, sed vel maximè in morte, ac etiam post mortem ad flammam purgatorij etiam ipsi deputati. Dum vivis dies vitæ tuæ, pauci & mali sunt, adeoq; miser es omnibus diebus vitæ tuæ, miser es propter continuas tentationes, quibus ab hostibus animæ tuæ continuò impugnaris, miser es propter tot animæ pericula, propter ærumnas & infirmitates, propter damna & multiplices cruces, quas

sustinere debes. In his omnibus eges misericordiâ, quæ tibi subveniat. Moreris, dies mortis est dies calamitatis & miserix, in maximis tunc versaris doloribus & angustijs, tunc descendet diabolus, habens iram magnam, & sciens quod modicum tempus habet, gravissimis te aggredietur tentationibus, & validissimos faciet insultus, ut anima tua, si succubueris illi, in prædam cedat. O in quantis tunc versaberis periculis, quantis timoris & tristitiæ jactaberis fluctibus ! ô momentum à quo tota pendet æternitas, quàm terribile homini morienti es futurum ! in morte manet te adhuc Judicium DEI, auditurus es sententiam vel vitæ vel mortis æternæ.

Post mortem, si mitteris ad pœnas purgatorij, illæ ipsæ pœnæ & cruciatus te manent, in quibus existunt animæ, quæ nunc tuâ ope & misericordiâ egent. Illæ nunc tuâ, tu brevî aliorum, vel etiam illarum ipsarum animarum ope & auxilio indigebis. In his omnibus miserijs & calamitatibus vitæ præsentis, mortis, & vitæ alterius, ut misericordiam experiaris & consequaris, sis ipse misericors in omnes quidem pauperes sed maximè in pauperes purgatorij animas.

Sed scire voles, à quonam es misericordiam consecuturus, in omnibus tuis miserijs & angustijs ? consequeris imprimis misericordiam illarum ipsarum animarum, quas tuis suffragijs adjuvisti, quas à pœnis purgatorij liberaisti. Illæ animæ ad DEI conspectum admittæ miserebuntur tui, suô patrociniô & intercessione pro te ad DEUM factâ succurrent tibi, in tuis angustijs, instabunt obsecrationibus, postulabunt gratias uberes, singulares, victrices, ad superandas tentationes, quibus intestaberis. Quodsi in peccatum labi te contigerit, instabunt apud DEUM, ut per veram & salutarem pœnitentiam consurgas, nec ampliùs ad peccata redeas. Defendent te in periculis animæ
tuæ

tuæ, sed neq; in periculis corporis, vitæ, famæ, & fortunæ absq; suo præsidio te relinquent, etiam in temporalibus Divinas tibi exposcent benedictiones. In morte etiam tua, ô quanta circate sanctorum illarum animarum futura est cura & sollicitudo? ô quæ non agent, ne tentationi succumbas, ut victor evadas & ex hoste triumphes, ne universum mundum amissurus, etiam animæ tuæ detrimentum patiaris, ut morbos & dolores patienter sustineas, ut cælestes tunc accipias consolationes, ut moriaris pretiosâ morte sanctorum. Post mortem etiam eadem animæ te in purgatorio constitutum solabuntur, ut ad te juvandum animi mortalium excitentur, Divinas exposcent gratias, ut suffragia animabus indeterminatè applicata, vel etiam pro quopiam determinatè oblata, non illi tamen, sed alijs, ex rationibus DEO cognitis, applicanda, tibi cedant, ipsæ orabunt & supplicabunt.

Deinde qui in animas quæ in igne purgatorii expiantur, misericors fuerit, ille ipsius Christi misericordiam consequetur. Pro tuis suffragijs, pro applicato fructu satisfactorio aliquorū vel quorumvis tuorum bonorum operum, in & ex gratia DEI factorum, Christus tuam remunerando charitatem, applicabit tibi satisfactionem & merita mortis ac passionis suæ. Condonabit tibi culpas tuas, remittet poenas, tuam cumulabit gloriam, prout fecit S. Gertrudi, cui morienti & in morte sua anxie, quod post translata sua omnia merita in animas purgatorii, ipsa non haberet, unde pro suis peccatis temporaliter satisfaceret, Christus apparens declaravit charitatem ejus in animas, se tanti æstimare, ut propter hanc, illi remittat omnes poenas, quæ ei essent subeundæ, & gloriam suâ liberalitate sit cumulaturus.

Tandem qui misericors fuerit in animas purgatorii,

gatorij, DEI ipsius misericordiam consequetur. Misericordia, quam exhibuit animabus purgatorij, ad Divinam pro ipso perorabit misericordiam, perorabunt & ipsæ animæ, multiplicatisq; intercessoribus, DEUS illi suæ propitiationis abundantiam largietur. Misericordem, qui intelligit super egenū & pauperē, in die mala liberabit Dominus, liberabit in die tribulationis, & tentationis, in die mortis, in die sui Judicij, in die & tempore purgationis ipsius. Liberabunt eum animæ, per suā suffragia & patrocinia, Christus per applicationem suæ satisfactionis, DEUS ipse per suam Clementiam, exaudiendo preces animarum, acceptando Christi satisfactionem, illiq; applicando, qui in animas purgatorij misericors existit, in vita, in morte eundem, suis illi succurrendo gratijs, & ex pœnis purgatorij, ad cælestem gloriam evocando, liberabit.

PUNCTUM III. His consideratis, Reflecte te & cogita *imò*. quæ & quanta sit tua erga animas in purgatorio detentas misericordia? an tanta ut propter illam, tu quoq; misericordiæ obtinendæ spem habere possis? Cogita si misericors es, quod in hac vel illa peccandi occasione & gravitatione non succubueris, sed ipsam fortiter viceris, an hæc victoria non sit tibi data in præmium tuæ in animas misericordiæ, quod si tentationi succubuisti, vide an non ideo DEUS lapsum tuum permiserit, quod sis in animas immisericors.

Cogita *2do*. Mortem tuam jam forte adesse vicinam & proximam. De dispositione ad illam, expediret te maturè cogitare, expediret modos & media providere, per quæ obtineas, ut in illo articulo DEUM in te misericordem experiaris, quatenus tunc de hoste tuo feliciter triumphes. Et quid rogo in hunc finem agis? quæ adhibes media? efficacius medium esse non potest, quàm ut ipse misericordiam exhibeas, (*Misericordia*) teste

S. Augustino) *Stat ante fores gehenna, & neminem permittit in carcerem mitti.* Hæc in **Judicio DEI**, Patronam causæ tuæ aget. Hæc non permittet ut malâ morte moriaris. Siquidem **S. Hieronymus** non meminit se legisse malâ morte mortuum, qui libenter opera charitatis exercuit. Quod si quæcunq; misericordia tantum in morte juvat, juvabit maximè illa, quæ animabus defunctorum exhibetur.

Cogita 3^{tiò} pro tot tantisq; tuis peccatis, si pœnas inferni evaseris, ut in Divina confidis misericordia, luendas tamen tibi esse purgatorij pœnas. Difficile tibi persuadere poteris, in hac vita plenè exsolviturum te omne debitum & statim à morte rectâ evoluturum in cælum, attento languore & remissione tuæ pœnitentiæ quam agis, fugâ & horrore asperitatum & mortificationum, neglectu Indulgentiarum, aliorumq; operum satisfactoriorum, maximè cùm non quadrantes, sed talenta, & millia talentorum sint tibi exsolvenda. Ex his ergo pœnis, quas certò certius lues, quis oro te eripiet? quis pro te tantum tuum exsolvet debitum? Confidis fortè amicis tuis, eorumq; in te affectui, spem habes in pijs tuis legatis, in testamento, & per illud facta fortunæ tuæ dispositione. Confidis fidei & conscientiæ executorum testamenti, quia illi ultimam tuam exequentur voluntatem, sacrificia pro te fieri curabunt, suffragijs varijs, & elemosynis animam tuam juvare volent. Cæterum quod his fidere non debeas, millena quotidiana te doceant & præmonent exempla. Alios, de quorum affectu securior esse possis, quære amicos. Ad cælum quàm plurimos tuâ ope adjutos trans mitte, qui, cum defeceris in via, recipiant te in æterna tabernacula. Hi te non fallent, procul ab his omnis ingratitude, procul benefactorum suorum oblivio: quando detineberis carcere, in quo exi-

getur à te, ut solvas quod debes, amici illi tui, cum illis bene fuerit, facient tecum misericordiam, Regi sæculorum & Supremo Cæli & terræ Dominatori, suggerent, ut educat te de carcere, ac perfolutâ, Justitiæ suæ ex Christi meritis & suffragijs viventium tibi applicatis, satisfactione adæquata, ad sui conspectum & cælestem te admittat Beatitudinem.

Fac proposita convenientia. Fac item contractum cum illis sanctis animabus, quod velis in illas esse misericors, quod firmum fixumq; habeas, illas juvare & ex flammis, quibus expiantur, liberare per sacrificia, eleemosynas, jejunia, mortificationes, Indulgentiarum usum, & animabus applicationem, per opera charitatis, misericordiæ, aliarumq; virtutum actus, ac tandem per applicationem fructûs satisfactorij, quorumcunq; bonorum operum tuorum, ut illæ vicissim, & suam tibi exhibeant & Divinam impetrent misericordiam.

Contractui huic, si tu ex parte tua steteris, illas quoq; ex parte sua impleturas, pro certò & indubitato habe.

In Colloquio, Christo pro redemptione mundi suum sanguinem fundenti, supplica humillimè, ut eodem sanctissimo sanguine ardores ignis purgatorij restinguat, ut ex infinito meritorum suorum thesauro pretium adæquatum pro animabus amicorum tuorum vitâ functorum (quos in particulari designabis) Justitiæ Divinæ, exsolvat, tuumq; cor ad misericordiam ipsdem pro tuo posse exhibendam, flectat & emolliat.

Supplica item Matri misericordiæ, ut illa quoq; suâ intercessione & patrocinio eandem adjuvet, piissimam suam manum porrigat, maternum monstret affectum, atq; ad DEI, suumq; ac Sanctorum transferat consortium.

In fine : Anima Christi. Ave MARIA
Me-

Meditatio I.

De Pretiosissima DEI Parente.

Preludium 1. Imaginare quod spectes Beatissimam DEI Parentem, continentem sub suo Pallio Ecclesiam Christi militantem, omnesq; ipsius status, sed vel maximè fideles, in sua protectione & patrocinio confidentes, atq; ad se devotione & affectu singulariore recurrentes.

Preludium 2. Postula gratiam, ut tenerri-
mo filiali affectu in sanctissimam hanc Matrem
ferri possis, vicissimq; Maternum ejus experiaris af-
fectum, atq; sub pallium & protectionem ejus re-
cipiaris.

PUNCTUM I. Audi illa verba Proverb. 8.
*Qui me invenerit, inveniet vitam & hauriet sa-
lutem à Domino.* Et considera quemamodum plu-
ra alia, quæ in sacris Scripturis de Sapientia incre-
ata dicuntur ab Ecclesia pretiosissimæ Divinæ Pa-
renti applicari & accomodari solent, ita & addu-
cta Sapientis verba optimè de eadem Sanctissima
DEI Matre intelligi posse eo sensu, quod qui in-
venit Mariam inveniat vitam animæ, & hauriat
salutem à Domino hoc est salutem æternam con-
sequatur. Circa quam veritatem.

Considera ulterius *primo*. Quid sit invenire
Mariam? Invenire Mariam non est quid aliud ni-
si invenire gratiam, affectum, & patrocinium san-
ctissimæ Virginis Mariæ. si hæc lucreris, præstô ti-
bi est Maria, adest tibi præsens per opem & præ-
sidium suum, opitulatur & succurrit tibi, protegit
te & defendit, suo filio te reconciliat, impetrat ti-
bi gratias & beneficia Divina. Invenis & lucra-
ris affectum Mariæ, invenis Mariam, vicissimquæ
ipsa te invenit, tanquam ovem perditam, in suas
U_s manu

manus te suscipit, illudq; habes, quod non possis perire, præ pietate Mariæ. Quàm felix es, si invenis Mariam, si te invenit Maria.

Confidera 2do. Quomodo inveniatur Maria ! Invenitur Maria à quærentibus illam, qui quærit invenit. Quærenda verò est per recursum & refugium ad ipsam factum. In periculis, in necessitatibus, in rebus dubijs, Mariam invoca, & invenies Mariam. Quære Mariam per filialem erga ipsam affectum & amorem. si quæseris ut Filius, Mariam Matrem invenies. Quære per exhibitam ipsi reverentiam, cultum, honorem & obsequia, sic quærendo invenies Mariam, in suos servos beneficentissimam & clementissimam Dominam. Quære per zelum, studium, & desiderium promovendi honorem ipsius, invenies Mariam boni tui studiosissimam. Quære Mariam per vitam sanctam & sanctè actam, conformem imagini Filij DEI, conformem exemplis Christi, invenies Mariam, Matrem Filij DEI & tuam, hoc est Mariam experieris Matrem. Ipsa enim est Mater Filij DEI, si proinde tu per gratiam sanctificantem fueris filius DEI, Maria mater tua erit. Ipsa est Mater Christi, si in Christum transformaberis per imitationem ejusdem, agnoscet te pro filio suo, amabit ut filium, matremq; tuam se esse monstrabit. Quære tandem Mariam per imitationem virtutum ipsius. imitare modestiã Mariæ humilitatem, castimoniam, puritatem, cæterasq; virtutes Mariæ, has omnes in te exprimere stude, ea ratione invenies Mariam, hoc illicio ipsam attrahes, affectumq; ejus conciliabis tibi.

PUNCTUM II. Confidera 3to. Ubinam inveniri possit Maria ! Ubiq; illa inveniri potest. Ubiq; te exaudiet. Sed maximè inquirenda est Maria in templo, per orationes ante aram, ante imaginem sanctissimæ hujus Virginis, fufas, ubi illa quæ-

sivit

ſivit amabiliſſimum ſuum Filium DEUM, ibi tu quære Matrem. Inquire Mariam in Nazareth, ibi invenies gratiã plenam. Nazareth interpretatur ſanctificata, cuſtodita, ſeparata, ſi Nazaræus & ſanctificatus DEO fueris, ſi gratiam ſanctificantem cuſtodieris, ſi te ſeparaveris & abſtraxeris à tumultu curarum terrenarum & ſenſualium, invenies Mariam. Invenies adhuc Mariam in Bethleem, hoc eſt in domo panis, ſi fueris affectus ſingulariter Sanctiſſimo ſacramento Eucharistiæ, ubi ſub ſpeciebus panis reſidet Panis verus, qui de cœlo deſcendit. Inquire Mariam in Cana Galilææ, hoc eſt, in deſponſatione, quã anima tua deſponſetur DEO & gratiæ ejus, in tranſmutatione aquæ in vinum, per quam efficiaris vinum ori Divino gratum & acceptum. Quære Mariam ſub cruce, quære in afflictionibus, in tribulationibus, conſigendo te cruci Chriſti & invenies Mariam, ejuſq; in his omnibus ſingulare experieris auxilium & patrocinium.

Conſidera 4^{to}. Quã ratione fiat, ut qui inveniat Mariã, inveniat vitã & hauriat ſalutẽ à Domino. Modus inveniendi vitã & ſalutẽ per Mariã ejuſq; affectum, certiſſimus eſt, & ita ſecundum præſentem providentiam neceſſarius, ut in hac providentia non obtineatur vita & ſalus abſq; Maria. Maria eſt Mater miſericordiæ, & Mater vitæ, ipſa nobis vitam genuit & ſemper gignit. Ad hanc miſericordiæ Matrem recurre, etiamſi DEO mortuus fueris, vives, & vitam per Mariam accipies. Quod gratiam Baptiſmi, per quam cæpiſti DEO vivere, acceperis, Mariæ debes, quod hanc vitam in Baptiſmo acceptam, per peccatum deinde amiſſam, in Sacramento pœnitentiæ receperis, etiam id per Mariam habes, ſi etiam nunc vivis per gratiam, vitamq; hanc conſervas & auges, affectum Mariæ agnoſce, per ipſam datur vita mundo, quot

quot in anima vivunt, post DEUM & Christum, vitam hanc Mariæ debent, ipsa enim Mater est viventium.

PUNCTUM III. Considera 5^{to}. Quid qui Mariam invenit, hoc est qui invenit affectum, patrocinium, & protectionem Mariæ, ille inveniat & hauriat salutem à Domino, quia secundum præsentem ordinationem Divinam, non est possibile salvari quenkumque, absq; Maria, non solum eo sensu, quia nemo potest salvari sine Christo, sine Salvatore, cujus Mater meruit esse Sanctissima Maria, sed etiam, quia per manus Mariæ DEUS nos habere voluit omnia salutis media, omnes gratias, omnia opera bona & merita nostra, dependenter à quibus salus obtinetur. Ipsa est thesauraria, quæ dispensat nobis thesauros cœlestes, ipsa est mare gratiarum, ex quo gratias accipiendo, haurimus salutem à Domino, in quo feliciter piscamur margaritam pretiosam, nimirum regnum cœlorum & nostram in cœlo beatitudinem. Per hoc, Pater Cœlestis suam Filiam, Filius Unigenitus Patris, suam Matrem, Spiritus Sanctus suam honoravit Sponsam, quod tres hæ Sanctissimæ Personæ, totum nos habere voluerint per MARIAM.

Ex his consideratis conclude vitam animæ tuæ non posse te habere, nec etiam salutem posse consequi, secundum præsentem ordinationē Divinam sine ope, patrocinio, & affectu Mariæ. Ejus proinde gratiam quærendam & promerendam esse, ut invenias vitam & consequaris salutem. Reflecte te deinde, quid hactenus egeris, ut affectum & amorem Sanctissimæ Mariæ invenires ! quæ tua devotio & pietas erga hanc Sanctam Matrem ? quis honor ? quis cultus à te illi exhibetur ? recurrisne ad illam in tuis tentationibus, periculis, afflictionibus, recurrisne ut Filius ad Matrem ? quis zelus, quod studium pro-

moven-

movendi cultum, defendendi honorem Mariæ ? utrum per vitam sanctam conformem exemplis DEI, & Mariæ Filij, Domini nostri JESU Christi, per imitationem virtutum Matris hujus Sanctissimæ, ipsi placere ejusq; affectum promereri studeas ? an quæris Mariam in templo, in frequenti Sacramentorum & digno usu, ac etiam sub cruce Christi ? vide quid te deinceps agere oporteat ? fac proposita. Deprecare Matrem Sanctissimam, desce negligentias tuas in cultu ipsius & quascunq; ejus irreverentias ?

In Colloquio Postula à Matre Sanctissima, ut illam, quæ invenitur etiam à non quærentibus, tu quærere velis, & quærendo invenias, inventam teneas nec unquam dimittas.

In fine: Ave MARIA.

Meditatio

De Pretiosissima DEI Parente.

Praludia eadem quæ meditationis præcedentis

PUNCTUM I. Audi illa verba Psal. 115. O

Domine ego servus tuus & Filius Ancilla tue. Ea; ipsa hoc sensu intellige : illum tantum servum DEI esse & talem se profiteri posse, qui verè est Filius Mariæ quæ se Ancillam Domini appellat. Connexa hæc & indivisa sunt, esse servum DEI & esse Filium Mariæ. servus DEI esse non potes, si non fueris Filius Mariæ. Circa quod ipsum.

Considera ulterius *Imò* Quid sit esse servum Domini. Servus Domini est, qui sciens voluntatem Domini, eam facit & exequitur, semperq; paratus & promptus est ad omne imperium, & quemcunq; nutum Domini sui. Servus DEI es, si servas præcepta ejus, ab his enim servandis, servus dictus esse

esse existimatur, imò si non solum præcepta & imperia, sed etiam quosvis nutus, hoc est consilia & inspirationes ad bonum te excitantes, exequeris.

Præterea servus Domini est, qui omnes suas actiones, omnia obsequia ac vitam ipsam Domino debet. Quidquid agit, non in suum vel cuiuspiam alterius, sed in Domini sui commodum agit. Totus est Domini, ejus subjacet dispositioni, & ab hac dependet in omnibus. Et tu servus DEI es, si omnes motus, actus, & respiria tua, DEO consecras, in DEI commodum, hoc est in laudem & gloriam ejus refers. Si Divinae voluntati & dispositioni, te tuaque omnia, & vitam ipsam tuam cum omni indifferentia, & animi præparatione, ad id quod DEO placet, relinquis.

Servus adhuc Domini est qui Domino adhæret, Dominum suum amat, honorat, reveretur, Dominum sequitur, honorem ejus zelat, pro Domino se opponit, nullumque vult alium Dominum agnoscere. Etiā tu servus DEI es, si DEO adhæres, si per peccatum ab eo non recedis unquam, si Dominum tuum JESUM, à quo redemptus es, sequeris, imitaris, ejus vestibus & insignibus indueris, nec te à DEO, à Christo, & ejus servitio, abstrahi permittis, si non es servus peccati, si excutis servitutem mundi, carnis & diaboli, siquidem qui his servit, servus DEI esse non potest.

PUNCTUM II. Considera 2do. Quid est esse Filium Ancillæ Domini? Filius debet ducere originem à suo Patre & Matre, debet ab illis accipere suum esse, substantiam & vitam suam, eaque omnia, quæ spectant ad perfectionem ejus esse. Debet præterea habere similitudinem cum Patre & Matre, debetque esse imago suorum Parentum. Ut sis Filius Ancillæ Domini, ab ea te originem ducere oportet, ab ipsa debes habere tuum esse, tuam substantiam, tuam vitam & quidquid te perficit

scit in tuo esse, imò quidquid boni habes, ab illa & per illam habere debes. Et hæc quidem à Materno Ancillæ Domini affectu habes, pluraq; ex his uberius & fructuosius habere potes, si in his ad Mariam recurras. Portat te illa in suis visceribus, affectu complectitur, suaq; intercessione vitam animæ, & omnia bona tua obtinet, & tibi confert. Spiritus Sanctus ita supervenit in Mariam, ut non solum ipso cooperante, ex purissimo suo sanguine, tanquam vera Mater carnem Filio DEI ministraverit, sed etiam ut tanquam Ancilla Domini, ministret tibi omne quidem tuum esse, sed vel maximè vitam animæ, & esse tuum supernaturale, quò Filius DEI es, ut ita sis Filius DEI per adoptionem, ut simul etiam sis Filius Ancillæ Domini.

Cæterum ad rationem perfectam Filij Mariæ restat adhuc, & ex parte tua necessarium est, ut cum ipsa hac Matre habeas similitudinem, ut sis imago ipsius. Vide quæ in Ancilla Domini relucet dotes, virtutes, & perfectiones, atq; lineamenta, hæc enim in te inveniri debent, ut sis filius Ancillæ. Illa tota pulchra est, & macula non est in ea, & tu enitere ad eam conscientiae puritatem, ut nullam in ipsa patiaris etiam levem maculam. Illa terribilis est ut castrorum acies ordinata, & te oportet esse terribilem inferno, hostibusq; DEI, & animæ tuæ. Illa contrivit caput serpentis antiqui, contere & tu caput serpentis infernalis, hoc est primitias suggestionum, & tentationum ipsius; illa DEI hominis seu Christi Mater exstitit, efficiaris & tu Mater Christi, faciendo voluntatem Patris æterni. Has aliasq; innumeras virtutes & perfectiones Mariæ in te exprimere stude, ut sis imago & similitudo, adeoq; filius Ancillæ Domini, sed maximè imitare humilitatem Virginis. Multa sunt quæ in hac Sanctissima Matre conspiciuntur, quæ tu non vales imitari. Hu-
mili-

militatem tamen illius, potes & debes imitari. Illa cum esset futura DEI Mater, Regina mundi, Domina univerſorum non dubitavit ſe humiliter Ancillā proſiteri. Tu pariter quāto major es, quò plura & majora dona de manibus Divinis accepiſti, tantò magis te humilia, vilemque te & inutilem ſervum exiſtima. Tali expreſſione humilitatis Sanctiſſimæ DEI Parentis, eris vera imago & filius Ancillæ Domini.

Filium Ancillæ Domini prodit adhuc & manifeſtat amor, & affectus mutuus, ſive Matris erga filium, ſive filij erga Matrem. Amat te Ancilla Domini, non erubeſcit, non dedignatur, quamvis degenerē, ſœdum, deformem, ſuiſque moribus diſſimilem filium, ita te amat, ut velit te facere DEO amabilem, gratum, ſuoque Filio Chriſto & ſibi quam maximè conformem. Ama & tu Ancillam Domini, non erubeſce humilitatem, ancillar ſervitutis ejus, ſiquidem illa tali humilitate placuit. Ancilla Domini eſt, ut non deterrearis Majeſtate ipſius, ut accedās fiducialiter, ut cum ipſe ſis naturā ſervus, recurras tanquam filius ad Ancillam Domini.

PUNCTUM III. Conſidera 3^{ti}o. An & quomodo hæc ſe inferant, eſſe Filium Ancillæ Domini, & eſſe ſervum Domini? omnino iſta ſe inferunt etiam in humanis: ex Ancilla Matre, non naſcitur filius, niſi ſervus. Ancilla Mater in ſervitute generat filios. Sed & Ancilla Domini generat in ſervitute ejusdem Domini. Generat te, & ſtatim ex utero format ſervum DEI, inſtruit & inſtituit, te ut DEO quàm perfectiſſimè ſervias. Impetrat gratias, quibus à DEO excitaris, ut ſervias illi omnibus diebus vitæ tuæ, ut ſervias in ſanctitate & Juſtitia, ut præcepta ejus ſerves, conſilia impleas, ut totum te DEO conſecres, ut ad laudem ipſius omnes actiones tuas referas, majoremque ipſius gloriam in omnibus quæras, ut DEUM re-

verea-

verearis, eiquè serviendo tandem salvus fias.

Voluit aliquando & petijt à Christo Mater Filiorum Zebedei, ut in Regno Christi sederent filij ejus, unus à dextris, alter à sinistris. Ancilla Domini pro filijs suis rogat, ut recipiantur in servos perpetuos, ut sint servi Domini, illiq; quàm perfectissimè famulentur. Quare Sanctissima ipsa DEI Parens, vult hæc indivisa & conjuncta esse, ut filij Ancillæ sint simul servi Domini, sed & tu, & quicumq; alius, si vis esse filius Ancillæ Domini, age, ut sis servus DEI, age ut sis filius Ancillæ.

Existimabat S. Paulus Apostolus se servum DEI non esse, si hominibus placeret, tu ut sis servus DEI, placere debes Ancillæ Domini tanquam filius, & si placere volueris Ancillæ Domini, ejusq; esse filius, servum DEI te esse oportet.

Quemadmodum verò hæc se inferunt esse servum DEI, & esse filium Ancillæ Domini, ita rursus non esse servi DEI infertur ex non esse filij Ancillæ Domini. Spectamus frequenter infelices mutationes & ruinas multorum, ut, qui DEO serviunt & servire tenentur, sint instabiles, ut ex servis DEI fiant mancipia peccati & diaboli. Si veras hujus causas investigare velimus, cur hic & ille DEUM abjecerit, jugum servitutis ejus excusserit, mundo, carni, diabolo se mancipaverit, hanc plerumq; causam inveniemus, quia in eo refrixit filialis affectus erga Beatissimam Mariam, quia refrixit devotio erga Ancillam Domini, studiū imitandi virtutes Mariæ, & promovendi honorem ejusdem. Hic & ille desit esse filius Ancillæ Domini, proinde desit quoq; servus esse DEI.

His consideratis, vide quo affectu ferri te oporteat erga Matrem DEI Sanctissimam, quanto studio curare debeas, ut sis filius Ancillæ Domini, si vis, ut teneris, velle servus DEI esse; siquidem servus DEI non es, si non es filius Ancillæ Domini.

W

Fac



F. Sch. N.

Depose

Matka Boska Ostrobramska
w Wilnie.

„Nie tyle słońce prom.
swej światłości spuściło
na nas, ile nam wyci-
erzonych zostało łask
Ducha św. aby Ciąm
duć poznanie samych
siebie i poznanie
Boga" — 30-41-31a

S. Janowski,

Fac reflexiones convenientes, propofita, elice affectus. Proteftare quod velis effe filius imò fervus Ancillæ Domini, ut fis fervus DEI; dicens: ut fim fervus Filij, fervitutem appeto Genitricis.

In colloquio Postula à Matre Sanctiffima, ut te in filium recipiat, atq; in DEI fervitio & obsequio constantem & perleverantem teneat.

In fine: Ave Maris stella.

Meditatio III. De Pretiosiffima DEI Parente.

Praludia eadem quæ duarum meditationum præcedentium.

PUNCTUM I. Audi illa verba Joan. 19. *Dixit Matri suæ: Mulier ecce Filius tuus, deinde discipulo: Ecce Mater tua. & ex illa hora accepit illam discipulus in suam.* Et cogita ex cruce à Christo datum te effe in filium Matri Beatiffimæ, Materetiam Beatiffima data tibi est in Matrem. Si tu fueris filius, Filiumq; te monstraveris Sanctiffimæ DEI Parentis, ipsa viciffim erit Mater tua, & Matrem se effe monstrabit: prius tu nomineris filius hujus Matris, tum deinde illa nominabitur Mater tua, ut intelligas, curare & agere te debere, ut Maternum Mariæ merearis affectum, opus effe, ut filium re effe ostendas, si vis experiri Mariæ patrocinium, ut illa tuam se effe monstret Matrem. Additur ulterius. Et ex illa hora accepit illam discipulus in suam. Circa quæ verba expende diligentius, quid fit Sanctiffimam DEI Parentem accipere in suam.

Et inprimis accipere Sanctiffimam Mariam in suam, non est quid aliud, quàm Mariam habere pro re maximè sua, tibi singulariter appropriata. Rerum nostrarum majorem curam habere

confe-

conſuevimus maiorem, circa illas adhibemus vigilantiam, ut res noſtra illæſa & integra maneat, ne nobis pereat, ut illam conſervemus. Res noſtræ ſingulariter nobis charæ & amabiles ſunt, ſunt in maiore reſpectu & æſtimatione. Qui Sanctiſſimam DEI Parentem accipit in ſua, debet illi ſingulariùs affici, illā amare, illam æſtimare debet eſſe, ſolicitus tanquam de re omnino ſua, tanquam de Matre ſibi chariſſima, de Matre Pretioſiſſima, ne ſua Mater aliquando eſſe deſinat.

2dò. Accipere Sanctiſſimam Mariam in ſua, non eſt unum aliquod particulare bonum in Maria accepiffe, ſed eſt accepiffe plura bona, bona multiplicia. In Maria accipies Matrem, accipis Reginam, Dominam, Advocatam, Patronam, Protectricem tuam. Cum Maria accipis innumera quæ habiturus aliquando es bona, idq; bona maximè propria, ex quibus plura emolumenta, imò felicitatem tuam percipies, ut dicere poſſis: *Omnia mihi pariter bona venerunt cum ipſa.*

PUNCTUM II. 3tio. Accipere Mariam in ſua, eſt Mariam accipere in omne id, quidquid eſt homo, eſt accipere Mariam in id totum, quidquid homo maximè ſuum & proprium habet, adeoque eſt illam accipere pro objecto & termino, inter objecta purè creata ſpecialiter licet non permodum ultimi finis, quietativo omnis ſui appetitùs, omnium potentiarum & facultatum ſuarum. Eſt accipere illam pro objecto expletivo, & ſatiativo imprimis omnium corporis ſenſuum, ut viſus & oculus tuus ſingulariter oblectetur Mariæ in ſacris ſuis imaginibus, aſpectu, has libenter cum magno animi ſenſu & cordialiſſimo affectu intueatur, ut non oblectetur viſus tuus niſi ijs quæ oblectare poterant viſum Mariæ, qualia ſunt Chriſtus infans in præſepio, in materno ſuo gremio, diſputans in templo, ſubditus JOSEPH & MARIÆ; Chriſtus prædicans E-

vangelium, Christus patiens, cruci affixus, gloriosus in sua resurrectione, cœlum ascendens &c. Ut visus in nullum tendat objectum, nullum conspiciat, quod displiceret Mariæ, quod Maria nollet à te videri.

Accipere item Mariam in sua, est accipere Mariam pro objecto auditus, hoc est: appetere, ut in auribus tuis quā frequentissimè sonet Dulcissimū nomen Mariæ; ut cum singulari gustu & animitui quietatione audias laudes Mariæ; ut audire velis, quæ audiens Maria conservabat in corde suo; ut obsurdescas ad omnia, quæ DEO & Mariæ adversantur.

Accipere Mariam in sua, est appetere, ut Maria sit objectum gustus tui; cujus illa erit objectum, quando cum Bernardo; hinc à Christi latere & vulnere, inde pasceris ab ubere Mariæ. Sapiet tibi sacra Eucharistia, purissima Christi caro de Virgine accepta; sapiet gustui tuo Maria. Illa sint tua obsonia, quæ fuerunt obsonia Mariæ, nimirum jejunium, inedia, fames sitis, summa in cibo & potu moderatio, condimenta tua sint lacrymæ, amaritudines, aliaquæ quæ fuerunt condimenta ciborum Mariæ.

Accipere Mariam in sua, est præterea accipere Mariam pro objecto odoratus. Maria est liliū inter spinas, est sicut acervus tritici vallatus lilijis. Labia ejus, distillant lilia. Ubra ejus Sanctissima frangrantia unguentis optimis. Maria est sicut cinamomum & balsamum aromatizans, est quasi myrrha electa, dans suavitatem odoris. Hoc suavissimo odore replearis, ipseque efficiaris bonus odor Christi. Hac suavitate pasce odoratum tuum nec alia ei oblectamenta quære.

Tandem accipere Mariam in sua, est Mariam accipere pro objecto sensus tactus. Ut sit illa tale objectum, maternis ejus advolvere pedibus
tene

tene illam, nec dimitte. Per corporis tui mortificationem induere Christum Filium Mariæ, in Christum te transforma, id obtinere stude, ut Mariæ palliō contegaris, sensum hunc tuum custodi, ne illum oblectet quod abhorret Maria.

4^{to}. Accipere Mariam in sua, est accipere illam in objectum trium animæ potentiarum: memoriæ, intellectûs, & voluntatis. Illa sit objectum memoriæ tuæ, sæpè huic obversetur. Habere studes memoriâ DEI præsentis, ponis ante oculos mentis tuæ Christum Redemptorem & Salvatorem tuum, pone ante eosdem oculos & Mariam. Illam tibi memoria repræsentet tanquam Matrem, tanquam Dominam, Patronam, Auxiliatricem, & Refugium tuum.

Accipe item Mariam in objectum intellectûs tui; intellectûs tuus circa illam occupetur, de illa libenter cogitet, Mariæ excellentiam, privilegia, virtutes, gratias, & beneficia sæpè meditetur, circa cultum & honorem ipsius speculetur, qua ratione honor, & cultus Mariæ promoveri, affectus conciliari, Patrocinium obtineri possit.

Accipe deniq; Mariam in objectum voluntatis, hæc post DEUM & Christum sit præcipuum voluntatis tuæ objectum, in quod singulariter feratur, & quô contentetur affectus tuus, ut nihil velis quod sit dissonum Mariæ, quod diminuat amorem, honorem Mariæ, quod non promoveat honorem & cultum Mariæ, quod non augeat eundem, quod non referatur ad Mariam.

PUNCTUM III. 5^{to}. Accipere Mariam in sua, est accipere Mariam pro objecto actuum, quorum homo potissimum censetur habere Dominium, per quos illud excercet, & per quos, res & objecta censetur possidere. Tales actus sunt præcipui affectus, quibus voluntas prosequitur bonum. horum enim homo habet et Dominium ratione libertatis ipsorum,

per illos exercet Dominium, resquē possidere censetur. Actus hujusmodi sunt: amor, ut post DEUM & Christum nihil ames ante & supra Mariam, nihil majore affectu quā Mariam, nihil æquē atq; Mariam; sed Mariam ames post DEUM & Christum supra omnia alia creata. Nullius puræ creaturæ tantū exsatiaris amore, atq; amore Mariæ. Tales item actus sunt: actus appropriationis, venerationis, honoris, cultūs, & laudis Mariæ, fiduciæ & spei in ejus patrocinio, zeli promovendi honorem Mariæ, studij in adinventione modi & mediorum, per quæ Mariam colas, venereris, ejus honorem & devotionem erga ipsam promoveas, desiderij, quō desideres frui in cœlis conspectu Mariæ. Hos affectus frequentissimos & usitatissimos habe, & possidebis Mariam, illamq; in tua accipies.

6to. Accipere Mariam in sua, est illam accipere in possessionem perpetuam, ut semper sit tua, ut nunquam illam amittas, nunquam eam tibi eripi patiaris, ut Mariam in tua accipias, ita illam accipe, ut nunquam te deserat, ut tua sit in vita, tua sit in morte, tua sit in æterna felicitate, ut sit tibi Mater in vita, Mater in morte æternæ felicitati te generans, dum vivis in corpore, sit tibi Mater pulchræ dilectionis, & sanctæ spei, in felicitate sit tibi Mater plenæ & perfectæ dilectionis, & gaudij satiati.

7mo. Tandem accipere Mariam in sua, est ita accipere Mariam, ut in te, in corde tuo, in affectu tuo, sua omnia inveniat Maria, ut nihil in te sit, quod non sit totum Mariæ, quod non sit ejus honori dicatum & consecratum, quod non sit dignum Mariâ, quod ei offerri non possit, aut non offeratur, ut nihil neges Mariæ, ut nihil sit terrenum, quod non contemnas amore Mariæ, nihil quantumvis durum & asperum, quod amore Mariæ

riæ non libenter suscipias, & offeras Mariæ, ac etiam ipsi DEO, per manus Mariæ.

His consideratis reflecte te supra singula. Reflecte te an sis verus filius Matris hujus Sanctissimæ, utrum? & qua ratione illam acceperis in tua & sua, An illam acceperis in rem tibi præ omnibus purè creatis maximè gratam & amabilem, in Matrem, Reginam, Dominam, Patronam, & Advocatam tuam. In refugium tuum, in mediatricem inter te & suum Filium? In consolatricem in tuis crucibus & afflictionibus? An acceperis illam ita in sua, ut in illa, plurima imò omnia bona tua invenias, ut per ipsam habeas & habere velis omnia, an acceperis Mariam in objectum singulariter satiativum sensuum tuorum, in objectum potentiarum animæ tuæ, memoriæ, intellectus & voluntatis? An ipsa, sit objectum præcipuorum cordis tui affectuum, amoris, appretiationis, laudis, honoris, spei, fiducia, & similibus? An Mariam totis cordis tui medullis & totis præcordiorum affectibus ames, laudes, venereris? Estne Maria objectum, quod post DEUM & Christum te maximè oblectare, & exsatiare potest & solet? Tandem vide, an Maria in te sua omnia reperiat, an non sint in te ea, quæ ipsi displiceant, quæ aversetur, quæ non ipsi sunt consecrata?

Confundere, si non ita accipis & habes Mariam. Noveris non esse te Christi discipulum, non esse Joannem, non diligeris à Christo ut Joannes, si Mariam non recipis in tua, si Maria non invenit in te omnia sua. Fac proposita particularia, quæ plurima ex his considerationibus erui possunt; elice varios affectus.

Colloquium ad Pretiosissimam DEI Parentē.
Mater Sanctissima, ecce ego licet indignissimus filius tuus, filius tamen, quia tibi in filium sub cruce Domini commendatus, filius doloris, ad tesup-

plex recurro, atq; coram Sanctissima Trinitate, & coram te, ac cœlesti curia universa profiteor, quod te in Matrem, Dominam, Patronam, & Advocatam meam accipiam, pro taliqu; deinceps agnoscere & habere velim, quod te in mea accipiam, in te & per te omnia habere velim, tu abhinc eris obiectum gratissimum omnium sensuum meorum, omniumq; potentiarum animæ meæ, tu post DEUM & Christum eris meta desideriorum, affectuumq; meorum. A te vicissim humillimè postulo, ut tu quoq; me in tua accipias, inter filios tuos, inter servos & mancipia tua connumereris, & me sub tuam protectionem suscipias, ut totus sim tuus, ut nihil sit in me, quod non sit tuum, quod non tibi ex integro offeratur, tuoq; honori & amoris consecratur.

In fine: sub tuum presidium.

Meditatio præliminaris Ad faciendam electionem.

Preludium I. Imaginare Paulum Apostolum, dum persequeretur Ecclesiam, luce cœlesti, quæ illum circumfulsit, & voce illa Christi: *Saule saule quid me persequeris*, ex equo dejectum & prostratum atq; orantem. *Domine quid me vis facere.*

Preludium 2. Postula gratiam, quâ & tu illustratus cognoscas, & intelligas in electionibus & deliberationibus tuis quibusvis, sed maximè in electione statûs vitæ tuæ, qualiter te gerere debeas, & quid te facere oporteat.

PUNCTUM I. Audi illa verba Matth. 16. *Quid prodest homini si mundum universum lucretur, anima verò sua detrimentum patiatur, aut quâ dabit homo commutationem pro anima sua.* Et considera, his scripturæ

scripturæ verbis duo insinuari, quæ præ oculis mentis haberi debent in omnibus hominis deliberationibus & electionibus, sed vel maximè in electione statûs vitæ.

1mum. Quod in his omnibus præ oculis habendus sit, & irretortâ palpebrâ semper inspiciendus finis hominis, ad quem creatus est, qui est laus & gloria DEI, ac salus animæ, hic finis debet esse regula & norma, quâ omnes electiones & deliberationes regulari debent, ita, ut illa nonnisi, & illius mediij ac statûs vitæ electio, futura sit recta electio, quæ huic regulæ optimè congruit, nec ab illa, ulla ratione, deflectit; quod non aliter obtinetur, nisi per attentam finis inspectionem & considerationem.

2dum. Quod iisdem verbis insinuaturn est: Illa nonnisi media, & res sub electionem nostram cadere & venire debere, quæ ad finem creationis nostræ conferre, & ad illum consequendum juvare possunt; quæ verò fini huic repugnant, salutiq; nostræ adversantur, illas nullatenus in deliberationem vocandas esse.

Et sic mundus, ejusq; lucrum nullatenus electionis tuæ finis esse potest & debet. Quare in tuis deliberationibus, ad id, tanquam finem, tibi attendendum est, ut salutem animæ consequaris, ne animæ detrimentum patiaris; non verò ad hoc, ut mundum lucreris. Hoc sine præ oculis habito, illa media eliges, quæ tali fini optimè congruunt, hoc est, per quæ salutem es consecuturus, nec passurus animæ detrimentum.

Sed nec mundus ejusq; lucrum, medium esse potest, quod per electionem tuam intendas & eligas, si probabiliter prævideas, mundum ejusq; lucrum non fore tibi medium consequendæ salutis; sed potius impedimentum ejusdem, hoc est, non aliter te lucraturum mundum, nisi patiendo animæ detrimentum.

W5

Potest

Potest quidem quis in statu sæculari salvari, & hunc statum potest eligere, si Divino lumine illustratus viderit hunc statum sibi conducibiliorem esse ad salutem, præ quovis alio statu perfectiore. cæterum statum sæcularem, prout hic conducit ad salutem eligere, non est mundum lucrari. etiam in hoc statu, ut quis salutem consequatur, & mundum & animam suam in hoc mundo, hoc est, prout immersam, rebus ad mundum spectantibus, odisse debet, ut illam in vitam æternam custodiat, debet mundum abijcere, contemnere, illi renuntiare, affectum ejus exuere, illoq; ita uti, tanquam si non uteretur.

Mundus, quem lucrando, animæ detrimentum patimur, est mundus ille, qui DEO & Christo adversatur, qui est unus ex tribus DEI & animæ hostibus. Est mundus à Christo reprehensus, judicatus, & condemnatus. Est mundus, quatenus illi inordinato affectu & contra legem Divinam afficiuntur homines; talis mundi lucrum, ad consequendum finem hominis, medium esse non potest, potius enim est impedimentum finis, adeoq; eligi non potest nisi damnosissimè.

Mundum, per enumerationem suarum partium, sic describit S. Joannes Epist. 1. cap. 2. *Omne quod in mundo est, concupiscentia carnis est, concupiscentia oculorum, & superbia vite.* Hæc quatenus sunt prohibita, quærere, vel quærere cum inordinato & immoderato affectu, vel quidpiam tale, quod aliquid ex his tribus redolet, est velle lucrari mundum cum detrimento animæ. Verùm quid prodest ita lucrari mundum, ut animam perdas? quid prodest ita consequi voluptates, divitias, honores, si animæ detrimentum patiaris. Nihil certè prodest talis voluptatum, divitiarum, honorum consecutio, nihil (inquam) prodest ad finem hominis, imò quàm maximè obest. Impedimenta hæc

hæc sunt non media consequendæ salutis, adeòq; sub electionem vocari non debent.

Non infrequens, stulta tamen cogitatio est, hominem posse frui mundò, & his quæ ad mundum spectant, simulq; salvari. Frui mundò, mundum lucrari per immoderatum & prohibitum usum voluptatum, divitiarum, per nimium honorum ambitum, est deslectere à via salutis. Divitem fieri, & divitijs cor apponere dum affluunt, est gibbum Cameli assumere, aut camelum induere, & in eum transformari; est mammonæ servire. Quomodo ergo fieri potest, ut deslectendo à viâ, quæ ducit ad vitam, salutem, & vitam æternâ consequaris, & ad felicem æternitatis terminum pervenias? Quomodo fiet, ut camelum indutus, per foramen acûs transeas, & per portam angustam cælum ingrediaris, ut simul Deo & mammonæ servias? Nunquid colligunt de spinis uvas, aut de tribulis ficus? Spinæ & tribuli sunt divitiæ, voluptates, honores nimio, & sollicitô studiô, & contra legem Divinam quæsitæ, quando per hæc; vel cû his speras te salutem consecuturum; expectas à spinis uvas præstantissimas, ex tribulis vis colligere ficus; verum arbor mala non facit bonos fructus.

Sectaris nimio & inordinato, affectu terrena, transitorias, ac etiam prohibitas voluptates, varietates &c, hoc ipso talia accipis in commutationem pro anima tua, pro salute tua, reipsa & ipso facto propter illa renuntias saluti tuæ. O quàm misera & quàm deslenda hæc commutatio? Et hæc quidem tu accipis in commutationem pro anima tua; sed quam dabis Deo commutationem pro eadem anima. Tua quâ vivis anima non tua est, sed res totaliter Deo debita, Divini sanguinis pretiô empta; hanc cû perdideris, Deo eam de manibus tuis repetenti & requirenti, quam dabis commutationem pro anima tua? Vile illud pretium, pro quo

quo illam vendidisti & commutasti, exosum Deo & abominabile est. Pro argento & auro malè acquisito appendis animam; verum, ut monet Ecclesiasticus, non est hæc digna ponderatio animæ. Non corruptilibus aurô & argentô redemptus es, non potest his æstimari incorruptibilis & immortalis tua anima.

Non igitur bene & rectè mundus in maligno positus, & à Christo iudicatus atq; condemnatus, quæritur ab eo, qui salutem animæ consequi intendit, nec vult animæ suæ detrimentum pati, impedimenta finis, media ad finem esse non possunt nec possunt eligi nisi cū detrimento finis, cū detrimento animæ.

Quod quidem certum est non solum de illis rebus, quæ universaliter & respectivè ad omnes sunt media repugnantia fini, aut potius impedimenta finis, sed etiam de illis, quæ comparatè ad certam aliquam & determinatam personam, & respectu ejusdem, sunt media repugnantia fini, atq; impedimenta ejusdem, idq; ratione aliquarum intervenientium circumstantiarum, licet respectu aliorum, qui talibus circumstantijs obnoxij non sunt, possint & soleant esse media apta ad consequendum finem, quod tales res ab eo eligi non possint, respectu ejus sunt impedimenta finis. Et sic v. g. status sacerdotalis, beneficium Ecclesiasticum, respectu plurimorum possunt & solent esse media apta ad consequendam salutem, si tamen experientia infirmitatis & fragilitatis tuæ, atq; conscientia frequentiorum lapsuum te admonet, non futura hæc media opportuna tuæ salutis, sed potius quod hæc futura sint laqueus, quo infeliciter illaqueaberis, media hæc non sunt tibi assumenda; quia hæc respectu tui, non media, sed impedimenta sunt tuæ salutis, aliudq; proinde opportunius medium est tibi quærendum.

Ex his consideratis, hæc erue practica dicta-

mina, illaq; pro ininconcusso & firmissimo fundamento, cui omnes tuæ electiones inniti & infundari debent, tene. 1^{mo} Finem creationis tuæ, hoc est salutem animæ, in omnibus electionibus, præ oculis te debere habere. 2^{do}. ad hunc finem consequendum, illa non nisi media sub tuam electionem debere te vocare, quæ fini creationis tuæ non repugnant, sive ex seipsis & ex natura sua, sive expensis & attentis omnibus & singulis circumstantijs, tuam personam particularem concernentibus, quæ, si aliqua ratione, fini repugnant, protinus rejicienda sunt. Ad has deinde regulas & normam examina, sive quascunq; electiones tuas, sive idq; quàm maximè, electionem statûs vitæ, si fortè hoc negotium eligendi statûs aggressus, vel aggressurus es; hisq; regulis, nisi aberare velis, electionem tuam conformare stude.

PUNCTUM II. Audi illa verba Ecclesiastici 3. *Cor ingrediens duas vias non habebit successum.* Eaq; intellige hoc sensu, quòd cor per electionem alicujus rei sive medij, duos oppositos fines intendens, non possit habere bonum successum, ut scilicet utrumq; illum finem consequatur. Exempli gratiâ, si in quapiam electione, præcipuè verò in electione statûs vitæ, intendas & finem gloriæ Divinæ, ac salutis animæ tuæ, & finem aliquem vanum, mundanum, qualis finis esset consecutio honorum, dignitatum, carnis commodorum, oblectationum sensualium, divitiarum, proventuum pinguium, & his similibus. Talis electio non habebit successum, nec bene succedet in consecutione alterius finis.

Poteris quidem unum finem consequi, sed ab altero, nihilo certius excides, hoc est salutem animæ non consequeris. *Æternæ veritatis oraculum est. Non potestis DEO servire & Mammonæ. Nemo potest duobus Dominis servire.* Viæ hæ, ad diversos, eosq; oppositos ducunt terminos; ad quem
termi-

terminum ducit una, ab eodem abducit altera; una ducit ad salutem, altera ad interitum. Qui tales proinde vias ingreditur, non bono progredietur, successe, ad alterum terminum, idq; ad terminum meliorem, hoc est ad salutem non perveniet. Si vis successe bonum & optatum habere, unam tene viam, tene viam salutis, obliquas devita, solâq; rectâ viâ incede.

In omnibus quidem deliberationibus, sed maximè in ijs, in quibus delibera ur de eligendo vitæ statu, id singulariori studio curandum est, ut unicè DEUM, gloriam ipsius, & salutem animæ tuæ intendas, ut oculus tuus simplex sit, quò solum DEUM respicias, ut intentio tua sit depurata ab omni vano, carnali, & mundano affectu. Non bene hæc secum componuntur & conjunguntur: terra & Cælum, vanitas & gloria Divina, amor sui, & amor DEI, Dagon & Ara Domini. De ara cordis ejiciendus est Dagon, præcidendæ manus, præcidendi pedes, præcidendum caput & truncus abijciendus; sola arca Domini, hoc est gloria DEI, & salus animæ, in corde & in intentione tua locum habere debent. Reseca proinde omnes affectus mundanos, carnales, & vanos, Dagon hic ejiciatur, nimirum amor proprius, & inordinatus. Ejice non solû trabem, sed etiam festucâ de oculo tuo, DEUMq; solum simplici oculo, mundo corde intueri. Non enim misceri poterunt æterna caducis, spiritualia temporalibus, ut pariter sapias quæ sursum sunt, & quæ super terram. Si cor tuum duas vias ingressum fuerit, scandalizabitur in eis, ut monet idem Ecclesiasticus, & infelicitè aberrabit.

Ex his consideratis erue hoc dictamen, quòd in omnibus tuis electionibus etiam hoc pro universalissima & fundamentali regulâ habere debeas: Quam maximam curam tibi habendam esse, ne
duas

duas vias ingrediaris, ne duos diversos fines nec sibi subordinatos respicias, ne simul DEUM quæras & te ipsum, ut oculus tuus sit simplex, ut intentio sit pura, ut hanc tanquam, pupillam custodias, nec minimū pulvisculum terrenæ affectionis patiaris, persvasus omnino tantum te in spiritualibus studijs profecturum, quantum ab amore tui ipsius, & commodi proprii, ac rerum terrenarum affectione animum abstraxeris.

Reflecte te supra puritatem intentionis tuæ. In electione statūs tui, unamne ingrederis viam an duplicem? quid te moveat ad sanctiorem vitæ statum, ad statum v.g. Ecclesiasticum eligendum? si fortè ad hanc electionis partem magis te inclinari sentis? An unicè propter JEUM venias, ad IESUM, an certè, ut etiam Lazarum videas? DEUMne solum quæris, an te ipsum? salutemne animæ tuæ, an certè bona aliqua temporalia, an non spes aliquas venaris? omnino cura, ut solum DEUM, ejus gloriam, & animæ tuæ salutem quæras, unam hanc viam cor tuum ingrediatur, nec ab hac unquam deflectat. protestare, quòd DEUM solum in omnibus spectare velis. *Quid mihi est in cælo? & à te quid volui super terram, DEUS cordis mei & pars mea DEUS in æternum.*

PUNCTUM III. Audi illa verba Lucæ 12. *Quærite primum Regnum DEI, & Justitiam ejus, & hæc omnia adiicientur vobis.* Et ex illis discite: inter actus voluntatis, quos homo habet circa finem & media, quis ordo servari debeat, quem non sit fas pervertere, adeoque qualiter electiones nostræ fieri & ordinari debeant? Finis primus esse debet in intentione, hic primò intendi, expeti, & quæri debet, tum deinde cognita conducibilitate & aptitudine mediorum ad finem intentum consequendum, eligenda sunt media conducentia ad eundem finem, non è contra. Præposterè proinde

inde agit, qui primò eligit quoddam medium, & postquam se determinavit ad tale medium, tum deinde quærit modum & rationem, quâ per tale medium finem consequi possit. Talis electio in re est constitutio medijs pro fine, & finis assumptio pro medio, vel certè est finis assumptio pro re, quâ occasione alterius principaliter intenti, obtineri etiam & acquiri posse existimatur.

Cum ergò finis hominis sit Regnum DEI, salus animæ; hæc primò quæri debent, tum deinde quærenda media ad hunc finem, quærenda Justitia & vita Justitiæ, per quam in Regnum DEI pervenias. Pervertis ordinem, si non habita ratione finis tui, eligis primùm statum determinatum, v.g. statum conjugalem, matrimonialem, aut etiam statum spiritualem, & Ecclesiasticum, ac tum deinde cogitas & inquiris, qua ratione hic status poterit te juvare ad finem tuum, hoc est ad animæ salutem consequendam, nec aliâ viâ, nisi hanc ad salutem pervenire contendis. Similis es infirmo, qui prius eligit medicinam, ignarus, an hæc suo morbo sanando sit idonea, tum deinde vult & intendit, ut hæc ipsum sanet; & viatori, qui viam prius eligit, tum deinde nolendo illam dimittere, inquit, qua ratione per talem viam possit pervenire ad terminum sibi constitutum; es miles, qui plumbeum enssem petit, ac illò vult hosti suo caput præcidere. Turrim ædificas, non computato sumptu si habeas ad perficiendum; aggredieris hostem, ignorans, an habeas vires ad resistendum, eumq; debellandû.

Ut securè procedas, sine tuo præ oculis constituto, gloriâ nimirum DEI, & animæ tuæ salute, non aliter media elige, nili præmissò examine, quæ media ad finem illum conducunt, & quæ ad consecutionem ejusdem te juvare possunt; collatisq; & comparatis secum invicem medijs, illud elige, quod conducibilius apparebit, & per quod securius

securius obtinetur finis. Ita fiet, ut in electione non aberres, ut quæras primum Regnum DEI, tum deinde Justitiam ejus; per quam Regnum DEI obtinetur, ut intentionem finis non præcedat electio medij, nec pervertatur ordo, qui servari debet; tandem ut recta in DEUM tendas non oblique, nec eum perversè ad vota tua trahas.

Existimamus frequenter quærere nos Justitiam DEI, & quærimus mundum, quærimus carnem, quærimus vanitatem, quærimus corporalia atq; sensualia commoda & emolumenta. Justitiam quærimus sed non veram, at nonnisi apparentem, & quam DEUS aliquando rigidè judicabit. Existimamus, quod electione illa, quâ ex nimio & præcipiti affectu statum quempiam eligimus, non facto prævio examine, an hunc statum eligendo, Regnum DEI & salutem animæ consequemur? non facta disquisitione, quid nos impellat ad talem electionem? an non ratio aliqua humana, vana, carnalis, mundana, politica, saltem occultè se insinuans? existimamus inquam, quòd ingrediamur viam salutis, & ecce frequenter illam tenemus, quæ nos ab hoc termino abducit, & in perditionem præcipitat. Temporalia quærimus, & non Regnum DEI, quæ simpliciter quæri non debent, & non quæsita licèt, adiicienda nobis, quantum ad vitæ sustentationem necessaria erunt, appromittuntur. aut certè moderatè, sine effusione nimia ad exteriora, sine adhæsione affectûs ad ipsa, in tantum nonnisi quæri debent, in quantum conferunt, & juvant ad majorem Divinam gloriam & animæ salutem consequendam.

His consideratis, hoc dictamen practicum, tanquam certissimam & infallibilem bonæ electionis regulam, & firmum fundamentum, supra quod ædificare debes, præter priores regulas tene: nulum te medium prius eligere debere, antequam

finem intendas & præcognoscas; media autem, præcognito fine, non aliter eligenda, nisi bene ponderatâ & examinatâ ipsorum conducibilitate ad finem.

Reste te deinde supra electiones tuas, si ve jam factas, quæ adhuc mutari possunt & corrigi; easq; ad hanc regulam, non minus atq; ad regulas duorum præcedentium punctorum examina, an omnibus his regulis bene cohæreant, & ut cohæreant, curam & diligentiam adhibe; si ve supra electiones faciendas etiam rerum mutabilium, ut etiam in his, iisdem regulis, & principijs dirigaris; ut ab illis, ne ad latum unguem discedas; ita enim fiet ut tuæ electiones tales sint futuræ, propter quas ipse in numerum electorum connumereris. Fac proposita. Elice affectus.

Colloquium instituendum ad Sapientiam Incarnatam Christum Dominum, cui humillimè supplica, ut, qui tui gratiâ factus est via, veritas, & vita, ducat te & dirigat in viam salutis, instruat te & imbuat principijs altissimis indubitatae veritatis, & infallilibus, quibus te in tuis electionibus regulare possis, & quæ sequendo non aberres; in eoq; statu vitæ te constituat, ut ipsi & in ipso vivas, imò ipse in te vivat, atq; ut, post mortalem vitam, vivas DEO, & ipso fruaris in beata æternitate.

In fine: Anima Christi.

Meditatio

Proponens primum modum faciendæ bonæ electionis.

Preludium 1. Imaginare te in ea circumstantia positum esse, in qua proficiscenti ad aliquem

quem terminum, plures viæ vel semitæ occurrunt, te interim ignorante, per quam, ad terminum præfixum, bene & securè pervenire possis.

Praeludium 2. Postula à Deo gratiam, quâ illuminatus, illam viam salutis, & illum ulterioris vitæ statum eligas, quem tenendo, à termino salutis & felicitatis æternæ non aberres.

PUNCTUM I. Audi illa verba S. Petri Apostoli, aliorumq; qui electuri in locum Judæ proditoris, duodecimum Apostolum, sic Deum orasse referuntur. Act. I. *Tu Domine, qui nosti corda omnium, ostende quem elegeris.* Et breviter mente recolle historiam electionis, quâ S. Mathias, à congregatis Apostolis, alijsq; Christi discipulis, electus & substitutus est in locum Judæ proditoris, annumeratusq; est undecim Apostolis. In qua historia, hoc potissimum considera, quòd illa Electio non fuerit inchoata, vel saltem non fuerit perfecta & absoluta, absq; oratione & invocatione Divini luminis. Orantes dixerunt. *Tu Domine, qui nosti corda omnium, ostende quem elegeris.* Ex cujus actus & orationis consideratione, illud in tuum deriva commodum, cumq; percipe fructum.

Imò. In omnibus quidem electionibus, sed maxime in electione rerum majoris momenti, rerum immutabilium, qualis est electio status vitæ, quem ad mortem usq; tenere debes, non debere te temerè procedere, non esse hanc electionem faciendam secundum humanam quamcunq; inclinationem, nec secundum rationes temporales & politicas. Existimandum potius est, hujusmodi electionem, rem esse gravissimi momenti, maxime sanctam, opus Divinum, adeoq; consulto Deo per orationem, imò sæpius exorato, invocato etiam Beatissimæ & Sanctorum patrocínio, aggrediendū esse tantæ deliberationis negotium. Electio status vitæ, est investigatio viæ, quâ sibi ad salutem

pervenienendum est, quam si teneas, securus esse possis, te non aberraturū. In qua deprehendenda, cum tu facile decipi possis, siquidem ut monet Sapiens. *Est via quæ videtur homini recta, novissima verò illius ducunt ad mortem.* Quærendus est Dux, talis viæ gnarus, qui tibi hujusmodi viam ostendat, quæ te ad optatum perducatur terminum. Talem autem ducem meliorem habere non potes, quam ipsum DEUM. Ille est qui nec falli nec fallere potest, ipse novit corda hominum, hoc est, perspicacissimo intellectus sui lumine cognoscit, antequam sint, omnes tuos actus, idq; non solum actus liberos, qui absolute sunt futuri, sed etiam condicionate futuros, taliq; cognitione & scientiâ directus, præparavit ab æterno, varia gratiæ suæ auxilia, fecit varias series & coordinationes gratiarum, idq; non semper efficacium, sed permixtas aliquas gratijs pure sufficientibus; aliquam seriem conjunctam cum pœnitentia finali, cum finali perseverantia in gratia; alias series non conjunctas tali perseverantiæ aut pœnitentiæ. Hasq; series, diversis statibus, respective ad tuam personam alligavit, ita nimirum ut si hunc statum elegeris, habiturus sis in eo talem seriem gratiarum, quæ terminabitur gratia finali & felici morte; si fortè alium statum elegeris, non habiturus es similem gratiarum seriem, sed potius illam, quæ carebit finali perseverantiâ in gratia, quæ terminabitur statu peccati mortalis, impœnitentiâ finali, infelici morte, & æterna animæ damnatione. Orandus proinde DEUS est, & ardentissimis votis ac suspirijs, etiam longiori tempore continuatis & repetitis postulandum lumen à Patre luminum, ut qui novit corda hominum, qui cor tuum intuetur, qui tibi auxilia gratiæ præparavit, variasq; series gratiarum coordinavit, diversisq; vitæ statibus diversas alligavit, ut eum tibi statum vitæ ostendat, in eam te viam dirigat, quâ incedendo

dendo, securè ad terminum æternæ felicitatis pervenias, tuæq; animæ salutem consequaris.

2dò. Hoc in tuum commodum derivare potest. Negotium electionis statûs vitæ tuæ ingressurus, quid à DEO postulare debeas? non satis est si postules, ut DEUS electionem tuam, cum eam perfeceris, & apud te fixum, determinatum, & constitutum habueris, in hoc vel illo statu vitam ducere, & DEO immolari, ut, inquam, talem electionem approbet, ratam & acceptam habeat, in eaq; te roboret & confirmet, ac tuis votis annuat, sed etiam, antequam quidquam eligas & statuas, orare & postulare debes, cum omni indifferentia & animi præparatione, ad id volendum & eligendum, quod Divinæ voluntati placitum fuerit, ut DEUS ostendat suâq; manifestet voluntatē, quē statû vitæ ipse pro te elegerit, & in quo te salvare decreverit.

Præposterè & minus prudenter, ac etiam damnosè & periculosè agit, qui post factam à se proprio arbitratu electionem, cum fixa & determinata voluntate & adhæione ad rem electam, tum primum recurrit ad DEUM, ut ipsam ad vota sua trahat, ab eo exigens, ut electioni suæ se accommodet, & suæ voluntatis ductum sequatur. Non vult quidem DEUS ut ipse, in hoc electionis negotio, operetur solus, ut solus ille eligat statum nostrum, ut ad hunc, quem ipse elegerit, nos compellat & necessitet, sed vult eundem statum etiam à nobis eligi, quia vult ut nobis nostram libertatem servet integram & illæsam, ut cum majori nostro merito hac in parte procedamus. Vult nihilominus simul, ut Divina ejus electio præcedat nostram, nostræ electiones conformentur Divinæ, ab eaq; dependeant, ut voluntas creata sequatur ductum voluntatis Increatæ, non ut nos DEUM trahamus in vota & sententias nostras. Talem si indifferentiam habueris, poteris securè & cum fiducia orare:

X₂

Domine

Domine qui nōsti corda omnium, nōsti etiam me ad omnem nutum tuum paratissimum esse, nihil statuere, nisi quod te, de me constituisse didicero; ostende igitur quem pro me elegeris statum, quam viam designaveris, qua ad te pervenire debeam.

Huic tamen indifferentiæ, ne minimum adversatur fixa voluntas, spectans & unice intendens gloriam DEI, tuæq; animæ salutem; imo tali voluntate regulandæ sunt quæcunq; electiones nostræ, & in fundamento talis fixæ & determinatæ voluntatis, quæ quoad hoc est conformis voluntati Divinæ, orandus est DEUS, ut per interna Lumina, & per ratiocinationes à te faciendas, tibi manifestare velit, in quo vitæ statu te gloriam DEI, & animæ tuæ salutem quærere oporteat.

Protestare hanc indifferentiam, & actum recognitionis in Divinam voluntatem elice, lumenq; cœleste & intellectus tui illustrationem implora, ut cognoscere possis Divinam circa te voluntatem, atq; ut sanam, & Divinæ electioni conformem electionem statûs ulterioris vitæ tuæ facias. DEUS meus, & Creator meus, supreme rerum omnium Dominator, summa felicitas & omne bonum meum, compareo indignus ante conspectum Divinæ Majestatis tuæ; & cum sim vilissima creatura tua, ad te laudandum, tibiq; serviendum, te aliquando fruendum creata, voluntatem meam à te acceptam, tibiq; omnibus titulis debitam, tibi integerrime subjeicio, ac tuæ sanctissimæ voluntati, tanquam supremæ & infallibili regulæ, conformare desidero, & hoc unice amplecti volo, quod tuæ voluntati placitum fuerit, sed vel maxime in electione statûs vitæ meæ, ductum voluntatis tuæ sequi, fixum, determinatum, & omnino constitutum habeo. Tu Domine nōsti corda omnium, meum quoq; cor intueris, tu nōsti quid gloriæ tuæ expediat, quid futurum est cum salute ani-

mæ

meæ meæ. Tu ab æterno considerasti omnes vias & semitas meas cognovisti, quâ via ad te sim per-
venturus, quibus infelicitè aberraturus. Statue i-
gitur de me, quidquid tibi placet, cui placere non
potest, nisi gloria tua & salus mea. Ex plenitudi-
ne scientiæ tuæ, elige statum, in quo tibi serviam,
qui gloriæ tuæ promovendæ maximè idoneus vi-
sus fuerit, in quo me salutem consequi volueris,
quem tu elegeris, is mihi acceptissimus erit. Re-
nuntio proinde omnibus inclinationibus & affectio-
nibus meis, omnibus respectibus vanis, sensualibus,
& humanis, qui me alio fortè abducere volent.
Offero me ad omnes cruces, afflictiones, egestatem,
& maximas quascunq; ærumnas. si viam crucis,
quâ ad te perveniam, mihi præparasti, paratum
me ad omnia invenies, paratum cor meum. DE-
US, paratum cor meum. Illud à te humillimè
postulo, ut hanc voluntatem tuam, notam mihi
facias. Ostende Domine, quem statum vitæ pro
me elegeris. Tua sancta illustratione dirige me in
viam salutis, quâ ad te pervenire possim. Quod
eum ostenderis, doce me facere voluntatem tuam,
doce me exequi quæ inspiraveris, doce me, viâ
quam monstraveris, progredi de virtute in virtu-
tem. Effice ut tibi serviam, juxta beneplacitum
tuum, & ut tuam in omnibus quærendo gloriam,
eam, ad quam me creasti, consequar animæ meæ
salutem.

PUNXUM II. Recole memoriâ alia, quæ
præterea in electione S. Mathiæ in Apostolum in-
tervenerunt. Nimirum Imò Quomodo S. Petrus
Apostolorum Princeps, congregato sancto illi cœ-
tui reliquorum Apostolorum & discipulorum Chri-
sti, proposuerit finem faciendæ electionis, qui per
eam spectari debuit, illis verbis: *Oportet ex his vi-*
ris, qui nobiscum sunt omni tempore, quo intravit
& exiit inter nos Dominus JESUS, testem resur-

rectionis ejus nobiscum fieri unum ex istis. 2do. statuerunt sancti Apostoli duos ex congregatis discipulis, JOSEPH qui cognominatus est justus & Mathiam, ut ex his unus eligeretur. 3tio post orationem ad DEUM factam, dederunt sortes, & *Cecidit fors super Mathiam.* Hæc recolens, considera etiam in electione statûs vitæ tuæ, quàm faciendam aggredieris, ista proportionatè & accommodatè à te observanda esse. Ac imprimis, ut in meditatione præcedenti alias considerasti, & cujus meminisse maximè debes, hoc electionis negotium aggredientem, oportet te habere præ oculis finem, quem per electionem intendere debes. Finis autem hic non debet esse alius, nisi laus & gloria DEI, ejusq; obsequium & salus animæ tuæ. Ista unice quærere, & spectare debes, nulla ratione alios fines respicere, non tua commoda sensuaria, non carnem & sanguinem, non vanitates, non te ipsum, ita, ut illum statum vitæ eligas, in quo DEUM laudare, idq; perfectius laudare, ejus majorè & majorè gloriâ quærere, & tuæ animæ salutem certius & securius consequi possis.

2do. sub hanc electionem non posse venire nisi illos vitæ statûs, qui fuerint vel esse censentur media apta ad consequendum præfixum finem. sicut Sancti Apostoli, illos viros statuerunt, qui cum illis erant omni tempore, quo exivit inter illos Dominus JESUS, adeoq; qui possent esse testes resurrectionis ejus, quales nonnisi existimabant futuros idoneos ad munus Apostolatûs. Pariter & tu illos statûs vitæ assumes, pro objecto tuæ electionis, quos existimas fore media icône, ad finem creationis tuæ consequendum. Illos verò statûs ab hac electione & deliberatione rejice, de quibus rationabiliter persuasus es, quod te non juvabunt ad finem tuum, aut etiâ in eo consequendo impediant.

3tio. sicut Sancti Apostoli, præmissis his quæ dicta sunt, præmissâ etiam oratione, quâ orârunt,

ut,

ut DEUS ostenderet, quem elegerit, in his non steterunt ultimo, sed progressi sunt ulterius ad explorandam DEI voluntatem, per sortes quas miserunt, ita & tibi non sistendum esse in sola oratione & desiderio sciendi, in quo te DEUS vitæ statu esse velit ; sed per alios etiam modos & media, explorandam esse DEI voluntatem. Incurius es circa salutem tuam, si contentus desiderio serviendi DEO, & oratione ad DEUM, ut te DEUS vocet ad suum servitium, nihil ultra agis.

4to. Licet Apostoli in electione Sancti Matthiæ usi sint sortibus, per quas explorabant Divinam voluntatem & electionem ; tamen id factum ab illis fuit ex speciali & extraordinario instinctu, exemplo à nobis non praticando, nec imitando, sed loco sortium, utendum est intellectus ratiocinio, inquirendas nimirum esse varias rationes inclinantes in hanc vel illam electionis partem, pro hoc vel illo statu eligendo aut reiiciendo, rationumque talium inter se collatione & comparatione, explorandam Divinam voluntatem. Pro quo enim statu, ex Divina Illustratione, habebuntur rationes fortiores & validiores, magisque nostram voluntatem impellentes, quæ nimirum svadebunt, quod talis status electione, remotior sis futurus à quærendis terrenis & sensualibus commodis, vanitatibus, & quæ aliquomodo proprium amorem redolent, quod sis futurus remotior à proximis peccandi occasionibus, periculosisque conversationibus, & quod plures diaboli laqueos sis evitaturus ; uæ item svadebunt, in tali statu magis à te promovendam esse gloriam DEI ; animæque tuæ salutem certiorẽ & securiorem reddi : existimandum est talibus rationibus, tanquam sortibus ostendi tibi, quod hunc statum DEUS pro te elegerit, adeoque ipsum etiam à te eligi debere, nec tali electione te aberraturum esse. Hæc ut in deliberatione de

statu tuo observes, & ut tuis medijs Divinam voluntatem explores stude, & cave, ne ab his in aliquo recedas.

PUNCTUM III. Audi illa verba Eccles. 15. *Ab initio DEUS constituit hominem, & reliquit eum in manu consilij sui.* Quibus verbis significatur DEUM ita hominem creasse, ut voluerit eum esse liberum, volueritq; eum suas electiones, ad quas liber est, facere ex prævia deliberatione, consilio, & consultatione, hoc est, cognitis in utramq; partem rationibus, ipsq; bene ponderatis, & secum invicem sufficienter collatis, quodsi in omnibus ita procedendum est, maxime hic modus tenendus est in electionibus rerum immutabilium, à quibus non est fas recedere, qualis electio, ut alias dictum, est electio statûs vitæ. Hoc modo tanquam medio maxime opportuno, & ad præfixum finem plurimum conferente, etiam tu utere, illumq; nunc re ipsa exequere.

Statue *imprimis* ob oculos mentis, duos Diversos status, maxime & quasi genericè à se differentes, quales sunt: status matrimonialis & status Spiritualis ac Ecclesiasticus. Et inquire rationes moventes & allicientes, sive ad hunc, sive ad illum statum eligendum: vide, quomodo uterq; hic status juvare te possit ad finem tuum consequendum, gloriam scilicet DEI & salutem animæ tuæ? quæ in uno quoq; hoc statu, possint esse media & adminicula ad eundem finem? quæ, è contra, in alterutro sint discrimina & pericula excidendi à fine ultimo? an & qui modi, quàm efficaces, declinandi talia pericula? confer deinde invicem omnes has rationes, & vide quæ magis præponderent, in quo statu magis est per te promovenda gloria DEI? in quo es securior salutis æternæ, per quem magis assimilari Duci tuo Christo in quo propius eum comitaris, ejus vestibus & insignibus indu-

eris. &c. Collatis ita rationibus, advertes facile quò tua magis a Divino spiritu impelletur voluntas? quid tibi sit eligendum? quodsi senties impelli te interius ad eligendum v.g. statum spiritualem Ecclesiasticum & sacerdotalem.

Progredere 2do. ad deliberandum & consultandum an sæcularem sacerdotem an religiosum potius te fieri expediat? etiam in hac deliberatione, utere simili ut ante ratiocinio, hoc est rationes sive ad illum statum impellentes, ab hoc item vel illo statu retrahentes inquire, bene expende, & secum invicem confer. Vide nimirum utriusque status commoda, non illa, quæ carnem sapiunt, ab his enim quærendis procul esse debes, sed commoda Spiritualia, & adminicula ad tuum finem consequendum expende. Expende item in utroque statu varia salutis tuæ discrimina & pericula, & illa ad invicem inter se compara. Attende, in quò statu sit major commoditas obsequij Divini, & gloriæ DEI promovendæ, salutis item propriæ, imò & salutis proximorum consequendæ, ubi frequentiores, & fortè magis periculosæ ac etiam proximiores occasiones peccandi, aliaq; his similia. Quibus debite expensis, invocato cœlesti lumine tecum dispice, quis status tibi (tibi inquam nam, & supra te ipsum nimirum supra inclinationes, infirmitates animæ tuæ, alia huiusmodi habenda est reflexio) ex duobus his statibus congruat? in quò certior & secutior est tua salus, & ad quem te interius impelli sentias? si senseris te impelli ad eligendum statum religiosum.

Assume 3to. Sacros diversos religiosos ordines & repetito pluries simili ratiocinio, ibis per varias eorundem ordinum differentias específicas, prius per subalternas, tum deinde per differentias inferiores, donec tandem ad duos particulares ordines specie quasi infima differentes perveneris, & ex his unum certum elegeris. Et sic deliberabis

primò an religio tibi sit eligenda, quæ solitudinem & vitam solitariam atq; contemplativam proficitur, an certè ea religio quæ occupatur non solum circa propriam, sed etiam circa proximorum salutem curandam, & proficitur vitam mixtam ex activa & contemplativa. Procedes deinde ad species alterutrius hujus religiosæ vitæ sublaternas. Si v. g. senties te inclinari, ex rationibus æternis bene expensis, ad eligendam religionem quæ proficitur vitam mixtam, deliberabis an eligenda tibi sit aliqua Religio Clericorum Regularium, an certè Religio alia v. g. Fratrum mendicantium. Ulterius progredieris ad inferiores species, tandem ad species infimâ differentiâ à se differentes.

Has deliberationes facturus & repetiturus ratiocinio, illud quidem pro certo habe, quod omnes sacri religiosi ordines ab Ecclesia approbati, ex speciali Divina inspiratione sint instituti, quod mortales, ad consequendum finem suum, juvare possint non tamen omnes eodem modo. Ad illud adverte diligenter, quod non omnes tibi æqualiter congruant; nam imprimis non omnes æqualiter fortè conducunt tuæ complexionem, tuis viribus talentis &c. Non omnes etiam religiosi ordines eodem modo & ratione tendunt ad perfectionem, DEUMq; laudare ac illi placere student; unusquisq; ipsorum proposuit sibi specialius aliud & aliud consilium Christi adimplendum, aliam & aliam ipsius virtutem studiosius imitandam. Quidam sacri ordines toti sunt in imitanda perfectissima Christi paupertate, alij in humilitate & sui abnegatione, alij in imitanda ejusdem obedientia, alij volunt excellere in charitate, quâ Christus dilexit mundum, ut mundus salvetur per ipsum, ex quâ venit vocare peccatores, hominumq; salutem operari. Ad hæc, non in omnibus sacris ordinibus, totidem & æquè efficacia sunt media, & admini-
cula

cula ad perfectionem consequendam. Non omnes etiam eodem studio & æquali conatu tendunt ad perfectionem, non in omnibus æqualiter viget disciplina, & religiosi instituti observatio, non ubiq; est par Superiorum vigilantia, conveniens irrepentium defectuum correctio, & in delinquentes animadversio.

Ad has & quasq; alias particulares Religionum diversarum differentias, proprietates, consuetudines te reflecte, & ratiocinare, quid gloriæ Divinæ, quid salutis tuæ magis conveniat, seposito omni carnis affectu, & sensualium commodorum appetitu. Et si invocato Lumine, cælesti, & rationibus spiritualibus supernaturalibus, ijsq; præponderantibus, senseris te inclinari ad unum aliquem determinatum sacrum ordinem, electionem conclude, & factâ reverentissima gratiarum actione pro tali illuminatione & tanto DEI beneficio, opem Divinam implora, ad exequendum quod statuisti, quodsi te plenè determinare necdum poteris, re ulteriori deliberationi relictâ, conclude resignatione tui in DEI voluntatem, & postulatione ulterioris luminis, prout habes in primò puncto præsentis meditationis.

Meditatio

Proponens secundum modum faciendæ electionis.

Præcludia eadem quæ præcedentis meditationis.

PUNCTUM I. Audi illa verba Isaïæ 19. *Ubi sunt Sapientes tui? annuntient & indicent tibi, quid cogitaverit Dominus?* Et considera, siquidem modo per præcedentem meditationem proposito; & per ratiocinium tunc institutum circa varios vitæ status,

status, non es à DEO illuminatus, & permotus efficaciter ad eligendum unum ex ipsis; alium adhuc modum adhibendum, & aliâ via in hoc negotio procedendum esse. poterit is felicior esse, poteritq; DEUS gratiam, quam dare distulit, si constantes fuerimus in ea quærenda, misericordissimè elargiri. Modum hunc insinuatum habes in adductis Isaiæ verbis. Nimirum petes assequi quod intendis, consulendo Sapientes, qui tibi indicent & annuntient quid cogitaverit Dominus. Quare ultra consilium proprium & domesticum, quod habes & habere poteris, rationes varias pro utraq; electionis parte studiose adinveniendò, benè expendendò, illas invicem conferendo, & observando quæ & quantum præponderent. Consule etiam & adhibe alios consiliarios, qui & Sapientes sint, & sint tui amici, tibiq; benè velint, adeoq; qui & possint & velint tibi consulere. Tales consiliarij sunt: Christus Dominus, Beatissima Mater ejus, S. Angelus Custos, tuq; Sancti Patroni, alij etiam homines, in hac vita mortali degentes, mors ipsa, Judicium Divinum, tandem vita altera, quâ post mortem corporis victuri sumus.

Et *imprimis* ipse Christus, qui est Sapiëntia æterna, qui est amicus tuus benevolentissimus, quò nemo tibi potest melius velle, sit tibi in hoc negotio consiliarius. Ipsum crucifixum arctè complexus, inter oscula Sanctissimorum pedum, reverentissimè consule, quem statum vitæ eligere & tenere debeas, sicut illum consulait Paulus Apostolus. *Domine quid me vis facere?* Et existima Christum tibi consulere statum illum, qui erit maxime conformis ipsius evangelicis consilijs, in quo perfectius poteris imitari ejus exempla, in quo illum tanquam regem & ducem tuum propius comitaberis, in quo indueris ejus vestibus & insignibus, quales velles sunt pauperies, contemptus, ignomi-

nia,

nia, & insipientiæ titulus. In quo illi pauperi, spreto & illuso, magis assimilaberis; dicet ille tibi consilium à se exquirenti : *Exemplum dedi vobis, ut quemadmodum ego feci, ita & vos faciatis.* Illam etiam hic repetet adhortationem, quam habes in meditatione de regno Christi. Hoc consilio ac responso accepto à Christo, vide & bene expende: Ex duplici illo vitæ statu, circa quos in ratiocinio, per præcedentem meditationem instituto, stetisti, nec ad unum te determinare poteras, cui statui expressæ in hoc Christi consilio conditiones & proprietates, perfectius & magis propriè conveniunt, atq; illum elige.

2do. Sanctissima virgo Sapientiæ incarnatæ Mater, S. Angelus Custos tuus, Sancti tui Patroni, illi maximè, quorum opem & patrocinium jam alias expertus es, ad quos majorem præ alijs devotionem habuisti & habes, saluberrimum consilium tibi dare poterunt, si ad ipsos, sive per internæ suspiria, & invocationem ipsorum opis, ac patrocinij, sive per longiores devotiones in hunc finem institutas, recurras, vel etiam mente revolvās & tantisper recogites. Si præsentem & aspectabilem haberem Beatissimam Virginem, S. Angelum Custodem, SS. Patronos illos & illos, quibus singulariùs affectus sum, ipsosq; de statu vitæ meæ consularem, quid illi mihi consulerent, quem vitæ statum eligendum svaderent? atq; si in mentem tibi venerit quòd hi sancti consiliarij, hunc potiùs statum quam illum eligendum svaderent, acquiesce tali consilio, & illud tibi sequendum esse existima.

3tio. Ex hominibus viventibus potes habere consiliarios, si adhibeas viros prudentes, spirituales, non interessatos, & qui per consilium, quod tibi daturi sunt, nihil aliud quærant, nisi laudem & gloriam DEI, atq; animæ tuæ salutem. Imaginare tibi quempiam talem ex ipsis, & tecum perpende.

Si

Si hujusmodi viro prudenti & sancto exponerem, me in tali esse deliberatione, nec posse me resolvere ad unum potius statum eligendum, ipsiusque consilium expeterem, quid ille mihi consuleret? huncne potius an illum vitæ statum svaderet? Consilium quod ab ipso te accepturum sperares, existima tale esse, quod si sequaris, & juxta illud tuam electionem facias, te non esse aberraturum. Nisi etiam quid specialiter obsit, optimum & consultißimum est, ut defacto, sub obligatione secreti, rem totam confessorio tuo, vel alicui viro prudenti & timorato communices, ut omnes rationes, five allicientes & attrahentes, five retrahentes ab hoc vel illo vitæ statu, aperiās, ejusq; petas consilium. Consilio & responso tali, quod dabitur (maximè si postquam non unum sed duos aut tres hujusmodi viros exquisieris, & consilium eorum conforme fuerit) tali inquam consilio, securè stare et acquiescere poteris, & juxta illud, tuam electionem perficere. Tu etiam ipse tibi consiliarius hac ratione esse poteris. Cogita, si amicus tuus bonus, cui velles quàm optimè, consilium tuum peteret circa materiam præsentis deliberationis, optaretq; à te consilium non qualecunq; sed saluberrimum accipere; quod illi responderes & svaderes, hoc responsum exequendum tibi esse existima, neq; enim in retanti momenti, potes aut debes alteri melius velle, quàm tibi ipsi.

4^{to}. Mors ipsa potest esse consiliarius, qui tibi annuntiet & indicet, quid de te statuerit & cogitaverit Dominus. Hujus consiliarij sententia te non fallat, O mors quàm rectum est judicium tuum! Porro mortem tali ratione consule: cogita, si nunc tibi moriendum esset, & adhuc posses meritorie eligere unum statum ex his, de quibus deliberas, quemnam potius tunc eligeres? in morte etiam interrogatus, in quonam statu, si id tunc in

optio-

optione tua esset, mori exoptares? in quo te statu vixisse & mortem oppetere gauderes? ad hanc interrogationē quid responderes? illa responsio fit tibi regula, juxta quā convenit electionē tuā te facere.

5^{to} Assume adhuc in consiliarium tuum, illud iudicium, quod, constitutus ante DEI iudicis tribunal, formaturus es, vel certē, quod habiturus es in alteram vitam translatus, & in æternitate felici vel infelici positus. Quod tunc erit iudicium tuum, idem nunc fit in præsentī deliberatione. Judicaturus forsitan es, quod consultissimē fecisses, si hunc potius elegisses statum, quā illum, quod de tali electione facta in vita, minor tibi reddenda esset ratio; quod tali electione consecutus fuisses salutem æternam, à qua fortassis (avertat id DEVS optimus) excidisse te, serò nunquam satis dolebis. Ex tali iudicio tunc habendo, inferes, quid in præsentī, facto opus sit, quem statū eligere debeas?

Ex his consiliarijs cū cognoveris Divinam circa te voluntatem, non est cur ultra fluctues in hanc & illam partem; vide an non durum tibi sit, contra tot stimulos calcitrare? Time illam comminationem Christi: servus qui cognovit voluntatem Domini sui, & non fecit secundum voluntatem ejus, vapulabit multis. Resolve te ad suscipiendum illud vitæ institutum, ad quod per tales illustrationes & inspirationes Divinas vocaris. Quod cū feceris, Deo humillimē age gratias pro tanto beneficio, quod inter maxima, quæ in vita tua optare vel sperare potes, numerari debet, & postula gratiam, ut qui dedit velle, det & perficere, quod si aliquid adhuc te retardat, quominus electionem perficias; ut negotio huic finem impone-
re possis, progredere ad

PUNCTUM II. & audi verba illa Joan. 3. *spiritus, ubi vult, spirat, & vocem ejus audis.* Et considera post adhibitum etiam secundum electionis

modum, puncto præcedenti propositum, ut vocem Domini non audias, difficile id persuaderi posse. Timendum potius est, ne, dum Spiritus Sanctus ad cor tuum loquitur, ad vocem ejus obsurdescas; vocem quidem audias, sed non percipias, nec intelligere velis, quæ sunt tibi ad salutem. Talis obsurdescentiæ, duæ causæ, ex adductis S. Joannis verbis colligi possunt.

Ima Quod spiritus Sanctus, per suam inspirationem & vocationem, quâ te vocat, spirat ubi vult, hoc est, ea tibi inspirat, quæ ipsi placent; suo afflatu & affatu, ad eum te vitæ statum inclinât, quem ipse ex altissimo suo consilio elegit, non quo tu vocari velles. Fortassis spiritus S. taliter spirat: ut Christum sequaris pauperem, illusum, contemptû, ut eum eligas statum, eam religionem, quæ per institutum suum, his Domini sui vestibis, & insignibus præoptat vestiri. Tu verò ab his abhorres, non placent hæc appetitui sensitivo, tuæ hæc repugnant vanitati. Fortè vocat te spiritus S. ad eum statum, in quo te mundo mori omnino oportebit, in quo mortificationem Christi, continuo in corpore tuo circumferre necesse erit, in quo sædulò curandum est, ut & tu mundo, & tibi mundus, cum suis concupiscentijs sit crucifixus, per quàm abstraharis quàm maxime, à mundo à periculosis conversationibus, pluribusq; peccandi occasionibus, in quo cum hoste animæ decertandum, bellumq; ipsi inferendum est, in quo corpori nulla quies concedenda erit, nulla commoda sensuality quæri debent, in quo præclusus est honoribus aditus, in quo, diligentia cura & studio, in tuam perfectionem, & in proximorum salutem incumbendum est. Deniq; vocat te spiritus Sanctus, ut exeas de terra tua, de cognatione tuâ, de domo patris tui, aliamq; terram tibi monstrat, in quam te vult venire. Ab his è contrâ retrahit te fortissime amor proprius, spes
vana

vana crescedi honores, Prælaturas assequendi, nominis celebritatē & famam comparandi; retrahit te appetitus commodorum sensualium, divitiarum, libertatis, soli nativi amor. Omnia hæc magis placent, adeoq; vocans spiritus S. & svadens his omnibus contraria, spirat ubi vult, non eò modò, quò tu velles. Et hæc est, vel esse potest una causa obsurdescentiæ ad vocem Spiritus S.

2da Causa ejusdem obsurdescentiæ, esse solet. Quia Spiritus S. ipirat, vox ejus non est valida, sed tenuis & placida spiratio, in sibilo tenuis autæ, Spiritus S. ad cor tuum loquitur, svaviter invitat non violenter, vox ejus dulcis, & non illa adhuc, ad quam ambæ aures tinniant. Cùm interim totus fremat infernus, tumultuentur cupiditates tuæ, buccinatores inordinatorum affectuum, totis buccis clament, clament item voce valida nugæ illæ antiquæ, prout illas clamantes aliquando audit S. Augustinus. *Itanè nos deseris Augustine? ergonè tibi amplius illud & illud non licebit usq; in æternum?* Inter hos inconditos carnalium cupiditatum clamores, facile obsurdescitur ad vocem Spiritus Sancti tenuiter spirantis. Vox hæc svavis aut non auditur, aut audita non percipitur, non intelligitur.

Reflecte te, an ad vocem Domini non obsurdescas? an non aliqua ex his, vel non utraq; hæc sit causa obsurdescentiæ tuæ? Excita te ad audiendam vocem Spiritus Sancti, dicendo cum Psalmista: *hodie si vocem ejus audieris o anima mea noli obdurare cor tuum, magno & forti animo vince te ipsam, frange voluntatem tuam, quantumvis rebellem, compelle sub svave jugum, ad quod te vocat DEI tui beneplacitum. Vince omnes tuas pravas inclinationes, impone silentium tumultuantibus cupiditatibus tuis. Ejice tibicides & buccinatores pravorum habituum, & affectuum validè reclamantium.*

Proteſtare coram Domino, quodd ipſam ſc-
 lum, cuiq; vocem audire velis, idq; ita audire, ut
 intelligas, & corde percipias. *Loquere Domine quia
 audis ſervus tuus*, non loquatur mihi caro, mundus,
 non loquatur infernus, tu Domine loquere, verba enī
 vitæ æternæ habes. Perſice Domine aurem cor-
 dis mei, ut quæ mihi loqueris ad ſalutem, audiam
 & intelligam. Fac Domine, ut te loquente, om-
 nes clamores obſtrepentium cupiditatum mearum,
 & ſibi ſerpentis antiqui conticeſcant, ſola deinceps
 vox tua ſonet in auribus meis.

PUNCTUM III. Audi eadem verba S. Joan-
 nis, cum addito, quod ulterius ſequitur *Spiritus u-
 bi vult ſpirat, & vocem ejus audis, & nescis, unde
 veniat*. Et cogita obſurdeſcentiæ, ad vocem Spi-
 ritus Sancti, poſſe adhuc & hanc cauſam eſſe.
 Quodd audias vocem, ſed nescias unde veniat, hoc
 eſt, quia tibi certò non conſtat, an hæc vox, quam
 interiore aure animæ tuæ audis, ſit Divina, ſit vox
 Spiritus S. & non potiùs vox alicujus alterius Spiritus,
 an non vox hoſtis animæ tuæ, qui ſubinde ſe transfi-
 gurat in Angelū lucis. Nec mirum, ſi tali ſuborta du-
 bitatione, aliquantūm hæreas, nec ad vocem, quam
 interiùs audis, ſtatim te proripias, cū S. Paulus Apo-
 ſtolus velit, ut probemus Spiritus, an ex DEO ſint.

Loquitur quidem DEUS aliquando, ita cla-
 rē, & ejus virtus Divina ſic impellit voluntatem,
 ut omnis dubitatio & dubitandi facultas ſublata ſit,
 quominus ſequatur ipſam illam impullionem. Si-
 cut legimus SS. Paulo, & Matthæo Apoſtolis, a-
 lijsq; nonnullis accidiſſe. Quem vocationis Divinæ
 modum, S. pater JGNATIUS tempus primū ad
 electiones faciendas magis opportunum appellat.
 quia tamen hic modus loquendi eſt valde extraor-
 dinariùs, & non communis, expectari, aut exigī,
 & à DEO poſtulari non debet. Alij modi locu-
 tionis & vocationis Divinæ, magis uſitati & ordi-
 narij

arij sunt : Vel cùm animus inspirationibus & motionibus internis agitur, ijsq; tam efficacibus, ut sine ullo intellectus discursu, aut cum modico, voluntas feratur ad DEI servitium & perfectionem; qui modus vocatur secundum electionis tempus, vel tandem, cùm intellectus, ratiocinando (qui modus tertium tempus electionis appellatur) & rationes ponderando pro una & altera parte, veritatem clariùs aspicit, & veluti Lumen voluntati præfert, ut id demum eligat, quod, omnibus perpensis, melius fuerit Judicatum. Per duplicem hunc posteriorem locutionis Divinæ modum, quia non tollitur dubitandi facultas, fit, vel fieri potest, ut dum auditur locutio Divina, per alterutrum hunc modum facta, dubitetur, unde vox talis & impulsio veniat. Siquidem fieri potest, ut etiam hostis animæ, transfigurans se in Angelum lucis, voluntatem impellat ad id, quod aliquam obsequij Divini & perfectionis speciem & apparentiam habere videtur; rationes etiam fallaces, & argumenta sophistica obtrudat, ut hoc potiùs voluntas eligat, quàm illud; subinde etiam & rem bonam svadet, & pias cogitationes fovet. Est tamen virus quod latet, & quod detegi debet.

Ad discernendam locutionem & vocationem Divinam à Dæmonis versutijs & suggestionibus, has regulas, ex Doctrina S. Patris mei JGNATII, tene. *ima*, sedulò & accuratè excutiantur & examinentur sive motiones ipsæ & impulsiones secundi temporis, sive cogitationes & rationes pro utraq; electionis parte occurrentes, examinentur inquam circa principium, medium, & finem, hoc est circa rem ipsam & objectum ad quod tales motiones impellunt, sitne illud in se & verè bonum, an fucatam tantùm boni speciem præferat. Examinentur etiam circa finem? Ex quo si de illis motionibus & impulsionebus res svadetur.

sine ille finis bonus, depuratus à finibus quibuscunq; vitiis, an certè finis pravus, aut fini alicui non bono conjunctus? Circa medium deniq; examinentur, inquirendo, an objectum, quod svadetur, per aliquas circumstantias non vitietur? an comparatè ad illud bonum, ad quod voluntas antea impellebatur, non sit minus bonum? an res quæ svadetur, alioqui secundum se bona, non debeat per media mala & illicita obtineri? Si omnia hæc rectè se habeant, principium, medium, & finis, atq; rectè se habere deprehendantur per accuratum examen, in quo metienda sunt omnia, majore Divinâ gloriâ & salute ac perfectione animæ, nullo respectu habito ad proprias commoditates temporales, sensuales, & vanas; argumentum & indicium erit, motiones & impulsiones, quas voluntas sentit, cogitationes etiam & rationes ad quidpiam impellentes, à bono & Divino spiritu esse. Quod si res mala, vel bona quidem, sed non bene, quia ob finem malum, aut in circumstantijs, & per media quæ rem vitiant, svadeatur, deprehendaturq; sive in principio, sive in fine, aliquod vitium, quod certè diu latere non potest, hostis enim noster nocendi studiosissimus, diu se tegere & occultare nequit, quàm sine malo tanquam caudâ serpentinâ se prodat, vel ex capite agnoscatur, vel venenum ejus non sentiatur; ex his deprehendes motiones & impulsiones hujusmodi, à spiritu malo immissas esse.

2da. Regula est ad discernendam locutionem & vocationem Divinam, à suggestionibus spiritus mali. Attendendum est ad modum locutionis. Diversissimus enim est locutionis & vocationis Divinæ modus, à modo locutionis diabolicæ. Spiritus Divinus, dum movet & inclinât animam, quæ DEO se conjungere studet & desiderat, ejusq; exquirat circa id ipsum voluntatem, leniter, placidè, ac svaviter, sicut aquæ stilla in spongiam, illabitur.

Spiri

Spiritus verò malus duriter, implacide, violenter, atq; cum quodam strepitu, sicut imber decidens in petram. Seu, expressius loquendo, spiritus Divinus movet voluntatem animæ, quæ DEUM & suam salutem quærit, movet inquam syavi consolationum illapsu, hoc est, inflammat affectum ad amorem Creatoris, ad quærendam salutem & perfectionem propriam, ad exercendos, cum omni facilitate, heroicos virtutum solidarum actus, cor conterit & solvit in lacrymas poenitentiae, compassionis Christo patienti, in lacrymas pietatis, devotionis, teneritudinis, affectus erga DEUM; facit animæ desipere res terrenas, oblectationes sensuales, vanitates, & similia, è contra facit sentire gustum & delectationem in meditatione rerum coelestium, in asperitate statûs poenitentiae, viæ crucis, mortificationis, facit sentire desiderium maximâ quæq; agendi, & patiendi pro gloria DEI. E contra diabolus dum loquitur, desolatione perturbat animam, hoc est, ad res viles & terrenas inclinat, affligit timore subtractionis oblectationû, cõmodorum sensualium, vanitatum &c. Aufert internâ animi pacē & tranquillitatem, tristitiâ, teporē ac torporē inducit, & propè in desperationē agit.

Juxta has regulas, discerne & tu Spiritus, ipsorumq; impulsiones, quas sentis in deliberatione de statu tuo, aut certè ad directorem tuum pro consilio recurre. His expeditis, electionem statûs vitæ tuæ, in exercitijs S. Patris JENATII perficere, & difficultates in exequenda Divina vocatione profligare stude. Certè hoc tempus huic operi maximè est opportunû, dum DEI motio recens est, spiritusq; fervore per tot meditationes excitato, incaluit.

Colloquium ad pretiosissimam DEI Parentem, cui supplica, ut suo patrocinio te ab hoste protegat, & defendat, fraudesq; ejus detegat, ac Divinam vocationem te agnoscere, illamq; exequi faciat. *In fine : Ave MARIA.*

Meditatio I.

De reformanda vita hominis
in statu sæculari, ac etiam ma-
trimonialis constituti.

Praludium 1. Imaginare conversionem Cor-
nelij centurionis ad Christi fidem, de qua habetur
Act. 10. Et existima audire te illa S. Petri Apo-
stoli verba, occasione talis conversionis dicta: *In*
veritate comperi, quia non est personarum acceptor
DEUS, sed in omni gente, qui timet DEUM, & ope-
ratur Iustitiam, acceptus est illi.

Praludium 2. Postula gratiam à DEO, quâ
illuminatus cognoscas, qua ratione in statu sæcu-
lari, in quo es constitutus, eidem placere, & ac-
ceptus esse, tuamq; salutem consequi possis.

PUNCTUM 1. Audi illa verba 1. Ad Corinth.
7. *Reliquum est, ut qui utuntur hoc mundo, tanquam*
non utantur. Præterit enim figura hujus mundi. Et
considera, adorationem hujus S. Apostoli ad eos
dirigi, qui in statu matrimoniali, vel in statu sæcu-
lari constituti vivunt; ut hi finem suum, ad quem
creati sunt, hoc est, salutem animæ consequantur,
necessarium omnino est, ut utantur hōc mundō tan-
quam non utentes.

Illi, ratione sui statûs, utuntur hoc mundo,
vivunt alligati uxori, secundum Apostolum, sunt
soliciti quomodo eidem placeant. Filios & fami-
lias secundum suam conditionem alunt & alere
tenentur; habent terrenas possessiones. Bona tem-
poralia, & œconomias administrant, proventus
percipiunt, substantiam terrenam augere & con-
servare student. Filijs eandem exdividunt, parant
&

& colligunt dotem filiabus, honores, dignitates, in republica, in cōmunitatibus admittunt, ac etiam quærunt & procurant. Magistratus gerunt, tractant publica negotia in comitijs, comitiolis, de integritate Patriæ & bono communi consultant, non sequuntur præcipua & maximè difficilia Christi consilia, non imitantur ejusdem exempla saltem ita perfectè, atq; vi suæ professionis hæc imitantur, vel imitari tenentur, qui ad statum Ecclesiasticum, maximè verò ad statum religiosum vocati sunt. Ex quibus omnibus clarè patet, quòd homines in statu sæculari constituti, utantur hoc mundo. Ne verò illi ipsi animas suas perdant, & ut salutem consequantur, hoc reliquum ac necessarium est, ut utantur hoc mundo tanquam non utentes.

Porro tunc homines utuntur mundo tanquã non utentes, *imò* quando usus mundi & creaturarum ipsis permissus, ac per statum ipsorum cohoneatus, non est illis occasio progrediendi ad illicita, & prolabendi in ea, ad quæ ipsos mundus, caro, & diabolus incitat, & invitat, contra legem & voluntatem Divinam prohibentem, & contra rectæ rationis dictamen. Facilis siquidem in hoc statu est occasio prolabendi in illicita, ut quotidiana docent exempla. Non omnes sunt continentes intra limites conjugalis castitatis; ex nimio & inordinato affectu ad res temporales, & auctionem fortunæ, multæ committuntur injustitiæ, multæ fraudes, & damnificationes aliorum, ex ambitu & studio assequendorum honorum, promotionum, respectuum. O quæ & quanta non sunt legi Divinæ, charitati DEI & proximi adversantia! Ut igitur quis utatur hoc mundo tanquam si non uteretur, ita illi vivendum, ita sibi ipsi invigilandum est, ne vita sua sæcularis sit sibi occasio criminum, in quæ multi in hoc statu prolabuntur; ne eorum appetitus sensualis, permissio usu quarundam sensu-

aliū oblectationum, irritetur ad appetenda illicita, impellatq; voluntatem ut hæc quærat, & in ea consentiat, quæ sunt prohibita. Magna cautela & vigilantia adhibenda est, ut continentia conjugalis sit prorsus illibata, ut sensus corporis, & affectus custodiantur ad exemplum sancti Jobi, qui cum oculis suis fædus pepigerat, ut ne cogitaret quidem de virgine, ut bona fortunæ non augeantur modis indebitis & illicitis, per oppressionem pauperum, per injurias & damna proximorum, ut nihil alienum manibus adhærere contingat. Ne honores, dignitates, & alia hujusmodi quærantur per assentationes, per obsequia conscientiae læsiva, per consilia præjudiciofa Reipublicæ, vel bono sive cõmuni, sive cujuspiã privato, per depressionē aliorum, famæ alienæ denigrationes, & his similia.

2dò Utantur mundo tanquam non utentes, qui in concursu vel mundi amittendi, & eorum quæ mundi sunt, vel cõmittendæ offensæ Divinæ, sive mortalis, sive venialis, parati sunt potius jacturam opum, commoditatum, voluptatum, honorum, & totius mundi subire, quam DEUM etiã leviter offendere.

PUNCTUM II Utantur tertio mundo tanquam non utentes. Quos usus rerũ mundanarum & temporalium, non impedit in cura & studio propriæ salutis, rerumq; illarum, quæ ad salutem pertinent; imò extali suo statu occasionem & adjumentum habent exercendorum operum misericordiæ & charitatis, promovendæ etiã Divinæ gloriæ, & cumulandorum meritorum. Qui ita utantur mundo, ut illud sæpius mente versent, quòd prætereat figura hujus mundi, quòd hæc, quibus utuntur, sint finem acceptura, sint nonnisi figura & umbra aliorum bonorum, quòd sint alia bona longè sublimiora & excellentiora, quæ ab ipsis quæri debent, bona nimirum spiritualia, supernaturalia, perennan-

tura.

tura, bona non ad corpus sed ad animam pertinentia, quæ ipsos beatos & felices in æternum reddant. Qui præterea illa bona præstantiora ad animam spectantia studiose quærent, ad illa aspirant, mediisque conducentia adhibent, ut illa consequantur, totoque conatu allaborant, ut sic transeant per bona temporalia, ut non amittant æterna.

4to. Utuntur mundo tanquam non utentes, qui mundo utuntur absque nimia adhæsiōe, & affectu minus ordinato ad mundum. Qui, dum afficiuntur divitiis, cor non apponunt; Carnis voluptatibus licitis non ita immerguntur, ut non magis delectentur in domino, in rebusque; Divinis & spiritualibus gustum quærant, totoque mentis affectu in DEUM ferantur, qui in honoribus constituti meminerunt se homines esse alijs similes, mente, non elevantur, nec despiciunt alios, sed potius humiliantur sub potenti manu DEI.

5to. Utuntur mundo tanquam non utentes, qui circa ea, quæ mundi sunt student conformitati cum Divina voluntate; si, DEUS hæc auferat, puta, si auferat amicum, filios, bona fortunæ, honores &c. jacturam hanc ferunt cum æquanimi- tate, & cum omni subordinatione sanctissimæ Divinæ voluntati, animaque; tunc suas possident in patientia, & DEUM in omnibus benedicunt cum Sancto Job: *Dominus dedit, Dominus abstulit, sicut Domino placuit ita factum est sit nomen Domini benedictum.*

PUNCTUM III. Sexto demum utuntur mundo, tanquam non utentes. Qui rebus, quæ mundi sunt sibi licitis & permissis abstinere cum possunt, eaque amore DEI, & ex fine aliquid pro DEO & salute animæ suæ agendi, sibi ipsis subtrahunt; qui à multis abstinere, quibus sine DEI offensa uti possent, qui sub pretiosis vestibus cilicia, catenas ferreas, aliaque mortificationum instrumenta de- ferunt.

ferunt & contegunt. Qui in præcipuis constituti honoribus, DEO se humiliant, humilitatem Christianam non erubescunt, ad vilia etiam obsequia, DEO, Christo, pauperibus exhibenda se dimittunt, libenterq; ea sulciunt. Qui, dum ipsis divitiæ affluunt, cor non apponunt, sed paupertatem spiritus amant & sectantur, suis opibus, fortunis, bene comparatis utuntur, non tam ad propria commoda & minùs convenientes jactantias, atq; apparentias, quàm potiùs ad ferendum subsidium pauperibus & levandam egenorum inopiam, aliaq; bona & pia opera, totum id agendo ex amore DEI, & ad majorem mundi contemptum, quo uti putantur.

His consideratis, reflecte te supra tuum mundi usum, quomodo hactenus mundo usus sis, quomodo deinceps uti debeas? quid te pro salute animæ agere conveniat? reliquum vitæ tuæ quâ ratione transiges? fac proposita, eaq; deinceps constanter & immutabiliter exequi stude.

In colloquio Supplica humiliter Christo Crucifixi affixo, ut amara sua morte, & passione, omnem in te mortificet & exstinguat mundi affectum, ne mundi usus, sit tibi occasio amittendæ salutis & felicitatis æternæ, & ut non sit tibi impedimentum, sed potiùs medium & adminiculum ad DEUM amandum, laudandum, ipsiq; impensius serviendum, ut ita utaris mundo, ut & tibi mundus, & tu mundo sis crucifixus.

In fine: Anima Christi.

Meditatio II.

De reformanda vita hominis in statu sæculari, ac etiam matrimoniali, constituti.

Prælia eadem, quæ meditationis præcedentis.

Pu-

PUNCTUM I. Audi illa verba 2^{dæ} Petri 1. *fatagite ut per bona opera, certam vestram vocationem & electionem faciatis.* Quæ ipsa applicata & directa esse ad homines vitam sæcularem agentes, existima. Ut verò hæc fructuosius penetres.

Considera imò Per vocationem, non incongruè posse hoc loco intelligi inspirationem, & voluntatis tuæ motionem, ex vi cuius, tot alijs vijs ad salutem totq; diversis vitæ statibus omissis, assumpsisti & elegisti statum vitæ sæcularis, statum matrimonialem. Per electionem verò intelligi debere Divinam tui electionem ad gloriam, per quam DEUS te inter beatos & salvandos connumerat, tuumq; nomen libro vitæ, libro prædestinatorum inscribit. Differunt electio & vocatio per hoc, quòd vocatio versetur immediatè circa media salutis, habeatq; pro objecto & termino immediato, medium salutis, hoc est certum, vitæ statum. electio verò versetur circa ipsum finem, hoc est, circa ipsam hominis salutem, & hanc habeat pro objecto & termino immediato, circa quem versatur. Vocatio ostendet viam, quâ ambulando, pervenias ad terminum æternæ felicitatis; electio præstat, ut æterna felicitate potiaris. Vocationem Divinam habere, multis est commune; electio verò est donum rarissimis obveniens, juxta illud: *Multi vocati, pauci electi.* Potest enim quis vocari ad certum vitæ statum, & vocationi Divinæ vel non obedire, vel obedire quidem, sed postquam ingressus est eam salutis viam, in quam ipsum deduxit vocatio Divina, ab hac deinde via deflectere, aut non dignè sibi vocatione ambulare, & sic infelicitè aberrare.

Considera 2^{dò}: An quis vocatione Divina vocatus sit ad statum vitæ sæcularem, an verò ex alicujus alterius spiritûs motione & impulsu, statum hunc elegerit, rem esse valde dubiâ & incertâ. De vocatione ad altum perfectiorem, v. g. ad statum religiosum,

sum si non certitudo, fortis tamen præsumptio haberi potest, quòd hæc fuerit vocatio Divina. Ad hunc enim statum amplectendum, potuit quis moveri unicè gloriæ Divinæ & salutis consequendæ studio, idq; ex desiderio & proposito imitationis virtutum, & exemplorum Christi, ac impletionis Consiliorum ejus, absq; ulla admittance affectus carnalis & mundani. Potuit insuper adhibere media convenientia, sive pro cognoscenda, & pro exploranda Divina voluntate, & vocatione, sive pro discernendis ac probandis spiritibus, adeoq; vocatione suâ ad statum religiosum examinatâ per modos bonæ electionis, & per regulas discernendorum spirituum, potuit, potestq; advertere, vocationem suam esse & fuisse rectam, puram, omnino sanctam, adeoq; Divinam. De vocatione verò ad statum sæcularem, conjugalem, frequenter in contrarium est præsumptio; quotus enim est, qui hunc statum eligat unicè studio placendi DEO, Deumq; laudandi, & glorificandi; ex fine item consequendæ salutis, sine admittance inordinatæ affectionis ad carnis voluptates, ad res terrenas, sensuales, vanas, mundanas, ad commoditates, aliq; his similia? quotus est, qui hunc statum eligat ex intentione, quâ conjugium contrahi debere docuit Angelus Raphaël, Tobiam juniorem? Porro vocatio, admissum habens inordinatum affectum, cum sit obliqua, malo fine vitata vocatio Divina esse non potest, ut docet S. Pater IGNATIUS, Punct. 310. introductionis ad rerum eligendarum notitiam. & ipsa recta ratio ostendit.

Quantum verò attinet ad Divinam electionem hominis ad gloriam, de hac, in nullo vitæ statu, independenter à speciali revelatione Divina, certitudo omnimoda & absoluta haberi potest. Cum enim homo in vita sua nesciat, an amore an odio dignus sit; cum nemo dicere possit, mundum

est cor meum, purus sum à peccato; cùm ignoret an sit perseveraturus in DEI gratia, an in gratia finali moriturus. Nemo consequenter dicere potest ego de electis sum, ego prædestinatus ad vitā, ego de numero filiorum. Quamvis verò talem certitudinem in nullo vitæ statu habeamus, spes tamen & fiducia plerosq; consolatur, suntq; insuper signa & indicia manifesta è sensu D. Bernardi. *Serm. 1. in septuag.* : ut indubitabile sit aliquem esse in numero electorum, in quo ea signa permanserint. & talia quidem signa reperiri possunt in aliquibus viris sanctis & perfectis; in hominibus tamen vitam sæcularem agentibus hæc non solent ordinariè & communiter inveniri.

PUNCTUM II. Considera 3^{ti}o in hac incertitudine sive circa vocationem, sive circa electionem suam constitutus homo sæcularis, ne dubitationis hujus anxietate omnino consternetur, modum & remedium insinuat S. Petrus Apostolus illis suis verbis: *Satagite, ut per bona opera, certam vestram vocationem & electionem faciatis.*

Modus itaq;, quo in statu sæculari, cujuspiam, certa ad eundem statum vocatio & electio fieri possit est. Faciendi sunt fructus pœnitentiæ, deplorata vitæ antecedentis peccata eleemosynis redimenda, usu indulgentiarum & frequentatione Sacramentorum Eucharistiæ & pœnitentiæ expianda, opera etiam bona & salutaria, opera Justitiæ, misericordiæ, Charitatis exercenda, sanctè & Christianè vivendum. servanda DEI præcepta, Consilia Christi, quæ impleri possunt, adimplenda, orationi & obsecrationibus, cum Cornelio, insistendum. In rebus cœlestibus & Divinis gustus excitandus & fovendus, Curandum, ut juxta monitum S. Pauli Apostoli, exhibeamus nosmetipsos, sicut DEI ministros, in multa patientia, in tribulationibus, in angustijs, in laboribus, in vigilijs, in jejunijs, ut co-

raro

ram DEO humiliemus animas nostras, ut abundemus in omne opus bonum. Hac ratione vivendo, homo Christianus, in statu sæculari & matrimoniali constitutus, certam faciet vocationem & electionem suam.

Faciet imprimis certam vocationem. Etiam si enim dubitare possit, an vocatio illa, quâ primò elegit statum sæcularem & conjugalem, fuerit vocatio Divina, tamen postquam hunc statum eligit, nec amplius mutare potest, securus & certus esse debet, quòd illum DEUS vocet ad vitam in hoc statu sanctè & Christianè instituendam, quòd illa vocatio, quâ excitatur ut in tali statu, in timore & tremore operetur salutem, & in sanctitate ac Justitia, DEO famuletur omnibus diebus vitæ suæ, sit vocatio Divina. Talem verò vocationem & Divinam, & magis adhuc certam faciet, si DEO vocanti se ad meliorem vitam obsecutus fuerit, & hoc vitæ statu, tanquam medio ad suum finem consequendum, abundando in omne opus bonum, bene usus fuerit.

Faciet etiam certam electionem suam. Etiam si enim de hac non possit habere certitudinem absolutam, & ex omni parte infallibilem, atq; talem, quæ excludat ulteriorem sollicitudinem circa salutem animæ suæ; nihilominus per bona opera certam faciet electionem suam, certitudine spei, & magnæ fiduciæ, fundatæ & innixæ sufficientibus indicijs & argumentis, ex quibus colliget se esse in numero electorum, & quæ illum reddet diligentem & constantem in DEI servitio, & quærenda ejus gloria, atq; curanda animæ salute.

Hanc certitudinem faciet ipsi & conscientia rectèfactorum ac bonorum operum, in quibus se constanter exercet, & insuper ipsa promissio Divina, de retribuenda, pro meritis & bonis operibus, gloria.

Quæ cum conditionata sit, & per modum

con-

contractus onerosi, sub conditione ponendorum ab homine meritorum vitæ æternæ; impletâ hac conditione, per positionē talium bonorum operum, homo securus est, & in magnam spem erigitur, quod DEUS stabit promissioni suæ, adeoque quod sit collaturus illi gloriam & felicitatem æternam. Si operarius, absolutô opere, ad quod conductus est, certus est de danda sibi conductâ mercede, si miles, post strenuâ cum hoste pugnâ & victoriam, securus est de reddendo sibi stipendio, & dividendis etiam inter se spolijs; si mercator, persolutô adæquatô mercis pretiô, certus est juris sui ad emptam mercedem; pariter & homo Christianus certus est accipiendæ coronæ & felicitatis æternæ, post vitam Christianè & sanctè transactam, & sancta morte terminatam. Illa enim cœlestis beatitudo, est laborum vitæ hujus, pro DEO susceptorum, merces, est præmium & stipendium strenui, cum hostibus animæ, certaminis, ac de ipsis obtentæ victoriæ, est illa pretiosa margarita, quam eleemosynis, operibus misericordiæ, & sanctis laboribus emimus & comparamus.

PUNCTUM III. Considera 4^{to}. unumquemque electionis suæ ad vitam æternam certum & securum esse posse, si horum trium certus sit. 1^{mo} quod sua peccata sibi dimissa sint. 2^{do} quod sua bona opera sint à DEO acceptanda in meritum vitæ æternæ. 3^{io} quod in bonis & sanctis operibus atque in gratia finali perseveraturus sit ad mortem. Cum enim per hæc tria, seu dependenter ab his tribus, habeatur electio hominis ad gloriam; habita certitudine de tribus illis, habetur consequenter certitudo electionis. Porro qui Christianè, sanctè, & laudabiliter vivit, per sua bona opera & sanctam vitam facit & comparat certitudinem de illis tribus, non quidem, ut dixi, omnimodam & absolutam, sed certitudinem spei, & magnæ fiduciæ in-

nixæ promissionibus Divinis.

Nam imprimis faciendo dignos fructus pœnitentiæ, confitendo etiam sacramentaliter peccata, aut cordis contritione & humilitate sæpius ea deslendo, & pro ijs Iustitiæ Divinæ satisfaciendo, eaq; eleemosynis redimendo; habet, & habere potest spem magnam, adeoq; aliquam certitudinem, de remissis sibi peccatis, juxta illam promissionem Divinam 1. Joan. 1. *Si confiteamur peccata nostra, fidelis est & justus, ut remittat nobis peccata nostra, & emundet nos ab omni iniquitate.*

Deinde opera Iustitiæ, misericordiæ, charitatis, & quarumcunq; aliarum virtutum exercendo & accumulando, homo Christianus, confusus Divinæ bonitati & misericordiæ, quæ homini facienti quòd ex se est, non denegat gratiam; sperat, quod hæc sua bona opera, dum illa quàm perfectissimè peragere studet, sint acceptanda in meritum vitæ æternæ, & pro his sit retribuenda sibi merces magna nimis, persuadetq; sibi firmiter, in die judicij; auditurum se illam Christi sententiam: *Venite benedicti Patris mei, possidete regnum paratum vobis ab origine mundi; Esurivi enim & dedistis mihi manducare, sitivi & dedistis mihi bibere, hospes eram & collegistis me, nudus eram & cooperuistis me, infirmus, & visitastis me. In carcere, & venistis ad me. Quàdiu enim ex fratribus meis minimis uni fecistis, mihi fecistis.* Sententiæ tam exoptatæ, in ipsū pronuntiandæ facit, illi spem & aliquā certitudinē, enumeratorum misericordiæ operum executio & frequentatio.

Tandem homo Christianus persistendo constanter in bonis operibus, rigidamq; pœnitentiam de peccatis totâ vitâ agendo, ac cum magna solitudine operando salutem, sperat in morte, munendum se victrici & efficaci gratiâ Divinâ, contra omnes tentationes, quibus tunc inpugnabitur; sperat

rat se etiam in morte triumphaturum de hostibus animæ, de quibus in vita solitus fuerat triumphare; sperat se in gratia finaliter perseveraturum, quam tanta solitudine in vita conservare & augere studebat. Fidit asssecurationi S. Augustini asserentis: *Neminem vidi male mortuum, qui bene vixerit.* Si igitur bona opera faciunt nobis certitudinem, seu magnam spem, & in DEI bonitate fiduciam, de remissione peccatorum nostrorum, de comparando meritorum thesauro, ac etiam de conferendo nobis dono perseverantiæ in bonis operibus, & in gratia Divina; hæc ipsa certos nos facient electionis nostræ ad gloriam, certudine spei, & magnæ fiduciæ.

Hæc considerans accendere ad vitam sanctè & Christianè agendam, ad exercenda opera misericordiæ, ad cumulanda merita; quæcunq; potest facere manus tua, instanter operare. Manè semina, vespere non cesset manus tua. seriò cogita de vita rectè instituenda, age, ut opera tua novissima, sint plura & perfectiora prioribus, ut per hæc, certam facias vocationem & electionem tuam. Fac particularia proposita, elice affectus.

In colloquio Supplica humillimè bonitati Divinæ, ut te ad vitam piè & Christianè instituendam vocare, & accendere dignetur, suâq; potenti & efficaci gratia adjuvet, quâ adjutus, constantem de peccatis tuis pœnitentiam agas, bona opera & merita accumules, in ijsq; ac gratia sanctificante, finaliter, ad ultimum vitæ tuæ terminum perseveres, & per bona opera, certam facias vocationem & electionem tuam, ad æternam cum DEO felicitatem.

In fine: suscipe Domine &c.

Me-

Meditatio III.

De vita Christianè instituenda, sæculari & conjugali.

Præludia eadem, quæ meditationis primæ.

PUNCTUM I. Audi illa verba S. Pauli Apostoli 1. ad Timot. 5. de viduis dicta. *Si qua vidua filios aut nepotes habet, discat primum domum suam regere.* Et inferiùs ad omnes Patres-familias spectantia: *Qui suorum, & maximè domesticorum curam non habet, fidem negavit, & est infideli deterior.* Et considera doctrinam hanc Apostoli ad omnes extendi, qui in sæculo degunt, omnibusq; tuis ad vitam rectè & Christianè instituendam ac reformatam, necessariam esse, ut sciant domum suam regere, & ut suorum, maximè verò domesticorum, curam habeant; quod ut meliùs præstari possit.

Considera ulteriùs *imò.* Ad hoc, ut aliquis censeatur domum suam bene & Christianè regere, requiri imprimis, ut præ oculis constituto sine hominis, qui non alius est, nisi gloria Divina & salus æterna animæ, ita domum & rem œconomicam administret, ut administratio hæc sit ipsi medium promovendæ magis ac magis gloriæ Divinæ, ac consequendæ salutis non solum animæ propriæ, sed etiam ad eundem finem perducendi omnes, quotquot ad suam curam quâquâ ratione pertinent; et ut omnes suæ ac suorum actiones in hunc finem colliment, nec ab illo deflectere ullatenus permittantur. adeoq; requiritur, ut homo in tali statu constitutus, quærat regnum DEI & Iustitiam ejus, non solum sibi ipsi invigilando, rebus spiritualibus & Divinis vacando, Sacramenta frequentando, orationi, jejunijs, operibus bonis, maximè operibus misericordiæ insistendo, sed etiam,
ut

ut ipsam temporalium administrationem, in finem hunc ordinet & dirigat.

Quod ipsum ut assequatur, necesse est, ut quisq; secum rationem ineat, quàm amplam Domum & familiam habere illum æquum sit, attentis: statûs proprij conditione, reddituum ac proventuum amplitudine, alijsq; similibus circumstantijs, ita, ut non deflectatur in alterutrum extremum vitiosum, ne nimirum, aut luxu, prodigalitate, & excessu, aut parsimoniâ, angustia animi, & defectu peccetur. Ut item recogitet, ac secum dispiciat, quis sit modus tenendus in colligendis proventibus, còacervandis opibus, augendis & conservandis bonis fortunæ, ut hæc non procurentur studiò immoderatò, nimia solitudine, & ex inordinato ad hæc affectu; ut per curam talium, ne in minimo quidem lædatur conscientia, Justitia, DEI & proximi charitas. Opus insuper est, ut diligenter expendat, quis ibidem servandus sit modus in erogandis pecunijs, qualiterq; sit disponendum de possessis facultatibus, quæ expensæ & qui sumptus faciendi in usus, sive proprios, sive domesticos, pro domestica familia; quantum sit distribuendum in pauperes? quid expendendum in pia opera misericordiæ & charitatis? An maturè & tempestivè non sit deliberandum de ultimis dispositionibus faciendis, de condendo testamento? an hoc non sit sine dilatione conficiendum & qua ratione? ne res hæc, in ipsa infirmitate & morte faciat tibi difficultates, ac te impediat in facienda conveniente ad mortem vicinam præparatione, reconciliando cum DEO, per seriam poenitentiam, animo tuo, in eliciendis actibus, qui tunc maximè necessarij erunt, ne curæ & cogitationes circa res temporales, sint tibi impedimento.

PUNCTUM II. Considera 2dò Quæ & qualis cura & circa quos haberi & excerceri debeat ab his, qui in statu seculari vivunt, remq; temporalem œ-

conomicam administrant. Si filios, nepotes, habent, horum primam & principalem curam habere debent, eamq; duplicem, unam in spiritualibus, alteram in temporalibus.

In spiritualibus, circa filios & nepotes, cura taliter exercenda est, ut detur illis bona & Christiana educatio, ac institutio, ut timorem DEI doceantur, instruantur in rebus ad fidem & salutem pertinentibus, ut horrorem peccati quàm maximum concipiant, ut in pietate Christiana, & virtutibus se exercere ac proficere studeant. Studijs etiam literarum, atq; artibus liberalibus & scientijs excolendi sunt, non solum, quia hæc plurimum conferunt ad faciliorem & meliorem DEI, ac eorum quæ fidei sunt, cognitionem, timoremq; DEI, & virtutis amorem; sed etiam, quia cum literis plerumq; instillantur ea, quæ ad animam & salutem pertinent.

Circa temporalia curandum est, ut subsidia vitæ honestè ducendæ convenientia habeant, ut substantia & fortuna, ipsis relinquenda, sit bene acquisita, bonisq; modis & medijs aucta & conservata, nec oneribus, præcipuè majoribus, & ære alieno gravata, ut pro filiabus dos, conformiter ad præscriptum legum regni, assignetur, vel etiam, si fieri potest, in parata pecunia reliquatur, ut electio Statûs vitæ, libertati filiorum & filiarum relinquatur, nec ad ultimum determinatum statum, contra suam voluntatem & inclinationem, compellantur, ut, cum ad ætatem convenientem pervenerint, in adeundo illo vitæ statu, quem elegerint, juven-ur data & exdivisa substantiæ portione quæ ipsos concernit. Tandemq; ut filiæ nuptæ exdotentur, nec dos conveniens diutius detineatur.

Post filios & filias ac nepotes, debetur cura domesticæ familiæ, seu famulitio. Iterumq; hæc tam in spiritualibus, quàm in temporalibus.

In spiritualibus, ut Domino terreno & creato
ita

ita præstent obsequia, ut simul Domino cælesti & Increato famulentur, nec obsequia exhibita vel exhibenda creaturæ, sint impedimento, sed potius ut sint adjumentum ad serviendum Creatori, eiq; laudem & cultum reddendum. Præstandum illud est terreno Domino, ut quâ verbo, quâ exemplo famulos suos instruat, & hortetur ad convenientem salutis suæ curam, ut DEI & Ecclesiæ servant præcepta, poenitentiae & Eucharistiæ sacramenta frequentent, bona opera exerceant & accumulent, vitamq; inculpatam & christianam agant.

In temporalibus providendum ipsis est, ut vitæ sustentationem habeant ex conventionem vel consuetudine debitam, ut condicta stipendia integrè & in tempore recipiant. Consulendum pariter ipsorum bono & commodo, ut pecunias in stipendium acceptas, in usus honestos & necessarios convertant, & bene expendant, non in compotationes, aleas, & his similia, dissipent.

Postremò circa subditos cura hæc est habenda. In ijs quæ ad animam spectant, pro posse juvandi sunt, ut animæ salutem consequantur. Invigilandū est, ut non blasphemetur per ipsos nomen Domini, ut festa colant & observent, proindeq; diebus festis, laboribus, itineribus, alijsq; occupationibus distrahendi non sunt. Avertenda sunt scandala, & offensionum occasiones, vitia corrigenda, præcavendæ Divinæ offensæ, bonorum operum exercitium promovendum. Idonei circa ipsorum salutem operarij & vigiles providendi, qui eos in fide instruant, viam salutis doceant, sacramenta promptè & fructuosè ministrent, officia Divina, secundum ritus & præscriptum Ecclesiæ, celebrent, suoq; munere & sciant & velint accuratè fungi.

In ijs, quæ ad corpus & bona temporalia pertinent, hæc subditis à Domino præstari debent. Protectione & defensione illis assistendum est, sublevandi in

suis necessitatibus, inopiæ eorum succurrendum, quâ consilio, quâ etiam datò ipsis subsidio, mature juvandi, ne ad egestatem deveniant, laboribus insolitis, novis censibus, pensionibus, alijsq; oneribus non gravandi.

PUNCTUM III Considera 3^{tiò} quòd ad hanc filiorum, familiæ, & subditorum curam, quisquis hæc Dei beneficio nactus est, obligetur obligatione specialis charitatis seu pietatis, fundatâ in ipsa natura & inclinatione naturali, atq; in maxima convenientia. De obligatione ad curam filiorum, & cujusq; prolis, ita constat, ut hanc continuo inculcet omnium animalium sollicitudo circa suam prolem educandam & conservandam. Quòd vero ad curam etiam suæ familiæ & subditorum unusquisq; obligetur, obligatione illâ, quæ ad obligationem pietatis reducitur, hinc est, quia vel ipsum nomen, quò Dominus familiæ appellari consuevit, hanc loquitur obligationem; appellatur ille : *Pater familias*; quò nomine admonetur, ut suam familiam amet, tanquam Pater filios, adeoq; ut tanquam filiorum curam habeat.

Hanc curam ita ab ipsis exigit Apostolus, ut illum, qui eam non habet, & negligit, fidem negare asserat, & censeat infideli deteriorem esse. Certè fidem negat, qui suorum curam non habet, fidem inquam, ad quam suis domesticis & subditis obligatur: propter hanc negatam, nemo ipsi amplius fidere, & in ejus circa suos cura conquirere potest. Fidem etiam Divinam, non verbis, sed factis negat, dum non imitatur, ut debet, Divinam circa creaturas Charitatem & pietatem. Deus noster optimus, ita est universorum Dominus, supremusq; rerum omnium gubernator & rector, ut simul sit omnium nostrum pijsimus & providentissimus Pater, volens omnes salvos fieri, salutis media conferens, & ad hunc finem unumquemq; nostrum perducere desiderans.

derans. Ille insuper vitam nostram corporalem sustentat & conservat, omnesq; creaturas visibiles nostris usibus concedit & subijcit. Hoc ipso facto negat, qui suorum curam non habet. Re ipsa enim & imitatione non confitetur Divinam hanc, circa suas creaturas, providentiam & pietatem, licet eam imitari & exercere teneatur. Insuper negat fidem factis, quatenus omnium offensarum Divinarum, quæ à suis domesticis & subditis committuntur, per quas Deus blasphematur & negatur, reus ipse efficitur.

Est præterea is, qui suorum curam non habet, infideli deterior; quandoquidem multos infideles videmus, quantam curam illi, sive subditorum, sive familiæ, sive filiorum habeant, ut multos catholicos hac in parte superare videantur. Ad talem curam omnes Patres-familias hortatur S. Augustinus. Ubi dicit: *Unusquisq; Pater-familias hoc nomine agnoscit paternum se affectum sua familia debere. Pro Christo & vita aeternâ suos omnes admoneat, hortetur, corripiat, impendat benevolentiam, exerceat disciplinam, ita in domo sua Ecclesiasticum, & quodammodo Episcopale implebit officium, ministrans Christo, ut in æternum sit cum Christo.*

Hæc considerans, illud conclude: ut sis in æternum cum Christo, ut Christo ministres, necessarium esse, ut episcopale domi tuæ impleas officium, & curam domesticorum habeas. Confundere si in aliquo huic obligationi defuisti, tecum ipse dispice, quomodo deinceps te gerere debeas, firmisq; & convenientibus propositis id statue.

Colloquium ad Sanctissimum JOSEPHUM, cui humillimè supplica, ut is desponsatus pretiosissimæ DEI Parenti, putaticius Pater effectus incarnati Filij DEI, atq; constitutus super illam sacram familiam, quâ Trias illa Sanctissima: JESUS, MARIA, & JOSEPH efficiebat, præstet sua intercessione, ut in-

tegerimæ suæ conversationis exempla, Verbo incarnato præstita obsequia, & sollicitam curam circa illius Sanctissimæ Familiæ commoda, imitari & æmulari possis, per inculpatam tuam conversationem, per bona & sancta opera, & Christianæ virtutis exempla, tandem per convenientem & Christianam familiæ tibi commissæ administrationem, & ut, talia imitando, præmia fidelis ministerij consequi merearis in cælis.

In Fine: oratio de S. IOSEPH. Sanctissimæ Genitricis tuæ, Sponsi &c.

Meditatio

De fine hominis Religiosi & medijs ad talem finem

Praludium 1. Imaginare Christum ordinantem Ecclesiam, & in ea certam statuum diversitatem constituentem. juxta illud Apostoli ad Eph. 4. *Ipsæ dedit, quosdam quidem Apostolos, quosdam vero Prophetas, alios vero Evangelistas, alios autem Pastores & Doctores.*

Praludium 2. Postula gratiam, ut cognoscas finem & obligationem hominis Religiosi, ejusq; ad hunc finem media & adjumenta, utq; his convenienter uti velis.

PUNCTUM I. Audi sapientem Proverb. 4. dicentem: *Iustorum semita quasi lux splendens, procedit & crescit usq; ad perfectam diem.* Et considera verbis his exprimi finem hominis Religiosi, ejusq; obligationem.

Finis Religiosi est, continua ad perfectionem tendentia, & continuus in virtute progressus. Religiosi ad religionem hac intentione veniunt, ut relictâ

lietâ viâ latâ & spatiosa, quæ ducit ad interitum, relictis semitis sæculorum, quas calcârunt viri iniqui, relictis vijs difficilibus & incertis, scilicet relictô sæculô & vita sæculari, incedant semitâ justorum, servantq; DEO in sanctitate & justitia omnibus diebus vitæ.

Religiosi veniunt ex sæculo, non ut subsistant in via, quam ingrediuntur, aut secus viam sedeant, contenti eo Justitiæ & virtutis gradu, quem in primô religionis ingressu adepti sunt, sed ut semper progrediantur, hâc semitâ eundo de virtute in virtutem, de uno perfectionis gradu in alium, ut procedant sicut lux splendens, ubiq; splendorem virtutis, sanctitatis, & bonæ conversationis diffundendo, optimisq; exemplis, alijs prælucendo. Ut procedant sicut lux, crescendo usq; ad perfectum diem, hoc est, enitendo, ut virtus eorum sit aliquando in auge, sit in meridie, diemq; perfectum faciat.

Hæc considerans, fac reflexionem supra te ipsum, quem finem intenderis dum ires ad religionem. Hicne tuus finis, an alius fuerit? an etiam nunc, dum vivis in religione, eundem species & intendas? an ad hunc finem omnes tuæ collimant actiones? Vita tua religiosa estne semita justorum? estne semita quasi lux splendens? splendetne virtutibus & exemplis bonis? proceditne & crescit usq; ad perfectum diem? an non potius in dies magis decrevit? an in vesperam & tenebrosam noctem, hoc est ad vitam, vitâ sæculari deterriorem, non declinat? quodsi inveneris, alio te fine ad religionem venisse, aut etiam nunc vivendo in religione alium te finem intendere; Item non vivere te, juxta vocationem & obligationem statûs tui religiosi, adeoq; non incedere semitâ justitiæ, non progredi de virtute in virtutem, non crescere quali lucem splendentem; confundere coram DEO, corrige intentiones tuas, dirige gressus tuos, ut semitâ justorum deinceps pro-

cedas, & quasi lux splendens crescas usq; ad perfectum diem, per perfectam instituti tui religiosi observationem.

Fac proposita non universalia tantum, sed particularia, facta prius reflexione, & per illam deprehensio, quoniam maximè defectus, lucem tuam obscurant & impediunt, ne crescas usq; ad perfectum diem. Postula à Christo qui est via, veritas, & vita, ut ipsius sequendo vestigia, juxta consilia ejus vivendo, posthac semper semita iustorum procedas, neq; ab hac unquam declines, ut tua vita & conversatio sit quasi lux splendens, & crescens usq; ad perfectum diem, hoc est, quousq; tibi non illuxerit perfectus æternæ felicitatis dies.

PUNCTUM II. Audi verba illa Isaïæ 5. *Vinea Domini exercituum, domus Israël est, & viri Juda, germen ejus delectabile.* Audi item eundem Prophetam paulò superius dicentem : *Vinea facta est dilecto meo & sepivit eam.* Et Considera : vineam hanc, quâ olim figurabatur domus Israël typum esse Religionû, Ecclesiæ Christi, & status religiosi. De his, coram sponso suo Christo, gloriatur Ecclesia, dum aliquam Religionem institui, vel antiquam propagari, vel primævum ejus spiritum instaurari videt, dicitq; cum lætitia : *Vinea facta est dilecto meo.*

Homines Religiosi sunt talium vinearum germen delectabile; hi enim, ratione suæ constantiæ, fortitudinis, & imitationis Christi, qui est leo de tribu Juda, rectè appellantur viri Juda, germen delectabile. Ab hac vinea & germinibus, dominus vineæ expectat fructus virtutum multiplices, uvas ori suo gratas, vinum illud præstans, quod se bibiturum in Regno Patris sui Christus appromisit. Porro ut vinea hæc, Domino exercituum, fructificet, hoc primum medium ille ipse adhibuit, quod sepiverit eam, ne esset in direptionem & conculcationem, ne Aper de silva vastet eam. Sepes verò ulterius, qui-

quibus ordines & homines religiosi septi sunt.

Sunt *1^{mo}*. singularis Divina providentia, quæ Dominus exercituum protegit & munit suas vineas, & homines religiosos, impediendo graviores eorum tentationes, nec permittendo gravius tentari, aver-tendo graviorum peccatorum occasiones, quibus ob-noxij sunt homines sæculares.

2^{do} Sepes religionum sunt: præcepta, consilia, & exempla Christi, quæ hominem religiosum continent intra virtutis terminos: hostes animæ & præ-dones arcant, eorumq; tela retundunt.

3^{to} Sepes hujus vineæ sunt Vota religiosa, quæ nulla ratione transgredi fas est, quæ quamdiu inte-gra & inviolata sunt, vineæ non veniunt in direptionem & conculcationem, & fructum desideratum afferunt. Votum Paupertatis, murum appellat S. Pa-ter meus IGNATIUS, quod tanquam sepe, cincta vi-neæ Domini, à vastatore est tutissima; votum etiam Castitatis, est seps muniens vineam, seps est custodia sensuum, sine qua castitas difficilè servari potest, hæc seps si corruat, aper de silva vastat vineam Domi-ni. Votum pariter Obedientiæ, aut seps est, aut cum sit velut baculus senis, sepem vineæ religiosæ fulcit, quod firmior esse possit.

4^{to} Sepes harum vinearum, scilicet sacrarum religionum, sunt constitutiones, regulæ, instituta ea-rum, & quævis ordinationes sive instructiones; ho-rum enim observatione, religiones in sua integrita-te continentur & conservantur. Hæ arcant feras, apros, latrones, ne vineæ Domini veniant in con-culcationem & direptionem. Collapsâ hâc se-pe, hoc est, collapsâ disciplinâ religiôsâ & regulari, instituti observantiâ, vastantur vineæ, silvescunt-labruscas germinant, nec ferunt fructum desi-deratum.

5^{to} Sepes religionum sunt, gratiæ Divinæ, quas DEUS abundè & copiosè confert hominibus
reli-

religiosis, ad superandas tentationes & hostes animæ fugandos.

6^{to} tandem sepis loco est vigilantia Superiorum, avertentium à suis subditis ea omnia, ex quibus virtus & perfectio ipsorum, aliquod detrimentum pateretur, & per quæ accessum aliquem aut mundus, aut caro, aut dæmon haberet ad vineam hanc electam.

His consideratis, æstima gratiam vocationis tuæ ad statum religiosum; et reflecte te, an talibus sepibus munitus, in virtute & perfectione crescas, & fructum feras, quem à te expectat Dominus vineæ, an non facias labruscas, & uvas acerbæ? an divinâ Providentiâ arcente à te occasiones graviorum lapsuum, ipse te in eas non ingeras? an extra occasiones constitutus, non sis aliquando graviter lapsus?

Reflecte te iterum, quomodo imiteris exempla Christi? quomodo observes præcepta, & an sequaris consilia evangelica? sepes etiam votorum religiosorum suntne integræ? an non sint aliquâ saltem sui parte collapsæ? estne paupertas tua murus inconcussus? puritas tua & castitas estne Angelica, munita sensuum custodiâ, quæ ab anima tua hostes & prædones arceat? an certè ipsi tui sensus, non bene custoditi, non sint tales prædones? an oculus tuus non est deprædatus animam tuam? Obedientia tua an non sit fragilis arundo?

Institutum etiam religiosum, disciplina regularis, an per tuas transgressiones, licentiosas libertates, & laxitates, non collabatur.

Reflecte te ulterius, ususne sis gratijs, tibi copiose collatis, ad superandas tentationes? an non ultro nee, abjectis iisdem & contemptis, hostem in animam tuam non immiseris?

Reflecte te tandem, quomodo in te profecerit vigilantia superiorum tuorum? an furtivè lo-

cum

cum in te non dederis, siue concupiscentiæ carnis, siue concupiscentiæ oculorum, siue superbiæ vitæ.

Elice affectus confusionis, gratitudinis DEO, pro tot ad finem tuum consequendum tibi provisus medijs, fac proposita. Pete suppliciter à DEO, ne has, quas tibi providit sepes, à te aliquando auferat, ne eas dirui permittat, ut non permittat vineas suas venire in direptionem & conculcationem.

PUNCTUM III. Audi verba ejusdem Prophetæ, capite citato, de hac ipsa vinea dicentis : *Et lapides collegit ex illa, & plantavit eam electam, & torcular extruxit in ea.* Atq; his verbis alia media

expressa esse existima, ut vineæ religiosæ fructum afferant, & finem suum consequantur.

Ex insinuatīs hīc medijs *imūm* est. Quod Dominus vineæ lapides ex ea colligat. Tales lapides sunt : defectus aliqui irrepentes, prava aliorum exempla, & aliqui religiosi, per incorrigibilitatem, obdurati in malo. Lapides hī plurimū nocent vineæ Domini, hoc est, congregationibus & ordinibus religiosis, impediuntq; vineæ fertilitatem, colligit hos lapides Pater-familias & Dominus vineæ, non tolerando imprimis defectus irrepentes, sed per tot media illos corrigendo. Qualia media sunt : delationes defectuum, monitiones privatæ delinquentium à superioribus, publicæ reprehensiones, correctiones, & pœnitentiæ, frequens Sacramentorum, meditationum, examinum usus, exercitia Spiritualia, & hujusmodi alia. Tollit iterum lapides Dominus vineæ, avertendō mala exempla, siue externa, siue domestica, & si quid contingat, remedium conveniens, per superiores afferendo. Tandem colligit tertij generis lapides, nimirum religiosos, per incorrigibilitatem obduratos in malo, eos emolliendo, vel etiam, si omnino corrigi nolint, extra vineas ejiciendo, illosq; sæculo reddendo.

2dum Medium verbis adductis insinuatū est

est: Quòd Dominus exercituum, unamquamq; vineam plantaverit electam, non solum per hoc, quòd omnes religiones ab Ecclesia approbatæ, ex Spiritû Sancti inspiratione sunt institutæ, quòd Sanctissimas leges habent, quòd sint in certâ & secura salutis viâ. Sed etiam, quia DEUS ad religiones, seu sacros ordines, vocat homines præcipuos, electos ex millibus, quibus mundus non erat dignus. Dominus vineæ plantat vineam suam electam, dum unumquemq; accomodatè ad ipsius complexionem, inclinationes, vires, & talenta, vocat ad eam religionem, quam scit illi maximè congruere, ad religionem, quam ab æterno prævidit, respectu illius, futuram medium maximè opportunum perfectionis & salutis æternæ consequendæ. Plantat vineas electas in sacris religionibus, plantando non vites aliquas steriles, labruscârû & uvarum acerbissimarum productione, hoc est, multorum criminum in sæculo perpetratione, effætas, sed plantando germen delectabile, & ex mundo plantationes novellas, hoc est, homines in tenera adhuc ætate, in prima innocentia constitutos transferendo, & in vineis religiosis transplantando, & non tam deferentes, quàm ignorantes sæculum, ad religionem perducendo. Plantat postremò Dominus exercituum vineas electas, dum in unius cujusq; religiosi animâ, per suas sanctas illustrationes, inserit præstantissima virtutum germina. Germina delectabilia, quæ inserit, sunt: paupertas, castitas, obedientia, humilitas, orationis studium, amor DEI & proximi, conformitas cû Divina voluntate, aliæq; hujusmodi virtutes. Has plantando in anima cujusq; religiosi, Pater cælestis plantat vineam electam.

3^{ti}um Medium ad hoc conducens, ut religiosæ vineæ fructum præstantem & uberem faciant, est, quòd Dominus vineæ, in unâquâq; religione, tanquam suâ vineâ, extruxerit torcular, quo exprimitur vinum, ori Domini vineæ gratissimum, Ta-

Talia torcularia sunt: mortificationes & pœnitentiæ in religionibus usitatae, castigatio corporis, abnegatio sui ipsius, humiliationes ultroneè susceptæ & quæsitæ, contumeliæ, confusiones voluntariæ, labores usq; ad defatigationem, ad sudoris, imò quandoq; ad sanguinis effusionem suscepti, compunctio cordis educens ex oculis fontes lacrymarum &c. Hæc torcularia exstruxit in vineis religiosus Dominus earundem, dum religiones sacras voluit esse statum pœnitentiæ, gymnasia patientiæ, officinam crucifixorum, in qua in unoquoq; religioso formatur Christus isq; cruxifixus; dum Christus ad has vineas non aliter vocat, nisi ut post eum crucem ferant, ut cruce tanquam torculari premanantur, ut suam carnem cum concupiscentijs crucifigant, ut lacrymis suas & alienas culpas defleant, ut in ijs, tanquam strenui operarii, laborent usq; ad sanguinis profusionem.

His consideratis, humillimas DEO age gratias pro sollicita ipsius cura circa vineas suas, sive in colligendis offensivorum lapideis, sive in plantatione harum vinearum, ut sint vineæ electæ, sive in exstruendo torculari ad exprimendum vinum. Age pariter gratias, quòd te in una harum vinearum plantaverit. Admirare Divinam & circa vineas ipsas, circa germina in ipsis plantata, & circa te ipsum, magnam providentiam. Agnosce verè illud a D. Bernardo dictum. *In religione homo vivit purius, cadit rarius, surgit velocius, incedit cautiùs, irroratur frequentiùs, quiescit securiùs, moritur fiduciùs, purgatur citiùs, premiatur copiosiùs.*

Fac deinde reflexiones supra te ipsum, & imprimis, ad te referendo verba illa: *Collegit ex ea lapides*: cogita, quòd plures lapides, hoc est, plures defectus colligendi reperiantur in vinea animæ tuæ. ô quantum laborem causas cultoribus vineæ hujus in ijs colligendis! An ipse eosdem colligere consue-

veris per meditationes, examina conscientiae, variasque sanctas reflexiones? Tecum ipse dispice, an pravo tuo exemplo, non impediveris fructus spirituales in consodalibus tuis? an non tuo exemplo sit imputandum, quod aliquæ vites, quæ aliquando fuerunt germina delectabilia, nunc labruscas producant? An non sis lapis per incorrigibilitatem obduratus, aliquando extra tuam vineam, hoc est extra religionem ejiciendus?

Reflecte iterum te supra illa verba: *Et plantavit eam electam*, hæc etiam ad te referendo. Et cogita, in quali vinea DEI beneficio plantatus sis? an non in vinea electa? an non in vinea illa, in qua uberrimos fructus, & uvas ori Divino gratissimas proferre potes? quomodo religio hæc, ad quam vocatus es, ex omnibus maximè sit accommodata tuæ complexionì, viribus, talentis, inclinationibus, quot in ea habere possis media, fulcos inutiles, hoc est imperfectiones præcidendi. Cogita plantatum te esse inter germina, quæ sibi DEUS elegit ex millibus, quæ ferunt fructus uberrimos, uvas acceptissimas. Cogita etiam te plantatum esse, cum per ætatem tuam & indolem ad omne bonum flexibilem, esses germen delectabile, & quomodo factum est, ut nunc sis vitis sterilis, vitis effœta, vel certè labruscas producens. Tme, ne sis plantatio aliquando eradicanda! Vide etiam, an anima tua sit vinea Domini exercituum, varijs ab eo virtutibus plantata? esne ager, inspirationes Divinas, & sancta lumina, aliarumque gratiarum Divinarum imbrem suscipiens? an succrescant in te virtutum germina per continuum studium, & frequens earum exercitium? an non potius hæc germina suffocaverunt vepres & spinæ, ex maledicta terra, hoc est ex prava tua voluntate ascendentes?

Reflecte te tandem, supra illa verba: *Torcular construxit in ea*, hæc ipsa ad te referendo, & cogita,

an non exhorrescas torcular mortificationum, pœnitentiarum, afflictionum, crucis Christi? an vivis in religione tua tanquam in statu pœnitentiæ, tanquam in schola patientiæ? an formes in te Christum crucifixum? an mortificationem ejus feras in corpore tuo? an carnem tuam crucifigas & Christo configi studeas? an labores in religione usq; ad defatigationem; an peccata tua desleas? an cum lacrymis contriti cordis vinum exprimas gratum ori Divino.

Confundere de defectibus quos advertes. Ad bonum usum propositorū mediolorum, & ad ferendū fructum te excita, timore comminationis illius apud eundem Prophetam: *Auferam sepem ejus, & erit in direptionem; diruam maceriam ejus, & erit in conculcationem, ponam eam desertam, & non putabitur, & non fodietur, ascendent super eam vepres & spina, & nubibus mandabo, ne pluant super eam imbrem.* Fac proposita reflexionibus accommodata.

In colloquio Postula à Domino vineæ, ut mittat operarios, qui in ejus vinea colligant scandala, defectus eliminant, obduratos lapides vel emolliant, vel extra septa eijciant. Pete deinde, ut vineas suas plantet electas, nec cesset ad eas transferre germina delectabilia, & vites fertiles ac fructuosas. Tandem conclude verbis & affectu Psalmistæ: Psalm. 79. *DEUS virtutum convertere, respice de cœlo & vide, & visita vineam istam, & persice eam, quam plantavit dextera tua, & super filium hominis, quem confirmasti tibi.*

In fine: Anima Christi.

Meditatio
De vocatione ad statum sacerdotalem.

Aa2

Pro

Praludium 1. Imaginare ordinationem SS. Apostolorum, quâ à Christo Domino, in ultima cæna, ordinati sunt in Sacerdotes.

Praludium 2. Postula à DEO, ut agnoscas dignitatem vocationis tuæ, ejusq; obligationem.

PUNCTUM I. Audi illa verba S. Pauli Apostoli ad Ephes. 4. *Obsecro vos, ut dignè abuletis vocatione vestrâ, quâ vocati estis.* Et cogita observationem hanc Apostoli, licet intelligi possit de vocatione ad quemcunq; vitæ statum in Christiana religione & Ecclesia Catholica, præcipuè tamen intelligi & applicari posse, atq; in hac meditatione applicandam esse, vocationi ad statum sacerdotalem. Circa quam in puncto præsentis considera ulterius, Sacerdotum, in Christi Ecclesia, plura esse munia, seu officia & functiones. Nimirum:

1^{mo} Ut incruentum sacrificium DEO immolent & offerant, quemadmodum pro populo, ita & pro semetipsis. Pro vivis item atq; defunctis: & ut sacrificando conficiant Consecratione Corpus & Sanguinem Christi sub panis & vini speciebus.

2^{do} ut ministrent sacramenta Christi fidelibus, & ministrando Sacramentum Pœnitentiæ, exerceant Judiciariam potestatem, remittendo peccata, vel etiam retinendo & ligando, juxta pœnitentis dispositionem, & intra potestatis suæ terminos.

3^{io} Ut sint dispensatores mysteriorum DEI.

4^{to} Ut sint medici morbos animæ curantes.

5^{to} Ut sint Magistri & Doctores erudientes multos ad Justitiam, veram Christi fidem docentes, & viam salutis fidelibus demonstrantes.

6^{to} tandem muneris Sacerdotum est, ut DEUM orent, iratum placent hominibus, & legationis ad DEUM munere fungantur.

Hæc considerans, vide quæ & quanta munia & officia, ex vi ordinis sacerdotalis, commissâ habeas. Reflechte te, an & quomodo singula obeas, & quam

curam & diligentiam adhibeas, ut dignè ea obire possis.

PUNCTUM II. Considera vocationis ad statum sacerdotalem, ipsiusq; hujus statûs magnam dignitatem. Etiam in veteri lege, sacerdotalis dignitas præcipua & una ex maximis erat. Regali hæc æquabatur. Unde etiam duæ tribus, una tribus sacerdotalis Levi, altera tribus regia Judæ, conjunctæ & sibi permixtæ erant. In lege Christi, sacerdotalis dignitas tanto excellentior est, quanto ipsum sacerdotium hujus legis, præeminet sacerdotio veteri. Hoc figura fuit, illud res figurata. Sacerdotiû legis veteris originem habuit ab Aaron, & ab hoc in filios successio descendebat; sacerdotium novæ legis originem habet à Christo, & ab ipso descendit per specialem vocationem, & a legitimis Episcopis factam ordinationem. Munia Sacerdotum veteris legis fuerunt: ignem altaris custodire, sacrificia pecorum immolare, incensum adolere, panes propositionis recentes apponere, cerimonias legales observare & custodire &c. Quæ sint munera sacerdotum novæ legis, considerasti puncto præcedenti, eorumq; dignitatem deinceps considerabis amplius. Ex utriusq; sacerdotij veteris & novæ legis comparatione, sacerdotij tui dignitatem faciliè intelliges. Independentem ab hac comparatione, magna præterea sacerdotij novæ legis dignitas est. Quia.

Imprimis dignitas sacerdotij novæ legis, est dignitas regalis. Hoc enim sacerdotium est secundum ordinem Melchisedech, qui rex simul & sacerdos fuit. Sacerdotes Christi sunt principes super omnem terram constituti, sunt gens sancta, populus electus, coronata capita, sunt tales reges, qualis Rex, ipse Christus fuit, dum in corpore mortali, mortalis inter homines viveret, hoc est, sunt reges, non ad exigenda tributa, non ad exercitus ferro armados, hostesq; visibiliter debellandos, sed quòd men-

tes regant, quòd in æternum consulant, quòd credentes, sperantes, amantes in regnum cælorum perducant. Quare cum dignitas regalis Christi longè excellentior fuerit, Regum & Principum terræ potestate & dignitate, etiam dignitas Sacerdotum præeminet dignitati terrenorum Regum & Principum.

Imò sacerdotij dignitas maior est dignitate summi Pontificatûs, si hic præcisè spectetur quoad supremā & universālē Jurisdictionē supra totā Christi Ecclesiā. Nam Papæ, ex vi summi Pontificatûs præcisè a sacerdotio accepti, convenit Potestas in Corpus Christi mysticum, hoc est, in omnes fideles & Ecclesiam. Sacerdotij verò potestas, est potestas in Corpus Christi verum & reale, ita, ut vel in ipso Papa, nihil sit admirabilius, nihil potentius, ipso ejusdem sacerdotio.

2^{dò} Sacerdotij dignitas major est dignitate Angelicā. Quod enim non est concessum Angelis, concessum est hominī Sacerdoti. Quod Sacerdotes conficimus, adorant Angeli, nec conficere possunt, satisq; honoris se habere existimant, quòd Sacerdoti celebranti tanquam famuli assistant.

3^{dò} Sacerdotij dignitas est aliquatenus similis dignitati Maternitatis Christi, quæ tota in hoc stat, quòd Beatissima DEI Parens genuerit mundo Salvatorem & Redemptorem Christum JESUM, DEUM verum & hominem. Hunc ipsum Sacerdos, in suo sacrificio, generat & producit per consecrationem, realemq; Christi præsentiam ponit sub speciebus panis & vini, idq; non semel hoc duntaxat facit, sed toties, quoties sacrificat; generat autem Christum non parvulum, non mortalem & passibilem, qualem genuit Mater Sanctissima, sed generat Christum in mensura ætatis & plenitudinis suæ, immortalem, impassibilem, gloriosum & glorificatum; generat Christum Redemptorem & Salvatorem; ita enim conficit Corpus, & Sanguinē Christi, ut statim im-

Immolet eundem Christum, tanquam Agnum immaculatum, in redemptionem & salutem Fidelium.

4^{to} Sacerdotij dignitas est eadem moraliter cum dignitate Christi. Sacerdos enim conficiens Sacramenta, est eadem moraliter persona cum Christo, conficit Sacramenta repræsentando personam & in nomine ipsius, in potestate etiam & virtute sibi à Christo collata. Insuper conficit illa sermonibus & verbis Christi, vel certè verbis à Christo ad id institutis.

5^{to} Sacerdotij dignitas est dignitas propè Divina. Sacerdos enim ea operatur, quæ solius sunt virtutis & potestatis Divinæ. Quis potest dimittere peccata, nonne solus DEUS? hanc potestatem Christus contulit Sacerdotibus. *Quorum remiseritis peccata, remittuntur eis.* Judicium mundi & hominum, est res ad DEUM propriè spectans. Judicium hoc Pater æternus commisit Unigenito suo Filio, juxta illud Ioan. 10. *Pater omne Judicium dedit Filio.* Filius autè hoc ipsum Judicium & potestatem judiciariam dedit Sacerdotibus, ipsosq; constituit Judices, ut judicent 12 tribus Israel, hoc est, omnes Christi fideles: ita ut terrestre Sacerdotis Judiciū (prout ait S. Leo) *Sit præjudicata auctoritas in cælo, ut quæ in terris aut ligata sunt aut soluta, statuti ejusdè conditione obtineant & in cælo.* Divinum opus est disponere de Regno Cælorum. Post hoc, morte Filij DEI reſeratum, penes Sacerdotes est potestas clavium. Sacerdos cælum aperit, & nemo claudit; claudit & nō aperit. Virtus etiam patrativa miraculorum, est virtus soli DEO propria, DEUS enim est, qui facit mirabilia magna solus. Hanc virtutem contulit DEUS sacerdotio. Sacerdos sacrificando facit miraculum miraculorum, & mysterium maximum. Sacerdos voce suā (DEO obediēte homini) (è sinu Patris æterni, Filium ejus incarnatum ad terras deducit, speciebus panis & vini alligat, facit cum hominibus permanere, pane hōc cœlesti, sub

modicis speciebus, non solum septem millia hominum, sed totum mundum potens est reficere. Ad vocem sacerdotis, sacrosancto altaris mysterio, Angelorum chori adesse festinant, sociantur summa immis, ima & terrena junguntur celestibus, ex visibilibus, atq; invisibilibus unum quid efficitur.

6^{to} Ad dignitatem Sacerdotij accedunt & hæc, quod Sacerdos sit Minister & Dispensator mysteriorum DEI, sitq; Thesaurarius Verbi Incarnati; ipse in sua dispositione & manibus habet infinitum meritorum Christi thesaurum, immensas celestium gratiarum & donorum opes, illasq; liberaliter largiri possit, pro una lacrymula, pro pectoris tussione, pro poenitentis cordis suspirio, pro humili peccatorum confessione.

Quod Sacerdos sit medicus spiritualis, quod animas sanet, quod non solum vitam spiritualem protrahere possit, sed etiam mortuos in anima resuscitare, & ad vitam revocare valeat. Quod tanta virtute medendi polleat, ut nullus morbus sit insanabilis, nullum vulnus, respectu illius, incurabile. Quod non aliam medicinam utatur ad curandos animi morbos, nisi pretiosissimo, sanguinis ex Christi vulneribus profluentis, balsamo. Quod efficacissima remedia in promptu habeat, quæ ex præscriptione hujus medici applicata, vim magnam habent, non solum ad sanandos, sed etiam ad præcavendos ulteriores morbos & mortem animæ.

Accedit adhuc & illud ad dignitatem Sacerdotis, quod ratione potestatis prædicandi verbi Divini, fungatur charactere & officio Legati à DEO missi. Sacerdotes sunt præcursores adventus Domini, sunt Apostoli, orbis magistri, Doctores gentium, sunt Evangelistæ, Christi Evangelium annuntiantes, sunt Prophetæ prædicentes futura; præmia scilicet bonorum & supplicia impiorum. Mittuntur illi & legatione funguntur, non solum ad Reges terræ &

Princ.

Principes, ac divites hujus sæculi, sed etiam ad pauperes, rudes, & simplices. mittuntur tam ad justos, quam ad peccatores; ad hos, ut convertantur à vijs suis pessimis, & pœnitentiam agant; ad illos, ut in virtute proficiant, terviantq; Domino in sanctitate & Justitia; ut, qui justus est, justificetur adhuc, nec viam Justitiæ deserant unquam. Mittuntur ad Infideles & ad fideles, ut illi per ipsos lumen fidei accipiant, hi ut in lumine fidei ambulent, nec illud vitijs obscurant. mittuntur ad omnes, ut omnes ad Christum adducant, & omnibus viam salutis demonstrant. Puncta legationis sunt, ut homines agnoscant unum DEUM, & quem Pater misit JESUM Christum Filium ejus unigenitum, ut prædicent Regnum DEI & Justitiam ejus, ut prædicent pœnitentiam, ut prædicent non semetipsos, sed JESUM Christum & hunc Crucifixum, suaq; prædicatione efficiant, ut in fidelibus formetur JESUS Christus.

Tandem & hoc auget dignitatem sacerdotis, quòd non solum sit legatus DEI ad homines, sed etiam, quòd sit orator & legatus ad DEUM & Christum, à sponsa ejus, militante Ecclesiâ constitutus. Magna hinc Sacerdotis est dignitas. Cum Christus Sponsam suam amet, libenter hos legatos audit, libenter habet proponi sibi per ipsos negotia & necessitates Ecclesiæ, vota & desideria populorum. Oratores hi, sunt primæ admissionis; non solum illis semper patet accessus ad Christum, sed etiam tenentur sæpius cum eo transigere, conferre, & commissa sibi tractare. Iplis licet ingredi sancta Sanctorum, ipsi latus Regis sæculorum & thronum supant, in quo residet Christus Eucharisticus. Sacerdos, dum alij silent, in templo tanquam dignior & ex officio loquitur cum DEO, habetq; publicam audientiam, sæpè etiam secreto loquitur tanquam amicus cum amico.

PUNCTUM III. Circa verba superius adducta

Pun-

puncto 1. hoc considera. Si tanta est dignitas statûs sacerdotalis & vocationis ad eundem statum, sequi hinc legitimè, Sacerdotem oportere tali vocatione dignè ambulare. Certè sancta sanctè tractanda sunt, & tantæ Personæ dignitas, cum dignitate sustinenda. Non modicè enim derogatur dignitati non solum Sacerdotis, sed etiam DEI & Christi, cujus personam sacerdos agit, si mores non respondeant professioni, & tanti muneris sanctitati.

Porro, ut quis dignè ambulet vocatione ad talem statum.

Requititur imò Ut in Sacerdote sit puritas plusquam Angelica, puritas conscientiae, quam maxima, summa innocentia, & integritas vitae. Dum sacra peragis mysteria ô Sacerdos, Rex Angelorum est, quem consecratione in Eucharistiam deducis, & in ea adoras; Angeli ipsi assistunt; Angelorum panem & tu ipse manducas, & tali pane alios reficis. Quidni igitur & ipse Angelus eris? oportet te purissimos Spiritus, Angelica puritate, æmulari. Dum sacrificas, Agnum immaculatum immolas, quare curandum tibi est, ut & ipse sis agnus sine macula; cavendum, ne propter lupinos mores, sis lupus agnum comedens. Dum ad altare accedis, procedis, Albâ & splendidum apparatus indutus, quò sacerdotalium vestium nitore admoneris, ut tua conscientia, primâ stolâ, hoc est, gratiâ sanctificante fulgeat in oculis DEI, ut anima tua, tanquam sponsa coram suo Sponso Christo, compareat in vestitu per Charitatem deaurato, circumdata sanctarum virtutum & meritorum varietatibus atq; ornamentis. Nullius tunc labis, præcipuè mortalis, conscius esse debes, vult Christus ut sis mundus totus. Licet verò talis fueris, hoc est à gravioribus peccatis, per gratiam DEI liber, exigit à te tanti mysterij sanctitas, ut & pedes laves, hoc est, dum adest copia confessorij, ut etiam venialia, & pulvisculos pedibus ad-

hærentes, per Sacramentum pœnitentiæ, vel etiam lacrymis ex contrito corde profusis abluas. Christi Personam agis, imitare Christi sanctitatem, Christum induere, eumq; ita moribus & sanctitate exprime, ut jam non tu vivas, sed Christus in te vivat. Es quodammodo Mater Christi, ipsum in Sacramento producens & generans, magna, proinde in te puritas inveniri dedit. In Matre Sanctissima, tanta fuit puritas, ut nec actuali nec originali labe fuerit unquam contaminata; tu ad eam saltẽm puritatem enitaris, ut nullò unquam, non solum mortali peccatò, sed etiam veniali, maximè verò deliberato, maculeris. Christum manibus tractas, in ulnas tuas sicut alter Simeon fuscipis; ita illum porta, ut post quodvis Sacramentum, & Sacramentalẽ Christi susceptionẽ, securè & cù certa spe salutis, immediatè mori possis, illudq; cù Simeone occinere: *Nunc dimittis servum tuum &c.*

Requiritur 2^{dò} in sacerdote, ut dignè ambulet vocatione sua, magna in DEUM & proximum charitas. Quævis Sacramenta, quæ Sacerdos ministrat, sunt Sacramenta pietatis, sunt signa unitatis, & charitatis vincula, debent igitur & in suscipientibus & in ipso ministrante accendere magnam charitatem. Sacerdotio veteris legis demandata fuit cura custodiendi & fovendi ignis in altari. Ignis qui in altari custodiri debet à Sacerdotibus novæ legis, est Christus Eucharisticus: sed & ipsa anima atq; cor Sacerdotis, altare esse debet, in quo Sacerdos custodire & fovere debet ignem charitatis in DEUM & proximum. Duæ candelæ in altari accensæ, dum Divina celebrantur, quid aliud significant, nisi quòd cor Sacerdotis Divina celebrantis, gemino hoc duplicis charitatis igne ardere debeat. Debet tali igne ardere cor Sacerdotis, dum circa salutem animarum laborat, sive prædicando, catechizando, instituendo; sive Sacramentum pœnitentiæ aliq; Sacramenta ministrando. Si enim non arserit igne amoris Divi-

ni, non poterit ignem accendere in cordibus peccatorum. Debet etiā ardere igne charitatis erga proximum, quia debet condolere ijs, qui ignorant & errant, memor illius : *quoniam & ipse circumdatus est infirmitate.*

Requiritur 3^{ti} Fidelitas in dispensandis mysterijs, Ut Sacerdos censeatur dignè ambulare vacatione sua, fidelitatē in ipso requirit S. Paulus 1. ad cor. 4. sic nos existimet hōo, ut ministros Christi, & dispensatores Mysteriōrū DEI. Hic jā queritur inter dispensatores, ut fidelis quis inveniat. Rara quidē hęc virtus est, cæterum cuius Sacerdoti perquam necessaria. Porro fidelitas in hoc consistit, ut Sacramenta & mysteria Divina, indigentibus, petentibus, & debitè dispositis, promptè ministremus, ut minus dispositos disponamus, & instruamus, denegemus verò indignis, nec ad ea dispositis, imò nec disponere se volentibus, ut non demus sancta canibus, nec projiciamus margaritas ante porcos. Ad hanc fidelitatem, & fortitudinem, quæ fidelitati conjuncta esse debet, hortatur Sacerdotes S. Chrysostomus : *Ut cum multo studio hæc dona distribuatis* (loquitur de sanctissima Eucharistia) *Non parva vobis imminet ultio, si quem culpa ullius consciunt, hujus mensa participem esse concedatis. Sanguis ejus de manibus vestris exigetur.* Quod ita intelligi debet, ut publicè indigni, quales potissimum sunt excommunicati, palam & publicè arceantur à mensa Eucharistica, imò ab alijs etiam officijs Divinis. Qui privatā notitiā sciuntur indigni, si non possint ad saniozem mentem reduci, privata monitione prohibeantur à Sacramenti Sanctissimi susceptione. Similis fidelitas tantò magis servanda est in administratione Sacramenti poenitentiae, ne aliena peccata palpemus, ne excusamus, quæ excusari non possunt, nec debent, ne simus canes muti & non latrantes dum latrandum est, dum est monendus peccator de periculo animæ, de facienda restitutione.

restitutione sive bonorum fortunæ, sive famæ, & honoris, de dimittenda & amovenda proxima peccandi occasione, de vita seriò emendanda. Ne indebitis resolutionibus laxemus fidelium conscientias, ne ob vanos respectus, pravis consilijs, simus alijs duces in præceps, & quos in cælum ducere tenemur, ne præcipitemus in infernum.

Requiritur 4^{to} in Sacerdote orandi assiduitas, & frequens per orationem cum DEO communicatio, ut verè, de eo dici possit, *hic est sacerdos qui multum orat pro populo*. Sicut Christus semper vivit ad interpellandum pro nobis, & rogat pro nobis Patrem, ita & Sacerdoti cuius orandus est Pater cælestis deprecatione assidua. Sacerdos est orator & legatus Ecclesiæ, necessitates ejusdem in oratione DEO exponens. Cum ergò hæ multæ sint & novæ ac novæ semper, non breviter nec perfunctoriè exponi debent. Ut oratio sit efficax, constans esse debet, nec satis est, in ipsa cum Christo unâ horâ vigilare, sed totis noctibus orandum, sæpiusq; in oratione pernoctandum est. Hanc orandi assiduitatem requirit in Sacerdotibus Ecclesia, multa in hunc finem ejusdem præscribendo.

Requiritur 5^{to} In rebus Divinis tractandis summa reverentia. Minima irreverentia & denegatio exigui quantumvis honoris, offendit terrestres Principes. Præscribi consueverunt multæ adorationes, genuflexiones, cerimonie, cum summa gravitate, modestiâ, demissione exhibendæ ab ijs, qui in conspectum Principum, ad transigenda cum ipsis negotia, admittuntur. Quanto magis offendit DEUM irreverentia, quæ a Sacerdotibus committitur, dum hi ministrant in conspectu Domini, & celebrant Divina. Levem irreverentiam Ozæ Sacerdotis, quam commisit sua temeritate in contingenda Arca veteris testamenti, morte ejusdem punivit DEUS. Quæ poenæ manebunt irreverentias in tra-

tractando corpore & sanguine Christi, alijsq; Sacramentis administrandis, à pluribus Sacerdotibus committi solitas ? ritus & ceremoniæ ab Ecclesia præscriptæ, vide qua gravitate, modestiâ, animi demissione & corporis compositione fieri debeant ? absit ut hæc fiant more histrionico & mimico, ut genuflexiones Sacerdotis sint similes genuflexionibus militum Christo illudentium. DEUS non irridetur.

Requiritur 6^{to} ad dignè ambulandum vocatione sacerdotali, sufficiens in Sacerdote scientia, eruditio, & prudentia. Hæc enim requiritur in orbis Magistris & Doctoribus, in his, qui viam veritatis docere, & Evangelium Christi prædicare, ex vi sui muneris, tenentur. Sine hac, nec Sacramenta fructuosè ministrari, nec Verbum DEI salutariter prædicari, nec conscientiarum difficultates convenienter resolveri possunt. Sine scientia & doctrinâ, sacerdotium suscipi non debet ; post susceptum verò, doctrina Sacerdotis frequenti & fere continuâ librorum lectione, meditatione rerum Divinarum & spiritualium, similibusq; medijs conservari, ac etiam augeri debet. Curandum est, ne Ecclesiasticus ita se immergat rebus tēporalibus, ut obliviscatur spiritualium, vel studium eorum negligat, sine quorum sufficienti notitia, officio suo convenienter & fructuosè fungi non potest.

7^{mo} tandem requiritur, ut conversatio Sacerdotis sit sancta & exemplaris, ut Sacerdos sit sal, quod aspersum condiat populos, ut ejus actiones sint ad gustum Divinum, & fideles, videntes opera bona ipsius, glorificent Patrem qui in cœlis est, habeantq; unde ædificentur, nec cogantur delinquere, si eum imitari velint. Sacerdotes non solum incensum offerre debent, sed ipsi ubiq; & in omni loco debent esse bonus odor Christi, debentq; in praxi ostendere, & demonstrare exemplò, quod prædicatione docent.

His consideratis, æstima vocationis tuæ, ad statum sacerdotalem, dignitatem, simulque reflecte te supra tuam, propter peccata à te cōmissa, maximā indignitatē, & indignum te reputa eò, quò fungeris ministerio. Reflecte te, quàm indignè hæcenus ambulaveris vocatione tua? Recogita; quæ & quanta in te puritas conscientiæ? an talis, qualem exigit & personæ quam agis, & mysteriorum ac Sacramentorum quæ administras, excellentia & dignitas? quæ in DEUM & primum charitas? quis animarum zelus? quàm fidelis sis dispensator mysteriorum DEI? quod in te orationis studium? quis ad res Divinas meditandas, & cum DEO agendum affectus? quantam DEO præsentī exhibeas reverentiam, & cum quali, Divina peragis mysteria? quàm accuratus es in sacris cerimōnijs & ritibus observandis? An sis sollicitus de habenda sufficienti scientiā & doctrinā, ad munus sacerdotale ritè obeundum. Quam curam habes, de bono nomine & de dando alijs bono exemplo.

Confundere, si hæc in te aut non inveneris, aut defectuosa adverteris; fac proposita, curaturum te deinceps ea omnia & singula, sine quibus non potes dignè ambulare vocatione tuā.

In colloquio Supplica Christo, ut te dignum efficiat suum Ministrum, ac te in se transformet, ut non quomodocunq; geras personā ejus, ac sacerdotali munere & functione repræsentes, sed ut imitatione virtutum & exemplorum ejus, Christum in te quàm perfectissimè exprimas, hacq; expressione efficias, ut deinceps non tu vivas, sed vivat in te Christus.

In fine: Anima Christi



Meditatio

De vocatione ad beneficium ecclesiasticum habens anexam curam animarum.

Preludium 1. Imaginare actum institutionis, per quam institutus es in Pastorem & Rectorem Ecclesiæ tibi commissæ, vel etiam illum actum, quod S. Petrus institutus est à Christo in universalem totius Ecclesiæ Pastorem, illis verbis: *Pasce oves meas, pasce agnos meos.*

Preludium 2. Postula à DEO gratiam, quâ illuminatus agnoscas obligationem annexam beneficio Pastoralis seu curato, & ut huic obligationi satisfacias.

PUNCTUM I. Audi illa verba S. Pauli Apostoli ad Hebræos 13. *Obedite præpositis vestris & subjacere illis, ipsi enim pervigilant quasi ratione reddituri pro animabus vestris.* Et ex his verbis disce in munere Pastoralis Præpositorum & Rectorum Ecclesiæ tria hæc inveniri. *1^o* Honorē & jurisdictionē ipsorum spirituale in Oves suæ curæ commissas. *2^{do}* laborem & vigilias circa easdem oves, ac obligationem laborandi & vigilandi super gregem suum. *3^{io}* obligationem ad reddendam rationem pro animabus.

Convenit *imprimis* Ecclesiæ DEI Rectoribus honor & Jurisdictio. Ipsos siquidem Apostolus vocat Præpositos, vult ut illis obediatur, mandat ut hi subjaceant illis, qui ipsorum curæ committuntur. Illi habent potestatem nomine DEI, & nomine Christi summi Pastoris, præcipiendi legem Evangelicam, & leges Ecclesiæ promulgandi, ac etiam exigendi, ut hæc leges à fidelibus servantur; quia Pastores sunt, & vocem eorum oves audire & sequi tenentur.

Ultre

Ultra honorem & Jurisdictionem in munere Pastoralis contentam, ex vi Pastoralis muneris, debetur à Pastore (quod secundum est) labor & vigilantia supra oves. ipsi enim (ut ait Apostolus) *pervigilant*. Vigilantia Pastoris qualis esse debeat, commodè describitur à S. Basilio. Dicit ille : *Pastorem esse, est esse nihil habentē, nisi quod ad victum quotidianum attinet, clavam & peram, remissē tamen, tanquam subsidia diurna gestantem, nullam crastini curam habentem, bestiis hostem, mansuetorum animalium con- tubernalē, forum ac tribunalia fugientem, syco- phantarum ac mercature ignorantem, divitias nesci- entem, proprium tectum non habentem, sed sub eo, quod mundo commune est, agentem, noctu ad cœlum suspicientem, & per astra, conditoris admirabilem po- testatem considerantem*. Discutiantur singula. Vigi- lantis Pastoris proprium est : proprium nihil habe- re, nisi quod ad victum quotidianum attinet, non habere curam crastini, Divitias nescire, hoc est, non inhiare congregandis pecuniis, augendis Ecclesiasticis proventibus, sed contentum esse eo, quod ad congruā Pastoris sustentationē est necessarium; si verò redditus sint majores; quod est supra congruā sustentationem, id convertere in Ecclesiæ ornamentum, in Paupe- rum eleemosynas, in ovium suarum indigentium ne- cessitates. Nimia enim cura & sollicitudo circa auctio- nem proventuum, Divitiarum coacervationem, non solum dedecet Pastorem, & turpem redolet avari- tiam, sed etiam impedit eundem in debita vigilan- tia supra gregem Dominicum; quantum enim his augendis Pastores impendunt curæ, tantum detra- hunt de vigilantia circa oves.

Convenit deinde Pastori, ut peram & clavam remissē gestet, tanquam diurna subsidia ; nimirum, ut moderata sustentatione & provisione temporali- um, quam pera significat, sit contentus. Clavam vero teneat, tanquam subsidium & arma, ad arcen-

dos & abigendos lupos, fures, latrones, aliosq; ovium hostes, ad corrigendas inobedientes & aberrantes oves. Per clavā hanc intelligi debet Pastoralis sollicitudo, quæ nullis adversis cedat, nullis vincatur difficultatibus, omnesq; respectus superet. Vel etiam per clavam intelligenda est virga correptionis, quæ remissè gestari debet, quia in spiritu benignitatis & mansuetudinis Christi, corripiendæ & corrigendæ sunt oves, si desistant & aberrant.

Uterius, Pastor vigilans, debet esse bestiarum hostis, qui pro grege suo, adversus lupos infernales, adversus Leones rugientes, qui circum eunt, quærentes quem devorent, aliasq; bestias, adversus etiam fures & latrones, nimirum adversus hæreticos, & malos Catholicos, pravo exemplo corrumpentes alios, strenuè & fortiter decertare debet, ne oves discerpant & lacerent, ne furentur & mactent.

Pastoris etiam vigilantis officium exigit, ut sit mansuetorum animalium contubernalis, quia inter suas oves continuò versari debet, nec ab illis, ad tempus præcipuè longius, recedere fas ipsi est, ut totus sit in quærendis animarum lucris, in providendis ovium suarum spiritualibus, commodis in avertendis damnis & detrimentis.

Vigilantis præterea Pastoris hæc laus & commendatio esse debet, quòd forum & tribunalia fugiat, ac sycophantas & mercaturas ignoret, quòd lites, quantum fieri potest, declinet & aversetur, nec se negotijs sæcularibus & negotiationibus immisceat. Per hoc enim maximè avertuntur fidelium animi à Pastore, si litigiosus sit, si nimis in exigendis decimis, proventibusq; augendis, si lucra & pecunias, per modos indebitos & artes insolitas, quærat. Hæc dedecent statum Pastoralem, & Pastorem distrahunt, quominus convenienter ovibus invigilare possit.

Additur insuper, quòd Pastor vigilans proprium tectum non habeat. Pastor pastorum Christus Dominus de seipso dicit : *Vulpes foveas habent, volucres celi nidos. Filius autem hominis, non habet, ubi caput reclinat.* Etiam alios minores Pastores convenit æmulari, & imitari Pastorem optimum Christum, non ut defacto tecta & domos non habeant, sed ut nulla privata ipsorum commoda, in proprijs domibus, eos detineant, quin promptè, quocunq; tempore, subveniant animabus, accurrant ad juvandos morientes, ad ministranda sacramenta Fidelibus, ad conferendum Baptismum infantibus, maxime si periclitentur, ad solandos infirmos, aliaq; sui muneris exercenda ministeria, sæpiusq; sub eo, quod mundo commune est, tecto, hoc est, sub cœlo agant, quàm domi suæ inveniantur.

Tandem de Pastoribus dicitur & illud, quòd noctu ad cœlū suspiciant, & per astra, Conditoris admirabilem potestatem considerent; quia vigilantia Pastoralis etiam hoc à Pastoribus exigit, ut sæpius, non tam corporis, quàm mentis oculos in cœlum levant, ut sæpius postulent à DEO, se in cura & vigilantia circa animas adjuvari, ut è somno ad orationem se pro proripiant, illud mente revolventes: *Nisi Dominus custodierit Suum & ipsorum gregem, frustra illos vigilare, qui ex vi muneris Pastoralis custodiunt eum; ut Divina & cœlestia libenter meditentur, & per creaturas & ipsi veniant in cognitionem DEI & alios adducere studeant.*

3. *ium* Quod ex verbis Apostoli discitur, est ad vigilantiam supra oves ipsis commissas, ita teneri Pastores, ut sint rationem reddituri pro animabus. Hujus rationis DEO aliquando reddendæ, meminisse eos oportet. Hæc illos debet excitare, & accendere ad sollicitam curam & vigilantiam quàm maximam. circa animas ipsis demandatas. Quia DEUS, in die sui Judicij, sanguinem de manibus i-

psorum requireret, si qui culpâ & negligentia ipsorum perierint. Quia Judicium durissimum est ijs qui præsunt, ob negligentias, & defectus vigilantia convenientis circa ipsorum oviculas.

Sacerdotes non beneficiati, quidquid ministerij spiritualis circa animas præstant, si exerceant munia & ministeria sacerdotalia, cum hæc ex Charitate faciant, idq; frequenter absq; obligatione etiam ipsius charitatis, non reddent rationem pro animabus, ob omissa & non præstita aliqua spiritualia obsequia. Beneficiati tamen, qui possident beneficia annexam curam animarum habentia, graviter obligantur ad præstanda hujusmodi obsequia; quia obligantur ex Justitia commutativa, in stipendium enim, interveniente contractu saltem implicito, pro talibus obsequijs, percipiunt Ecclesiasticos proventus, & redditus beneficij. Quarè, si huic obligationi contraveniunt, si quid ex grege Domini, culpâ illorum pereat, si lusus infernalis aliquam oviculam rapiat & discerpat, sciant pro perditis animabus rationem se reddituros, manet illos Judicium durissimum.

Exhorresce Judicij Divini severitatem, & recogita, an, & quantam rationem redditurus es pro animabus, quas tuâ culpâ perijsse opinari potes. Recogita, an aliquæ & quot animæ per tuam negligentiam perierint? reflecte te, an tua vigilantia supra oves tibi commissas talis fuerit, qualem describit S. Basilius? et cum plures adverteris defectus, eos per seriam poenitentiam desce, ac firmiter propone omni deinceps diligentia te invigilaturum gregi tuo: Protestare paratum te etiam animam ponere, ne aliquando ovis quæpiam tibi commissâ pereat.

PUNCTUM II. Audi illa verba Principis Apostolorum imma S. Petri 5. *Pascite, qui in vobis est, gregem DEI.* Et considera: à quovis Pastore ovium Christi

Christi, eā curā circa oves cōmissas haberi debere, ut pascat gregem DEI, ut cibum & pascua ovibus provideat, eas alat, reficiat, & impinguet. Porro cibus duplex est. unus spiritualis, quo reficiuntur animæ, alter corporalis, quo sustentantur corpora. Cibum spiritualem, quis & qualis esse debeat, sæpius nobis descripsit incarnata Sapiencia Christus. Nam *primò* cibum spiritualem dicit esse omne verbum quod procedit de Ore DEI. *2dò* talem cibum dicit esse voluntatem DEI, aut potius voluntatis Divinæ executionem. *3tò* Carnem suam appellat cibum datum pro mundi vita. *4tò*. Cibus animæ sunt Justitia & omnes virtutes. Unde beati dicuntur, qui hunc cibum esuriunt, & sitiunt Justitiā. *5tò* tandem cibus animæ sunt quævis sacramenta novæ legis, sunt gratiæ Divinæ, tam habituales quàm actuales, illis enim sustentatur vita animæ nostræ.

Cibum hujusmodi, ex vi sui officij, Pastor gregis Christi, tenetur ovibus sibi commissis apponere. Et imprimis tenetur illas reficere verbo DEI, quia tenetur illis Doctrinam Christi & Evangelij continuo instillare, in catechismis, docendo mysteria & rudimenta fidei, instruendo quæ Christianum nōsse oportet, explicando quæ sunt præcepta legis naturæ, quæ præcepta legis scriptæ, quæ præcepta legis gratiæ seu Evangelica, quæ item præcepta Ecclesiæ, quæ sit obligatio servandi hujusmodi leges, quæ poenæ in transgressores statutæ, quæ præmia observantibus legem appromissa. In concionibus, ostendendo ea, quæ ad mores spectant & vitam sanctæ ac Christiane instituendam, deterrendo à peccatis, exempla Christi & sanctorum ad imitandum proponendo, exhortando ad præstandum DEO obsequium, reverentiam, & amorem, ad vitandas noxias conversationes, fugiendas occasiones peccati. In privatis colloquijs, varia salutis media, remedia contra

Bb3

pecca

peccata, motiva & incitamenta ad virtutē suggerendo.

Tenetur insuper Pastor gregis Christi, cibum illum, quo Christus ipse vescabatur, suis oviculis apponere, nimirum, debet illis exponere & explicare voluntatem Patris cœlestis, ad eamq; faciendam adhortari, debet illis explicare, quod voluntas DEI sit sanctificatio & salus æterna ipsarum; quod DEUS sua voluntate exigit, ut non solum præcepta servantur, sed etiam, ut in virtutibus Christianis proficiant. Debet suis oviculis persuadere Pastor, ut opera Justitiæ, Charitatis, misericordiæ, aliaq; exerceant, & per talia opera, salutem & cœlum promereantur; ut in perferendis diversis & tribulationibus conforment se voluntati Divinæ, in ea conquiescant, hanc in se impleri appetant, ac per ipsam, appetitum & famem suam exsatiarent.

Tenetur præterea Pastor ovibus, suæ curæ commissis, Panem cœlestem, panem Eucharisticum præbere & ministrare, non solum quando illæ præcepto obligantur ad hunc panem manducandum, sed quotiescunq; volent & petent. Imò famem hujus cibi debet in illis excitare, usum quam frequentissimum commendare, utq; illum fructuosè, & ad vitam, non vero ad Judicium manducant, instruere & admonere.

Uterius Pastor, vi sui muneris, tenetur ovibus Christi alia etiam Sacramenta ministrare, & ad hæc, tanquam ad pascua quibus impinguari possunt, adducere. Justitiam quoq; & quarumvis virtutum studium quam maximè cōmendare, ut hæc esuriant & sitiant, famemq; horum & sitim, in ipsis ut accendat, tenetur procurare.

Tandem Pastor gregis Dominici debet laborare, ut oves ipsius in gratia DEI proficiant, eamq; augere studeant, ut gratias actuales & inspirationes Divinas promptè & toto corde suscipiant, illisq; obediant, bene ipsidem utantur, & efficaces reddant.

Ita

Ita pascendo oves suas Pastores Ecclesiarum, impinguabunt sibi commissum pecus, impinguatas oves summo Pastori Christo reddent, & in Iudicio DEI universali, cum alijs ovibus, etiam suas oves ad dexteram constitutas, magno suo spectabunt solatio.

Verum & cibo corporali, oves tali refectione indigentes, nimirum pauperes, pascendæ subinde sunt à Pastoribus. Væ illis, si se ipsos pascant, si ex vellere ovium, ex pauperum substantijs, eorumquæ labore, lucra sua & emolumenta temporalia quærant, si comedant domos viduarum, si ut escam panis devorent plebem Christi. si à pauperibus, pro sepulturis mortuorum, pro Sacramentorum ministracione, & suis obsequijs, nimium exigant, & pecuniam cum sanguine emungant. Bonus Pastor non est rigidus exactor, metens ibi, ubi non seminavit. Pauperes, exhaustas, vellere spoliatas oviculas etiam temporali cibo reficit; eleemofynis sublevat, & corporalibus adjuvat subsidjs. Bonus Pastor dat, vel paratus est dare animam & vitam suam pro ovibus; quantò magis, in ovium commodum & subsidium, dabit perlibenter bona suæ fortunæ & substantiam. Hanc qui tenaciter retinet, nec pauperem sublevat, quomodo sperari poterit ut pro ovibus ponat animam? quemadmodum sentit S. Gregorius ubi dicit: *Qui non dat pro ovibus substantiam suam, quando pro his daturus est animam suam?*

Ad veba illa: *Pascite gregem DEI*, addit Petrus: *qui in vobis est.* Quo addito videtur commendare, ut omnes quidem oves, sed maximè illas, inter quas sæpius aut etiam continuò versantur, pascant Ecclesiarum Pastores & Præpositi; ut oviculis domesticis majora impendant, & incipiant à Domo sua, ut timorem Domini, & ea quæ ad salutem spectant, doceant suos domesticos & familiam, ut quisq; domum Pastoris considerans, advertat faciliè, domum illam esse ovile Domini, omnes illic esse mites, man-

svetas, innocentes oviculas, Christo Pastori gratas, nullum reperiri fætentem hædum.

Videtur & alterum commendare, ut, qui Pastoris munere fungitur, suas omnes oviculas non solum in & præ oculis habeat, sed etiam memoriâ & intellectu sæpius verset, de spiritualibus eorum necessitatibus cogitet, charitate & affectu complectatur, in corde & pectore ferat; hac enim ratione sperari potest, ut gregem, qui ita est intra cor & viscera Pastoris, pascat diligentius & cum majore gregis ipsius comodo, ac utilitate.

His consideratis, mentem ad teipsum converte, & percurrento singula, vide, in quo defueris Pastoralis tuo muneri? an singula hæc observaveris? ut deinceps observes, & tuo satisfacias officio, curam & studiū adhibe, propositisq; teipsum obfirma.

PUNCTUM III. Audi ulteriora verba ejusdem Scripturæ: *Pascite, qui in vobis est, gregem DEI, facti forma gregis ex animo*: Et considera: à Pastoribus gregis Christi, hoc insuper exigi ut sint forma gregis ex animo, hoc est, ut in seipſis, vitâq; & moribus suis ostendant oves ipsis cõmissæ, quales ex eorū institutione, esse debeant? ut in seipſis ideâ ipsis exhibeant & efforment, cui se conformare debeant; ut, quod ore & prædicatione docent, id exemplo ostendant, doctrinæq; veritatem exemplo proprio declarant. Imitari debent primum & universalissimum Pastorem Christum, qui non contentus, quod suâ doctrinâ oves pasceret, etiam exemplo illas pavit. Hæc, inter alias, boni Pastoris proprietates, imò obligatio est, ut ante suas oves vadat, hoc est, bono exemplo illis præcat & præluceat. Nunquam efficacius perivadebit Pastor suis ovibus, ut viâ mandatorum DEI incedant, ut non declinent à femita Justitiæ, ut de virtute in virtutem proficiant, ut salutem animæ consequi studeant; quàm, si ipse primus, tanquam Dux suarum ovium, hæc viâ præverit, &

suo exēplo viā hanc ipsis ostenderit. Unde non immeritò quærit S. Gregorius. *Quomodo nos vitam corrigere valemus alienam, qui negligimus nostram?*

Doctrina quævis, quantumcunq; difficilis, non potest melius facilitari, quam exemplis; in his maximè elucet veritas. Doctrina Evangelica, Doctrina salutis, est doctrina difficilis; difficilè ab hominibus intelligi, & percipi potest, nisi ostendatur in exemplis; habet quidem Pastor gregis dominici, & habere potest in promptu, siue ipsius Christi, siue tot Sanctorum exempla, quæ suis ovibus proponat, quibus doctrinam Evangelij & suæ prædicationis declararet & ostendat; cæterum exempla, quæ audiuntur vel leguntur, non sunt ita efficacia ad persuadendum. Efficaciora longè sunt exempla, quæ conspiciuntur; idq; maximè efficacia sunt, quæ in ipso Pastore & propositæ veritatis magistro inveniuntur, quando, qui prædicat, opere ea complet, & exequitur, quæ prædicatione docet. Ex vita & moribus magistri, doctrina ejusdem de moribus, magnum pretium & æstimationem habet; de veritate illius minimè dubitatur, si ipse magister suæ doctrinæ multum fidat & tribuat, & reipsa ac factis doceat: suam Doctrinam, à se, pro vera & infallibili haberi.

Hinc non immeritò dicit D. Bernardus: *Boni sollicitiq; Pastores impinguare pecus non cessant bonis latiq; exemplis, & suis magis quam alienis; nam si alienis & non suis, ignominia est illis, & pecus ita non proficit, si enim, verbicausā, ego, qui videor inter vos Pastoris officium gerere, vobis exposuero Moysi mansuetudinem, misericordiam Samuelis, Davidis sanctitatem, immitis ipse, & impatiens, atque immisericors, & minime sanctus; sermo minus sapide eveniet, & vos minus avidè capietis.*

Ex his concludet: Pastorem bonum debere esse formam gregis ex animo. Ex animo inquam

ut, quæ in ipso virtutum & sanctimoniz exempla
foris elucet, non ficto animo fiant, non simulate,
non ad oculum, sed ex interno vero & sincero vir-
tutis amore, ut non exterius solum & in cute pate-
ant, sed in ipso animo, in charitate interna erga
DEUM & proximum, in corde fundamentum su-
amq; radicem habeant.

His consideratis, ad teipsum te converte, &
vide, an sis forma gregis tui ex animo? an merea-
ris titulum boni Pastoris, tuæq; obligationi satisfa-
cias? an virtutum tuarum exemplis doctrinam,
quam ovibus proponis, confirmes? an non dicetur
tibi aliquando! ô Pastor! ô Idolium! constitue fir-
miter, quod deinceps futurus sis forma gregis tui ex
animo, quod sis accuratissimè impleturus boni
Pastoris munus & officium.

Colloquium. Supplica humillimè Pastori opti-
mo Christo, ut, qui te ad Pastoralis muneris sortem
vocavit, bonum te Pastorem efficiat, Pastorem vi-
gilantem, pascentem gregem Domini cum fructu
& utilitate ipsius gregis, bono exemplo, & sanctâ
vitâ tuâ, ad omne bonum prælucentem ita, ut sis
forma gregis ex animo, ut te potenti suâ gratiâ sibi
conformem efficiat, quatenus per imitatio-
nem exemplorum & virtutum ipsius, bo-
num pastorem induas, ita enim fiet,
ut sis forma gregis ex animo.

In fine: anima Christi.



ERRATA CORRIGE

In intentione Authoris pag. 3. fac. 1. V. 4. cetiduo
excitiorum *Lege* octiduo exercitiorum

Ibidem pag. eadem & fac. V. 19. ipforum *Lege*
ipfarum

Ibidem pag. 6. fac. 1. V. 15. succinite *Lege*
succincte

Ibidem eadem pag. & facie V. 16. circa quæ
Lege circa quas

Ibidem pag. 6. facie 2. V. 13. alium vero *Lege*
alia vero.

Parte 1ma.

Pag. 9. V. 17. *felicitatatis* L. felicitatis

Pag. 11. V. ultimo *clari* L. dari

Pag. 12. V. 15. *betus* L. beatus

Eadem pag. V. 28. *liberate* L. libertate

Pag. 20 V. 19. *temperantia* L. temperantia

Pag. 21. V. 1. *onitas* L. bonitas

Pag. 24. V. 29. *reveretatur* L. revereatur

Pag. 28. V. 8. *totâ hac pœna gravior est malitiæ*
peccati mortalis L. totâ hac pœna gravior
est malitia peccati

Pag. ead. V. 12. *mulplientur* L. multiplicentur

Pag. 32. V. 32. *divininis* L. divinis

Pag. 33. V. 33. *se abusus* L. es abusus

Pag. 49. V. 4. *deficiens* L. defectuosum. Ea-
dem pag. V. 5. *participionem* L. particellam

Pag. 58. V. 4. *consuggam* L. consurgam

Pag. 62. V. 31. *Sprutum* L. Spiritum

Pag. 64. V. 18. *pœnitecham* L. pœnitentiam

Pag. 90. V. 18. *precipituri* L. præcipitari

Pag. 95. V. ultimo *ppfinarum* L. pœnarum

Vitio typi locò signi paginæ 100. positum signum
pag. 90. & tota decas numeri iterum repetitur

Itaq; pagina 95. 2do notatâ V. 9. *ll-et* L. licet


Pag. 128. V. *habebis* L. habebis


Pag. 131. V. 10. *ilia* L. illa


Pag. 133. V. 16. *apprvriando* L. appropriando


Pag. 152.	V. 20.	<i>flagellis</i>	L. <i>flagellis</i>
Pag. 154.	V. 4.	<i>secundum</i>	L. <i>secundum</i>
Pag. 157.		<i>conformi</i>	L. <i>conformi</i>
Pag. 158.	V.	<i>ultimo ambusa</i>	L. <i>ambula</i>
Pag. 175.		<i>profectus</i>	L. <i>perfectus</i>
Pag. 184.	V.	<i>pacis</i>	L. <i>pazzis</i>
Pag. 188.	V. 17.	<i>invivat</i>	L. <i>invitat</i>
Pag. 229.	V. 32.	<i>xardescit</i>	L. <i>exardescit</i>
Pag. 243.	V. 32.	<i>genicus</i>	L. <i>gente</i>
Pag. 246.	V. 35.	<i>filium</i>	L. <i>filum</i>
Pag. 277.	V. 34.	<i>habueonit</i>	L. <i>habuerinr</i>
Pag. 284.	V. 6.	<i>multa me multa</i>	L. <i>multa me</i>
		<i>mala</i>	
Pag. 309.	V. 18.	<i>ara</i>	L. <i>arca</i>
Pag. 311.	V. 12.	<i>vita</i>	L. <i>via</i>
Pag. 319.	V. 14.	<i>stauts</i>	L. <i>status</i>
Pag. 320.	V. 30.	<i>va</i>	L. <i>quæ</i>
Pag. 339.	V. 4.	<i>dimiltunt</i>	L. <i>dimittunt</i>
Pag. 340.		<i>astum</i>	L. <i>statum</i>





















meditationes